


# Mokilese Bible



Matthew and Mark in the Mokilese language of Micronesia

**Mokilese Bible**  
**Matthew and Mark in the Mokilese language of Micronesia**

Copyright © 2019 Mokilese Bible Translation Committee

Language: Mwoakilloa (Mokilese)

This is a draft translation. Please check back often for updates at <https://eBible.org/mkj/>.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2023-12-19

---

PDF generated using Haiola and XeLaTeX on 19 Dec 2023 from source files dated 19 Dec 2023  
4097fd30-31ee-5fdc-8d01-bc0facef348a

## Contents

Matthew . . . . .	1
Mark . . . . .	48
LUK . . . . .	79
John . . . . .	129
Rome . . . . .	167

## **Rongmwehu ma ne insingdi jang ipen Matthew**

### *Oarlap in Puk oauwe*

*Rongmwehu in Matthew* sikoah doahroar Jounkoamoaur ma inoau poa ne wihwiawin nen Kadehde Mering; doari, doahroar Koahs ih kapwaihahda ah inoau oang nah armaj kan, jaudihoar oang mihn Jew kan nen anjoauwo ma Jesus minmine ipasai, apel oang sohn jampah ohroj.

Sikesikin *Rongmwehu in Matthew* ma inenin joanmwehu. Ih sapkihda sikesik in noaisikdihn Jesus, a doaula sikoahda doahroar Jesus ah poapdaijla apel oalao jongjong ipen Jehsen, apel doahroar ah doadoahk nehn Galilee; doari, doadoahk in kapahrakki Rongmwehu, apel kihda padahk oang armaj ohroj, apel kemwehuwihla johmwehu kan. Mwerin mehpwiai Matthew ken doaula siksikoa doahroar en Jesus injang Galilee pwa en jeiloaklahng Jerusalem, apel doahroar wihwia kan ma pwoaida in kadoarieklahn wihk ma ih mohmohmourki pohn jampah. In imwla ih ken kadoarihkihla loklok, mehdi apel iejdahn Jounkoamoaur.

Oau irair ma janjal mehlel nehn *Rongmwehu in Matthew*, ioar kajanjaldahn Jesus doahroar jounpadahk laplap men, ma anki manman en kawoahwoahda Kojonned in Koahs, apel ma kin padahkihwe doahroar Wein Koahs. Nehn pukkoauwe ah padahk kin nehnepijoang wiahda irair limoau in doahroar me: (1) kapahrak pohn dollo, ma kajalehda mourin arai kan ma uhdahn sohn Wein Koahs, pel irai pwukoa kan, kapai kan, apel kahrpoan irai mour (iroa koalik 5-7); (2) kaweidpen sohn doadoahk eijek roahmenno oang in poaroan ma ih kioang irai (iroa koalik 10); (3) karajraj doahroar Wein nehnloange (iroa koalik 13); (4) padahk doahroar woahwoahn wiahla sohn padahk in Jesus (iroa koalik 18); (5) padahk doahroar imwlahn irair in anjoau oauwe apel doahroar pwurdohn Wein Koahs (iroa koalik 24-25).

### **Audoapoa in Oarlap**

Doahroar iroakdihn kadaudok apel noaisikdihn Jesus Christ 1.2—2.23

Doahroar en John jounpoapdaij ah kapahrak kan. 3.1-12

Jesus poapdaijla ipen John apel oalao jongjong pehn Jehsen 3.13—4.11

En Jesus doadoahk nen Galilee 4.12—18.35

Jesus injang Galilee inlahng Jerusalem 19.1—20.34

Kadoarieklahn wihk ma ih mohmohmourki nehn Jerusalem apel ipen Jerusalem 21.1—27.66

Koahunno iejda apel pwokkoang nah sohnpadahkkok 28.1-20

### *Iroakdihn dihkan ma lel Jesus*

<sup>1</sup> Iroakdihn dihkan ma lel Jesus Christ kadaudok in David, kadaudok in Abraham:

<sup>2</sup> Abraham ioar jemen Isaac, Isaac jemen Jacob, Jacob jemen Judah pel riahkan.

<sup>3</sup> Judah ioar jemen Perez apel Zerach, ma inanki Tamar, Perez ioar jemen Hezron, Hezron jemen Ram, <sup>4</sup> Ram jemen Amminadab; Amminadab jemen Nahshon; Nahshon jemen Salmon; <sup>5</sup> Salmon jemen Boaz (ma inanki Rahab); Boaz jemen Obed (ma inanki Ruth); Obed jemen Jesse; <sup>6</sup> Jesse ioar jemen Nahmwarki David.

David ioar jemen Solomon, ma inanki pahien Uriah. <sup>7</sup> Solomon jemen Rehoboam, Rehoboam ma jemen Abijah, Abijah jemen Asa, <sup>8</sup> Asa jemen Jehoshaphat, Jehoshaphat jemen Jehoram, Jehoram jemen Uzziah <sup>9</sup> Uzziah jemen Jotham, Jotham jemen Ahaz, Ahaz jemen Hezekiah, <sup>10</sup> Hezekiah jemen Manasseh, Manasseh jemen Amon, Amon

jemen Josiah, <sup>11</sup> Josiah jemen Jechoniah pel riahkan nehn anjoauwo irai kaliplipla Babylon.

<sup>12</sup> Mwerin kaliplipla Babylon: Jechoniah ioar jemen Shealtiel, Shealtiel jemen Zerubbabel, <sup>13</sup> Zerubbabel jemen Abiud, Abiud jemen Eliakim, Eliakim jemen Azor, <sup>14</sup> Azor jemen Zadok, Zadok jemen Achim, Achim jemen Eliud, <sup>15</sup> Eliud jemen Eleazar, Eleazar jemen Matthan, Matthan jemen Jacob, <sup>16</sup> Jacob jemen Joseph, pahien Mary, ma noaisikihdi Jesus, ma adanki Christ.

<sup>17</sup> Ohroj ma insingdi me ioar di eijek pahu jang Abraham lel David, di eijek pahu jang David lel kalipliplahng Babylon, di eijek pahu jang kalipliplahng Babylon lel Christ.

### *Doahr Noaisikihdi Jesus Christ*

<sup>18</sup> Me ioar mwomwen en Jesus Christ noaisikdi: Ah nohno Mary inoauwen pwoapwoaud oang Joseph, a mwohn ara paspene, diarekda pwa ih lijaian jang Ngen Joarwi. <sup>19</sup> A Joseph nehn ah wia woal lelpoak apel pwung men johpwa nimen koauwehla oadoan Mary mwohn armaj kan, lemehda pwa ih en mweijang ih in rir. <sup>20</sup> A mwerin ah lemehda me, Sohnloang in Koaunno men pwokkoang ih nehn ah oarmoan pwehng ih, "Joseph nihn David, joah mijik in oaloo Mary wiahkihla pahioamw, pwa dahkij ih lijaiankihda jang Ngen Joarwi. <sup>21</sup> Ih pirin noaisikihdi jermwein men, koawoa en kioang oadoda Jesus\*, pwa Ih pirin doarohla Nah armaj jang nehn diparaihok."

<sup>22</sup> Mehpwiai ohroj wiawi pwa en pwoaida da ma Koaunno pwa jang ipen joukohppo,

<sup>23</sup> "Meipwonno pirin lijaianda, noaisikihdi jermwein men, ma irai pirin kioang oadoda Emmanuel," (woahwoahki "Koahs pwilpwili kisai").

<sup>24</sup> Nehn en Joseph pwohrda ih wia da Sohnloang in Koaunno pwehng ih. Ih ken oaloo Mary painkihla. <sup>25</sup> Joseph johpwa suhwoang Mary in palwar oaroh liho noaisikihdi nah jermweinno. Ih kioang oadoda Jesus.

## 2

### *Waal loalkoanngok jang palimese*

<sup>1</sup> Mwerin en Jesus noaisikdi nehn Bethlehem wein Judea, nehn mwein Nahmwarki Herod; waal loalkoanngok jang palimese indoa Jerusalem <sup>2</sup> kalkalelpoak wija ma Jeri siksikko noaisikdi mine, nahmwarkihn mihn Jew kan. Irai pwa, "Kamai kapangda Ah ujuhwo palimese in loanngae ioar kamai indoahng pwongi Ih."

<sup>3</sup> Nehn en Nahmwarki Herod rongda me, ih jalohkihda pwilihkihoar Sohn Jerusalem ohroj. <sup>4</sup> Ih panginpene Jamwrou laplappok apel jounpadahk in kojonnedok, ih kalelpoak iparai "Ia wija Messiah pirin noaisikdi?"

<sup>5</sup> Irai japoang pwa, "Nehn Bethlehem nehn wein Judea, pwa ioar mehwa joukohppo insingehdi:

<sup>6</sup> 'Koawoa, Bethlehem, nehn wein Judah, jaudi koawoa, keiou siksik nehn pwungen koaun in Judah kan, pwa jang ipoamw emen koaun pirin indoa ma pirin apwali noai armaj in Israel kan.' "

<sup>7</sup> Doar Herod kapokonihpene in rir waal loalkoanngok pwa ih en woahwoahkihda ngehd uhdahn anjoauwo ujuhwo pwokda, <sup>8</sup> ih kadarla irai Bethlehem pwehng irai,

\* **1:21** Addoauwe Jesus woahwoahki "Koaunno koamoaurla."

“Alwe rapahki mwehu jeriho. Ma kamwai kapangda Ih, kamwai pakairkihdohng ngoahi, pwa ngoahi en pel pwili alwe pwongi Ih.”

<sup>9</sup> Mwerin irai rong mehpiwai irai ken dauluhlla; a ujuhwa ma irai kapang palimese in loange pel pwuroahng pwokda kahlwa irai oaroh lel wijahu ma jeriho mine.

<sup>10</sup> Anjoauwo irai kapangda ujuhwo, irai inenin malauda. <sup>11</sup> Nehn irai dilda nehn ummwo kapangda Jeriho apel Ah nohnohu, Mary, irai poadpwomwla pwongi Ih. Doar irai kihda irai kijakij kajampwallok kijakijkihoang Ih kohl, frankincense pel myrrh.

<sup>12</sup> Anjoauwo irai japhallahng nehn arai wei, irai wud nehn apas al sohrohr pwa Koahs ne kaperki irai nehn oau oarmoan pwa irai en joah pwurla ipen Herod.

### *Kaula Egypt*

<sup>13</sup> Nehn irai ne inla, sohnloang in Koainno men pwokkoang Joseph nehn ah oarmoan. Sohnloango pwehng ih, “Pwohrda oaloo jerihen pwilihki inahu kaukihdiha ara Egypt. Mine oaroh ngoahi kapwa pwehng koawoa, ngehd kamwai en japhaldo, pwa Herod raparahki jerihen pwa ih en kojukdi.”

<sup>14</sup> Inpwongohr Joseph pwohrda oaloo jeriho pwilihki inahu irai inla Egypt, <sup>15</sup> mine o oaroh lel en Herod mehdi.

Me ne kapwaihahda dahkij ma Koainno ne pwa jang ipen joukohppo, “Ngoahi pangin noai jermweinno jang Egypt.”

### *Kojkojdih jerihkan*

<sup>16</sup> Nehn en Herod kidalda pwa woal loalkoangok ne kapweipweidi ih, ih inenin lioas. Ih ruwojla pwa jeri woal ohroj ma mahki johnpar riau apel pehnangin ma minmine nehn Bethlehem apel kahnihmw ohroj ma koaroonoang en kojkojdi; me jang in ah rong jang pwihnin woal loalkoangok sabin irai kapangda ujuhwo.

<sup>17</sup> Me ne pwoaida dahkij joukohp Jeremiah kohpda:

<sup>18</sup> “Ngilloau indoa joang nehn Ramah,  
ngilen joang koalik,  
Rachel ma joangjoangjoangki nah jerihok,  
johpwa nimen injenmwahula,  
pwa jerihok ne mehdi.”

### *Japhalla Nazareth*

<sup>19</sup> Mwerin Herod mehdi, sohnloang en Koainno men pwuroahng pwokkoang Joseph nehn ah oarmoan nehn Egypt, <sup>20</sup> “Pwohrda,” Sohnloango pwehng ih, “oaloo jerihen apel inahn kamwai japhalla Israel, pwa irai ma jongjong in kojukdi jerihen ne mehdi.” <sup>21</sup> Joseph pwohrda, oaloo jeriho apel inahu japhalla Israel.

<sup>22</sup> A nehn ah kidalda pwa Archelaus nihn Herod, koain kapwin Judea ioar ih mijikin inla o. Mwerin ah ne pel oaloo kaweid nehn ah oarmoanno, ih inla nehn wein Galilee. <sup>23</sup> Peneineiho inla koaujoanla nehn kahnihmw oau adanki Nazareth. Me ne pel pwoaida dahkij ma joukohppok ne kohpda: “Ih pirin wiahla mihn Nazareth.”

## 3

### *John Jounpoapdaj Koainopda Al*

<sup>1</sup> Nehn rehn pwiok John jounpoapdaj indoa padpadahk nehn japwsoahn in Judea, <sup>2</sup> ih pwa, “Kamwai koluhla pwa Wein nehnloange\* ne koaroono.” <sup>3</sup> John ioar woalwa ma joukohppa Isaiiah pwa:

“Ngilloau ma kin poangpoangpoang nehn japwsoahn:

\* **3:2** Wein nehnloange Mihn Jew kan mehj kin inenin mijikin pwa ke insinge oadoan Koahs, ioar kahrehda Matthew kin insingehdi “Wein nehnloange” ah mehlein lal pwiai ioar “wein Koahs”

'Kamwai koaunopda alin Koaunno,  
kamwai kainenehla Ah al kan ma Ih pirin alu loaloa!' "

<sup>4</sup> En John likkoauwok wiawihda jang winen kamel, ih kangirki kilin kahu nen lopkoa. Kanah mwinge ioar padda apel jukehn loanglap in nehn woallo. <sup>5</sup> Armaj jang Jerusalem, jang koujapw ohroj nehn wein Judea apel wijahkan ohroj koaroannoang Pillap Jordan indoa pwa, <sup>6</sup> irai en woahkda diparai kan, a ih poapdaijihla irai nehn Pillap Jordan.

<sup>7</sup> A nehn a kapang dirin Pharisee apel Sadducee allaluhdo ipoa pwa en poapdaij, ih pwehng irai, "Kamwai sinekpwi, inje pwehng kamwai pwa kamwai kak pisjang koaloklok in Koahs ma nimenoar lel kamwai? <sup>8</sup> Kamwai wiahda siahk kan ma pirin kajalehda amwai ne koluhla apel wiliakapwla. <sup>9</sup> Kamwai joah lemleme pwa kamwai nen kak pisjang koaloklok pwa kamwai kadaudokin Abraham. Ngoahi pwehng kamwai pwa Koahs kakkoar wiahda nihn Abraham jeri jang in sakai pwiai! <sup>10</sup> Jiloahu ne onopdahng poaloahdi sipin suhkoa ohroj ma johkin kihda wah mwehu, en poalpoaldi peidekla nehn oaiho. <sup>11</sup> Ngoahi poapdaijihki kamwai pil pwa en kajalehda amwai koluhla, a Ih ma pirin indoa mwerin ngoahi pirin poapdaijihki kamwai Ngen Joarwi apel oai. Ih inenin laplapjang ngoahi; ngoahi johpwa warroang wa Ah sandellok. <sup>12</sup> Ih kol nah poahkko, onopdahng pwa en kasohrohripijoang liporrohn wihd kan jang in kilinnok. Ih pirin nekidla wah kan nehn johkoku, a okojla kilinnok nehn oaiho ma johkak kunla."

### *En Jesus Poapdaijla*

<sup>13</sup> Jesus ken injang Galilee inla Pillap Jordan pwa en poapdaijla ipen John. <sup>14</sup> A John jong en kauhdi, pwehng Ih, "Ngoahi anahne koawoa en poapdaiji ngoahi, a koawoa ken indoa ipoai?"

<sup>15</sup> Jesus japoang, "Joah kauhdi, pwa ioar koajoandi wa me, pwa ioar ma koanoahng kisa kapwaihahda kupwur en Koahs." John ken pwungkihla.

<sup>16</sup> Jesus ken poapdaijla, Ih doauda jang nehn pillo; anjoauwo nehnloange risda, Ih kapang Ngenin Koahs indihdo in mwomwen mwurei men jokdi pohn Ih. <sup>17</sup> Ngilloau jang nehnloange pwa, "Me ioar noai jermwein kajampwalwa, ma Ngoahi keiou ipwilki."

## 4

### *En Jesus Kajongjong*

<sup>1</sup> Ngen Joarwi kahlwahla Jesus nehn japwsoahn pwa en kajongjong ipen Jehsen. <sup>2</sup> Mwerin Ah joah mwinge rehn pahijek pel pwong pahijek, Ih mwakohkohla. <sup>3</sup> John Kajongjonngo indoa pwehng Ih, "Ma koawoa nihn Koahs, pwehng sakai pwiai en wiahla pilahwa."

<sup>4</sup> Jesus japoang, "Ne insingdi nehn puk joarwi: 'Jaudi pilahwahr doari armaj kak mourki pwa lalkan ohroj ma kin indoa jang ipen Koahs.' "

<sup>5</sup> Jehsenno ukla Ih nehn Jerusalem, kahnihmw joarwiho, kihdi oang Ih pohn koadkoan Umw Joarwiho, <sup>6</sup> pwehng Ih, "Ma koawoa nihn Koahs, lujdihwe pwa ne insingdi nehn Puk Joarwi:

'Ih pirin ruwoj nah sohnloanngok doahr koawoa,  
irai pirin kolkihda koawoa poahrai  
pwa ehmmwen kan en joah ohla pohn sakai.' "

<sup>7</sup> Jesus japoang ih, "Ne pel insingdi: 'Joah kajongjongi Koaunno oamw Koahs.' "

<sup>8</sup> Jehsenno pel ukdahla Ih pohn dol illoahioau, kajalehng Ih wein jampah ohroj apel doahr ahr ling. <sup>9</sup> Jehsen pwehng Jesus, "Mehpwiai ohroj ngoahi pirin kioang koawoa, ma koawoa rukdi pwongi ngoahi."

<sup>10</sup> Jesus pwehng ih, “Alwe jang Ngoahi, Jehsen! Pwa ne pel insingdi, ‘Pwongi Koounno oamw Koahs, papah Ih kalahpwuk.’ ”

<sup>11</sup> Doari Jehsenno injang Ih, a sohnloanngok indoa jeuweje Ih.

### *Jesus sapda padahk*

<sup>12</sup> Anjoauwo ma Jesus rongda pwa John ne mine nehn kalpwuhj, Ih pwurla Galilee. <sup>13</sup> Ih joah koaujoan nehn Nazareth, Ih inla wud mine Capernaum, ipen jed in Galilee, nehn wein Zebulun apel Naphtali. <sup>14</sup> Me wiawi pwa en kapwaihahda kokohp en Isaiah:

<sup>15</sup> “Nehn wein Zebulun apel Naphtali,  
ipen jeddo, oaloap Pillap Jordan,  
nehn Galilee wija ma mihn likin dir mine!

<sup>16</sup> Armaj ma mine nehn ros pirin kapang maram koalik oau. Araihoek ma mine nehn japw ros apel mehdi, marammo pirin dakarda.”

<sup>17</sup> Jang anjoauwo inla Jesus sapda padahk, “Wikjang dipamwai kan, pwa Wein nehnloanng ne koaroando.”

### *Jesus Pangin Sohnloakjid pahmen*

<sup>18</sup> Rehn oau Jesus allaluhla pohn poahrinjedin Galilee Ih kapangda riari oau, Simon ma pel adanki Peter apel riah Andrew. Ara loakloakjidki nihra ukko nehn jeddo, pwa ara sohnloakjid roahmen. <sup>19</sup> Jesus pwehng ara, “Kamwa indoa pwilihla Ngoahi, a Ngoahi pirin wiahkihla kamwa sohnloakjidi armaj.” <sup>20</sup> Anjoauwohr ara kihdi nihra ukko pwilihla Ih.

<sup>21</sup> Pel aluhla ekij Ih kapangda pel oau riari, James apel John, nihn Zebedee, mwindi nehn wararai pohsso pwili ara pahpa Zebedee, winwina nihrai ukkok. Ih pangin ara en pel indoa. <sup>22</sup> Anjoauwohr ara kihdi pohsso apel ara pahpa, pwilihla Ih.

### *Jesus Kemwehuwihla johmwehu*

<sup>23</sup> Jesus allaluhjili nehn Galilee ohroj, padpadahk nehn jinakoke kan, padpadahkki doahr Rongmwewuin Weiho, kemwehuwihla joangoan johmwehu ohroj ipen armaj kan. <sup>24</sup> Rongin Ih lel wija ohroj nehn Syria, armaj kan wahdohng Ih ohroj ma johmwehuki joangoangoan johmwehu, irai kan ma anki moadoak koalik, irai kan ma ngen jaus diloang loaloo, pel irai kan ma anki epilepsi apel mwoasor — Ih kemwehuwihla ohroj. <sup>25</sup> Pokon koalik pwilihla Ih wija ma Ih inla — armaj jang Galilee, jang Decapolis, jang Jerusalem, jang ohroj Judea, apel jang palimese in Pillap Jordan.

## 5

### *Padahk in Pohn Dol*

<sup>1</sup> Nehn en Jesus kapangda pokonno, Ih indahla pohn dol oau mwindi; Nah sohnpadahkkok pokondo Ipoa. <sup>2</sup> Ih ken sapda padahki irai pwa:

### *Pai mehlel*

<sup>3</sup> “Meid pai irai kan ma anahne ngen,  
pwa irai pirin johjohki Wein nehnloanng.

<sup>4</sup> Meid pai irai kan ma joang,  
pwa Koahs pirin kainjenmwahuwihla irai.

<sup>5</sup> Meid pai irai kan ma aksiksik,  
pwa irai pirin johjohki jampah.

<sup>6</sup> Meid pai irai kan ma kin ngoangki me pwung,  
pwa Koahs pirin kaisarihla irai.

<sup>7</sup> Meid pai irai ma kin kadek,



pwa irai pel pirin diar kadek.

<sup>8</sup> Meid pai irai ma mwakelkel nehn mohngiongirai,  
pwa irai pirin kapang Koahs.

<sup>9</sup> Meid pai irai ma kin wihwia doadoahk in kamwahu nehn pwungen armaj kan,  
pwa irai pirin adanki jerihn Koahs.

<sup>10</sup> Meid pai irai ma kin loklokki pwung jang in irai mohmohmourki Koahs,  
pwa irai pirin anki Wein nehnloange.

<sup>11</sup> “Meid pai kamwai ma armaj lahlahwe, apel koalkoa kamwai, apel karaunihki kamwai joang likamw apel japwung ohroj pwa Ngoahi. <sup>12</sup> Kamwai injenmwahu apel malau pwa kijakij koalik joujowi kamwai nehnloange, pwa ioar pel joangwahr irai wiahng joukohppok mwohn kamwai.”

### *Jed apel Maram*

<sup>13</sup> “Kamwai ioar jed in jampah. A ma nimen jeddo johla nime, joh mehkij kak en wiawihwang pwa en pwuroahng minehda nime. Johla kaspoan jeddo, ioarroar en kerpwihekla pwa armaj kan en alu puwoa.

<sup>14</sup> “Kamwai ioar maram in jampah. Kahnimw oau ma mine pohn dol oau johkak oakkoakla. <sup>15</sup> Armaj pel johkak okojda lahm oau kioang pehn pwohl oau. A irai en kioang pohn dohياهو pwa en kamarami ohroj nehn ummwo. <sup>16</sup> En pel doahr amwai maram en janjalda mwohn armaj, pwa irai en kapang amwai wihwia mwehu kan apel kapngahki Jamamwai nehnloange.”

### *Padahki doahr Kojonned*

<sup>17</sup> “Joah lemleme pwa ngoahi indoahng koauwehla Kojonned in Moses ke pel padahk in Joukohppok; Ngoahi joah indoahng koauwehla arai padahk kan, a Ngoahi indoahng kapwaihahda. <sup>18</sup> Ngoahi pwehng kamwai in mehlel, ma nehnloange apel jampah johla, insing siksik oau ke mwei siksik kij in Kojonneddo johkak joaloangla oaroh audoapoa ohroj en pwoaida. <sup>19</sup> Emen ma koauwehla oau in kojoneddok, mihndahr ma kojonedwahr ma keiou siksik apel padahkihoang epwi en pel wia doahroar, pirin keiou siksik nehn Wein nehnloange. A inje ma kin kapwaihahda apel padahkki kojoned pwiai pirin laplap nehn Wein nehnloange. <sup>20</sup> Ngoahi pwehng kamwai, ma amwai wihwia mwehu joah mwehu jang en jounpadahk in Kojonned apel Pharisee-ok kamwai uhdahn johkak dilda nehn Wein nehnloange.”

### *Kojarmaj*

<sup>21</sup> “Kamwai ne rong padahkkok ma mihn mehjjok oaloo, ‘Joah kojukdi armaj; emen ma kojukdi armaj pirin lelloang kadeik.’ <sup>22</sup> A Ngoahi pwehng kamwai: emen ma lioas oang riah pirin lelloang kadeik. Pel oau, emen ma pwehng rياهو, ‘Pweipwei men koawoa,’ pirin pel wijikla mwohn Mwoalen Koapwung. A emen ma pwa, ‘Koawoa Iahk!’ ih kak lel oang nehn keper in oaiho nehn ehl. <sup>23</sup> Ma koawoa wia oamw meiroang in mwoallo a koawoa samanda pwa rioamw men injinjuwed oang koawoa, <sup>24</sup> kihdi oamw meiroanngo ipen mwoallo. Inla koapwungla nehn pwungamwa, japahldo wia oamw meiroanngo.

<sup>25</sup> “Ma mine emen pirin wahlahng koawoa nen mwoalen koapwung, pispis koajoanehdi nehn pwungamwa mwohn ah wahla koawoa ipen jounkoapwung kan, doar koawoa ken wijikla nehn kalpwuhj. <sup>26</sup> Ngoahi pwehng koawoa in mehlel, koawoa johkak pislal oaroh ngehd koawoa en dupukla pwaipwanid ohroj.”

### *Kamwahl*

<sup>27</sup> “Kamwai ne rong padahk paso, ‘Joah kamwahl.’ <sup>28</sup> A apkas Ngoahi pwehng kamwai emen ma kapang lihmen apel mwewukihda, ih ne kamwahl nehn mohngiongjin. <sup>29</sup> Ma mijoammwen loap kidal kioang koawoa nen dihp, dipoaljang

kerpwihla. Ma ekij in palwoaroamwen kerpwihekla mwehujang ma palwoaroamwen ohroj kerpwihekla nehn ehl. <sup>30</sup> A ma loap kidal kahrehng koawoa en wia dihp, poaloahjang kerpwihla. Mwehuwoang koawoa en luhjjang ekij in palwoaroamwen jang palwoaroamwen ohroj en kerpwihekla nehn ehl.”

### *Mweipijoang (in pwoapwoaud)*

<sup>31</sup> “Kamwai ne kidal da kojoneddo pwa, ‘Emen ma mweijang pahioahu en kioang ih kijinlikoau in kamweid.’ <sup>32</sup> A Ngoahi pwehng kamwai, ma woalmen mweijang pahioa, jang in kahrpoahioau likin kamwahl, ih ne kahrehioang liho nehn kamwahl ma ih pwuroahng pwoapwoaudla; a ma emen woal painkihda liho, ih ne mine nehn dipen kamwahl.”

### *Kahula*

<sup>33</sup> “Kamwai ne rong da ma ne pweiekkooang mihn mehjjok. ‘Joah koauwehla oamw kahula, a kolkol oamw inoau oang Koaunno.’ <sup>34</sup> A ngoahi pwehng kamwai, Joah kahula mwahl. Joah kahukihla nehnloanngge pwa ioar mwoalen Koahs wa. <sup>35</sup> Joah pel kahukihla ke jampah pwa ioar dohn ehn wa; ke Jerusalem pwa ioar kahnihmw in Nahmwarki Laplap. <sup>36</sup> Pel joah kahukihla moangoammwen, pwa koawoa johkak wiahng apas pisen moang en korohrohla ke soalla. <sup>37</sup> Amwai sikesik en kin mine in ‘Eh’ ke ‘Joah’; a ma daulihla a kin sapjang ipen me juweddo.”

### *Pwoaroan maj oau oang Pwoaroan maj oau*

<sup>38</sup> “Kamwai ne pel rong pwa. ‘Pwoaroan maj oau dupukki pwoaroan maj oau, a ngihpas dupukki ngihpas.’ <sup>39</sup> A Ngoahi pwehng kamwai, kamwai en joah pallan armaj men. Ma emen pokihdi joapoamwen loap moaun, pel kioang ih oaloap. <sup>40</sup> A ma emen panglahng koawoa mwoal en koapwung en kihjang oamw jehsso, pel kioang ih oamw joakidden. <sup>41</sup> Ma emen ipong oang koawoa en alu ki mwail oau, a koawoa en pwili aluhkihla mwail riau. <sup>42</sup> Ma emen poaki koawoa mehki koawoa mweidoahng, ma emen poaki koawoa mehki pwa ih en kajpahlihdo mwuhr pel mweidoahng.”

### *Ipwilki Imwinsihsi*

<sup>43</sup> “Kamwai ne pel rong Ih ne pwa, ‘Ipwilki mihn ipoamw’ a lioassoang oamw imwinsihsi. <sup>44</sup> A Ngoahi pwehng kamwai: Ipwilki amwai imwinsihsi kan apel kapkapki irai ma kin koalkoa kamwai, <sup>45</sup> pwa kamwai en kak wia jerihn Jamamwaiho nehnloanngge. Pwa Ih ma wiahng joauwo en dakda pohn me nauna apel pohn me mwehu, Ih kadardo wud pohn armaj pwung apel armaj japwung. <sup>46</sup> Ma kamwai ipwilki irai ma ipwilki kamwai, kijakij dahioau kamwai nen oaloo? Jounrik daksis kan joah kin pel wia doahroar? <sup>47</sup> Ma kamwai pel kajamwo rioamw kan oar doari, dahioau kamwai wia koalik jang epwi? Armaj rosros kan joah kin pel wia doahroar? <sup>48</sup> Kamwai en unjek doahroar Jamamwaiho nehnloanngge ma unjek.”

## 6

### *Kioang ih ma Anahne*

<sup>1</sup> “Kanaihoahng kamwai en joah wia pwa amwai wihwia mwehu kan en janjal mwohn armaj pwa irai en kapang kamwai. Ma kamwai wia me, nen joh amwai pwaj jang Jamamwaiho nehnloanngge.

<sup>2</sup> “Doari, nehn amwai pirin kijekioa emen ma anahne, joah kalohkihjili doahr mwalaun kan kin wia nehn jinakoke kan pel nehn al kan pwa armaj en kapnga. Ngoahi pwehng kamwai in mehleh, irai ne oaloo dupkoan irai doadoahk ohroj. <sup>3</sup> A nehn amwai en kijekioa emen ma anahne, joah mweidoahng loap jehjoa in poahmmwen en kidal da loap kidal wihwia, <sup>4</sup> pwa oamw kijakij en wiawi in rir. Doar oamw Pahpa, ma kin kapang mehkan ma kin wiawi in rir, pirin dupuk koawoa.”

*Kapkap*

<sup>5</sup> “Nehn amwai kin kapkap, joah wia doahr mwalaun, pwa irai kin perenki kapkap, uhda nehn jinako ke kan apel nehn koaimw in al kan pwa armaj en kapang. Ngoahi pwehng kamwai in mehlel, irai ne oaloe dupkoaraiwa pwon. <sup>6</sup> A nehn oamw en kapkap, inla nehn oamw perehu, risingdi wanihmmwo, koawoa kapkap oamw oamw Pahpa, ma koawoa joh kak kapang. Doar oamw Pahpa, ma kin kapang da ma wiawi in rir, pirin dupuk koawoa.

<sup>7</sup> “A nehn amwai kapkap, joah pwurur doahr armaj rosros kan, pwa irai kin lemleme pwa arai kohs kan nen rong irai pwa dir irai lallok. <sup>8</sup> Joah doahroar irai pwa Joamoammwo kidal da koawoa anahne mwohn oamw poaki Ih. <sup>9</sup> Doar me, ioar doahr oamw pirin kapkap:

‘Jamamai nehnloanng,

oadoammwen en joarwi,

<sup>10</sup> oamw wei en pwoaida,

injenoamw en wiawi pohn jampah doahroar nehnloanng.

<sup>11</sup> Kihdoa rehnnoauwe kanmai mwingehn oauwoau rehn.

<sup>12</sup> Mahkoahng kamai amai japwung kan,

doahroar amai kin mahkoahng irai kan ma wia japwung oamw kamai;

<sup>13</sup> joah kahlwahng kamai nehn jongjong,

kapisla kamai jang ipen ih ma naunahu.

[Oamw mwei ioarroar Mwei, Manman apel Lingwa allaluhla.

Amen.]’ \*

<sup>14</sup> “Pwa ma kamwai mahkoahng irai kan ma wia naunahng kamwai, Jamamwai nehnloanng pirin pel mahkoahng kamwai. <sup>15</sup> A ma kamwai johpwa mahkoahng arai japwung kan, Jamamwai nehnloanng pel jehpirin mahkoahng kamwai.”

*Kaijihjol*

<sup>16</sup> “Nehn amwai kin kaijihjol, kamwai joah wia mwomw doahroar mwalaunnok kin wia, pwa irai kawikla mwomwoarai en kajalehda pwa irai kaijihjol. Ngoahi pwehng kamwai in mehlel, irai ne oaloe dupkoarai. <sup>17</sup> A nehn oamw kaijihjol, salipla pel duhpla mijoammwen, <sup>18</sup> pwa en joah janjal oamw armaj pwa koawoa kaijihjol, a oamw oar Joamoamw, ma kisai johkak kapang, a joamoamw, ma kin kapang mehkan ma wiawi in rir, pirin dupuk koawoa.”

*Pai nehnloanng*

<sup>19</sup> “Joah nekidpene oamw pein koawoa oamw pai kan nehn jampah, wija woahd apel insahn pahrang koauwehla, pel jounpirap kan kak dilda pirapoahla. <sup>20</sup> A nekidpene oamw pai kan nehnloanng, wija woahd apel mer johkak koauwehla, apel jounpirap kan johkak dilda pirapoahla. <sup>21</sup> Pwa wija oamw pai kan mine, ioar mohngiongimmwen pel mine.”

*Mihn Joaroa Palwar*

<sup>22</sup> “Maj ioar lahm in palwar. Ma pwoaroan mijoammwen kan mwehu, palwoaroamwen nen dirin maram. <sup>23</sup> A ma pwoaroan mijoammwen kan nauna, palwoaroamwen nen pel ros. Doar ma marammo nehn koawoa ros, ia woahr koalikin rossoauwe!”

*Koahs apel Koapwoahn Jampah*

<sup>24</sup> “Joh emen kak papah koaun roahmen. Ih kakkoar lioassoang emen a ipwilki emen, ke ih nen poadidi oamw emen a mwamwahlki emen. Koawoa johkak papah Koahs apel mwani.

\* **6:13** Epwi Puk Joarwi, johpwa insingdi me loaloe.

25 “Ioar Ngoahi pwehngki kamwai, joah pwunodki amwai mour, da kamwai pirin kang ke nim; ke oang palwoaroamwaikan, da kamwai pirin likkoauki. Mour joah kajampwal jang mwinge? Ke palwar joah kajampwal jang likkoau? 26 Kapang mahnsang in nehn woahwoa kan: irai johkin poadok ke doli ke nekid nehn wehraus kan, a Jamamwaiho nehnloanngge kin kamwinge irai. Kamwai joah kajampwaljang irai? 27 Inje in kamwai jang in pwunod kak karoairoaihla ah mour awahioau?

28 “Mihnda kamwai pwunodki likkoau? Kamwai kapang kiepw in nehn japw kan, nehn irai kin koapkoapda; irai johkin doadoahk ke wiahda arai likkoau. 29 A Ngoahi pwehng kamwai pwa pel Solomon, nehn ah koapwoahpwoa johpwa kapwasda linginnuar mehpwai. 30 Ma ioar doahr en Koahs kapwasihda mo in nehn mohj kan, ma mine rehnnoauwe a lakapw nehn oaiho, ih joah nen kapwasihda kamwai mwehu jang? Ia woahr siksikin amwai pwojon! 31 Doari, joah pwunod, pwa, ‘Da kamain kang? Ke da kamain nim? Ke da kamain kol?’ 32 Armaj rosros kan kin raprapahki mehpwai, a jamamwaiho nehnloanngge kidal pwa kamwai anahne mehpwai. 33 Doar rapahki mijkoalkoal wein Koahs pel Ah pwung, a mehpwiak ohroj nen liklikkoang kamwai. 34 Doari, joah pwunodki lakapw, pwa lakapw kapwa pwen pwunodki pein ih. Johpwa anahne kapsahng apwal kan ma oauwoau rehn kan kin wahdo.”

## 7

### *Kadeiki Epwi*

1 “Joah kadeik armaj kan, pwa doar Koahs kadeikda kamwai. 2 Pwa Koahs nen kadeikda kamwai doahr kamwai kadeikda epwi, oh Ih nen jongki kamwai mihn jonngohr ma kamwai jongki epwi. 3 Amwda koawoa ke soahk dipoar siksik kij nehn mijen rioammwo a koawoa joah injinohki pwilein suhkoahn nehn mijoammwen? 4 Ia mwomwen oamw en kak pwehng rioammwen, ‘Menlau, mweidoahng ngoahi en kihjang dipoar siksik kij nehn mijoammwen,’ ma anjoauwohr pwilein suhkoahioau mine nehn mijoammwen? 5 Armaj likamw men koawoa, keiou kihjang pwilein suhkoa nehn mijoammwen pwa koawoa en kak kapang mwehu, koawoa en kak kihjang dipoar siksik nehn mijen rioammwo.

6 “Joah kioang doahk mehkij ma Joarwi; pwadoar ih pwurdo koahdi kamwai; kamwai joah kerpwihla nihmwai sakai kajampwal kan oang pij kan, pwa ioarroar irai nen wia siakpijoang.”

### *Poaki, Rapahki, Lesles*

7 “Poaki a kamwai pirin oaloo; Rapahki a kamwai pirin diar; lesles a wanihmmwo pirin risdahng kamwai. 8 Pwa inje ma poaki pirin oaloo; apel inje ma kin rapahki pirin diar; apel wanihmmwo pirin risdahng inje ma lesles. 9 Inje in kamwai ma nah jeri poaki pilahwa a ih kioang sakai? 10 Ke ma ih poaki mwumw a ih kioang sinek? 11 Ma nehn amwai nauna, kamwai kidal kioang nihmwai jerihkan kijakij mwehu, ia woahr mwehuwin kijakijjo Jamamwai nehnloanngge pirin kioang irai ma poaki Ih!

12 “Wiahng epwi da ma kamwai nimen irai en wiahng kamwai, pwa me oaroahpene Kojonned apel padahk in Joukohp kan.”

### *Wanihmw Soahsiksik pel Wanihmw Sahlaplap*

13 “Dilda nehn wanihmw Soahsiksik. Pwa wanihmmwo inlahng ehl pwen sahlaplap pel allo pwen koalik apel moangoai a armaj dir alu loaloo. 14 A wanihmmwo inlahng mour pwen soahsiksik, allo pwen apwal doar armaj jipid diarda.”

### *Suhkoa pas pel wehn suhkoahu*

15 “Kamwai mwajahni mwehu joukohp likamw kan. Irai indoa ipamwai in mwomwen jihpw, a loaloarai doahr wolf ingkelpwi. 16 Kamwai nehn kidalki arai wahrai kan. Kak armaj en doli grape jang suhkoa dokdok, ke fig jang suhkoa karak? 17 Suhkoa mwehu kihda wah mwehu, a suhkoa nauna kihda wah nauna. 18 A suhkoa mwehu pas johkak kihda wah nauna, a suhkoa nauna johkak kihda wah mwehu. 19 Suhkoa ohroj ma joah kihda wah mwehu pirin poalpoaldi kerpwihekla nehn oaiho. 20 Ioar, jang in wah kan kamwai nen kidalki joukohp likamw kan.”

### *Sohnpadahk Mehlel*

21 “Jaudi ohroj ma panginki Ngoahi, ‘Koaun, Koaun’ pirin dilda nehn Wein nehnloange, a araihokkoar ma kin kapwaihahda injenen Joamoaiho ma mine nehnloange. 22 Rehnin kadeikko armaj dir pirin pwehng Ngoahi, ‘Koaun, Koaun, jaudi kamai ma kin wia kokohp in oadoammwen, pel in oadoammwen kamai kin kaujjang ngen jaus pel wia joangoan manman dir?’ 23 A Ngoahi pirin pwehng irai, ‘Ngoahi jehjoa kamwai. Alwe jang ipoai, kamwai armaj nauna!’ ”

### *Sohn Kou Umw Roahmen*

24 “Doari emen ma kin rong Oai padahk kan apel peikkoang, ih doahroar woal loalkoanngo ma kouda umwahu pohn sakai. 25 Wuddo mwoardi, lapakehda, enngo koaldo pohk ummwo, a ih johpwa mwoardi, pwa ih poahjoanda pohn sakai.

26 “A emen ma rong Oai padahk kan a johpwa wia doahr woal pweipweiho ma kouda umwahu pohn pik. 27 Wuddo mwoardi, lapakehda, enngo pohk ummwo, ummwo kipla ripoadpoaddi.”

### *Manman en Jesus*

28 Nehn en Jesus ne doari Ah padahk, pokonno inenin pwuriamweikihla mehlel joangoan padahk oauwo, 29 pwa manman in Ah padahk johpwa doahroar en jounpadahk in Kojonneddok arai padahk.

## 8

### *Jesus kemwehuwihla woal Lepa men*

1 Nehn Ah indi jang pohn dollo pokon koalik oau pwilihdo Ih. 2 Woalmen johmwehu lepa indoa ipen Jesus, poadpwomwla pwehng Ih, “Maing, ma koawoa nimen, koawoa kak kamwkehda ngoahi\*.”

3 Jesus kailla poah pukkoang woallo, “Ngoahi nimen,” Ih pwehng ih, “Ken mwakelkelda!” Anjoauwohr woallo mwehula jang ah lepa. 4 Jesus pwehng woallo, “Kapang! Pwa koawoa en johpwa pwehng emen. Inla kajalehng jamwrou a koawoa wia oamw meiroang joango ma Moses koajoanehdi, en wia oamw mihn kadehde oang irai.”

### *Jesus kemwehuwihla en Koaun in Jounpei men ah lidu*

5 Nehn en Jesus lel Capernaum, koaun in jounpei men indoa ipoa, poaki jauwaj. 6 “Maing,” ih pwehng Ih, “noai lidu men mine in ummwo, mwoasorla apel inenin weiroak.”

7 Jesus pwehng woallo, “Ngoahi pirin inla kemwehuwihla ih.”

8 Koaun in jounpeiho pwehng Jesus, “Maing, ngoahi joah warroang Koawoa en indoa nehn umwoaiho. Pwen lalloar, ah noai liduhwo ne mwehula. 9 Pwa ngoahi pel anki manman pohn jounpei kan pehn ngoahi. Ngoahi kin pwehng emen, ‘inla,’ ih inla; a oang emen, ‘indoa,’ ih indoa. Ngoahi pwehng noai liduhwo, ‘Wia me,’ ih wia.”

\* 8:2 kamwkehda ngoahi Joangoan johmwehu oauwe kin kajaminihla armaj oang joarwi.

<sup>10</sup> Nehn en Jesus rong me, Ih pel pwuriamweikihla pwehng irai ma pwilpwili ih, “Ngoahi pwehng kamwai in mehlel, Ngoahi kahjik diar emen nehn Israel ma anki joangoan pwojon koalik doahr me. <sup>11</sup> Ngoahi pwehng kamwai pwa armaj dir pirin injang palimese apel palikapi, mwindi nehn dohiarai pwili Abraham, Isaac pel Jacob nehn Wein nehnloanng. <sup>12</sup> A sohn Weiho pirin kerpwihekla likin, oang nehn rosso, wija ma irai pirin joang apel keikeikeisakai.”

<sup>13</sup> Doari Jesus pwehng koaun in jounpeiho, “alwe in umwoammwo, da ma koawoa kamehlele en wiawi.”

Nah liduhwo mwehula anjoauwohr.

### *Jesus Kemwehuwihla Johmwehu dir*

<sup>14</sup> Anjoauwo Jesus lel nehn umwen Peter-o, Ih kidalda pwa inen pahien Peter-o johmwehu karkar. <sup>15</sup> Jesus koldi poahn liho, karkarro injang ipen liho; ih ken pwohrda sapda papah Ih.

<sup>16</sup> Injoausikdi, armaj dir ma ngen jaus sihda pohrai wijikdohng Jesus. Jesus kajroahjang ngen jaus iparai ki lal, apel kemwehuwihla ohroj ma johmwehu. <sup>17</sup> Me en kapwaihahda da me joukohp Isaijah pwa: “Ih oaloahda asai jasihkei kan pel wahda asai johmwehu kan.”

### *Dupkoan Pwilihla Jesus*

<sup>18</sup> Anjoauwo ma Jesus kapangda uhwen koalikin pokonnoauwo pwilpwili Ih, Ih pwehng nah sohnpadahkkok pwa irai en jeila oaloap jed in Galilee. <sup>19</sup> Jounpadahk in kojoneddo men indoa ipoa pwehng Ih, “Jounpadahk, ngoahi en pwili koawoa wija ohroj koawoa inla.”

<sup>20</sup> Jesus japoang, “Fox mine arai lipw, mahnsang kan mine arai paj, a Nihn-Armaj joh wija Ih en koammoaldi.”

<sup>21</sup> Emen sohnpadahk pel pwehng Ih, “Maing, mweidoahng ngoahi en inla jaripdi oai pahpahu mijkoalkoal, a ngoahi indoa pwilihla Koawoa.”

<sup>22</sup> A Jesus pwehng ih, “Pwili Ngoahi, a mweidoahng mehdi kan en jaripdi pein arai mehdi.”

### *Jesus Kamoaloiloaihdi Melmel*

<sup>23</sup> Jesus doaudahng nehn pohsso, Nah sohnpadahkkok pwili Ih. <sup>24</sup> Anjoauwohr melmel oau pwokda pohn jeddo, nohk jaujauwo nehn pohsso. A Jesus moair. <sup>25</sup> Sohnpadahkkok inla panginda Ih pwehng Ih, “Maing, doaroahla kisai! Kisain ken mehdi!”

<sup>26</sup> Ih japoang, “Siksik amwai pwojon, Amwda kamwai ke majpwehk.” Ih uhda ruwoje enngok apel nohk en uhdi, anjoauwohr melmello ken molundi.

<sup>27</sup> Sohnpadahkkok pwuriamweila, idoak nehn pwungarai, “Armaj dahmen me? Ma eng apel no kin peikkoang!”

### *Kemwehulahn Woal Roahmen ma Ngen Nauna Dilda Nehn Ara Mour*

<sup>28</sup> Anjoauwo ma Jesus lel oaloap jeddo, nehn koujapw in Gadara, woal roahmen suhwoang Ih ma indoa jang nehn joaujoauwok. Woal roahmen ne ma ngen jaus mine nehn ara inenin keper doar joh armaj kin wud nehn alloauwo. <sup>29</sup> Anjoauwohr ara wering Jesus pwehng Ih, “Koawoa Nihn Koahs, da koawoa nimen wiahng kama? Koawoa indoahng koalkoa kama mwohn anjoauwo?”

<sup>30</sup> Mine pwihnin pij koalik oau mwingmwinge joah dohla. <sup>31</sup> Ngen jaussok poaki Jesus, “Ma koawoa pirin kajroahla kamai, kadarla kamai nehn pwihnin pijjo.”

<sup>32</sup> “Inla!” Jesus pwehng irai. Doar irai ken inla dilloang nehn pijjok, nehn anjoauwohr pijjok kijoudihla duhla nehn pillo.



<sup>33</sup> Sohn apwali pijjok kaula inla nehn koaujoanno pwehng me ohroj, pwilihki da ma wiawihoang armajjok ma ngen jaussok mine pohra. <sup>34</sup> Sohn koaujoanno ohroj inlahng suhwoang Jesus. Anjoauwo irai suhwoang Ih, irai poaki Ih en injang nehn arai wijahu.

## 9

### *Jesus Kemwehuwihla Woal Mwoasor men*

<sup>1</sup> Jesus doaudahng pohn pohsso jeila oaloap jeddo, nehn Ah koaujoanno\*. <sup>2</sup> Woalpwih wahdohng Ih woal mwoasor men mine pohn rohp oau. Anjoauwo ma Jesus kapang arai pwojon, Ih pwehng woal mwoasorro, “**Koapwoarpwoar, noai jeri! Dipoamw kan ne lapwda.**”

<sup>3</sup> A epwi Jounpadahk in kojoneddok ma mine o lemlemehki pwa “Woal mene lahlahwe.”

<sup>4</sup> Jesus kidal arai lamlam, doar Ih ken pwa, “**Amwda kamwai ke lamlam nauna nehn mohngiongimwai kan?** <sup>5</sup> Ia minno moangoai, Ngoahi en pwa, ‘Dipoamw kan ne lapwda,’ ke, ‘Uhda alu?’ <sup>6</sup> A Ngoahi en kamehlele oang kamwai en kidal pwa Nihn-Armaj anki manmanin mahkoahng dihp pohn jampah.” Ih pwehng woal mwoasorro, “**Uhda, oaloe kioammwen koawoa inla nehn umwoammwo.**”

<sup>7</sup> Woallo ken uhda inla in umwahu. <sup>8</sup> Nehn en pokonno kapang me irai inenin majpwehkda; irai kapnga Koahs ma kioang armaj joangoan manman oauwo.

### *Jesus pangin Matthew*

<sup>9</sup> En Jesus injang o nehn Ah allaluhla, Ih kapangda woal men, adanki Matthew, jounrik daksis, ma onnonohn nehn ah oahpisso. Jesus pwehng ih, “**Pwilihla Ngoahi.**”

Doar ih ken uhda pwilihla Ih.

<sup>10</sup> Nehn en Jesus mwingmwinge nehn umwen Matthew-o, jounrik daksis apel armaj dipan dir indoa pel mwinge pwili Ih apel nah sohnpadahkkok. <sup>11</sup> Pharisee pwi kapang me pwehng nah sohnpadahkkok, “Amwda amwai Jounpadahkken ke pwili jounrik daksis pel armaj dipan kan mwinge?”

<sup>12</sup> Nehn Ah rongda me, Jesus pwa, “**Jaudi armaj sihkei ioar anahne jounwini, a armaj johmwehu.** <sup>13</sup> Inla woahwoahkihda woahwoahn mehkije jang nehn Puk Joarwi: ‘Ngoahi mwehuki kadek, jaudi meiroangin mahn.’ Ngoahi joah indoahng pangin armaj pwung, a armaj dipan kan.”

### *Peidekki doahr Kaijihjol*

<sup>14</sup> Doar nihn John jounpoapdaj sohnpadahkkok indoa idoak oang Jesus, “Amwda kamai apel Pharisee-ok kin dod amai kaijihjol a nihmw sohnpadahk kan ken johkin kaijihjol?”

<sup>15</sup> Jesus japoang, “**Imdoahr nihn woallo ma pirin koapwoapwoaud sohnkaparrok en injinjuwed ma ih minmine iparai? A oau anjoau ma pirin indoa ma woal kamwohddo pirin wijik jang irai; doari, ioar anjoauwo irai pirin kaijihjol.**

<sup>16</sup> “**Joh armaj kin doahng dipwin likkoau kapw kij in likkoau dehn oau, pwa dipwin likkoau kappwo nen pworpene doapwdoapwjang in likkoau merinngo, nehn kakoalikhla soahroakko.** <sup>17</sup> Joh armaj kin widekihoang wain kapw nehn dohn wain dehn. Pwa dohn wainno nen pwokpijoang, wainno widekla, dohn wainno ohla. Wain kapw en widekihoang nehn dohn wain kapw, a kapwa nekidekla.”

### *Jerpein Mehdi men apel Li Johmwehu men*

\* **9:1** nehn ah koaujoanno Capernaum (kapang 4:13)

<sup>18</sup> Nehn Ah pwahpwahpwa me, koaunin mihn Jew men indoa poadpwomwla mwohn Jesus pwehng Ih, “Noai jerpeinno kapwehsen mehdi. A indoa kioang poahmmwen puwoa, pwa ih en mourda.”

<sup>19</sup> Jesus uhda pwilihla ih, pwilihki nah sohnpadahkkok.

<sup>20</sup> Anjoauwo lihmen ma johmwewhuki insa koarkoar johnpar eijek riau indoa likinjarkin pukkoangdi imwin Ah likkoauwo. <sup>21</sup> Liho pwehng pein ih, “Ma ngoahi pwen kodurroar Ah likkoauwo, ngoahi nen mwehula.”

<sup>22</sup> Jesus jipwoalla pwehng ih, **“Koapwoarpwoar, Noai jerpein, oamw pwojon ne kasihkeida koawoa.”** Liho mwehula anjoauwohr.

<sup>23</sup> Anjoauwo ma Jesus dilda nehn umwen koaunno Ih kapang jounkoajoanngok apel armaj kan loakloakoa, <sup>24</sup> Ih pwehng irai, **“Kamwai dilla, jerpeinne johpwa mehdi, a ih moair.”** A irai uruhrki Ih.

<sup>25</sup> Mwerin armajjok dilla, Ih dilla loaloa koldi poahn jerpeinno, ih pwohrda. <sup>26</sup> Rong oauwe lohk pijoang nehn wija ohroj.

### *Jesus Kemwehuwihla Woal Majkun Roahmen*

<sup>27</sup> Jesus daudauluhla jang wijahu, woal majkun roahmen kaujla Ih, poangpoang, “Mahkoahng kama, nihn David!”

<sup>28</sup> Nehn Ah ne dilda nehn umw, woal majkunnok indoa Ipoa, a Ih peidek oang ara, **“Kamwa kamehlele pwa Ngoahi kak kemwehuwihla kamwa?”**

“Eh, Koaun,” ira japoang.

<sup>29</sup> Doar Ih jair mijara pwa, **“Me en wiawi jang in amwa pwojon;”** <sup>30</sup> ira pwuroahng kapangda wija. Jesus pwehng ira, **“Kapang pwa johpwa emen en kidal mehkije.”**

<sup>31</sup> A ira inla likin kalohkihjili wijahu ohroj.

### *Jesus Kemwehuwihla Woal Loahsoang men*

<sup>32</sup> Nehn ara allaluhla, woal loahsoang men ma ngen jaus dilingla ih wijikdohng Jesus. <sup>33</sup> Anjoauwo ma ngen jausso diljang ipoa, woal loahsoanngo lallalda. Pokonno inenin pwuriamwei pwa, “Kahjikkoar mehkij doahre wiawi nehn Israel.”

<sup>34</sup> A Pharisee-ok pwa, “Koaunin ngen jaus kan ma kioang Jesus manman in kajroahjang ngen jaus.”

### *Sohn Doadoahk Jipid*

<sup>35</sup> Jesus allaluhjili nehn kahnimw apel koujapw ohroj, padpadahk nehn jinakoke kan, padpadahkki doahr rongmwewuin Weiho, kemwehuwihla joangoan johmwewu ohroj ipen armaj kan. <sup>36</sup> Nehn Ah kapang pokonno, Ih ipwilkihda irai, pwa ara injinjuwed apel joh jauwajparai, doahr jihpw ma ne joh jiloapoarai. <sup>37</sup> Doar Ih pwehng Nah sohnpadahkkok, **“Roakke koalik a sohn doadoahk jipid. <sup>38</sup> Poaki koaun in roakke en kadardo sohn doadoahk dir pwa en doadoahk nehn mwoaswello.”**

## 10

### *Woaroak Eijek Roahmen*

<sup>1</sup> Jesus panginpene Nah sohnpadahk eijek roahmenno, kioang irai manman en kajroahjang ngen jaus apel kemwehuwihla joangoangoan johmwewu ohroj. <sup>2</sup> Me ioar oadoan woaroak eijek roahmenno: Keiou Simon (ma pel adanki Peter) a riah Andrew; James nihn Zebedee, apel riah John; <sup>3</sup> Philip apel Bartholomew; Thomas apel Matthew, jounrik daksis men; James nihn Alphaeus, apel Thaddaeus; <sup>4</sup> Simon mihn Canaan\*, apel Judas Iscariot, ma pangla Jesus.

### *Jesus kadarla Sohnpadahk Eijek Roahmen*

\* **10:4** Simon mihn Canaan pel Simon mihn Zealot pel Simon ma ngoang



<sup>5</sup> Sohnpadahk eijek roahmenno Jesus kadarla kioang irai kaweid pwiai: “Johpwa inla nehn pwungen mihn likin kan ke inla nehn koaujoan in mihn Samaria kan. <sup>6</sup> A kamwai inlahng jihpw joaloanglahk ipen mihn Israel kan. <sup>7</sup> Kamwai inla padahki pwa: Wein nehnloannge ne koaroan. <sup>8</sup> Kemwehuwihla johmwehu kan, kamourda min mehdi kan, kamwkehda irai kan ma anki johmwehu lepa, kauj jang ngen jaus kan. Doar amwai oaloo in joh dupkoa, Kamwai pel kihwei in joh dupkoa. <sup>9</sup> Johpwa wa kohl, silper, ke kapa nehn amwai pwuko kan; <sup>10</sup> johpwa wijik pehk nehn oamw jeiloak, ke joakid riau, ke ju ke jokon; pwa sohn doadoahk kan warroang oaloo dahkij arai anahne.

<sup>11</sup> “Nehn amwai dilda nehn oau koaujoan ke koujapw, rapahkihda armaj men ma nimen kamwain mine nehn umwahn oaroh kamwai pwur. <sup>12</sup> Nehn amwai en dilda nen umw oau, amwai rahnmwahu en doahroar me; popohl oang sohn ummwoauwe. <sup>13</sup> Ma sohn ummwo kajamwo kamwai, amwai popohl en minmine iparai, a ma joah, amwai popohl en japhaldohng kamwai. <sup>14</sup> Ma mine umw oau ke koaujoan oau joah nimen kajamwo kamwai, ke rong amwai padahk, diljang wijahu jiped jang pwirejpar in pwoalkoamwai. <sup>15</sup> Ngoahi pwehng kamwai pwa in mehlel, Rehn in Kadeikko Koahs pirin kajalehda Ah kalahngan oang sohn Sodom apel Gomorrah koalik jang koaujoan pwiai.

### *Koaloklok kan ma pirin Leldo*

<sup>16</sup> “Kamwai Rongmwehu Ngoahi kadarwe kamwai doahroar jihppwi nehn pwungen wolf. Kamai uhdahn pirin kanaihoahng kamwai doahroar sinek kan apel maid doahroar mwurei kan. <sup>17</sup> Kamwai mwajahn pwa armaj kan pirin joalihdi kamwai apel pangla kamwai mwohn mwoalen koapwung kan, apel poki kamwai nehn jinako ke kan. <sup>18</sup> Pwa Ngoahi, kamwai nen wijikla mwohn koaun apel nahmwarki kan, pwa kamwai en kadehdehng irai apel mihn likin kan doahr Rongmwehu. <sup>19</sup> Nehn irai pirin panglahng kamwai koapwung, kamwai joah pwunodki da kamwai pirin pwa, ke ia mwomwen amwai pirin pwa; nehn anjoauwo pirin lel, nen mweimweioang kamwai da kamwai pirin pwa. <sup>20</sup> Pwa lal kan ma kamwai pirin pwa jaudi amwai a Ngenin Jamamwaiho pirin kalallali kamwai.

<sup>21</sup> “Armaj pirin pangla riarai kan pwa en mehdi, pahpa kan pirin pangla nihrai jerihkan; Jerihkan pirin uhwoangda arai pahpa kan pwa irai en kojkojdi. <sup>22</sup> Armaj ohroj pirin lioassoang kamwai pwa ngoahi ma kahrehda, a emen ma pwojon lel imwin pirin mourla. <sup>23</sup> A ma kamwai koaloklok nehn oau koaujoan, kaulahng nehn oau koaujoan. Ngoahi pwehng kamwai in mehlel, kamwai nen johpwa koarjoahla koaujoan in Israel kan mwohn Nihn-Armaj pirin pwurdo.

<sup>24</sup> “Joh sohnpadahk men laplap jang ah jounpadahk: joh lidu men laplap jang ah koaun. <sup>25</sup> Sohnpadahk men en pel isarki en doahroarla ah jounpadahkko, apel liduhmen en pel doahrla ah koaunno. Ma moangoan peneinei oau poangpoangki Beelzebul, ia woahr nauna in ad ma emen sohn peneineiho en poangpoangki!

### *Inje Koawoa en Mijik*

<sup>26</sup> “Kamwai en joah mijik armaj. Me ohroj ma kin oakkoakla, uhdahn pirin janjalda, ke me rir ohroj pirin janjalda. <sup>27</sup> Da ma Ngoahi pwehng kamwai in rir, kamwai en kajalehda nehn pokon janjal; a me ma Ngoahi ngudngudkihoang kamwai, kamwai en pakairkihda pohn umw kan. <sup>28</sup> Johpwa mijik irai ma kak kojukdi palwar a johkak kojukdi pali ngen. A mijik Ih ma kak koauwehla ara, ngen apel palwar nehn ehl. <sup>29</sup> Send oau kamwai kak dupukda mahn siksik roahmen, a emen joh kak kipdi pohn pwirej likin koajoandi en Jamamwaiho. <sup>30</sup> A pel oang kamwai ohroj, pisen moangoamwai kan ohroj ne pel wadwaddi. <sup>31</sup> A doar joah mijik; kamwai kajampwaljang mahn siksik dihrdir!

### *Kadehdehda Christ mwohn Armaj*

<sup>32</sup> “Emen ma pohneje Ngoahi mwohn armaj, Ngoahi pel pirin pohneje ih mwohn Joamoaiho nehnloange. <sup>33</sup> A emen ma kahmahmki Ngoahi mwohn armaj, Ngoahi pel pirin kahmahmki ih mwohn Joamoaiho nehnloange.

### *Jaudi Moaloailoai Ngoahi Indoahki a Kodlaj*

<sup>34</sup> “Johpwa lemleme pwa Ngoahi indoahng wahdo moaloailoai pohn jampah. Ngoahi joah indoahng wahdo moaloailoai, a kodlaj. <sup>35</sup> Pwa Ngoahi indoahng ukudla jermwein men en uhwoang jamah, jerpein men en uhwoang ah nohno, lihmen uhwoang inen pahioa. <sup>36</sup> En emen ah imwinsihsi pirin wia sowoa mehlel in nehn umwahu.

<sup>37</sup> “Emen ma ipwilki jamah ke inah koalik jang ah ipwilki Ngoahi johpwa warroang Ngoahi; emen ma ipwilki nah jermwein ke jerpein koalik ah ipwilki Ngoahi johpwa warroang Ngoahi; <sup>38</sup> emen ma johpwa wahda ah lohpuw pwili ngoahi johpwa warroang Ngoahi. <sup>39</sup> Emen ma nimen kolkol ah mour nen luhj jang, a emen ma luhj jang ah mour ki Ngoahi nen kolkol ah mour.

### *Dupkoan wihwia Mwehu*

<sup>40</sup> “Emen ma kajamwo kamwai kin kajamwo Ngoahi, a emen ma kajamwo Ngoahi kin kajamwo ih ma kadardo Ngoahi. <sup>41</sup> Emen ma kajamwo joukohp en Koahs men pwa ih joukohp en Koahs men pirin oaloo kijakij in joukohp men, a emen ma kajamwo armaj pwung men pwa ih armaj pwung men pirin oaloo kijakij in armaj pwung men. <sup>42</sup> Ngoahi pwehng kamwai in mehlel, ma emen kioang mwoak in pil mwolou oau oang pwilihoai siksik pwiai, ih nen uhdahn oaloo dupkoa.”

## 11

### *Jesus apel John jounpoapdaj*

<sup>1</sup> Anjoauwo ma Jesus ne doari Ah kioang kaweiddok oang Nah sohnpadahk eijek roahmenno, Ih inla jang o pwa Ih en sukuhli pel padahk nehn arai koaujoan kan.

<sup>2</sup> John jounpoapdaj, mine nehn kalpwuhj, rongda pwa da Christ wihwia, kadarla nah sohnpadahkkok ipen Jesus, kalelpoak. <sup>3</sup> “Koawoa oar ma John jounpoapdaj ma pirin indoa, ke kamain pel kajkajik emen sohrohr?”

<sup>4</sup> Jesus japoang, “Pwurla pwehng John da kamwai rong apel kapang: <sup>5</sup> ‘Majkun kan kapangda wija, mwoasor kan alu, irai kan ma anki lepa mwehula, pongpong kan rongda wija, mehdi kan mourda, Rongmwehu ne pel padahk oang armaj joamwoahmwoa kan.’ <sup>6</sup> Meid pai armajjok me johpwa peikajalki Ngoahi.”

<sup>7</sup> Anjoauwo ma nihn John sohnpadahkkok pwurpwurla, Jesus sapda siksikoahng pokonno doahr John: “Da kamwai inlahki nehn japwsoahn ipen John pwa kamwain kapang? Alek pas jahkkihla enngo? <sup>8</sup> Ma jaudi, da kamwai inlahng kapang? Woal men kapwasda inenin mwehu? Irai ma kin kapwasda mwehu kin mine nehn umwen nahmwarki. <sup>9</sup> Doari da kamwai inlahng kapang? Joukohp men? Eh, Ngoahi pwehng kamwai, pel koalikjang joukohp men. <sup>10</sup> John ioar ma puk joarwi pwa: ‘Koahs pwa, Ngoahi pirin kdarwe Noai jounpakairro mwohn koawoa, ma pirin koaunopda allo mwohn koawoa.’ <sup>11</sup> Ngoahi pwehng kamwai in mehlel: Johpwa armaj men ma mour nehn jampah laplap jang John jounpoapdaj; a ih ma keiou siksik nehn Wein nehnloange laplapjang John. <sup>12</sup> Jang nehn rehn kan ma John kapkapahrak leldo apkas, Wein nehnloange inenin apwalkihda mwoakidpwi, apel iraihok ma wia mwoakid pwiai jong en koldi. <sup>13</sup> Mwahn John jounpoapdaj, Joukohp kan ohroj apel kojoned en Moses siko doahr Wein Koahs. <sup>14</sup> A ma kamwai nimen kamehlele, John ioar Elijah ma kokohppok siko ma pirin indoa. <sup>15</sup> Armaj men ma mine sioa mihn rongrong, a ih en rong!”

16 “Da Ngoahi kak karjahkihoang armaj en rehn pwiai? Irai doahroar jerihkan mwinda nehn market kan poangpoanglahng epwi: 17 ‘Kamai koajoang oang kamwai, a kamwai johpwa kahlek; kamai koaul ki koaul en mehdi, a kamwai johpwa joang!’ 18 John indoa, ih kaijihjol apel joah nim wain, a armaj ohroj pwa, ‘ih dirkihla ngen jaus.’ 19 Anjoauwo ma Nihn-Armaj indoa, Ih mwinge apel nimnim, armaj ohroj pwa, ‘kapang woal menen! Ih mijen mwinge apel sohn nim jakau men, Ih pirienki jounrik daksissok apel armaj jekenkennok!’ En Koahs loalkoang kadehdehda ah wihwia pwung kan.”

*Apwal oang koawoa Kahnihmw oau ma joah Wikla.*

20 Doar Jesus sapda kajalehda Ah japwungki koaujoannok ma Ih wiahda loapdirin Ah manmannok, pwa sowoahk johpwa koluhla apel wikla. 21 Ih pwehng irai, “Inenin naunahng koawoa, Chorazin! Pel naunahng koawoa, Bethsaida! Pwa manmannok ma ne wiawihang kamwai, wiawihang Tyre pel Sidon, irai ne likkoaukihda likkoauwin injinjuwed pel kamwroahdihoang moalkoahr pohrai, pwa en kajalehda irai ne koluhla apel wikla. 22 A Ngoahi pwehng kamwa, Ngoahi nimen kamwahn kidal, pwa nen rehnin kadeikko Koahs pirin kajalehda Ah kalahngan oang sohn Tyre pel Sidon koalik jang kamwa. 23 A koawoa, Capernaum, koawoa ma nimen leldahla nehnloange, koawoa nen jinoakekdihla nehn ehl! Pwa manmannok ma ne wiawihang koawoa, wiawihang sohn Sodom, irai nen minehr lel rehnoauwe. 24 Ah koawoa en kidal pwa rehnin kadeikko, Koahs nen kajalehda Ah kalahngan oang Sodom koalik jang oang koawoa!”

*Koammoal oang armaj pwunod*

25 Anjoauwo Jesus pwa, “Ngoahi kapnga koawoa, joamoai, Koan in nehnloange apel jampah! Ngoahi kapnga ki koawoa, oamw kajalehng irai joaloalkoangkok mehkan ma koawoa oakihjang iraihok ma koahiok apel loalkoang in jampah. 26 Joamoai, me ne wiawi pwa ioar mehwa koawoa pwungki.

27 “Me ohroj ne mweimweioang Ngoahi jang ipen Joamoaiho. Johpwa emen kidal Nahu likin Jamahu, pel johpwa emen kidal Jamahu likin Nahu pwilihki araihok ma Nahu pilda pwa Ih en kajalehng irai Ih.

28 “Kamwai ohroj indoa ipoai kamwai ma ne koakoahkla apel soausoaukihla amwai wijik kan, Ngoahi en kakoammoalihla kamwai. 29 Kamwai oaloo aproahda Oai mihn wijikke, apel sukuhl jang Ngoahi, pwa Ngoahi ma aksiksik apel nehn kapehd karkarahk, kamwai nen diar koammoal nehn ngenimwaikan. 30 Pwa Oai mihn wijikke ma Ngoahi pirin kioang kamwai, moangoai apel marahra.”

## 12

*Peidekki doahr Sabbath*

1 Mwerin anjoaukij Jesus aluhla nehn mwoaswel oau Sabbath. Nah sohnpadahkkok mwakohkohda irai dolihdi wehn wihdpwi irai kang. 2 Anjoauwo Pharisee-ok kapang irai, irai pwehng Jesus, “Kapang! Nihmw sohnpadahkkok wia me ma uhwoang kojoned in Sabbath.”

3 Ih japoang, “Kamwai johkin wadek da David wia anjoauwo ma ih apel pwilihoahk mwakohkohla? 4 Ih dilda nehn Umwen Koahs, pwilihoahk kangla pilahwa joarwiho — ma uhwoang kojoned irai en wia, pwa jamwrouwok oar kin kang. 5 Ke kamwai kahjik wadek nehn kojoned en Moses-ok ma pwa Sabbath ohroj jamwrouwok nehn Umw Joarwi koauwehla kojoned in rehn joarwi a irai johpwa dipanki? 6 Ngoahi pwehng kamwai pwa mine armaj men ma laplap jang Umw Joarwiho. 7 Puk Joarwi pwa, ‘Kadek mwehujung meiroang in mahn.’ Ma kamwai woahwoahki lal kamwai nen johpwa koawe armaj joh dipoa. 8 Pwa Nihn-Armaj ioar Koan in Sabbath.”

### *Woal men ma mwoasor oaloap poah*

<sup>9</sup> Jesus injang o, inla nehn jinakokehu, <sup>10</sup> woal men ma mwoasor oaloap poah mine o. Armajpwi pel mine o ma jongjong en kadipoahki Jesus Ah japwung. Irai idoak oang Ih, “Johpwa uhwoang asai kojoned Koawoa en kemwehuwihla armaj johmwehu Sabbath?”

<sup>11</sup> Ih pwehng irai, “Ma emen in kamwai nainki jihpw men a ih kipdihoang nehn lipw oau Sabbath, kamwai joah nen pwoakda ih jang nehn lippwo?” <sup>12</sup> Ia woahr kajampwalin armaj men jang jihpw men! Doari mwehu en wia me mwehu Sabbath.”

<sup>13</sup> Doar Ih pwehng woal mwoasor poahu, “Kailwe poahmmwen.” Doar ih kailla poah doari ken mwehula dauluhl, doahrla loap mwehuwo. <sup>14</sup> A Pharisee-ok ken injang o pilahnehda irai en kojukdi Jesus.

### *Nihn Koahs Lidu Pilpildahu*

<sup>15</sup> A Jesus kidal pwa da irai pilpilahne, Ih injang wijahu, armaj dir kaujla Ih. Ih kemwehuwihla johmwehu ohroj iparai, <sup>16</sup> a Ih pwehng irai en johpwa pwa inje Ih.

<sup>17</sup> Me kapwaihahda dahkij Isaiiah kokohpki doahr Ih:

<sup>18</sup> “Noai liduhwa, ma Ngoahi ne pilda.

Ih ioar Ngoahi ipwilki,

apel perenki,

ngoahi pirin kihdahng Ngenihoa puwoa,

Ih pirin kalohkihda kadeik oang wei kan.

<sup>19</sup> Ih jehpirin akmai ke rahrahu;

Ih jehpirin kapahrak nehn al kan.

<sup>20</sup> Ih jehpirin sipwangdi alek piroakla kan,

ke kakunihla lahm oau.

Ih pirin sihkeiki pwa pwung paiai en pwoaida.

<sup>21</sup> Sohn wei ohroj pirin koapwoarpwoarkihla oadoa.”

### *Jesus apel Beelzebul*

<sup>22</sup> Doari woal men ma ngen jaus dilingla ih, ma pel majkun pel jehjoa lallal, wijikdohng Jesus. Ih kemwehuwihla woallo doar ih ken kak lallal pel kapangda wija.

<sup>23</sup> Pokonno pwuriamweikihla, “Audi Ih ma kijehn kadaudok en David wa me?”

<sup>24</sup> A anjoauwo me Pharisee-ok rongda me, irai pwa, “Kamwai johpwa pwuriamweiki Ah kak kauj jang ngen jaus. Ih kihjang ah manman ipen Beelzebul, koaunin ngen jaus.”

<sup>25</sup> Jesus ne kidal da arai lemleme, ioar Ih pwehngkihoang irai, “Wei oau ma uhpene apel peipene nen pwungarai jehpirin mour woaroi. Kahnimw oau ke peneinei oau ma sowoa kan pel uhpene nehn pwungarai nen uhdahn mwoarpijoang.” <sup>26</sup> A doar ma oau pwihn mahwin oang oau pwihn nehn wein Jehsen, woahwoahki pwa wein Jehsen ne pwalpijoang, doar nen pispis mwoarpijoang. <sup>27</sup> Kamwai pwa Ngoahi kin kauj jang ngen jaus kan pwa Beelzebul ma kioang Oai manman. A inje ma kioang nihmwai sohnpadahk kan manman in kauj jang ngen jaus kan? Pein nihmwai sohnpadahk kan nen kadehdehng kamwai doahr amwai japwung! <sup>28</sup> Joah, jaudi, a Ngenin Koahs ma kioang Ngoahi manman in kauj jang ngen jaus kan, a ioar me ma kadehdehda pwa Wein Koahs ne lel kamwai.

<sup>29</sup> “Joh emen kak koauwehla umwen woal sihkei men pwa en pirapoa ah koapwoa kan ma ih johpwa koldi piroahpene woal sihkeiho. Ioar wioapoawahr doari ih kak pirapoa ah koapwoa kan.

<sup>30</sup> “Emen ma johkin pwili Ngoahi, kin uhwoang Ngoahi, a ma johkin jeuweje Ngoahi rikpene, kin kamwroahpijoang. <sup>31</sup> Me ioar kahrpoahwa Ngoahi pwehng kamwai, Dihp ke lahlahwe ohroj kak mahkla — a lahlahwe Ngen Joarwi ioar johkak mahkla.

<sup>32</sup> Emen ma lahlahwe Nihn-Armaj, kak mahkla, a lahlahwe Ngen Joarwi pwanah johkak mahkla — apkas ke pel allaluhla.

### *Suhkoa pas apel Wah kan*

<sup>33</sup> “Ma kamwai poadokdi suhkoa mwehu pas, a wah pirin mwehu. Ma kamwai poadokdi suhkoa nauna pas, wah pirin nauna. Pwa kamwai pirin kidal suhkoa kan ki wahrai kan. <sup>34</sup> Kamwai doahroar sinek! Imdoahr armaj nauna doahr kamwai kak pwa mehkij mwehu? Pwa dahkij ma kamwai pwa ioar kin kajalehda audoapoaan nehn kapehdimwaikan. <sup>35</sup> Armaj mwehu men kin pwahla lal mwehu jang nehn ah mohngiong mwehu, a armaj nauna men kin pwahla lal nauna jang nehn ah mohngiong nauna.

<sup>36</sup> “Doari, kamwai en kidal pwa nehn Rehnin Kadeikko armaj ohroj uhdahn pirin pwukoahki arai lallal mwahl ohroj. <sup>37</sup> Pein amwai sikesik kan ma pirin kadeikda kamwai ma kamwai mwakelkel ke dipan.”

### *Kilel in Jonah*

<sup>38</sup> Jounpadahk in Kojonned apel Pharisee pwi indoa ipen Jesus pwehng Ih, “Jounpadahk, kamai nimen Koawoa en kajalehng kamai oau manmanno.”

<sup>39</sup> Jesus japoang, “Ia woahr nauna apel rosros in armaj in anjoau kije! Kamwai poaki manman oau jang Ipoai a manman wahr Ngoahi nen kioang kamwai ioar manman in joukohp Jonah. <sup>40</sup> Pel doahr en Jonah minmine nehn kapehdin mwumw koalikko rehn jiluh pel pwong jiluh, ioar doahr, Nihn-Armaj, pirin mine pehn jampah rehn jiluh pel pwong jiluh. <sup>41</sup> Nehn Rehnin Kadeikko mihn Nineveh pirin uhwoang kamwai apel kadeikda kamwai, pwa ahr koluhla apel wiliakapwla nehn ahr rong en Jonah padahkko. A apkas emen ma laplapjang Jonah mine me. <sup>42</sup> Nehn Rehnin Kadeikko Li nahmwarki in Sheba pirin uhwoang kamwai apel kadeikda kamwai, pwa ih jeiloakdo jang in imwin jampah pwa en rong doahroar en nahmwarki Solomon kaweid loalkoang. A apkas mine emen ma laplap jang Solomon mine me.

### *Japahldohn Ngen Nauna*

<sup>43</sup> “Nehn en ngen jaus men kin diljang nehn armaj men, ih kin allaluhjili nehn japwsoahn, rapahki wijahn koammoal a nehn ah johkin diar. <sup>44</sup> Doar ih ken pwehng pein ih, ‘Ngoahi en pirin pwurlahng nehn umwoaiho.’ Doar ih pwurla diarda pwa umwahu ne soahnda, mwakelkel, apel joan. <sup>45</sup> Doar ngen jausso pel pwurla rapahkihda pel ngen jaus ijimen ma nauna jang ih, irai ohroj dilda koaujoanla wijahu. A doari armajjo a kapwa nauna jang mijkoalkoal. Ioar joangoan mour wa me nen wiawi oang armaj nauna in rehn pwiai.”

### *Inen Jesus apel Riah Woal kan*

<sup>46</sup> Nehn en Jesus siksikesik oang pokonno, inahu apel riahk mine likin, nimen lal oang Ih. <sup>47</sup> Armaj men pwehng Ih, “Inoammwo apel rioammwok minmine likinno, irai nimen lal oang Koawoa.”

<sup>48</sup> Jesus japoang, “Inje inoai? Inje rioai kan?” <sup>49</sup> Doar Ih doklahng nah sohnpadahkkok Ih pwa, “Irai pwiai ioar inoai apel rioaikoa. <sup>50</sup> Emen ma kin wia injenen Joamoaiho nehnloange ioar rioai woal, rioai li apel inoai.”

## 13

### *Karajraj in Jounkamwoaroa*

<sup>1</sup> Rehnnohr Jesus injang in ummwo Ih indihla in oaroahrin jeddo, wijahu ma Ih mwindi pwa en wia ah padahk. <sup>2</sup> Pokonin armaj koalikkoau pidekihpene Ih. Ih ken doaudahng nehn pohs pas, mwindi, a pokonno uhda pohn oaroahrin jeddo. <sup>3</sup> Ih doadoahkki karajraj pwa en pwehng irai me dihrdir.

“Armaj men mine ma inlahng kamwroa ah liporrohk. <sup>4</sup> Doari, nehn ah kamwkamwroa ah liporrohk, epwi mwardi oang nehn al siksik in nehn mwoaswello, mahnsang pwi sangdo kangjang. <sup>5</sup> Epwi liporro kipdi nehn wija sakaikai ma pwirejjo poadpoad. Liporrohk pispisin koapda pwa pwirejjo poadpoad. <sup>6</sup> A anjoauwo ma joauwo dakda, suhkoahk pispisinnor mengla pwa koalohraiok johpwa lel nehn wija loal. <sup>7</sup> Epwi liporrohk kipdi nehn pwungen suhkoa soaksoak. A suhkoa soaksoakkok koapda kajasihkeihla irai. <sup>8</sup> A epwi liporrohk kipdi nehn pwirej mwehu uhwahda, epwi min epwiki, epwi weneijek, a epwi jilihjek.

<sup>9</sup> “Armaj men ma mine sioa mihn rongrong, a ih en rong.”

### *Kahrpoan Karajrajok*

<sup>10</sup> Nah sohnpadahkkok indoa ipen Jesus idoakkoang Ih, “Amwda koawoa ke kin doadoahkki karajraj nehn oamw kin lalloang armaj kan?”

<sup>11</sup> A Jesus japoang irai, “Kamwai ne mweimweioang en woahwoahkihla me rir in Wein nehnloange, a irai joah. <sup>12</sup> Pwa armaj men ma anki mehkij, ekij nen pel aluhwoang, pwa ih en anki koalikjang. A oang ih ma joh ah mehkij, dahkij ma mine ipoa nen pel kihokjang. <sup>13</sup> Ioar kahrehda Ngoahi kin padahk oang irai in karajraj, pwa armaj kin kapang da Ngoahi wia, a irai johkin soahk, irai rong da ngoahi kin pwa, a irai johpwa nimen rong ke woahwoahki. <sup>14</sup> Me ioar kokohp in Isaiah, pwoaida iparai ma pwa:

‘Kamwai pirin rongrongrong, a johpwa woahwoahki;  
kamwai pirin kapkapang a joah dehdehki.

<sup>15</sup> Pwa mohngiongin armaj pwiai ne koapsakaila,  
siarai kan pongpongla,  
a irai moairpene,

pwa mijarai kan en joah kapang,  
a siarai kan johkak rong,  
a mohngiongirai johkak woahwoahki,

a irai johkak okdekdohng Ngoahi  
pwa Ngoahi en kemwehuwihla irai.’

<sup>16</sup> “A kamwai, meid pai kamwai ma mijamwaikan kak kapang, apel siamwaikan kak rong. <sup>17</sup> Ngoahi en kadehdehng kamwai pwa dir joukohp apel armaj pwung ma nimen kapang da kamwai kapkapang apel rong da kamwai rongrongrong, a irai johkak.

### *Jesus Kawoahwoahda Karajraj in Jounkamwoaroawo*

<sup>18</sup> “Kamwai rong apel padahkihdi woahwoahn karajraj in Jounkamwoaroawo. <sup>19</sup> Irai kan ma rong padahk in Wein nehnloange a johkin woahwoahki. Irai doahroar liporrohk ma mwardi pohn allo, Ngen nauna kan indoa jerkijjang dahkij ma ne poaddi nehn mohngiongirai. <sup>20</sup> Liporro ma kin mwardi oang nen wija sakai woahwoahki irai kan ma kin rong oaloahda apel perenkihda. <sup>21</sup> A johkin soangdi iparai, ma apwal oau ke kojkoj kin lel irai pwa padahkko, a irai kin pispis in lohdi. <sup>22</sup> Liporrohk ma mwardi oang nehn pwungen suhkoa soaksoakkok doahroar araihok ma rong apel oaloahda mahjanno, a nen johpwa kos mahjanno nen johla mine iparai pwa jang in pwunod in jampah apel ipwilki pai in jampah nehn arai mour, kahrehda arai joh kak kihda wahrai. <sup>23</sup> Liporrohk ma koapda nehn pwirej mwehuwo ioar kajalehda mohngiongin iraihok ma rong apel woahwoahkihla padahk mehlello, doar uhwahda dir pehn epwi min epwiki, epwi weneijek, a epwi jilihjek.”

### *Karajraj in Dipwdipw*



<sup>24</sup> Jesus pwehng irai apas karajraj: “Wein nehnloanngge doahroar jounkamwoaroa men ma kamwroahdi ah liporrohk mwehu nehn ah mwoaswello. <sup>25</sup> Oau pwong armaj ohroj moair, ah imwinsihsi indoa kamwroahdi suhkoa dipwdippwi nehn pwungen suhkoahn pilahwa. <sup>26</sup> Anjoauwo ma suhkoahk sapda koap pwa en uhwa, dipwdippwok pel koapda. <sup>27</sup> Nihn woal nah liduhwok indoa pwehng ih, ‘Maing, jaudi liporro mwehupwi koawoa kamwroahdi nehn oamw mwoaswello? Ia injang dipwdipw pwiai?’ <sup>28</sup> Jounmwoaswello pwehng irai, ‘Imwinsihsi men ioar wia men.’ Irai idoak, ‘Kamain inla wijdahjang dipwdippwok?’ <sup>29</sup> Ih japoang, ‘Joah, kamwai nen pel koauwehla suhkoa mwehuwok. <sup>30</sup> Mweidoahng ohroj en koapda lel anjoau in doddol. A ngoahi kapwa pwehng joundoddol kan irai en kasohrohr jang dipwdipw kan irai pwidenghla a min mwehu kan irai en kioang nehn oai johkoku.’ ”

### *Karajraj in Liporrohn Mustard*

<sup>31</sup> Jesus pwehng irai apas karajraj: “Wein nehnloanngge doahroar liporrohn mustard oau poaddi nehn ah mwoaswello. <sup>32</sup> Me ioar liporrohwa ma keiou siksik jang liporro ohroj, a koapda wiahla suhkoahwa keiou koalik nehn mwoaswello, nehn ah ne wiahla suhkoa koalik pas, mahn kan kin sangdo, koammoaldi pohn rah kan.”

### *Karajraj in Ihs*

<sup>33</sup> Jesus pwehng irai apas karajraj: “Wein nehnloanngge doahroar me. Lihmen oaloo ihs kij doaloahkihda pilahwa koalik kij. Pilahwahu ken pwoaida.”

### *Doahr en Jesus Doadoahkki Karajraj*

<sup>34</sup> Anjoau ohroj Jesus kin doadoahkki karajraj doahr me oang pokonnok; Ih johkin sikesik oang irai joah doadoahkki karajraj. <sup>35</sup> Me kapwaihahda kokohppo jang joukohppo ma pwa:

“Ngoahi pirin doadoahkki karajraj nehn oai pirin sikesik oang irai.

Ngoahi pirin kajalehng irai joang kan ma johpwa janjal jang anjoauwo jampah wiawihda.”

### *Jesus Kawoahwoahda Karajraj in Dipwdipw*

<sup>36</sup> Anjoauwo Jesus injang pokonno, inla dilda nehn ummwoau. Nah sohnpadahkkok sohdo ipoa pwehng Ih, “Maing, kawoahwoahng kamai karajraj in dipwdippwok nehn mwoaswello.”

<sup>37</sup> Ih japoang irai, “Woallo ma poadokdi liporro mwehuwo ioar Nihn-Armaj. <sup>38</sup> Mwoaswello ioar jampah; a liporro mwehuwok ioar armaj ma sohn Weiho; dipwdippwok ioar armaj koa ma nihn Jehsen; <sup>39</sup> a imwinsihsiho ma poadokdi dipwdippwok ioar Jehsen. Anjoau in doddol wehn suhkoahu ioar imwin jampah, a joundoddolok ioar sohnloanngok. <sup>40</sup> Doahroar dipwdippwok kasohrohrla apel jirepla, ioar doahr da pirin wiawi imwin jampah. <sup>41</sup> Nihn-Armaj, pirin kadarla nah sohnloanngok, pwa en kihpene irai ohroj jang nehn Ah Weiho ma kin kahrehng armaj nehn dihp apel ohroj ma kin wia me nauna kan, <sup>42</sup> irai pirin kerpwihla irai nehn oai pwidenggo, wijahu ma irai pirin joangoangoang apel keikeikeisakai. <sup>43</sup> A irai kan ma pwung pirin lingla doahroar joauwo nehn Wein Jamaraiho. Armaj men ma mine sioa, en rong!

### *Karajraj in Pai Kajampwallo ma Oakkoakla*

<sup>44</sup> “Wein nehnloanngge doahroar me. Woal men kidalda pai kajampwaloau ma oakkoakla nehn japwoau. Nehn ah kidalda, ih pel pwuroahng jaripdi nehn pwirejjo ih ken perenda inla noaskihla ah koapwoa ohroj, ih japahlla dupukda jappwo.

### *Karajraj in Sakain nehn Pwaihoo*

<sup>45</sup> “Pel oau, Wein nehnloanngge doahroar me. Woal men roaproapoan sakain nehn pwai ling. <sup>46</sup> Nehn ah kidalda oau ma inenin ling, ih noaskihla me ohroj ih anki ih dupukkihda sakaiho.

### *Karajrajin Nehkko*

<sup>47</sup> “Pel oau, Wein nehnloanngge doahroar me. Nehk in loakjiddoau ma j johdi nehn jeddo pwa en koldi joangoan mwumw ohroj. <sup>48</sup> Anjoauwo ma nehkko ne dir, irai warahkihda hla poahrinjeddo, mwindi, nehkpijoang mwummwok. Mwumw mwehuwok, irai kioang nehn arai pwukohk, a min naunahk kerpwihlekla. <sup>49</sup> Me ioar pirin doahroar imwin jampah. Sohnloanngok pirin indoa kasohrohrihpijoang armaj naunahk jang ipen armaj mwehuwok, <sup>50</sup> kerpwihla armaj naunahk nehn oaiho, wijahu ma irai pirin joangoangoangoang apel keikeikeisakai.

<sup>51</sup> “Kamwai woahwoahki mehpwiak?”

“Eh,” irai japoang, “kamai woahwoahki.”

<sup>52</sup> Ih pel pwehng irai, “Jounpadahk in kojoneddo ohroj ma ne wiahla sohnpadahk in Wein nehnloanngge, doahroar armaj men ma kihjang nehn ah johkohu me kapw apel me dehn.”

### *Jesus Johla Kenken Nehn Nazareth*

<sup>53</sup> Anjoauwo ma Jesus ne doari Ah siksikoahng irai karajrajpwai, Ih injang wijahu. <sup>54</sup> Ih japahllahng uhdahn Ah wijahu. Nehn Ah padpadahk nehn jinakoke, ohroj ma rong Ih inenin pwuriamweikihla. Irai idoak, “Ia Ih kihjang Ah loalkoang apel manman? <sup>55</sup> Jaudi Ih ioar nihn daiksanngo jermweinwa me? Jaudi Mary ioar Ah nohnohwa, jaudi riah woalkoa James, Joseph, Simon, apel Judas? <sup>56</sup> Jaudi riah lihkan ohroj ma kin pel koaujoan ipasai? Ia Ih kihjang mehpwiak?” <sup>57</sup> Doari, irai ken johla nimen kamehlele Ih.

Jesus pwehng irai, “Joukohp men kin woan wija ohroj, a jaudi nehn pein ah wija apel nehn ah peneinei.” <sup>58</sup> Doari Ih wia manman jipidpwihoar wijahu pwa jang in irai joah pwojon.

## 14

### *Mehdihn John jounpoapdaij*

<sup>1</sup> Anjoauwo ma Herod Antipas koaunin Galilee rongda doahr Jesus, <sup>2</sup> ih pwehng nah papahk, “Me uhdahn John jounpoapdaij ne pwuroahng mourda. Ioar kahrehda ih kak wia joangoan manman pwiak.”

<sup>3</sup> Pwa Herod ne koldi John jounpoapdaij, piroahpene, kioang ih nehn kalpwuhj, ih wia me oang Herodias, pahien riah Philip. <sup>4</sup> Pwa John kin pwehng Herod, “Johpwa pwung koawoa en painkihla Herodias!” <sup>5</sup> Herod uhdahn nimen kojukdi John, a ih mijik mihn Jew pwa irai kin wiahki John joukohp men.

<sup>6</sup> Rehnin en Herod noaisikdiho nihn Herodias jerpeinno uhda, kahkahlek mwohn pokonno. Herod inenin malaukihda, <sup>7</sup> ih inoaukihdi apel kahukihoang jerpeinno, “Ngoahi pirin kioang koawoa me ohroj ma koawoa poaki.”

<sup>8</sup> Jang in kaweid in ah nohnohu, jerpeinno poaki Herod, “Kihdoahng ngoahi wijahkije apel apkas moangoan John jounpoapdaij nehn oau pileis en!”

<sup>9</sup> Nahmwarkiho injinjuwedkihla, a jang in kahula apel inoau ma ih wiahda mwohn sohn kamdippwo ohroj, ih pwa en jerpeinno poakpoakko en pwoaida. <sup>10</sup> Moangoan John ken poalpoaljang nehn kalpwuhjjo. <sup>11</sup> Moangoan John wijikdo nehn pileis oau, liklikkoang jerpeinno; ih uhda wahlahng ah nohnohu. <sup>12</sup> Nihn John sohnpadahkok indoa oaloa palwoaroa wahla jaripdi; Irai ken inla pwehng Jesus.

### *Jesus Kamwinge Woal Limekid*



<sup>13</sup> Nen en Jesus rongda rongin John, Ih inla jang wijahu, Ih pwilihda pohn pas, jeilahng kalahpwukla wija kij. Armajjok rongda me, irai injang nehn ahr koaujoannok wud nehn japw kaujla Ih. <sup>14</sup> Nen en Jesus doaudihjang pohn pohsso, Ih kapangda pokon koalik oau, nen kapehdin ipwilkihda irai, Ih kemwehuwihla armaj johmwehuwok iparai.

<sup>15</sup> Injoausik pene Nah sohnpadahkkok indoa ipoa pwehng Ih, “Maing, ne rospene, a wija kije japwsoahn oau. Kadarla pokonno pwa irai en kak inla nehn kahnihmw dupukda kanrai mwinge.”

<sup>16</sup> A Jesus japoang irai, **“Irai johpwa anahne inla. Kamwai pein kamwinge irai.”**

<sup>17</sup> Irai pwehng Ih, “Mehwahr mine ipamai, lopwonin pilahwa limoau apel mwumw roahmen.”

<sup>18</sup> Jesus pwehng irai, **“Wahdo oang Ngoahi.”** <sup>19</sup> Ih pwehng pokonno en mwindi pohn mohk. Ih oaloo lopwonin pilahwa limoau apel mwumw roahmen, jardahla nehnloange, kapingkalahngan oang Koahs, sipwangpijoang pilahwa, kioang Nah sohnpadahkkok, sohnpadahkkok wud nehkkoang pokonno. <sup>20</sup> Armaj ohroj mwinge oaroh moadla, sohnpadahkkok dowihda luhwen mwinge wiahda kiam eijek riau. <sup>21</sup> Dirin woal ma pwili mwinge, woal limekid, li apel jeri johpwa pwili wadwaddoang.

### *Jesus Alu Pohn Jed*

<sup>22</sup> Jesus pwehng Nah sohnpadahkkok arai en doauda pohn pohn oau jeila oaloap jeddo, pwa Ih en kadarpijoang pokonno. <sup>23</sup> Mwerin Ah kadarpijoang armajjok, Ih indahla kalahpwukla pohn dol oau, pwa en kapkap. Ih minmine wijahu kalahpwuk oaroh rospene. <sup>24</sup> Ioar anjoauwo ma pohsso ne dohla mine nehn pwungen lehu okdekkihjili nohk pwa enngo sihkei koaldohng pohsso.

<sup>25</sup> Nehn pwungen kiloak jiluh apel wonou injohrehn, Jesus inla iparai, alu pohn lehu. <sup>26</sup> Nehn en sohnpadahkkok kapang Ih alu pohn lehu, irai inenin majpwehkda. “Eni men!” Irai pwa apel rahrahuki arai majpwehk.

<sup>27</sup> Jesus pispisinnoar lallahng irai, **“Kamwai sihkei!”** Ih pwa, **“Ngoahi me, kamwai joah majpwehk.”**

<sup>28</sup> A Peter pwehnglahng ih, “Maing, amai Koaun, ma uhdahn koawoa men, pwehng ngoahi en alwe ipoamw, alu pohn jed.”

<sup>29</sup> **“Koa, indoa,”** Jesus pwehng ih. Doar Peter kerdihjang pohn pohsso, alu pohn jeddo inla ipen Jesus. <sup>30</sup> A nehn ah poahmda sihkeilahn enngo, ih majpwehkda, sapda pwuhpwurdi. Ih pwa, “Maing, Doarohla ngoahi!”

<sup>31</sup> Anjoauwohr Jesus pukla, koldi ih, pwehng ih, **“Amwda oamw pwojon ke siksik! Amwda koawoa ke joh kamehlele?”**

<sup>32</sup> Ara doaudahng pohn pohsso, a enngo uhdi. <sup>33</sup> Sohnpadahkkok pohn pohsso pwongi Jesus, pwehng Ih, “Mehlel oar pwa koawoa uhdahn Nihn Koahs!”

### *Jesus Kemwehuwihla Armaj Johmwehuwok nehn Gennesaret*

<sup>34</sup> Irai kosehla lehu lellahng japw wijahkij oadoa Gennesaret. <sup>35</sup> Nehn en armaj in wijahu kidalda Jesus, irai ken iloaklahng armaj johmwehuwok in wijahu apel wija koaroannok ohroj en wijikdohng ipen Jesus. <sup>36</sup> Irai poaki Ih en mweidoahng armaj johmwehuwok en pukkoang ikin Ah likkoauwo; doar ohroj ma pukkoang kin sihkeida.

## 15

### *Padahk in mihn Mehjok*

<sup>1</sup> Pharisee pwi apel jounpadahk in Kojonnedpwi indoa jang Jerusalem indoa ipen Jesus, idoak oang Ih, <sup>2</sup> “Amwda nihmw sohnpadahkkok kin joah kapwaihahda asai

siahk koadoautoauto jang jamasai mihn mehjjok? Irai joh kin amwunla poahrai mwohn arai mwinge!”

<sup>3</sup> Jesus japoang, “A amwda kamwai ke japeik oang kojoned in Koahs nehn amwai kin pein daur amwai padahk kan? <sup>4</sup> Pwa Koahs pwa, ‘Woaunki joamoamw apel inoamw, a ma armaj men lahlawe jamah ke inah, en kojkojdi.’ <sup>5</sup> A kamwai kin padahki, ma armaj men ma anki mehki ma ih kak jeuweje ki jamah ke inah, a ih pwa, ‘Me en Koahs,’ <sup>6</sup> Irai johpwa anahne woaunki jamarai, ioar doar amwai kin mwamwahlki mahjan in Koahs, pwa kamwai en daur pein amwai padahk kan. <sup>7</sup> Mwalaunpwi kamwai! Mehlel oar pwa uhdahn pwung oang kamwai dahki joukohp Isaiah ne kohpda oang kamwai nehn ah pwa,

<sup>8</sup> ‘Koahs pwa, armaj pwiai kin woaunki Ngoahi jang in arai lal a mohngiongirai inenin dohjang Ngoahi.

<sup>9</sup> Johpwa kaspoan ahr kin joarwihoang Ngoahi, pwa irai kin padahki kojoned in armaj, a irai karaunki pwa en Koahs Kojoned.’ ”

### *Da ma kin kajaminihla armaj*

<sup>10</sup> Doar Jesus ken pangindo pokonno Ipoa, pwehng irai, “Kamwai rong apel woahwoahki mwehu me: <sup>11</sup> Johpwa mehki ma kin aluhwoang nehn oawoan armaj ma kin kajaminihla armaj, pwa me ma kin injang nehn oawoa.”

<sup>12</sup> Doar sohnpadahkok indoa Ipoa pwa, “Koawoa kidal pwa Pharisee-ok lioaski dahki ma Koawoa pwahla?”

<sup>13</sup> Jesus japoang, “Suhkoa ohroj ma Joamoaiho nehnloange johpwa poadokdi nen wijwidahjang, <sup>14</sup> joah injinohki irai! Jounkaweid majkunpwi arai. Doar ma armaj majkun men kahlwa emen armaj majkun ara nen kipdihoang nehn lippwo.”

<sup>15</sup> Peter pwehnglahng Ih, “Kawoahwoahda woahwoahn karajraj pasen.”

<sup>16</sup> Jesus japoang irai, “Kamwai kahjik oar loalkoangla, doahr iraihok ma joaloalkoang? <sup>17</sup> Kamwai johpwa woahwoahki? Mehki ma koawoa kangla indihla nehn kapehdimwen kin pel injang nehn palwoaroamwen. <sup>18</sup> A me ma injang nehn oawoa, kin sapda jang nehn mohngiong, ioar kin kajaminihla armaj. <sup>19</sup> Lam lam nauna kin injang nehn mohngiong, ioar kin kahrehda, kojarmaj, kamwahl, nenek, pirap, likamw, pel karaun mwahl. <sup>20</sup> Mehpwiai ioar kin kajaminihla armaj. A jaudi mwinge johpwa amwumwla!”

### *En Lihmen Ah Pwojon*

<sup>21</sup> Jesus injang wijahu inla wija kij ipen kahnihmw in Tyre apel Sidon. <sup>22</sup> Lihn Canaan men, ma kin koaukoaujoan wijahu, indoa ipoa, ngil koalik poangpoanglahng Ih, “Maing, koawoa ma nihn David, kadek oang ngoahi! Noai jerpein men mine ma ngen jaus ne dilingla; ih kin minmine nehn apwal koalik.”

<sup>23</sup> A Jesus johpwa pwahla lal oau oang ih. Nah sohnpadahkok sohla Ipoa, engdehn poaki Ih, “Kadarla lihen! Ih kadroapwoa kisai ki ah poakpoak en.”

<sup>24</sup> A Jesus japoang liho, “Ngoahi, koadoaddoahng ipen jihpw joaloangla in mihn Israel oar doari.”

<sup>25</sup> A liho sohla ipoa dairukdihoang in pwoalkoa, “Maing, jeuweje ngoahi!”

<sup>26</sup> Jesus japoang, “Johpwa pwung en kihjang kenen jerihkan mwinge peidlahng doahk kan.”

<sup>27</sup> “Mehlel, Maing,” liho japoang, “a doahk kan kin pel kang mwoarmwoarin mwinge kan ma mwoardi pehn en laplappok sehpil.”

<sup>28</sup> Doar Jesus ken japoang ih, “Koawoa lihmen ma anki pwojon inenin koalik! Dahki ma koawoa poaki nen pwoaihoang koawoa.” Nehn anjoauwohr nah jerpeinno mwehuda.

### *Jesus Kemwehuwihla Armaj Dihrdir*

<sup>29</sup> Jesus injang wijahu, alu paianla poahrinjedin Galilee. Ih doauda pohn dol oau mwindi. <sup>30</sup> Pokon koalik oau indoa Ipoa, wahdohng Ih armaj mwoasor, armaj majkun, armaj dangpel, armaj loahsoang, apel dir ma anki joangjoangoan kahpwal in palwar, irai wahdo kihdi ipen ehn Jesus. Ih kemwehuwihla ohroj. <sup>31</sup> Pokonno pwuriamweikihla ahr kapangda doahr armaj loahsoangok kakla lallal, armaj dangpellok mwehula, armaj mwoasorrok ne kakla alu, apel araihok ma majkun ne kapangda wija. Irai kapngahki Koahs in Israel.

### *Jesus Kamwinge Armaj Pahkid*

<sup>32</sup> Jesus panginpene nah sohnpadahkkok ipoa Ih pwehng irai, “Ngoahi ipwilkihda armaj pwiai pwa irai minminehki Ipoai rehn jiluh, doar ne pel rojla kanrai mwinge. Ngoahi johpwa nimen karpajoang irai nen irai johpwa mwinge, pwadoar irai mwehlella nehn allok.”

<sup>33</sup> Sohnpadahkkok idoakkoang Ih, “A ia wija kamai kak kihjang mwinge nehn japwsoahnoauwe ma en isar oang pokonnoauwe?”

<sup>34</sup> Jesus idoak oang irai, “Lopwon in pilahwa doapoa mine ipamwai?”

Irai japoang, “Lopwon ijuh, apel mwumw siksik jipidpwi.”

<sup>35</sup> Jesus pwehng pokonno en mwindi pohn pwirej. <sup>36</sup> Doar ih oaloo lopwon ijuhwo pwilihki mwummwok, kapingkalahnganki oang Koahs, sipwangpijoang, kioang nah sohnpadahkkok, sohnpadahkkok wud nehk oang pokonno. <sup>37</sup> Irai ohroj mwinge oaroh moad. Sohnpadahkkok rikda luhwen mwingehk wiahda kiam ijuh. <sup>38</sup> Dirin irai ma pwili mwinge rehnno, woal pahkid, li apel jeri jehpwili waddoang.

<sup>39</sup> Doar Jesus kadar pijoang armajjok, Ih doauda pohn pohs pas, jeilahng ipen koaujoan in Magadan.

## 16

### *Koaunnok pwehng Ih en Wiahda oau Kilel Manman*

<sup>1</sup> Pharisee-pwi apel Sadducee-pwi indoa ipen Jesus pwa irai en lidipihdi Ih, ioar kahrehda irai pwehng Ih en wiahng irai oau manman jang nehnloange. <sup>2</sup> A Jesus japoang, “Nen en joauwo kin duhla, kamwai kin pwa, ‘Lakapw nen mwehu pwa mijen loanngge Wahssa.’ <sup>3</sup> A Inminjoang kamwai kin pwa, ‘Rehnnoauwe pirin wud, pwa mijen loanngge wahssa apel soal.’ Kamwai kak kajawihda iren anjoau jang nen amwai kin kapang mijen loanngge, a kamwai joh kak kajawihda kilellok doahr anjoau pwiai! <sup>4</sup> Ia woahr nauna apel rosros in armaj in anjoau kije!” Ih pel pwa, “Kamwai poaki manman oau jang Ipoai a manman wahr Ngoahi nen kioang kamwai ioar manman in Jonah.”

Doar Jesus ken injang irai inla ekij wija.

### *Ihs in Pharisee apel Sadducee-ok*

<sup>5</sup> Nehn en sohnpadahkkok jeila lel oaloap jeddo, irai moalkoahla wahda pilahwa.

<sup>6</sup> Jesus pwehng irai, “Kamwai mwajahn apel kalikdihjang ihs in Pharisee apel Sadducee-ok.”

<sup>7</sup> Irai sapda siksikoahpene nehn pwungarai, “Ih pwa me, pwa kisai johpwa wijik pilahwa.”

<sup>8</sup> Jesus kidal da irai pwahpwahpwa, ioar Ih idoakki iparai, “Dahkij kamwai siksikoa pene nen pwungamwai pwa joh pilahwa ipamwai? Amwai pwojon inenin siksik! <sup>9</sup> Kamwai kahjikkoar woahwoahkihla? Kamwai johpwa lemleme lopwon in pilahwa limoauwo ma Ngoahi kamwingehkihla armaj limekiddo? Kiam doapoa kamwai audohda? <sup>10</sup> A lopwon in pilahwa ijuhwo oang armaj pahkiddo? Kiam doapoa kamwai audohda? <sup>11</sup> Amwda kamwai ke johpwa woahwoahki pwa audi

pilahwa ma Ngoahi pwahpwahpwa? Kamwai kalkehjang kamwai ihs in Pharisee apel Sadducee-ok.”

<sup>12</sup> Doari, sohnpadahkkok ken woahwoahkihda pwa audi ihs in nehn pilahwa ma irai en kalkehjang irai, a padahk in Pharisee apel Sadducee-ok.

### *En Peter Kadehde doahr Jesus*

<sup>13</sup> Jesus inlahng wijahkij ipen kahnihmw Caesarea Philippi, wijahu Ih idoak oang nah sohnpadahkkok, “Inje ma armaj kan kin pwahki doahr Nihn-Armaj?”

<sup>14</sup> Irai japoang, “Epwi kin pwa John jounpoapdaij, a epwi pwa Elijah, apel epwi pwa Jeremiah ke emen in joukohppok.”

<sup>15</sup> A Jesus pel idoak iparai, “Inje kamwai kin pwahki Ngoahi?”

<sup>16</sup> Simon Peter japoang, “Koawoa ioar Messiah, Nihn Koahs mourro.”

<sup>17</sup> Jesus japoang, “Meid pai koawoa, Simon nihn John, pwa jaudi armaj ma kajalehng koawoa mehlel oauwe. Pwa Joamoai ma minmine nehnloanngge. <sup>18</sup> Doari, apkas Ngoahi pwehng koawoa, pwa koawoa Peter, paip koalik oau, pohn paip koalikkoauwe Ngoahi pirin kouda oai mwomwohdjo. Doar mehdi johpwa pirin kak kalwehdi. <sup>19</sup> Ngoahi pirin kioang koawoa kihkan in Wein nehnloanngge. Me ohroj ma koawoa kainoapwihdi nehn jampah pirin pel kainoapwidi nehnloanngge, apel me ohroj ma koawoa mweidda nehn jampah pirin pel mweimweida nehnloanngge.”

<sup>20</sup> Doar Jesus pwehng nah sohnpadahkkok, irai en johpwa pwehng emen, pwa Ih ioar ma Messiah.

### *Jesus sikoa Ah Pirin Koaloklok apel Mehdi*

<sup>21</sup> Jang anjoauwo inla Jesus sapda sikoa in janjal oang nah sohnpadahkkok, “Ngoahi uhdahn pirin inla Jerusalem, oaloo loklok koalik jang ipen koaunnok, jamwrou laplappok, apel jounpadahk in Kojonneddok. Ngoahi pirin kojkojdi, a mwerin rehn jiluh, Ngoahi pirin iejda.”

<sup>22</sup> Peter kalahpwukihla Jesus sapda koapwung oang ih, “Maing oai Koaun, Koahs kainoapwi joanngoauwe,” ih pwa. “Me uhdahn johpwa pirin wiawihhoang koawoa!”

<sup>23</sup> Jesus pwurlahng Peter pwehng ih, “Alwe jang Ngoahi, Jehsen! Koawoa lidip keper oau oang Ngoahi, pwa oamw lamlam jaudi jang ipen Koahs, a jang ipen armaj.”

<sup>24</sup> Doari Jesus pwehng nah sohnpadahkkok, “Ma emen in kamwai nimen indoa pwili Ngoahi, en uhdahn moalkoahla pein ih, wahda ah lohpuw, pwilihla Ngoahi.

<sup>25</sup> Pwa emen ma nimen doarohla ah mour ih pirin luhj jang; a emen ma sohnmesekihla ah mour ki Ngoahi, ih pirin mourla. <sup>26</sup> Pirin mine kaspoan oamw en wihnikihda jampah pwon, a luhj jang oamw mour? Joh douluhl, joh mehkij koawoa kak kihda pwa en japahl oang oamw mour. <sup>27</sup> Pwa Nihn-Armaj, pirin indoa nehn ling in Jamahu pwili nah sohnloanngok, pwa en dupukkoang emenemen armaj jang in ah wihwiahk. <sup>28</sup> Ngoahi pwehng kamwai in mehlel, pwa epwi kamwai ma mine me nen joah mehdi oaroh irai nen kapang Nihn-Armaj pirin indoa doahr Nahmwarki men.”

## 17

### *Jesus Wikla Palwoaroa*

<sup>1</sup> Mwerin rehn wonou Jesus ukda Peter apel riariho, James apel John, ukdahla pohn dol illoahioau pwa irai en kalahpwukla. <sup>2</sup> Nehn irai kapkapang, palwoaroon Jesus wikla, mijoa dakda doahr joauwo, apel Ah likkoauwo inenin korohrohla.

<sup>3</sup> Sohnpadahk jilmenno pel kapangda Moses apel Elijah siksikesik oang Jesus. <sup>4</sup> Peter pwehng Jesus, “Oai Koaun, inenin mwehu asai minmine me! Ma koawoa mwehuki, ngoahi en kouda umpwal jiluh wija kije, oau umwoamw, oau umwen Moses, apel oau umwen Elijah.”

<sup>5</sup> Nehn anjoauwo ih pwahpwahpwa me, koasoau maram oau pwaindi irai, a ngilloau indihdo jang nehn koasoauwo ma pwa, “Me ioar Noai jermwein kajampwalwa ma Ngoahi kin ipwilki, kamwai rong Ih!”

<sup>6</sup> Nehn en sohnpadahkkok rongda ngillo, irai inenin majpwehkda, ioar kahrehda arai rukdi lel pohn pwirej. <sup>7</sup> Jesus indoa pukkoang irai, Ih pwa, “**Kamwai uhda, kamwai joah mijik!**” <sup>8</sup> Nehn irai jarda, joh armaj irai kapang, Jesus kalahpwuk.

<sup>9</sup> Nehn irai indihdohjang pohn dollo, Jesus inoapwihdi irai en, “**Johpwa pwehng emen doahr mwoakiddoauwe ma kamwai kapang oaroh Nihn-Armaj en iejda jang mehdi.**” <sup>10</sup> Sohnpadahkkok idoak oang Jesus, “Amwda jounpadahk in Kojonneddok pwa Elijah uhdahn pirin sapin indoa?”

<sup>11</sup> Jesus japoang, “**Mehlel, Elijah uhdahn pirin sapin indoa pwa en koaunopda me ohroj.**” <sup>12</sup> A Ngoahi pwehng kamwai, Elijah ne indoa, a armaj kan johpwa kidal ih, doar irai wia mwahlki apel wiahng ih injenarai. Nen doahr irai pirin wiahng Nihn-Armaj, ma pirin pel oaloo koaloklok jang iparai.”

<sup>13</sup> Sohnpadahkkok woahwoahkihda pwa Ih pwehpwehpwehng irai doahr John jounpoapdaj.

### *Jesus Kemwehuwihla Jermwein Men Ngen Nauna Mine Ipoa*

<sup>14</sup> Anjoauwo irai lellahng ipen pokonno, woalmen indoa ipen Jesus, poadpwomwla mwohn Ih, <sup>15</sup> Ih pwa, “Maing, jeuweje noai jermweinno, pwa ih kin johmwehu roarroar koalik ma kin lelloang ih, kapkihdihoang nehn oai ke nehn pil pehn dir. <sup>16</sup> Ngoahi wahdohng ih ipen nihmw sohnpadahkkok, a irai johkak kemwehuwihla ih.”

<sup>17</sup> Jesus japoang, “**Kamwai inenin joah pwojon apel japwung! Ia woaroi in oai pirin minmine ipamwai? Ia woaroi in oai pirin kanangmahng kamwai? Wahdo jermweinnen Ipoi!**” <sup>18</sup> Doar Jesus ruwoj ngen jausso en diljang nehn jermweinno, ngen jausso ken diljang. Anjoauwohr jermweinno mwehula.

<sup>19</sup> Sohnpadahkkok kalahpwukla ipen Jesus idoak oang Ih, “Amwda kamai ke johkak kaujjang ngen jausso ipen jermweinno?”

<sup>20</sup> Jesus japoang irai, “**Pwa amwai pwojon johpwa isar. Ngoahi lal mehlel oang kamwai, ma amwai pwojon inenin sihksik wahroar liporrohn mustard oau, kamwai kak pwehng dollo, ‘mwoakid jang men mwoakidla o!’ ih nen mwoakid. Kamwai nen kak wia me ohroj.**” <sup>21</sup> [A joangoan ngen jaus oauwe joh mehkij koawoa kak kaujihjang ioarroar kapkap apel kaijihjol.]”

### *Jesus Pwuroahng Sikoa doahr Ah Pirin Mehdi*

<sup>22</sup> Sohnpadahkkok ohroj pokonpene Galilee, Jesus pwehng irai, “**Nihn-Armaj pirin ken likliklahng ipen armaj kan;**” <sup>23</sup> ma pirin kojukdi Ih, a rehn jiluh mwerin Ih pirin iejda.”

Sohnpadahkkok inenin injinjuwedla.

### *Jesus Kihda Ah Daksis oang Umw Joarwiho*

<sup>24</sup> Nehn en Jesus apel nah sohnpadahkkok lel Capernaum, jounrik daksis in Umw Joarwiho indoa idoak oang Peter, “Imdoahr, amwai jounpadahk en kin pwili dupuk daksis in Umw Joarwi?”

<sup>25</sup> “Eh, ih kin pwili dupuk.” Peter japoang.

Nehn en Peter inla nehn ummwo, Jesus ken pispis oar pwehnglahng, “**Simon, Da oamw lamlam oang irairroauwe? Inje kin nohpwei ke dupuk daksis oang Nahmwarkihn jampahioauwe? Jang ipen nah armaj kan ke jang ipen mihn likin kan?**”

<sup>26</sup> “Jang ipen mihn likin kan,” Peter japoang.



“Doari,” Jesus pwa, “Sowoa mehlel in weiho kin jehpwili dupuk daksis. <sup>27</sup> A, kisai joah nimen kalioasihda sohn rik daksis pwiai, Doar indihwe nehn jeddo, peiddihwe nihmw ohn. Keiouin mwumw ma koawoa oapihda, Kihpijoang oawoan mwummwo, koawoa nen kapangda mwani isar oang dupukla asa daksis.”

## 18

### *Inje ma Keiou Laplap nehn Wein Koahs*

<sup>1</sup> Nehn anjoauwo sohnpadahkkok indoa ipen Jesus idoak, “Inje ma keiou laplap nehn Wein nehnloange?”

<sup>2</sup> Doar Jesus pangindo jeri siksik men kihdi nehn pwung irai. <sup>3</sup> Ih pwa, “Ngoahi pwehng kamwai in mehlel, pwa ma kamwai johpwa wikla doahroarla jeri, kamwai nen johkak dilda nehn Wein nehnloange. <sup>4</sup> Pwa emen ma kin aksiksikla doahrla jeri siksik mene ih pirin keiou laplap nehn Wein nehnloange. <sup>5</sup> Apel emen ma kin kajamwo jeri siksik men doahre in oadoaioa ih kin kajamwo ngoahi.

### *Kahrehioang Nehn Dihp*

<sup>6</sup> “Ma emen ma kahrehng en emen jeri siksik pwiai ma kamehlele Ngoahi en johla ahr pwojon, mwehu oang en pirapirroang oau sakai koalikko in sipinwoaroa, pwa en sikmehula. <sup>7</sup> Ia woahr nauna in oang jampah mihn koauwehla pwiai ma pirin kahrehioang emen en kerpwihla ah pwojon! A joah, joang pwiai pirin pwen mine anjoau ohroj, a ia woahr nauna in oang armaj meno ma mehpwiai sapdahjang ipoa!

<sup>8</sup> “Ma oaloap poahmmwen ke oaloap ehmmwen kahrehng koawoa nehn dih, poaloahjang, kerpwihla! Pwa nen mwehuwoang koawoa en dilloang nehn mour joahsukko, ki oaloappoar poahmmwen ke oaloappoar ehmmwen jang poah riau ke eh riau kerpwiheklahng nehn oaiho ma johkin kunla. <sup>9</sup> A ma oaloap pwoaroan mijoammwen kin kahrehng koawoa nehn dih, roahkjang, kerpwihwehjang koawoa! Mwehu ma koawoa loapin pwoaroan maj dilda nen mour joahsuk jang pwoaroan maj riau a kerpwiheklahng nehn oai in nehn ehl.

### *Karajraj in Jihpw ma Joaloangla*

<sup>10</sup> “Kamwai Kanaihoahng pwa kamwai en johpwa mwamwahlki emen siksik pwiai. Kamwai en kidal pwa arai sohnloang kin mine ipen Joamoaiho nehnloange anjoau ohroj. <sup>11</sup> [Pwa Nihn-Armaj indoahng koamoaurla irai kan ma ne joaloangla.]

<sup>12</sup> “Da kamwai leleme? Ma armaj men nainki jihpw epwiki, emen arai joaloangla, ih joh nen kihdi jihpw duweijek dohmenno arai en mwingmwingehjili pohn nahna, a ih inla rapahki jihpw joaloanglahu? <sup>13</sup> A ma ih kapangda, Ngoahi pwehng kamwai in mehlel, pwa ih nen uhdahn perenki jihpw meno jang jihpw duweijek dohmenno ma johpwa joaloangla. <sup>14</sup> Ioar nen doahr Jamamwaiho nehnloange, ih johpwa mwehuki emen siksik pwiai en joaloangla.

### *Rioamw Men Ma Wia Dihp*

<sup>15</sup> “Ma rioamw men wiahda dih pwa oang koawoa, inla ipoa, kajalehioang dipoahu. A me en wiawi in rir. Ma ih rong koawoa, a koawoa ne kajpahliho rioammwo. <sup>16</sup> A ma ih joah rong koawoa, a emen ke roahmen armaj en pwilihda koawoa, pwa ara roahmenno en wia kadehdehn joang ohroj ma Puk Joarwi pwa. <sup>17</sup> A ma ih pel johpwa nimen rong irai, a koawoa lelki mwomwohdjo. A ma ih pel johpwa nimen rong mwomwohdjo, a wiahkihla ih mihn likin men ke jounrik daksis men.

### *Manman in Joalihdi apel Lapwadda*

<sup>18</sup> “Ngoahi pwehng kamwai in mehlel, pwa me ohroj ma kamwai joalihdi nehn jampah, a nen pel joaldi nehnloange; a me ohroj ma kamwai lapwadda nehn jampah, a nen pel lapwda nehnloange.

19 “Apel Ngoahi pwehng kamwai in mehlel, ma roahmen ipamwai nehn jampah minminkihpene ara kapkap, poaki mehki, nen uhdahn pirin pwoaidahng ara jang ipen Joamoaiho nehnloange. 20 Pwa wijahki ma roahmen ke jilmen pokon pene in oadoaioa, Ngoahi kin pwili irai mine wijahu.”

### *Karajraj in Papah Joampoak*

21 Peter sohdo ipen Jesus pwehng Ih, “Maing oai Koaun, pehn doapoa ngoahi en mahkoahng rioaiho ma kin wia dihp oang ngoahi? Isar ma ngoahi mahkoahng ih pehn ijuh?”

22 A Jesus japoang, Ih pwa, “Johpwa isar pehn ijuh, a pehn ijuh wad ijihjek. 23 Pwa Wein nehnloange doahroar nahmwarki men ma lemehda en wia koapwung in pwaipwanid oang nah papahk. 24 Nehn ah sapda wia koapwunngo, a emen irai wijikdohng ipoa, ma pwaipwanidki pehk in kohl lopw. 25 Papahu johpwa nainki mwani isar in dupukla ah pwaipwaniddo, doar nahmwarkiho pwa ih en noasla, doahroar lidu men, pwilihkihoar pahioa, nah jerihok, apel ah koapwoa ohroj pwa en kak dupukla ah pwaipwaniddo. 26 Papahu ken poadpwomwla mwohn nahmwarkiho, ‘Maing, koawoa en menlau mahkoahng ngoahi, koawoa en kanangmahng ngoahi, pwa ngoahi pirin dupukkoang koawoa me ohroj.’ 27 Nahmwarkiho ken ipwilkihda ih apel mahkoahng ih ki ah pwaipwaniddo doar ken mweidoahng ih en inla.

28 “Mwerin a injang wijahu, ih suhwoang emen pwilihoa papah ma pwaipwanidki oang ih mwani silper jipidpwi, ih jipoardi, padikpene sipinwoarua, pwehng ih, ‘Pispis dupukdo oamw pwaipwanid oang ngoahi!’ 29 Papahu rukdi mwohn ih poakmahk, ‘Menlau kanangmahng ngoahi, pwa ngoahi nen dupukkoang koawoa!’ 30 A ih kia rong, doar ih peiddoang pwilihoahu nehn kalpwuhj oaroh pwilihoahu en dupukla ah pwaipwaniddo. 31 Nehn en pwilihoa papahk kapangda dahki wiawi, irai injinjuwedkihla koalik, inla pwehng nahmwarkiho me ohroj ma wiawi. 32 Nahmwarkiho pangindo nah papahu pwehng: ‘Koawoa papah naunahmen! Ngoahi mahkoahng koawoa oamw pwaipwanid ohroj oang ngoahi, pwa koawoa poakmahk ipoi; 33 A da koawoa ke johpwa mahkoahngki pwilihoammwo, doahroar oai ne mahkoahng koawoa.’ 34 Doari nahmwarkiho inenin lioas, doari ih peiddoang papahu nehn kalpwuhj pwa ih en loklok oaroh ngehd ih en dupukla ah pwaipwanid ohroj.”

35 Doar Jesus pwa, “Ioar joangwa ma Joamoaiho nehnloange pirin wiahng kamwai, ma emen emen kamwai johpwa mahkoahng riah jang nehn ah mohngiong.”

## 19

### *Padahk doahr Mweipjoang in Pwoapwoaud*

1 Nehn en Jesus kadoarihla Ah sikoa mehpiwai, Ih injang Galilee inla nehn wein Judea oaloap Pillap Jordan. 2 Pokon koalik oau kaujla Ih, Ih kemwehuwihla irai wijahu.

3 Pharisee pwi indoa Ipoa, jong in lidipi Ih ki ahr peidek, nen irai idoak, “Imdoahr, asai Kojonneddo mweidoahng woal men en kak mweijang pahioa ki kahrpoa joah lipilpil?”

4 Jesus japoang irai, “Kamwai kahjikkoar wadek Puk Joarwi ma pwa jang oh sapin kawa, ‘Jounkapikpiko, wiahda armaj, woal apel li.’ 5 Koahs pel pwa, ‘jang in kahrpoahioauwe woal men pirin mweijang jamah apel inah ih pasoahng pahioahu, ara roahmenne paspene wiahla oau.’ 6 Ara ne johla wia roahmen a emennoar. Doari joh armaj men en kamweidpijoang da ma Koahs ne kapsahpene.”

7 Pharisee-ok idoak ipoa, “A amwda Moses ke kihda kojonneddo pwa woal men kak kihda kijinlikoau in kamweid, ih ken kak mweijang pahioahu.”

<sup>8</sup> Jesus japoang irai, “Moses mweidoahng kamwai en mweijang pahioamwai kan pwa amwai nohn koapsakai. A jang in sapdahu me johpwa kin wiawi. <sup>9</sup> A Ngoahi pwehng kamwai, ma woalmen mweijang pahioahu in kahrpoa oau ma jaudi kamwahl, a ih painkihla emen li sohrohr ih wiahda dipen kamwahl.”

<sup>10</sup> Nah Sohnpadahkkok pwehng Ih, “Ma ioar pirin doahr men nehn pwungen woal men apel pahioahu, doar mwehu en pwen joah pwoapwoaud.”

<sup>11</sup> Jesus japoang irai, “Jaudi ohroj kakkoang oaloahda padahkkouwe, araihok oar ma mweimweioang jang puwoa. <sup>12</sup> Pwa kahrpoahpwi mine ma kahrehda armaj johkak pwoapwoaudkihda. Epwi noaisikdi palwoarorari johpwa unjek; a epwi jang in arai leklekla, a epwi jang in pein injenarai arai johpwa nimen pwoapwoaud pwa en mwehuwoang Wein nehnloange. Ma emen kak oaloo padahkkouwe, a en oaloo.”

### *Jesus Kapaiahda Jeri Siksikpwi*

<sup>13</sup> Jerihpwi wijikdohng ipen Jesus pwa en kihdahng poah pohrai apel kapkapki irai, a sohnpadahkkok lipwoarehda armajjok. <sup>14</sup> Jesus pwehng irai, “Mweidoahng jerihkan en indoa Ipoai. Kamwai joah iroahdi irai, pwa Wein nehnloange ioar wein joangoan armaj pwiai.”

<sup>15</sup> Ih kihdahng poahk pohrai, doar Ih ken inla jang wijahu.

### *Mwahnkapw Koapwoahpwoa men*

<sup>16</sup> Anjoau kij mwahnkapw men indoa ipen Jesus idoak, “Jounpadahk, joangoan wihwia mwehu da ma ngoahi uhdahn wia pwa ngoahi en oaloahki mour joahsuk?”

<sup>17</sup> “Amwda koawoa ke idoak oang Ngoahi dahkij mwehu?” Jesus japoang. “Emen oar ma mwehu. Kapwaihahda kojoned kan ma koawoa nimen dilda nehn mour joahsuk.”

<sup>18</sup> “Kojoned dahpwi?” Woallo idoak.

Jesus japoang, “Joah kojukdi armaj; joah kamwahl; joah pirap; joah karaun likamw; <sup>19</sup> woaunki joamoamw apel inoamw; ipwilki mihn ipoamw doahroar oamw kin ipwilki pein koawoa.’ ”

<sup>20</sup> “Ngoahi ne kapwaihahda kojoned pwiai ohroj,” mwahnkappwo japoang. “Da ngoahi en pel wia?”

<sup>21</sup> Jesus pwehng ih, “Ma koawoa nimen unjekla, alwe noaskihla me ohroj koawoa anki, kioang dupkoa kan armaj joamwoahmwoa kan, oamw pai nehnloange nen koalikla; indoa pwilihla Ngoahi.”

<sup>22</sup> Nehn en mwahnkappwo rong lal pwiai, ih injinjuwedla, ken allaluhla. Pwa woal inenin koapwoahpwoa men ih.

<sup>23</sup> Doar Jesus pwehng nah sohnpadahkkok, “Ngoahi pwehng kamwai in mehlel: inenin apwal oang armaj koapwoahpwoa en dilda nehn Wein nehnloange. <sup>24</sup> Ngoahi en pel pwuroahng pwa: Apwal oang armaj koapwoahpwoa men en dilda nehn wein Koahs jang kamel men en dilda nehn pwokin si pas.”

<sup>25</sup> Nehn en sohnpadahkkok rong me, irai inenin pwuriamweikihla. “Doar inje kak mourla?” irai idoak.

<sup>26</sup> Jesus jipwoallahng irai, japoang, “Me johkak ipen armaj, a ipen Koahs me ohroj kak.”

<sup>27</sup> Doar Peter pwehng Ih, “Kamai ne kihdi me ohroj, kamai pwilihla koawoa. Dahkij kamai pirin anki?”

<sup>28</sup> Jesus pwehng irai, “Ngoahi pwehng kamwai in mehlel, pwa kamwai eijek roahmennen ma kin pwilpwili Ngoahi, kamwai pirin pwili mwindi nehn mwoalen kadeikko apel pwili kadeikda kainek eijek riau in Israel, anjoauwo ma Nihn-Armaj pirin mwindi nehn Ah mwoal linngo nehn Ah Mwei Kappwo. <sup>29</sup> Apel irai ohroj ma ne kihdi umwarai kan, riarai woal, riarai li, jamarai, inarai, nihrai jerihkan, japwarai



kan ki Ngoahi, pirin oaloo pehn epwiki koalikjang apel pwilihki mour joahsuk. <sup>30</sup> A armaj dir ma kin mijoa apkas pirin mwerinla, a armaj dir ma kin mwerin apkas pirin mijoahla.

## 20

### *Sohn Doadoahk in nehn Mwoaswelin Wain*

<sup>1</sup> “Wein nehnloange doahroar woal men ma inla inminjoang pwa ih en oaloo armaj in doadoahk nehn ah mwoaswelin wainno. <sup>2</sup> Ih pwungkihoang irai pwa ih en dupuk irai mwani silper oau rehn oau, ih kadarla irai en doadoahk nehn mwoaswelin wainno. <sup>3</sup> Ih pwuroahng inla nehn wijahn noasnoasso kiloak duwoau minjoanngo, ih pel kapangda epwi armaj onohn mwahl joh me irai wia. <sup>4</sup> Ih pel pwehng irai en inla doadoahk a ih en dupuk irai dahkij ma koanoahng. <sup>5</sup> Irai ken inla. A ih pel pwuroahng inla kiloak eijek riau apel kiloak jiluh, ih pel wia joanngohr ma ih wia inminjoanngo. <sup>6</sup> A injoausik, nimwennoar kiloak limoau ih pwuroahng inla wijahn noasnoasso, ih pel kapangda epwi armaj ma pel onnonohn mwahl. Ih idoak oang irai, ‘Amwda kamwai ke koauwehkihla amwai anjoau onnonohn mwahl, johpwa doadoahk rehn oauwe?’ <sup>7</sup> Irai japoang, ‘Pwa joh armaj nimen doadoahkki kamai.’ Woallo pwehng irai, ‘Kamwai inla pwili doadoahk nehn mwoaswelin wainno.’

<sup>8</sup> “Injoausikko woallo pwehng nah jounkouwahu, ‘Panginpene sohn doadoahk kan, koawoa dupukla irai, sapkihda irai ma indoa mwuhr kan oaroh lel arai kan ma sapin indoa.’ <sup>9</sup> Woal kan ma sapda doadoahk kiloak, emen oaloo mwani silper oau. <sup>10</sup> A anjoauwo ma irai ma sapda doadoahk mijoa indoahng oaloo dupkoarai, irai lemleme pwa irai nen oaloo koalik. A irai pel oaloo mwani silper oau emen emen irai. <sup>11</sup> Nehn irai oaloo dupkoaraihok, irai sapda lipahnedede jounmwoaswello pwa, <sup>12</sup> ‘Armaj pwiak doadoahk awa oauwoar, a kamai koakoahkla doadoahk pehn joauwo rehnnoauwe pokon pehn joauwo, a koawoa kioang kamai joangoan dopdop oauwoar!’ <sup>13</sup> Ih japoang emen irai, ‘Johpwa japwung oau ngoahi wiahng koawoa, kisa joah pwungkihpene pwa mwani silper oau rehnnoau? <sup>14</sup> Oaloo dupkoammwen, koawoa ken inla in umwoammwo. Pwa injenoai, ma ngoahi nimen dupukkoang iraihok ma indoa mwuhr doahroar oai dupuk oang koawoa. <sup>15</sup> Imdoahr, ngoahi joah anki pwungin doadoahkki pein noai mwanihkaai oang pein injenoai? Ke koawoa pihrinki ki oai kadek?’ ”

<sup>16</sup> Jesus kadoarikhla Ah sikesik, pwa, “Armaj in mwuhr pirin mijoahla, a armaj in mijoa pirin mwerinla.”

### *Kajiluh in en Jesus ah Kohpda doahr Ah pirin Mehdi*

<sup>17</sup> Nehn en Jesus allaluhdahlahng Jerusalem, Ih kasohrohrihla nah sohnpadahk eijek roahmenno wijahkij nehn allo, Ih pwehng irai, <sup>18</sup> “Kamwai kidal pwa kisai allaluhdahlahng Jerusalem, wijahwa ma Nihn-Armaj pirin likliklahng ipen jamwrou laplap apel jounpadahk in Kojonned kan. Irai pirin kadeikda Ih pwa Ih en kojkojdi. <sup>19</sup> Irai pirin pangla Ih ipen mihn likin kan ma pirin wiahla mihn kapis iparai, pwa en pokpok apel kalohpwuhla; in rehn kajiluh ih pirin iejda.”

### *Poakpoak in Nohno men*

<sup>20</sup> Doari, pahien Zebedee indoa ipen Jesus; pwilihkihla nah jermwein roahmenno, dairukdi mwohn Ih, wia ah poakpoak.

<sup>21</sup> “Da koawoa anahne?” Jesus idoak.

Liho japoang, “Inoauki oang ngoahi pwa noai jermwein roahmenne en pwili mwindi ipoamw in oamw loop moaun apel oamw loop meing nehn dohioammwo, ma koawoa pirin nahmwarkihla.”

<sup>22</sup> Jesus japoang ara, “Kamwa jehjoa pwa da kamwa poakpoakihen! Kamwa kak nim jang nehn mwoak in loklok ma Ngoahi ne pirin ken nim?”

Ara japoang, “Kama kak.”

<sup>23</sup> “A doar mwehu kamwa pirin pwili nim nimoai mwoakke,” Ih pwehng ara. “A joh oai oang pilda pwa inje pirin mwindi loop moaun apel loop meing in Ngoahi. Wijahpwiak ne kileldi oang iraihok ma Joamoaiho ne koaunopda.”

<sup>24</sup> Nehn en sohnpadahk eijekko rongda me, irai inenin lioas oang riariho. <sup>25</sup> A Jesus panginpene irai ohroj, pwehng irai, “Kamwai kidal pwa koaun in armaj rosros kan kin anki manman in koaunda nihrai armaj kan, laplap kan ioar kin anki manman ohroj. <sup>26</sup> A ih jehpirin doahr me ipamwai. Inje ma nimen laplap ioar ih pirin papah ohroj; <sup>27</sup> a inje ma nimen keiou ioar ih pirin wiahla nihmwai lidu — <sup>28</sup> doahroar Nihn-Armaj, ma indoa jaudi pwa armaj kan en papah, a Ih en papah armaj ohroj apel mihndahkihla Ah mour pwa en koamoaurla armaj dihrdir.”

### *Jesus Kemwehuwihla Woal Majkun Roahmen*

<sup>29</sup> Nehn en Jesus apel Nah sohnpadahkkok injang Jericho, pokon koalik oau kauj mwerirai. <sup>30</sup> Woal majkun roahmen mwindi imwin allo rongda pwa Jesus allaluhla wijahu, ara sapda rahrahu, “Maing, Koawoa ma nihn David! Jeuweje kama!”

<sup>31</sup> Pokonno woarwoarihda ara, pwehng ara en nennenla, a ara kapwa koalikla ara rahrahu, “Maing, nihn David! Jeuweje kama!”

<sup>32</sup> Jesus uhdi, pangin ara en indoa, “Da kamwa nimen Ngoahi en wiahng kamwa?” Ih idoak ipara.

<sup>33</sup> Ara japoang, “Maing, kama nimen kapangda wija!”

<sup>34</sup> Jesus ipwilkihda ara, Ih pukkoang mijarahk. Anjoauwohr ara ken kak kapang wija. Doar ara ken kaujla ih.

## 21

### *Dilda Jerusalem ki Rojon in Kalwehdi*

<sup>1</sup> Nehn en Jesus apel Nah sohnpadahkkok koaroannoang Jerusalem, irai lel Bethphage pohn Dolin Olip. Jesus kadarla sohnpadahk roahmen mijarai <sup>2</sup> pwehng ara “Kamwa alwe nehn kahnihmw en mijoahn, kamwa pirin kapangda ejel men pirapirdi, pwilihki nah pwinihk siksik men mine ipoa; Kamwa lapwadda ara ukdo Ipoai. <sup>3</sup> A ma emen idoakkoang kamwa mehkij, kamwa pwehng ih, ‘Koaunno anahne ara,’ nehn anjoauwohr ih nen mweidoahng kamwa.”

<sup>4</sup> Mehpwiai wiawi pwa en pwoaida da ma joukohppo pwa:

<sup>5</sup> “Pwehng kahnihmw Zion,

Kapang, oamw nahmwarki allalu indoa ipoamw!

In aksiksik, mine pohn ejel lihmen.

Mine pohn nihn ejel pwinihk pwulopwul men.”

<sup>6</sup> Sohnpadahkkok ken inla wiahda me ohroj ma Jesus pwehng ara. <sup>7</sup> Ara ukdo ejello apel nah pwinihkko, kihdihoang ara likkoauwok pohra; Jesus doauda mwindi puwoa.

<sup>8</sup> A pokon koalik oau piroakihdi arai likkoauwok nehn allo, a epwi pel poaloahdi rahn suhkoa piroakihoang nehn allo. <sup>9</sup> Pokonno ma alu mwohn Jesus apel ihr ma alu mwerin, sapkihda ahr koaul rahrahuki, “Kapnga Ih ma kijehn David! Koahs en kapaida Ih ma indoa in oadoan Koaunno! Kapnga Koahs!”

<sup>10</sup> Nehn en Jesus dilda nehn Jerusalem, Kahnihmwo pwon mwoakidkihda Ah dilda. “Inje woal mene?” irai idoak.

<sup>11</sup> A pokonno kin japoang irai, “Ih ioar Joukohp Jesus, jang Nazareth wein Galilee.”

### *Jesus Dilda nehn Umw Joarwiho*

<sup>12</sup> Jesus inla dilda nehn Umw Joarwiho, kajroahjang loaloa irai ohroj ma noaski apel dopdop koapwoa. Ih ukuddi en sohnkawiliali mwanihok arai sehpillok apel koauwehla dohn noaski mwureiok. <sup>13</sup> Ih pwehng irai, “Ne insingdi nehn Puk Joarwi ma Koahs pwa, ‘Umwoaie pirin adanki umwen kapkap,’ a kamwai ne wiahkihla dohn jounpirap!”

<sup>14</sup> Armaj majkunpwi apel mwoasorpwi indoa ipen Jesus nehn Umw Joarwiho, Ih kemwehuwihla irai. <sup>15</sup> Jamwrou laplappok apel jounpadahk in Kojonneddo kan lioaskihla irai kapang manman kapwuriamwei pwiai apel rong en jerihok nehn Umw Joarwiho rahrahuki, “Kapnga oang Ih ma kijehn kadaudok in David!”

<sup>16</sup> Irai idoak oang Jesus, “A koawoa rong dahkij jeri pwiai pwahpwahpwa?”

“Eh Ngoahi rong,” Jesus japoang. “Kamwai kahjikkoar wadek Puk Joarwi? Ma pwa ‘Koawoa ne oaloa kaping unjek jang in oawoan jerihkan apel jerihkan ma kin dihdi?’ ”

<sup>17</sup> Jesus injang iparai, injang nehn kahnihmmwo inla Bethany, wija Ih koammoaldi inpwonngo.

### *Jesus Kariahla Suhkoa Pas*

<sup>18</sup> Inminjoang in rehnno, nehn en Jesus japahllahng in kahnihmmwo, Ih mwakohkohda <sup>19</sup> a Ih kapangda suhkoa fig pas imwin allo. Ih inla pwa Ih en kapang ma mine wah, joh wah Ih kapang, a pwen soahr doari. Doar Ih pwehng suhkoahu, “Koawoa johla pirin pwuroahng uhwa!” Anjoauwohr suhkoahu mengda.

<sup>20</sup> Sohnpadahkok kapang me, irai inenin pwuriamweikihla, irai ken idoak, “Imdoahr suhkoa pase kak pispisinnoar mengda?”

<sup>21</sup> Jesus japoang, “Ngoahi pwehng kamwai in mehlel, ma kamwai kin pwojon johpwa peikajal, kamwai kak wiahda da ma Ngoahi wiahng suhkoa pase; a jaudihoar mehwehr doari, kamwai pel kak pwehng dolloauwe, ‘Sohjang men, pein peiddihlahng koawoa nehn jeddo,’ a pirin pwoaida. <sup>22</sup> Ma kamwai kamehlele, kamwai nen oaloa da ma kamwai poaki nehn amwai kapkap.”

### *Peidek doahr en Jesus Pwungin wiahda Manman*

<sup>23</sup> Nehn en Jesus japahlla nehn Umw Joarwiho, Ih pwuroahng sapda padahk, a jamwrou laplappok apel epwi koaun pwi indoa Ipoa wiahng peidek pase: “En inje manman ma Koawoa wihwiahki joang pwiak? Inje ma kioang Koawoa manman oauwe?”

<sup>24</sup> Jesus japoang irai, “Ngoahi pirin pel idoak oang kamwai peidek oau; ma kamwai japoangla Ngoahi, a, Ngoahi pirin pwehng kamwai nehn en inje manman ma Ngoahi wihwiahki joang pwiak. <sup>25</sup> John jounpoapdajj kihjang ia ah manman in poapdajj armaj? Jang nehnloange ke jang ipen armaj?”

Irai sapda akmaipene nehn pwungarai pwahpwahpwa, “Ma kisai japoangki, ‘Jang nehnloange,’ Ih nen pwehng kisai, ‘A amwda kamwai ke joah kamehlele John?’ <sup>26</sup> A ma kisai japoangki, ‘Jang ipen armaj,’ me kepperroang kisai, pwa armaj ohroj kin wiahki John joukohp men.” <sup>27</sup> Doar irai japoangla Jesus, “Kamai jehjoa.”

A Jesus wud japoang irai, “Doar Ngoahi pel jehpirin pwehng kamwai jang in en inje manman ma Ngoahi wihwiahki mehpwiai.”

### *Karajraj in Jermwein Roahmen*

<sup>28</sup> “A da kamwai lemlemehioang karajraj pase? Woalmen mine ma nainki jermwein roahmen, Ih inla ipen jermwein koalikko, ih pwehng, ‘Noai jeri, inla doadoahk nehn mwoaswelin wainno rehnnoauwe.’ <sup>29</sup> Jermweinno japoang jamahu pwa, ‘Ngoahi kia,’ a mwuhr ih koluhla, ukudla ah lamlam ih inla nehn mwoaswelin wainno.

<sup>30</sup> Mwahmwahu pel inla ipen jermwein siksikko pwehng joangohr. Jermwein

siksikko japoang jamahu, 'Eh, ngoahi pirin inla.' A ih johpwa inla. <sup>31</sup> Inje in jermwein roahmenno ma kapwaihahda injenen jamahu?"

Irai japoang, "Jermwein koalikko."

Doar Jesus pwehng irai, "Ngoahi pwehng kamwai in mehlel, pwa jounrik daksissok apel lihn noaski palwoaroaraihok nen dilda nehn Wein Koahs mijen kamwai. <sup>32</sup> Pwa John jounpoapdajj indoahng kamwai, pwa en kajalehng kamwai alin mourro, kamwai ken joah kamehlele ih, a jounrik daksissok apel lihn noaski palwoaroaraihok kamehlele. A nehn amwai kapang mehpiwak wihwiawi kamwai johpwa nimen ukudla amwai lamlam, kamehlelehla Ih.

### *Karajraj in Sohn Apwali nehn Mwoaswel in Wainno*

<sup>33</sup> "Kamwai pel rong apkas karajraj: Mine jounmwoaswel men ma poadokdi mwoaswelin wain oau. Ih ken kelihpene, jaripda dohn ungod wain oau loaloa, kouda wijahn iroir oau. Ih kioang armaj en apwali ih ken jeiloakla nehn wai.

<sup>34</sup> Ne lel anjoau in doddol wehn mwoaswelin wainno, ih ken kadarla nah liduhpwi ipen sohn apwali mwoaswellok pwa en oaloo pwoaijoa jang nehn mwoaswello.

<sup>35</sup> A sohn apwalihok nehn mwoaswello koldi liduhwok, pokihjili emen, a emen irai kojukdi, a emen irai kasoahki sakai. <sup>36</sup> Doari woallo ma anki mwoaswello pel pwuroahng kadarla liduhpwi ma dir jang pwihn keiouwo. Sohn apwalihok wiahng irai joangohr. <sup>37</sup> Oh mwuhr ih kadarla nah jermweinno iparai, lemleme, 'Mehlel irai uhdahn pirin wounki noai jermweinno.'

<sup>38</sup> A nehn en sohn apwali nehn mwoaswello kapang jermweinno, irai pwahpene nehn pwungarai, 'Ioar nihn jounmwoaswello nah jermweinwa me; koa, kisai kojukdi ih, kisai ken wud japwankihla jappwe!' <sup>39</sup> Doari irai jipoardi ih, kerpwihla likin mwoaswello, irai kojukdi ih."

<sup>40</sup> Jesus idoak iparai, "Anjoauwo ma jounmwoaswello pwurdo, da ih nen wia oang sohn apwali nehn mwoaswello?"

<sup>41</sup> A irai japoang, "Ih uhdahn pirin kojukdi armaj nauna pwiai. Ih kioang epwi sohn apwali sohrohr nehn ah mwoaswelin wainno, ma uhdahn pirin kioang pwoaijoa anjoau ma koanoahng."

<sup>42</sup> Doar Jesus pwehng irai, "Da, kamwai kahjikkoar wadek da ma Puk Joarwi pwa? 'Sakaiho ma jounkou umw kan ne kerpwihla, wud wiahla sakain pwukoakoaimw!

KOAUNNO ma wiahda me;

mehkij ma kapwuriamwei mehlel oang kisai.'

<sup>43</sup> "Ioar Ngoahi pwehngkihoang kamwai, pwa Wein Koahs pirin liklikjang kamwai liklikkoang oau wei ma nen kak kapwarahda wehn Wein Koahs. <sup>44</sup> [Armaj men ma pirin kipdihoang pohn sakaihoauwe, ih pirin kipdihoar mwoarpjoang, a ma armaj men ma sakai oauwe pirin kipdihoang puwoa pel nen kamwisihdi emen ma ih kipdihoang puwoa, ih pirin lelloar kamwisihpene.]"

<sup>45</sup> Nehn en jamwrou laplappok apel Pharisee-ok irai rongda en Jesus karajraj pwiak, irai lioaskihla pwa Ih karajrajki irai. <sup>46</sup> Doar irai jong en joalihdi ih, a irai mijik pokon in armajjok, pwa irai kin wiahki Jesus joukohp men.

## 22

### *Sikesikin Kamdipwin Koapwoapwoaud.*

<sup>1</sup> Jesus pel pwuroahng doadoahkki karajraj nehn a sikesik oang armajjok, Ih pwa, <sup>2</sup> "Wein nehnloange doahroar nahmwarki men ma koaunopda kamdipwin koapwoapwoaud oau oang nah jermweinno. <sup>3</sup> Ih kadarla nah liduhwok pwa en pakairkihoang irai ma oaloo lukko en indoa; a irai johpwa nimen pwili sowoahda.

<sup>4</sup> Doari, ih pel kadarla epwi lidu en pwehng irai, 'Kamdippwe ne onopda, uduken kahu pwulopwul kan ne kojkojdi. Me ohroj ne onopda. Irai en ken indoa!' <sup>5</sup> A Iraihoek ma luk wiawihoang johpwa soahk, a pwen wihwiah pein irai doadoahk, emen inla nehn ah mwoaswel, emen nehn ah stohwa. <sup>6</sup> Epwi koldi nah jounpakairrok koalkoa, apel kojukdi irai. <sup>7</sup> Doari, nahmwarkiho inenin lioasla. Ih kadarla nah jounpeihok en kojukdi iraihoek ma kojukdi nah jounpakairrok apel okojda arai kahnihmmwok. <sup>8</sup> Ih pel pwehng nah liduhwok, 'Kamdipwin koapwoapwoaudde ne onopda, a irai ma luk wiawihoang joah warroang pwili. <sup>9</sup> Apkas inla nehn al kan lukehdo ohroj ma kamwai kapangda.' <sup>10</sup> Doar liduhwok ukdo ohroj ma irai suhwoang, armaj mwehu apel armaj nauna doahr oauwoar, kamdippwo ken dirkihla armaj.

<sup>11</sup> "A anjoauwo ma nahmwarkiho indoahng suhwoang armajjok, ih kapangda woal men ma joah mine nehn likkoauwin koapwoapwoaud. <sup>12</sup> 'Oai pirien, indoahr oamw dildo nehn ummwe johpwa likkoauki likkoauwin koapwoapwoaud?' A woallo johpwa japoang. <sup>13</sup> Doari, nahmwarkiho pwehng irai ma jeujeuweje ih, 'Piroahdi poah apel ehn kamwai kerpwihla ih likin wija rosso, wijahu ma joang apel keikeikeisakai.' "

<sup>14</sup> A Jesus koarjoahla karajrajjo pwa, "Dir armaj oaloo lukko, a epwihoar pilpilda."

### *Daksis oang Caesar*

<sup>15</sup> Pharisee-ok suhpene pwa irai en koajoanehdi doahr irai en lidipihdi Jesus ki mehk ma Ih pwa, pwa irai en kak kadipoahki Ih. <sup>16</sup> Irai kadarlahng Ih epwi nihrai sohnpadahkkok pwilihki epwi nihn Herod sohn doadoahkkok, en idoak oang Ih peidek oauwe: "Jounpadahk, kamai kidal pwa Koawoa armaj mehlel men. Koawoa padahkki kupwur en Koahs oang armaj johpwa kaspoahki da wiawihoang Koawoa. Koawoa johkin lipilpilki armaj. <sup>17</sup> Apkas pwehng kamai da Oamw lamlam oang me: Pwen pwung en dupuk daksis oang Caesar in Rome ke joah?"

<sup>18</sup> A Jesus pwen kidal arai lamlam nauna, Ih pwa, "Mwalaun kamwai! Amwda kamwai ke jongjong in lidipihdi Ngoahi? <sup>19</sup> Kajalehng Ngoahi oau mwani silperren ma kamwai kin dupukki daksis!"

Irai wahdohng Ih mwani silper oau, <sup>20</sup> a Ih idoakkoang irai, "Mijen apel oadoan inje me pohn sende?"

<sup>21</sup> "Caesar," irai japoang.

"Doar ioar," Jesus pwa, "Dupukkoang Caesar dahkij ma ah. A dupukkoang Koahs dahkij ma Ah."

<sup>22</sup> Nehn irai rongda me, irai pwuriamweikihla, irai ken japhlpjoang.

### *Peidek Doahroar Iejda Jang Mehdi*

<sup>23</sup> Rehnnohr Sadducee-pwi indoa ipen Jesus (Ioar irai joangoan armajkoa ma kin siko pwa armaj mehdi kan jehpirin iejda). Irai pwa armaj jehpirin iejda jang mehdi. <sup>24</sup> Irai pwehng Jesus, "Maing Jounpadahk, Moses pwa, ma woal men mehdi a joh nah jeri, riah woal pirin wud painkihla liho pwa en wiahda kadaudokoan woal mehdiho. <sup>25</sup> Doari, riari oau kin minmine ipamai, woal ijimen. Minnohr koalik pwoapwoaudla oaroh mehdi jang pahioahu a joh nihra jeri. A in doahroar siahk oauwe riah woal pel painkihla lihohdiho. <sup>26</sup> Joangohr pel wiawihoang karoahmenno, apel kajilmenno. Allaluhdi oaroh lel min kaijimenno. <sup>27</sup> A oh mwuhr lihwa mehdi. <sup>28</sup> Doari nehn rehno ma armaj mehdi kan pirin iejda, inje in min ijimenno ma ioar pirin pahien liho, nehn irai ohroj ne painkihda ih."

<sup>29</sup> Jesus ken japoang irai, "Kamwai inenin japwung, kijehn amwai johkin woahwoahki Puk Joarwi apel manman in Koahs. <sup>30</sup> Anjoauwo ma mehdihoek iejda, irai pirin doahrla sohnloang in nehnloange, jehpirin pwoapwoaud. <sup>31</sup> A oang in irair oauwe, kamwai johkin wadek dahkij Koahs pwehng kamwai? Ih pwa, <sup>32</sup> 'Ngoahi



ioar Koahs in Abraham, Koahs in Isaac, apel Koahs in Jacob.' Ih ioar Koahs in armaj mour, jaudi armaj mehdi."

<sup>33</sup> Nehn en pokonno rong Ih, irai ken pwuriamweikihla Ah padahk.

### *Kojonned ma Keiou Kajampwal*

<sup>34</sup> Nehn en Pharisee-ok rongda pwa Jesus ne kasukihdi en Sadducee-ok ahr peidekkok, irai ken pokonpene. <sup>35</sup> Emen in irai, jounpadahk in Kojonneddo nimen lidipihki Jesus peidek oau, <sup>36</sup> "Jounpadahk," ih idoak, "ia kojonned wa ma keiou kajampwal nehn Kojonneddok?"

<sup>37</sup> A Jesus japoangki, " 'Koawoa en ipwilki Koounno oamw Koahs ki oamw mohngiong ohroj, ngenimwen ohroj, apel oamw lamlam ohroj.' <sup>38</sup> Me ioar kojonned wa ma keiou koalik apel kajampwal. <sup>39</sup> A kariau in kajampwal ma pel doahroar me: 'Ipwilki mihn ipoamw doahroar oamw ipwilki pein koawoa.' <sup>40</sup> Kojonned in Moses kan ohroj apel padahk in joukohp kan ohroj poahjoanda pohn kojonned riau pwiai."

### *Peidekki doahr Messiah?*

<sup>41</sup> Nehn en Pharisee-ok pokonpene; Jesus idoak oang irai, <sup>42</sup> "Ia amwai lamlam oang Messiah? Kijehn kadaudokin inje Ih?"

Irai japoang, "Ih kijehn kadaudokin David."

<sup>43</sup> Jesus pel idoak, "Amwda Ngenin Koahs ke audohkihda David pwa Ih en panginki 'Oai Kooun.'

<sup>44</sup> 'Koounno pwehng Oai Kooun:

Koawoa en mwindi oang in loap moaun in Ngoahi,

Oaroh Ngoahi kihdihoang oamw imwinsihsi kan pehn pwoalkoamwen kan.'

<sup>45</sup> Ma David panginki ih 'Kooun,' imdoahr ih en kak wia kadaudokin David?"

<sup>46</sup> Johpwa emen kak japoangki Jesus mehkij; Jang rehnno inla, johla emen nimen idoakkoang Ih mehkij.

## 23

### *Jesus Kalkehjang Irai jounpadahk in Kojonned apel Pharisee kan.*

<sup>1</sup> Doar Jesus kapahrak oang pokonno apel Nah sohnpadahkkok, <sup>2</sup> "Jounpadahk in kojonned kan apel Pharisee-ok ioar irai anki manman in kawoahwoa kojonned in Moses. <sup>3</sup> Doari, kamwai uhdahn pirin pel peikkoang apel kapwaihahda me ohroj ma irai kin padahkihoang kamwai; a kamwai johpwa japjang arai wihwia kan. Pwa irai johpwa kin kapwaihahda dahkij arai kin kapahrakkihwe. <sup>4</sup> Irai kin piroahdihoang wijik soausoau pohn armaj. Irai johkin kamwoakid apas jandin poahrai pwa en jeuwejhda wijik soausoau pwiai. <sup>5</sup> Me ohroj ma irai kin wia, irai wia pwa en janjal mwehu mwohn armaj. Kamwai soahk mwehu koalik in koakon kan ma mine in soamwoarai apel in poahrai ma iren Puk Joarwi kan mine loaloa apel roairoai in mihn pirapirin arai likkoauwo.

<sup>6</sup> "Irai perenki mwindi in moangoan sehphil kan nehn kamdipw apel mine nehn jeia ma keiou janjal nehn jinakoke kan! <sup>7</sup> Irai perenki armaj en kin soahk irai pohn al kan, irai pel perenki armaj en panginki irai 'jounpadahk.' <sup>8</sup> Kamwai joah kin nimen armaj en panginki kamwai 'Jounpadahk,' pwa kamwai ohroj doahroauwoar, apel anki Jounpadahk mennoar. <sup>9</sup> Pel johpwa panginki emen pohn jampah 'Mwahmwa,' pwa Jamamwai emennoar doari ma mine nehnloange. <sup>10</sup> Kamwai joah pel nimen emen en panginki koawoa koaun, pwa amwai koaun mennoar ioar 'Christ.' <sup>11</sup> Minwa ma keiou laplap nehn pwungamwai kan en wia sohn papah. <sup>12</sup> Pwa emen ma nimen laplap pirin siksikla, a irai ma kin aksiksik pirin laplapla."

### *Jesus Kariahla arai Mwalaun*



13 “Ia woahr apwal oang kamwai jounpadahk in kojoned kan, apel Pharisee kan! Mwalaunpwi kamwai! Pwa kamwai kin risingdi jang wanihmw in Wein nehnloange, a pein kamwai joh kin dilda ke mweidoahng armaj kan ma kin engdehn in dilda.

14 [“Ia woahr apwal oang kamwai jounpadahk in kojoned apel Pharisee kan! Mwalaunpwi kamwai! Kamwai kin jerkihjang umwen liohdi kan nehn amwai kin lioajoahjki amwai kapkap roairoai. Ioar mehwa kamwai nen oaloahki koaloklok koalik.]

15 “Ia woahr apwal oang kamwai jounpadahk in kojoned apel Pharisee kan! Mwalaunpwi kamwai! Kamwai kin joarjoaroakjili nehn jed apel kosehwe weipwi pwa kamwai en ukuddoang lamlamin armaj emen oang in amwai lamlam in mihn Jew; nehn ah ne lohdi kamwai kin wiahng ih en warroang inla nehn ehl pehn riau koalik jang kamwai.

16 “Ia woahr apwal oang kamwai jounkaweid majkun kan! Kamwai kin padahkihoang armaj kan ma emen ma kin kahukihla Umw Joarwiho johkin pwukoahki.

17 Armaj majkun pweipweipwi kamwai! Ia mehwa kajampwal in kohl ke Umw Joarwi ma kin kajarwihla kohl. 18 Kamwai pel pwa ma emen ma kahukihla Mwoal Joarwiho, jehpirin pwukoahki; a ma armaj men ma kin kahukihla mihn meiroang in pohn mwoallo ih ioar pwukoahki ah kahula. 19 Ia woahr amwai majkun! Mindahioau ma kajampwal, meiroang ke mwoallo ma kajarwihla meiroanngo? 20 Doari, armaj men ma kin kahukihla mwoal joarwihoau, ih kin kahukihla mwoal joarwiho apel me ohroj ma mine puwoa. 21 Nehn en emen kin kahukihla Umw Joarwiho, koawoa kahukihla Umw Joarwiho apel Koahs, ma mine loaloa. 22 Nehn en emen kin kahukihla nehnloange, ih kin kahukihla mwoalen Koahs apel Ih ma mine puwoa.

23 “Ia woahr apwal oang kamwai jounpadahk in kojoned apel Pharisee kan! Mwalaunpwi kamwai! Kamwai kin meiroangki oang Koahs eijek kij oau in amwai koapwoahn jampah, apel mihn kioang nimen mwinge ma doahroar mint, dill, apel cumin, a kamwai johkin peikkoang padahk kajampwal kan in kojoneddo ma doahroar pwung paiai, kalahngan apel mehlel. Ioar mehpwiai ma kamwai uhdahn pirin kapwaihahda apel pwilihkihoar minpwiok. 24 Jounkaweid majkunpwi kamwai! Kamwai likihla loang jang nehn nimamwai pil pwadoar kamwai japwungla johploahdi kamel?

25 “Ia woahr apwal oang kamwai jounpadahk in kojoned kan apel Pharisee kan! Mwalaunpwi kamwai, kamwai kin kamwkelehda likin nihmwai mwoak apel pileis, a loaloa dirkihla dipwjoau ma kamwai kin pein oaloahdi jang in amwai kin roprop oang pein kamwai. 26 Pharisee majkun men koawoa! Keiou kamwkelehda nehn mwoakko mijkoalkoal, a likin nen pel mwakelkelda.

27 “Ia woahr apwal oang kamwai jounpadahk in kojoned apel Pharisee kan! Mwalaunpwi kamwai! Kamwai kin mwehuki mwakelkel in likin joaujoau, a loaloa dir in sihn armaj mehdi apel me kajaus ohroj. 28 Pel doahr Kamwai, kamwai jong en doahroar armaj pwung likimwaikan, a loaloa mohngiongimwai kan dirkihla widng apel mwoarjuwed.

### *Jesus Kohpda doahroar Irai pirin Koaloklok*

29 “Ia woahr apwal oang kamwai jounpadahk in kojoned apel Pharisee kan! Mwalaunpwi kamwai! Kamwai kin wiahda joaujoau mwehu oang joukohp kan apel kalingihda joaujoau in armaj mwehu kan; 30 kamwai kin pwa, ‘Ma kamai kin pwili mine nehn mwein jamasaihok, kamai nen jehpwili kojukdi joukohppok.’

31 Kamwai ne pein kadehdehda pwa kamwai kijehn kadaudok en iraihok ma kojukdi joukohppok. 32 Kamwai doaudioaula kadoarihla dahkij ma jamamwaihok ne sapkihda. 33 Sinekpwi kamwai, ipwihpw in sinekpwi kamwai! Kamwai

lemleme pwa kamwai kak pisjang kadeik in nehn ehl? <sup>34</sup> A doar Ngoahi pwehng kamwai pwa Ngoahi pirin kadardohng kamwai joukohppwi, woal loalkoangpwi, apel jounpadahkpwi; kamwai pirin kojukdi epwi, kalohpwuhla epwi, poki epwi nehn amwai jinakoke kan apel kauj jang irai nehn koaujoan kan. <sup>35</sup> Doari, imwlahn mehpwiai, koaloklok pirin aluhwoang kamwai pwa jang in amwai kojukdi armaj ma joh diparai; sapda jang Abel lel kojkojdihn Zechariah nihn Berechiah, ma kamwai kojukdi nehn pwungen Umw Joarwiho apel mwoal joarwiho. <sup>36</sup> Ngoahi pwehng kamwai in mehlel pwa koaloklok in kojukdi armaj pwiai pirin aluhwoang armaj in rehn oauwe!”

### *En Jesus Ipwil oang Jerusalem*

<sup>37</sup> “O Jerusalem, Jerusalem! Koawoa ma kin kojukdi joukohp kan apel kasoahki sakai jounpakairrok ma Koahs kadardohng koawoa! Pehn doapoa Ngoahi nimen jupwurpene nihmw jerihkan doahr jummwa pein men kin kihpene nah pwinihk kan pehn poah, a koawoa joah nimen mweidoahng Ngoahi! <sup>38</sup> A doar, oamw Umw Joarwihn pirin soahnda johla sowoa. <sup>39</sup> A Ngoahi pwehng koawoa me, koawoa nen johpwa pwuroahng kapang Ngoahi oaroh koawoa en pwa ‘Koahs en kapaiahda Ih ma indoa in oadoan Koounno.’”

## 24

### *Jesus Sikoa Doahr Ohlahn Umw Joarwiho*

<sup>1</sup> Nehn en Jesus japjapahljang Umw Joarwiho, Nah sohnpadahkkok kajalehng Ih doahroar mwomwen Umw Joarwiho. <sup>2</sup> A Ih pwehng irai, “Kamwai kapang mwewuhi mehpwiai ohroj. Ngoahi pwehng kamwai in mehlel, joh oau sakai pirin luhwoahdi nehn dohiah, ohroj pirin mwoardi.”

### *Apwal apel Loklok kan*

<sup>3</sup> Nehn en Jesus mwindi pohn Dolin Olip, Nah sohnpadahkkok indoa Ipoa in rir, “Pwehng kamwai, pwa ngehd mehpwiai pirin wiawi, a kilel dahpwi ma pirin kajalehda Oamw anjoau in japahl do apel imwin jampah.”

<sup>4</sup> Jesus japoang irai, “Kamwai kanaihoahng kamwai pwadoar armaj kapweipweidi kamwai. <sup>5</sup> Armaj dir pirin indoa in oadoaioa pwa, ‘Ngoahi ioar Messiah!’ Irai pirin kapweipweidi armaj dir. <sup>6</sup> Kamwai pirin rong rongin mahwin pirin wiawi wija koaroan apel doh, a joah majpwehkda. Pwa mehpwiai uhdahn pirin wiawi, a jaudi ioar imwin jampah me. <sup>7</sup> Wei kan pirin mahwin pene nehn pwungarai. Japw kan pirin uhpene nehn pwungarai. Wija ohroj lehk koalik apel roarroarin japw pirin. <sup>8</sup> A mehpwiai ohroj pwen doahroar sapdakoan moadoakin noaisik.

<sup>9</sup> “Doar kamwai pel pirin joaldi apel, kihelahng koaloklok apel kojkojdi. Sohn wei ohroj nen lioassoangda kamwai pwa Ngoahi. <sup>10</sup> Nehn anjoauwo dir pirin kerpwihla ahr pwojon, epwi pirin pangla, a irai pirin pel lioas pene nehn pwungarai. <sup>11</sup> A doar, joukohp likamw dir pirin pel pwokda, kapweipweidi dir armaj. <sup>12</sup> Me nauna pirin dirla nehn wijahkan, limpoak in armaj dir pirin siksikla. <sup>13</sup> A inje ma kolkol oaroh lel imwin pirin mourla. <sup>14</sup> Apel Rongmwehu in Weiho pirin padahk nehn jampah pwon, pwa armaj ohroj en rong; a imwin jampah kapwa leldo.

### *Janjal Kamajpwehk Naunahu*

<sup>15</sup> “Kamwai pirin pel kapang Janjal Kamajpwehk Naunahu ma Joukohp Daniel ne kohpda. Ih pirin uhda nehn wija joarwiho.” (Ma emen wadek me, en woahwoahki!) <sup>16</sup> “Doar irai ma mine Judea en kaudahla pohn dollok. <sup>17</sup> Ma emen ma mine pohn umwahu en johpwa doaudihla nehn umwahu pwa en oaloo mehki. <sup>18</sup> Emen ma mine nehn japw, en joah pwurla pwa en oaloo ah joakid. <sup>19</sup> Ia woahr apwal oang li

lijaian apel nohnohk ma kadihdi jeri nehn anjoauwo. <sup>20</sup> Kamwai poaki ipen Koahs pwa amwai kaula in pisle en joah wiawi anjoau in kopou ke Sabbath. <sup>21</sup> Pwa apwal in anjoauwo pirin koalik jang apwal ma kin wiawi jang mehj leldo apkas; pel joh mehkij pirin doahroar jang me inla. <sup>22</sup> Koahs ne kajipidihla rehnnok; pwa ma Ih johpwa wia me, joh armaj emen pirin pisle. Pwa nah armaj pilpil kan ioar kahrehda ih pirin kajipidihla rehnnok.

<sup>23</sup> “Doari, ma emen pwehng kamwai, ‘Kapang, ioar Messiah wa me,’ ke ‘Ih o,’ johpwa kamehlele. <sup>24</sup> Messiah likamw apel joukohp likamw pirin pwokda wia manman kapwuriamei pwa en kapweipweidi nihn Koahs armaj pilpil kan, ma kak. <sup>25</sup> Kamwai rong, pwa Ngoahi ne pwehng kamwai mwohn mehpwiai pirin wiawi.

<sup>26</sup> “Doar ma armaj pwehng kamwai, ‘Kapang, Messiah mine nehn allo!’ — joah inla kapang. Ke, ‘Kapang, ih oakkoakkoak nehn ummwo!’ — joah kamehlele. <sup>27</sup> Nihn-Armaj pirin indoa doahroar joarom ma kin kamaramihda mijen loannge pwon.

<sup>28</sup> “Vulture kin pokonpene wija ma mahn ke palwar mehdi kin mine.”

### *Indoahn Nihn-Armaj*

<sup>29</sup> “Mwerin rehn apwal koalikkok, Joauwo pirin rosia, johnpwonngo johla maramin, ujuhwok pirin kipdi jang mijen loannge, apel manman in nehnloanngé pirin mwoakidda jang nehn dohiarai. <sup>30</sup> A doar, kilel in Nihn-Armaj Ah pirin indoa pwokda mijen nehnloanngé, a kadaudok in jampah ohroj pirin jong nehn irai pirin kapang doahroar Nihn-Armaj Ah pirin alu indoa pohn koasoau in mijen loanngé in sihkei apel ling koalikkok. <sup>31</sup> Ngilen jowi koalik oau pirin wiawi, a Ih pirin kadarla Nah sohnloanngé kan wija ohroj in jampah jang in palimese lel palikapi, pwa irai en kapokonihpene Nah armaj pilpil kan.

### *Padahk jang Suhkoa Fig*

<sup>32</sup> “Ngoahi nimen kamwai en oaloo padahk oau jang in suhkoa fig ma rahn suhkoa pase kin green kodla apel mwisla doar soah kan ken sapda pouj doar kamwai ne kidal pwa roak ne koaroando. <sup>33</sup> Pel doahroar, ma kamwai pirin kapang mehpwiai ohroj wiawi, kamwai pirin kidal pwa anjoau in ne koaroando, ne nimwennoar sapda. <sup>34</sup> Ngoahi pwehng kamwai in mehlel pwa mehpwiai ohroj pirin wiawi mwohn en armaj ohroj ma mour apkas pirin mehdi. <sup>35</sup> Nehnloanngé apel jampah pirin johrla, a Oai padahk kan jehpirin joaloangla.

### *Johpwa Emen Kidal Rehno apel Awahu*

<sup>36</sup> “A johpwa emen kidal rehno ke awahu ma mehpwiai pirin wiawi, sohnloang in nehnloanngé apel Nahu jehjoa. Jamahu kalahpwuk kidal. <sup>37</sup> Indoahn Nihn-Armaj pirin doahroar ma ne wiawi oh nehn en Noah mweiho. <sup>38</sup> Nehn rehnnok mwohn nohlikko armaj kan kamkamdipw, jakjakau, woal kan apel lihkan pwoapwoaud oaroh lel rehno ma Noah dilloang nehn warihmmwo. <sup>39</sup> A irai johpwa kidal pwa da pirin wiawi oaroh lapakehu ne indoa pohkla irai ohroj. Ioar doahr pirin wiawi anjoauwo ma Nihn-Armaj pirin indoa. <sup>40</sup> Anjoauwo woal roahmen pirin doaddoadoahk nehn japw oau; emen pirin wijik jang, emen luhwoahdi. <sup>41</sup> Li roahmen pirin daulahk pilahwa nehn wijahn wia pilahwa; emen pirin wijik jang, emen luhwoahdi. <sup>42</sup> Kamwai anahne onop anjoau ohroj, pwa kamwai jehjoa pwa rehn dahioau Koaunno pirin japahldo. <sup>43</sup> Ma koaunin peneinei oau kidal anjoauwo ma jounpirap men pirin indoa, koawoa nen kidal pwa ih pirin poahd apel johpwa mweidoahng en koauwehla umwahu. <sup>44</sup> Ioar mehwa kahrehda kamwai en anahne onnonop anjoau ohroj. Pwa Nihn-Armaj pirin indoa anjoau oau ma koawoa joah kajik.

<sup>45</sup> “Inje jounpapah ma poadidi apel koahiok? Ih ma koaunno pilda pwa en pwukoahki apwali epwi jounpapah kan pwa en nehk oang kanahr mwinge nehn anjoau ma koanoahng. <sup>46</sup> Meid pai papahmeno ma koaunno pwurdo in umwahu kidalda pwa ih wia doadoahk mwehu, <sup>47</sup> Ngoahi pwehng kamwai in mehlel, koaunno nen kioang jounpapah meno en kohwahki me ohroj ih anki. <sup>48</sup> A ma ih jounpapah nauna men, ih pirin pwehng pein ih pwa, ‘oai koaunno jehpirin japahldo anjoau roairoai.’ <sup>49</sup> Ih ken sapda koalkoa pwilihoa jounpapahk, passoang irai mwinge apel nim jakau. <sup>50</sup> Ah koaunno pirin pwurdo oau rehn ma jounpapahu johpwa kajik apel kidal. <sup>51</sup> Koaunno pirin poaloo wasiksikihdi ih kihlahng ipen pwihn mwalaunnok wija ih pirin joang apel keikeikeisakai.

## 25

### *Karajraj in Jerpein Eijek*

<sup>1</sup> “Wein nehnloanng doahroar me; anjoau kij jerpein eijek wahda nihrai lahmmok inlahng kajamwo woal kamwohddo. <sup>2</sup> Limmen in irai pweipwei, a limmen loalkoang. <sup>3</sup> Jerpein pweipwei limmenno johpwa wahda pilen nihrai lahmmok, <sup>4</sup> a min loalkoang limmenno wahda rumehpwi audohkihda pilen nihrai lahmmok. <sup>5</sup> Nehn en woallo kosin indoa, lihok moairla.

<sup>6</sup> “Lel in lopkoan pwong irai pwohrkihda ngilen poangpoang, ‘Kapang, woalwa ne leldo! Kamwai indoa kajamwo ih!’ <sup>7</sup> Jerpeinnok ohroj pwohrda onopda nihrai lahmmok. <sup>8</sup> Min pweipwei limmenno poaki ipen min loalkoangok, ‘Menlau kihdoahng kamai ekij pilen nihmwai lahm kan, pwa nihmai lahm kai ne kunla.’ <sup>9</sup> A jerpein loalkoang japoang, ‘Johkak. Nen johpwa isar oang kisai ohroj. Inla nehn stohwa dupukda nihmwai pilen lahm kan.’ <sup>10</sup> Anjoauwo irai inla nehn stohwa dupuk nihrai pilen lahmmok, woal kamwohddo ne indoa, irai ma ne onopda pwili ih dilda oang kamdipw in koapwoapwoauddo, wanihmmwo risdi loakdi.

<sup>11</sup> “Mwuhr, jerpein pweipweihok pwurdo, irai uhda likin wanihmmwo poangpoang, ‘Maing, risingda wanihmmwen oang kamai!’ <sup>12</sup> A ih japoang, ‘Ngoahi pwehng kamwai in mehlel, Ngoahi jehjoo kamwai!’ ”

<sup>13</sup> Jesus kadoarihla karajraj pase, “Doar onnonop, pwa kamwai jehjoo rehn ke awa ma Ngoahi pirin japahldo.”

### *Karajraj in Papah Jilmen*

<sup>14</sup> “Wein nehnloanng doahroar woal men ma pirin wia a jeiloak. Ih pangin pene nah papahk ih nehk oang irai ah koapwoa kan, pwa irai en apwali oang ih. <sup>15</sup> Oang emen ih kioang uhwen ah koahiok: Oang emen ih kioang mwani kohl limekid, oang emen ih kioang riekid, a oang emen ih kioang kid doar ih ken jeiloakla. <sup>16</sup> Papahu ma oaloo mwani kohl limekid inla kadirihla nah mwanihok pel wiahda mwani kohl limekid. <sup>17</sup> Pel doahroar minno ma oaloo mwani kohl riekid, pel wiahda mwani kohl riekid. <sup>18</sup> A papahu ma ne oaloo mwani kohl kiddo, Ih ken inla jaripda pwoarroau nehn pwirejjo oakihla nihn ah koaunno mwanihok.

<sup>19</sup> “Mwerin anjoau roairoai, en papahk ahr koaunwa pwurdo pwa en koajoanehdi mwanihok iparai. <sup>20</sup> Papahu ma oaloo mwani kohl limekid indoa pel wa mwani kohl limekid ‘Maing, koawoa kioang ngoahi mwani kohl limekid, kapang pel mwani kohl limekid ngoahi ne koadoahkoahda.’ <sup>21</sup> Koaunno japoang, ‘Doadoahk mwehu, papah lelpoak apel mehlel men koawoa, ki oamw koahiok in koadoahkoahda mehkij siksik, ngoahi pirin kioang koawoa mehkij koalik koawoa en kin appwapwali.’ <sup>22</sup> Papahu ma oaloo mwani kohl riekid pel indoa pwehng ih, ‘Maing: kapang! Koawoa kihdoahng ngoahi mwani kohl riekid, a me pel riekid ngoahi ne koadoahkoahda,’ <sup>23</sup> Koaunno pel pwehng ih, ‘Doadoahk mwehu, papah lelpoak apel mehlel men

koawoa, ki oamw koahiok in koadoahkoahda mehkij siksik, ngoahi pirin kioang koawoa mehkij koalik koawoa en appwapwali. Indoa pwili injenmwahuki oai pai.’  
<sup>24</sup> A papahu ma oaloo mwani kohl kiddo, pel indoa pwehng ih, ‘Maing, ngoahi kidal pwa koawoa woal joah mahk men; koawoa kin doli wija ma koawoa johkin poadok, koawoa kin nekid pene wija ma koawoa johkin kamwroahwe. <sup>25</sup> Nehn oai mijik koawoa, ngoahi inlahr oakihla nihmw mwanihok nehn pwirej. Kapang! Ioar nihmw mwani koa me.’  
<sup>26</sup> A koaunno japoang, ‘Koawoa papah nauna apel dangahnga men! Koawoa kidal pwa ngoahi armaj apwal men, ma kin doli wija ngoahi joah poadok, oaloahjang wija ma ngoahi joah koadoahkoa? <sup>27</sup> Amwda koawoa joah nekidla noai mwani kan nehn pangk, pwa ngoahi en kak oaloo ohroj pwilihkihla wihnin nehn oai pwurdo? <sup>28</sup> Doari, kamwai kihjang mwanihkan ipoa, kamwai kioang papahu ma nainki mwani kohl nenno. <sup>29</sup> Pwa oang emen ma anki mehkij, kakoalikpoa pirin pel aluhwoang; a oang ih ma joh ah mehkij, dahkij ma mine ipoa nen pel kihekjang. <sup>30</sup> Apkas kerpwihla min joh kaspoa mene likin wija rosso, wijahu ma ih pirin joang apel keikeikeisakai.’

<sup>31</sup> “Nihn-Armaj pirin indoa doahr Nahmwarki men, pwilihki Nah sohnloang kan ohroj, Ih pirin mine nehn Ah mwoalen kadeik linngo. <sup>32</sup> A sohn jampah ohroj pirin pokonpene mwohn Ih. Ih pirin kasohrohrihpijoang oang pwihn riau, doahroar jilepen jihpw men kin kasohrohrihpijoang jihpw jang kuhs. <sup>33</sup> Ih pirin kihla armaj pwunngok loap moaun a luhwoahk loap meing. <sup>34</sup> Doar Nahmwarkiho pwehng irai ma mine loap moaun, ‘Indoa, kamwai ma ne kapaida jang ipen Joamoaiho! Indoa oaloahdi weiho ma koaunopdahng kamwai jang sapin wiawihdahn jampah. <sup>35</sup> Pwa nehn Oai kin mwakohkohda, kamwai kamwinge Ngoahi; nehn Oai mareuda, kamwai kihdoa Nimoai pil; a nehn Oai wia mihn keiru men, kamwai kajamwohng Ngoahi nehn umwamwai kan. <sup>36</sup> Nen joh Oai likkoau, kamwai kihdoa Oai likkoau; nehn Oai johmwehu, kamwai kin pwokdo apwali Ngoahi; Ngoahi joaldi nehn kalpwuhj, kamwai paj Ipoai.’  
<sup>37</sup> Armaj pwunngok japoang, ‘Maing, ngehd kamai kapang Koawoa mwakohko, kamai kamwinge Koawoa? Ke mareu, kamai kioang Koawoa pil Koawoa en nim? <sup>38</sup> Ke armaj in indoa men, kamai kajamwo Koawoa? Ke joah likkoau, kamai kalikkoauwihda Koawoa? <sup>39</sup> Ngehd kamai ne pel kapang Koawoa johmwehu ke joal nehn kalpwuhj, a kamai alwe paj Ipoamw?’  
<sup>40</sup> A Nahmwarkiho pirin japoang, ‘Ngoahi pwehng kamwai in mehlel, nehn amwai wiahng emen rioai keiou siksik, Ngoahi ma kamwai ne wiahng!’

<sup>41</sup> “Doari Ih wud pwehnglahng iraihok loap meing, ‘Kamwai alwe jang Ngoahi, kamwai ma riahla kan! Alwehng nehn oaiho ma johkin kunla ma koaunopdahng Jehsen apel ngen jaussok! <sup>42</sup> Pwa Ngoahi mwakohko, kamwai joah kamwinge Ngoahi. Ngoahi mareu, kamwai joah kanimpili ngoahi. <sup>43</sup> Ngoahi armajin indoa men, kamwai joah kajamwo Ngoahi oang nehn umwamwai kan. Ngoahi joah likkoau, kamwai joah kalikkoauwi Ngoahi. Ngoahi johmwehu pel nehn kalpwuhj, kamwai joah indoa Ipoai.’  
<sup>44</sup> A irai japoang, ‘Maing, ngehd kamai ne pel kapang Koawoa mwakohko ke mareu ke wia armajin indoa men, ke joah likkoau, ke johmwehu, ke mine nehn kalpwuhj, a kamai joah jeuweje Koawoa?’  
<sup>45</sup> A Ih japoang irai, ‘Ngoahi pwehng kamwai in mehlel, nehn amwai johpwa nimen jeuweje ih ma keiou siksik in rioai pwiai, kamwai johpwa nimen jeuweje Ngoahi.’  
<sup>46</sup> Doar irai pirin inlahng koaloklok joh imwin, a irai ma pwung pirin inlahng mour joh imwin.”



<sup>1</sup> Anjoauwo ma Jesus ne kadoarihla Ah padahk doahr mehpwaii ohroj, Ih ken pwehng Nah sohnpadahkkok, <sup>2</sup> “Mwerin rehn riau, doahroar amwai kin kidal, Joarwihn Passover pirin wiawi, a arai pirin pangla Nihn-Armaj pwa en kalohpwuhla.”

<sup>3</sup> Jamwrou laplappok apel koaunnok pokon pene in umwen Jamwrou laplap Caiaphas; <sup>4</sup> irai koajoanehdi pwa irai en joalihdi Jesus in joah janjal irai kojukdi Ih. <sup>5</sup> Irai pwahpene nehn pwungarai, “Kisai joah wia nehn anjoau in joarwi laplap oauwe, pwa armaj kan en joah mwoarongkihda.”

### *Jesus Keidi nehn Bethany*

<sup>6</sup> Nehn en Jesus minmine Bethany nehn umwen woal lepa men ma adanki Simon, <sup>7</sup> lihmen indoa Ipoa wahdo lehn wai wai kajampwal oau ma inenin koalik dupkoa. Liho widekihdi oang pohn moangoan Jesus. <sup>8</sup> Nehn en sohnpadahkkok kapang me irai lioasla pwahpwahpwa, “Mihnda lehn wai oauwe wiamwahlla?” irai idoak. <sup>9</sup> “Lehn wai wai oauwe kak noasla koalihkkoalik dupkoa, kak kihkekkoang min paijuwed kan!”

<sup>10</sup> Jesus kidal da irai pwahpwahpwa, Ih ken pwehng irai, “Da kamwai diroapwkihdahki lihmene? Siahk mwehu oau ih wiahng Ngoahi. <sup>11</sup> Min joamwoahmwoahk pirin pwen mine ipamwai anjoau ohroj, a Ngoahi joah. <sup>12</sup> Pwa nehn ah widekihoang lehi pohioa, ih koaunopda palwoaroaioa oang Oai pirin joajjoardi. <sup>13</sup> Ngoahi pwehng kamwai in mehlel, wija kij ma padahk in Rongmwehu wiawi nehn jampah, dahkij ih wia pel pirin lohkjili pwa en kasmanda lihmene.”

### *Judas Pwungki en Pangla Jesus*

<sup>14</sup> Doar emen irai eijek roahmenno — ma adanki Judas Iscariot — inla ipen koaun in jamwrou laplappok, <sup>15</sup> idoak iparai, “Da kamwai pirin kioang ngoahi ma ngoahi panngoang Jesus kamwai?” Doar irai wadekla mwani silper jilijjek kioang ih. <sup>16</sup> Jang anjoauwo inla Judas kapkapang anjoau mwehu ih en panngoang irai Jesus.

### *Jesus Pwili nah Sohnpadahkkok Kamdipwin Passover*

<sup>17</sup> Rehn keiou in Joarwihn Pilahwa Joah Doal Ihs, sohnpadahkkok indoa idoak oang Jesus, “Ia wija koawoa nimen kamain koaunopdahng koawoa kamdipw in Passover?”

<sup>18</sup> Ih japoang, “Alwe nehn kahnihmmwen ipen woal men pwehng ih, ‘Jounpadahkko pwa: Oai anjoau ne lel. Ngoahi pwilihki noai sohnpadahkkok pirin kasman Passover nehn umwoammwe.’ ”

<sup>19</sup> Sohnpadahkkok wiahda da Jesus pwehng ara, ara ken koaunopda kamdipwin Passover.

<sup>20</sup> Injoausik pene Jesus mwindihoang in sehpyllo pwilihki nah sohnpadahk eijek roahmenno mwinge. <sup>21</sup> Nehn irai mwingmwinge, Ih pwa, “Ngoahi pwehng kamwai in mehlel, emen in kamwai pirin pangla Ngoahi.”

<sup>22</sup> Irai inenin pahsoaula sapda wad emen iddidoak oang ih, “Maing, inje me? Ngoahi me?”

<sup>23</sup> Jesus japoang, “Inje ma pwili Ngoahi kaduhdi kanah pilahwahu nehn pileisse pirin pangla Ngoahi. <sup>24</sup> Nihn-Armaj pirin mehdi doahr ah ne insingdi nehn Puk Joarwi. A inenin naunahng ih ma pangla Nihn-Armaj! Mwehu oang oar ma armaj meno joah noaisikdi.”

<sup>25</sup> A Judas, ma pirin pangla Ih, pwehng Ih, “Mehlel jaudi ngoahi, Jounpadahk?” Jesus japoang, “Eh, ioar koawoa ma ne pwahda.”

### *En Koaunno Kamdipwin Koamwurmwur*

<sup>26</sup> Nehn irai pwen mwingmwinge, Jesus pwoakda pilahwahu, kapkapki, sipwangpijoang, kioang Nah sohnpadahkkok, pwehng irai, “Oaloo, kang, me ioar udukoaihoa.”



<sup>27</sup> Doar ih pel oaloo mwoakko, kapkapki, pel kioang irai, pwehng irai, “Nim jang loaloo, kamwai ohroj. <sup>28</sup> Pwa insahihoa me, insahn inoauwo ma pirin widekdi pwa en lapwadda dipen armaj. <sup>29</sup> Kamwai en kidal pwa jang me inla Ngoahi johla pirin nim wain oaroh ngehd Ngoahi en pwili kamwai nim wain kapw nehn en Joamoaiho Ah Wei.”

<sup>30</sup> Doari, arai ken koaulkihla koaul pas irai ken inla pohn Dolin Olip.

### *Jesus Kohpda en Peter pirin Kahmahmkihla Ih*

<sup>31</sup> Doari Jesus pwehng irai, “Pwongouwehr kamwai ohroj pirin kerpwihla Ngoahi apel kaujjang Ngoahi; pwa Puk Joarwi pwa ‘Ngoahi pirin kojukdi Jiloapoahu, a pwihnin jihppwok pirin kaupijoang.’ <sup>32</sup> A mwerin Ngoahi en iejda, Ngoahi pirin inla Galilee mwohn kamwai.”

<sup>33</sup> Peter japoang, “Mihndahr ma ohroj kerpwihla koawoa, ngoahi johpwa pirin.”

<sup>34</sup> Jesus pwehng Peter, “Ngoahi pwehng koawoa in mehlel, mwohn joang jummwa, koawoa pirin kahmahmki Ngoahi pehn jiluh pwa koawoa jehjoa Ngoahi.”

<sup>35</sup> A Peter japoang “Maing, ngoahi johpwa pirin kahmahmki koawoa, mihnda ma ngoahi pwili Koawoa mehdi.”

Ohroj sohnpadahkkok pel pwa me.

### *Jesus Kapkap nehn Mwoaswel Gethsemane*

<sup>36</sup> Doar Jesus pwili Nah sohnpadahkkok inla wijahkij adanki Gethsemane, a Ih pwehng irai, “Mwindi me a Ngoahi en inla o Ngoahi kapkap.” <sup>37</sup> Ih ukda Peter apel nihn Zebedee woal roahmenno pwili Ih, a Ih sapda pahsoau pel injinjuwed. <sup>38</sup> Doar Ih pwehng irai, “Nehn kapehdihoa inenin soausoau apel dirkihla injinjuwed, doahrma pwen pirin kojukdi Ngoahi. Kamwai jowi Ngoahi me apel pwili Ngoahi poahd.”

<sup>39</sup> Ih ken aluhla pel ekij dohla Ih kipdi mijoa lel pwirej Ih kapkap, “Joamoai, ma kak, kihjang Ngoahi mwoakin loklok oauwe. A jaudi Injenoai, a Oamw koajoandi en pwoaida.”

<sup>40</sup> Doar Ih pwurla ipen Nah sohnpadahkkok kapangda pwa irai moair. Ih pwehng, “Peter, imdoahr? Kamwai johkak pwili Ngoahi poahd awa oau oar? <sup>41</sup> Mwajahn pel kapkap pwa koawoa en joah lohdi oang kajongjong. Ngen nimen a palwar jasihkei.”

<sup>42</sup> Ih pel inla kariau pel kapkap, “Joamoai, ma johkak mwoak oauwe en liklikjang Ngoahi ioarroar Ngoahi en pwen nimla, Injenoamw en wiawi.”

<sup>43</sup> Nehn Ah japahldo, Ih pel pwuroahng kapang irai moair, irai johkak poahdpijoang ki arai nimen moair.

<sup>44</sup> Ih pel injang irai pwurla kapkap kajilpak, pwuroahng pwahpwahpwa mehwehr.

<sup>45</sup> Doar Ih pel pwurlahng sohnpadahkkok pwehng irai, “Kamwai pwen moairroar koamkoammoal? Kapang, awahwa ne leldo, Nihn-Armaj ne pirin pangpangla ipen armaj dipan kan. <sup>46</sup> Pwohrda, kisai inla! Woalwa ma pirin pangla Ngoahi ne indoa.”

### *Jesus Joaldi*

<sup>47</sup> Nehn Ah pwahpwahpwa me, Judas, emen in eijek roahmenno, leldo pwilihki pwihn oau wijik kodlaj apel suhkoa mihn pokpok. Jamwrou Laplappok apel epwi koaun in armajjok ioar kardo irai. <sup>48</sup> Judas ne kioang irai kilel oau: “Kamwai nen kidal inje kamwain koldi jang in oai en inla rahnmwahuwi ih kioang ih kis.”

<sup>49</sup> Doar Judas inenlahng oar Jesus. “Kajilel, Jounpadahk!” ih pwehng pel kioang Ih kis.

<sup>50</sup> Jesus pwa, “Oai pirien, ken wia dahkij koawoa indoahng wia.”

Doar epwi irai jipoardi Jesus joalihdi Ih. <sup>51</sup> Emen in woallok ma pwili Jesus wijla kodlaj pas poaloahjang oaloap sien liduhwo nihn jamwrou laplappo. <sup>52</sup> “Kihdi nihmw kodlajjen,” Jesus pwehng ih, “pwa ohroj ma pei ki kodlaj pirin mehkihdi kodlaj. <sup>53</sup> Koawoa johpwa wahwoahki pwa Ngoahi kak poaki Joamoaiho en

kadardo sohnloang kidpwi en jeuweje kisai, Ih pirin kadardo anjoauwohr? <sup>54</sup> A ma Ngoahi wia, imdoahr Puk Joarwiho ma sikoa dahkij wiawi apkas en kak pwoaida?"

<sup>55</sup> Jesus wud pwehng pwi hnno, "Da Ngoahi armaj keper nauna men pwa kamwain indoa wijik mihn pei doahr kodlaj pel pwilein pok kamwain joalihdi Ngoahi? Amwda kamwai joah joalihdi Ngoahi nehn Umw Joarwiho? Ngoahi mine o padpadahk rehn ohroj. <sup>56</sup> A me wiawi pwa en pwoaida dahkij joukohppo pwa ma insingdi nehn Puk Joarwi."

Anjoau kijo sohnpadahkkok ohroj kerpwihla Ih kaujjang.

### *Jesus Mwohn Mwoalen Koapwunngo*

<sup>57</sup> Armajjok ma joalihdi Jesus ukla Ih nehn umwen Caiaphas, jamwrou laplappo, wijahu ma jounpadahk in Kojoneddok apel koaunnok ne pokonpene. <sup>58</sup> A Peter pel pwilpilihwe ekij dohlahjang, oaroh lel nehn kelin umwen Jamwrou laplappo. Ih dilla loaloa mwindi ipen jiloapoahpwi pwa ih nimen kapang imwin mehpwaii ohroj.

<sup>59</sup> Jamwrou laplappok apel Sohn Mwoalen Koapwung ohroj engdehn oang kadiarekda kadehde likampwi oang Jesus pwa irai en kak kojukdi Ih. <sup>60</sup> Doari, johpwa mehkij irai diarda, apel jounkadehde dir kinehng Jesus likampwi. A jounkadehde roahmen pwokda, <sup>61</sup> ma pwa, "Woal mene pwa, 'Ngoahi kak koauwehla Umw Joarwihn Koahsso pel pwuroahng kouda mwerin rehn jiluh.' "

<sup>62</sup> Doar jamwrou laplappo uhda pwehng Jesus, "Da, joh oamw pajpoang oang kadip pwiai ma uhwoang koawoa?" <sup>63</sup> A Jesus pwen nennenlahr. Doar Jamwrou laplappo pwehng ih, "In oadoan Koahs mourro koawoa en kahukihoang kamai pwa koawoa Messiah wa ma nihn Koahs."

<sup>64</sup> Jesus japoang, "Koawoa ma pwa. A Ngoahi pwehng kamwai ohroj pwa jang me inla kamwai pirin kapang Nihn-Armaj pirin mwindi loop moaunin Wija Laplap ma allaluhdo pohn koasoau kan in pehnloange!"

<sup>65</sup> Ki pajpoang oauwe Jamwrou laplappo ken soahr di ah likkoauwo lioas, pwehng Ih, "Lahlahwe! Kisai johpwa anahne pel epwi jounkadehde? Kamwai ohroj ne rong Ah lahlahwe. <sup>66</sup> Ia amwai koajoandi?"

Irai rahuki, "Th ne dipda. Koanoahng Ih en mehdi."

<sup>67</sup> Doari irai sapda andipoa mijoa apel pakiri Ih. A epwi poki Ih, <sup>68</sup> Kapiski Ih, "Messiah, kajawi oang kamai pwa inje ma poki koawoa."

### *Peter Kahmahmki Jesus*

<sup>69</sup> Peter onnonohn nehn kelin ummwo, a emen nihn jamwrou laplappo nah lidu jerpeinnok indoa ipoa pwehng ih, "Koawoa, emen ma pwili Jesus mihn Galilee-o."

<sup>70</sup> A Peter kahmahmkihla mwohrai ohroj. "Ngoahi jehjoa pwa da koawoa pwahpwahpwa," <sup>71</sup> Mwerin ah diljang nehn kello, emen lidu jerpein kapangda ih pwehng iraihok ma mine wijahu, "Woalmene kin pwili Jesus mihn Nazareth."

<sup>72</sup> Peter pel pwuroahng kahmahmkihla, pwa, "Ngoahi kahukihla pwa ngoahi pwanah jehjoa woal menen!"

<sup>73</sup> Mwerinno, iraihok ma uhda wijahu sohlahng ipen Peter pwehng, "Uhdahn koawoa emen irai: pwa ngoaroammwen ne kajalehda."

<sup>74</sup> Peter kahula, "Ngoahi pirin riahla ma ngoahi likamw — ngoahi jehjoa inje woalmenen!"

Anjoauwohr joang jummwa. <sup>75</sup> Anjoauwo Peter samanda en Jesus pwehng ih: "Mwohn joang jummwa, koawoa pirin kahmahmkihla Ngoahi pehn jiluh pwa koawoa jehjoa Ngoahi." Ih ken inla jang wijahu kasoahng joangin.

<sup>1</sup> Oh inminjoang jamwrou laplappok apel koaunnok ne wiahda arai koajoandi pwa irai en kojukdi Jesus. <sup>2</sup> Arai joalihdi Ih, ukla jang wijahu ukla ipen Pilate, koapina in Rome.

### *Judas Lohjakla*

<sup>3</sup> Nehn en Judas, ma pangla Ih, kidalda pwa Jesus ne dipda pwa Ih en mehdi, ih inenin koluhla mehlel. Doar ih oaloo mwani silper jilihjek kapwurihlahng jamwrou laplappok apel koaunnok. <sup>4</sup> “Ngoahi ne wiahda dihp,” ih pwehng irai, “pwa ngoahi pangla woal pwung men.”

“Ia kaspoahng kamai?” irai japoang ih. “Men pwen oamw pwukoa.”

<sup>5</sup> Doar Judas kerpwihdi mwanihkoa nehn Umw Joarwiho ih inla lohjakla.

<sup>6</sup> Jamwrou laplappo pwoakda mwanihok, “Kisai johkak kioang mwani pwiai nehn wijahn nahk in mwanihn Umw Joarwiho,” irai pwa, “pwa uhwoang kojoned kisai en oaloo mwani dupkoan kojukdi armaj.” <sup>7</sup> Mwerin irai ekij siko irai koajoanehdi pwa arai en dupukla japwen jounwia ainpwoahsso, irai wiahkihla pei in armaj in likin. <sup>8</sup> Ioar kahrehda mohj oauwo adanki Mohj in Insa.

<sup>9</sup> Me ne kapwaihahda koko hp in Jeremiah ma pwa, “Arai oaloo silper jilihjek, dopdopla mihn Israel lemleme pwa ioar woahr dupkoa, <sup>10</sup> irai dupuk kihda mohjo en jounwia ainpwoahsso, doahr en Koainno kaweid.”

### *Jesus Koapwung Mwohn Pilate*

<sup>11</sup> Apkas Jesus uhda mwohn Pilate, koapinahn Rome. “Koawoa ioar Nahmwarkihn mihn Jew?” koapina idoak oang Ih.

Jesus japoang, “Eh, ma koawoa ne pwa.” <sup>12</sup> A anjoauwo ma jamwrou laplappok apel koaunnok kajalehda irai iroahk kadipoahki Ih, Jesus nennenla johpwa lallal.

<sup>13</sup> “Koawoa johpwa rong dirin arai iroahk ma irai kadipoahki koawoa?” Pilate idoak.

<sup>14</sup> A Jesus johpwa pwa mehkij, oang iroahk ma uhwoang Ih, ma inenin kapwuri-amwei oang koapinahu.

<sup>15</sup> Nehn anjoau in joarwihn Passover ohroj. Koapina kin kapisla emen sohn kalpwuhjjo oang mihn Jew-ok, joah lipilpil emen ma irai pilda. <sup>16</sup> Nehn anjoauwo mine woal mwoarjuwed men nehn kalpwuhj oadoa Jesus Barabbas. <sup>17</sup> Nehn en armajjok pokon pene mwohn umwen Pilate-o minjoanngo, ih idoak oang irai, “Inje kamwai nimen ngoahi en mweidoahng kamwai — Barabbas ke Jesus ma adanki Messiah?” <sup>18</sup> (Ih woahwoahki mwehu pwa koain in mihn Jew-ok joalihdi Jesus jang in pihrin.)

<sup>19</sup> Anjoauwohr, nehn en Pilate ah minmine nehn ah jeiahn koapwung, pahioahu kadardohng ih rong pas, “Mweidla woal pwung menen, pwa ngoahi loklok koalik nehn oai oarmoane ih pwohng.”

<sup>20</sup> Jamwrou laplappok apel koaunnok kaweidki pokonno en poaki Barabbas en lapwda, a Jesus en kojkojdi.

<sup>21</sup> Koapinahu pel pwuroahng idoak, “Inje in ara roahmenne kamwai nimen ngoahi en mweidoahng kamwai?”

Pokonno rahukihla japoang ih, “Barabbas!”

<sup>22</sup> Pilate pel pwuroahng idoak, “A da ngoahi en wiahng Jesus ma adanki Messiah?” Arai ohroj pel rahukihda, “Kalohpwuhla ih!”

<sup>23</sup> “Kahrpoa?” Pilate idoak oang irai. “Dihp da ih wiahda?”

A irai kapwa kakoalikhla ngilarai, “Kalohpwuhla ih!”

<sup>24</sup> Pilate ne kidalda pwa ih johpwa kak wia mehkij ma en kak kauhdi pwa pingpinngo ne koalkoalikla. Doar ih pwa oau pwohl in pil en wijikdo ih amwunla

poah mwohn pokonno, pwehng irai, “Ngoahi pijekjang insahn woal mene. Kamwai wud pwukoahki.”

<sup>25</sup> Armajjok ohroj pel rahukihla, “Kamai pirin pwukoahki Ah mehdi — kamai apel nihmai jerihkan.”

<sup>26</sup> Doari, Pilate kadarla Barabbas oang irai. Ih koajoanehdi arai en poki Jesus ki joal pahrang imwin pas, irai kioang jounpeihok en kalohpwuhla ih.

### *Jounpeihok Koauwe Jesus*

<sup>27</sup> Epwi nihn koapina jounpeihok wahla Jesus oang nehn arai umwen koapinahu a pangindo pwihnin jounpeihok ohroj. <sup>28</sup> Irai kihjang Ah likkoau a pwainkihdi Ih robe wahssahioau. <sup>29</sup> Irai wiahda mwarmwar dokdok ingkoang roairoai pas kamwarmwarihkihdi moange, a irai kioang suhkoa pas nehn poah en wia kilel in manman. Doar irai poardi jang Ih nehn irai kapiski Ih, rahrahuki, “Kapang! Nahmwarkihn mihn Jew kan!” <sup>30</sup> A irai andipoa Ih pel doapwoa jang suhkoahu nehn poah pokihki nehn moange. <sup>31</sup> Nehn irai ne lok in wia mwahlki Ih, irai kihjang robe-o irai wud kioang pein Ah likkoauwok. Doar irai ukla Ih en lohpuwuhla.

### *Jesus Kalohpwuhla*

<sup>32</sup> Nehn irai allalu jang nehn kahnihmmwo, ihr koanoahdi woal in Cyrene men adanki Simon, irai ipong oang ih en wahda en Jesus lohpuwuhwo. <sup>33</sup> Irai inla lel wijahkij adanki Golgotha (woahwoahki wijahn sihn moang). <sup>34</sup> Irai kioang Jesus wain doal kihda ad kasik pwa en nim, a mwerin Ah jong ekij, Ih johpwa nimla.

<sup>35</sup> Mwerin irai poanihdi Ih oang in lohpuwuhwo, irai wijwijki Ah likkoauwo pwa inje en anki, irai ken nehkpjoang nehn pwungarai. <sup>36</sup> Irai ken mwindihoang wijahu jiljiloa Jesus. <sup>37</sup> Pohn moange in lohpuwuhwo ihr poanihdihoang insing oau ma kawoahwoahda kahrpoan Ah kalohpwuhla. Insingo pwa,

Ioar Jesus me, Nahmwarkihn mihn Jew kan.

<sup>38</sup> Jounpirap roahmen pel pwili Ih lohpuwuhla, emen mine loop moaun, a emen loop meing.

<sup>39</sup> Armajjok ma kin dauli wijahu kin mwasmwasoahki arai kapiski Jesus, pwahpwahpwa, <sup>40</sup> “Ioar koawoa ma pirin koauwehla Umw Joarwiho pel pwuroahng kouda mwerin rehn jiluh! Pein kapisla koawoa, ma koawoa Nihn Koahs! Doaudi jang in lohpuwuhwen!”

<sup>41</sup> Jamwrou laplappok, apel jounpadahkkok in Kojonneddo, apel epwi koaunnok pwili kapiski Jesus, <sup>42</sup> “Ih kapisla epwi, a Ih johkak kapisla pein Ih! Jaudi Ih ioar nahmwarki in Israel? A Ih en kerdihjang in lohpuwuhwen, a kamai nen kamehlele Ih. <sup>43</sup> Ih koapwoarpwoarki Koahs; doari, Koahs en kapisla Ih en kajalehda Ah pwungki Ih! Ih pwahla pwa, Ih Nihn Koahs.”

<sup>44</sup> Jounpirappok ma pwili Ih lohpuwuhla; ara pel pwili lahlahwe Jesus.

### *Jesus Mehdi*

<sup>45</sup> In jauwaj, roasoahdi oau wiawi pohn jappwo pwon, oaroain awa jiluh. <sup>46</sup> Koaroan oang kiloak jiluh mwerin jauwaj, Jesus ngil koalikda pwa, “Eli, Eli, lema sabachthani?”\* ma woahwoahki, “Oai Koahs, Oai Koahs, amwda Koawoa kerpwihlahki Ngoahi?”

<sup>47</sup> Epwi armajjok ma uhuhu wijahu ken rongda, irai pwa, “Ih pangpangin Elijah!” <sup>48</sup> Emen irai pispis kijoula pwoakda spwoanj oau kapwuhrihdi wain kasik, kioang in mijen suhkoa pas kihdahlahng Ih pwa Ih en nim.

<sup>49</sup> A epwi irai pwehng Ih, “jowi. Kisai kapang ma Elijah nen indoa kapisla Ih.”

<sup>50</sup> A Jesus pel pwuroahng ngil koalikda, doar Ih ken mweidla ngenin.

\* **27:46** “Eli, Eli, lema sabachthani?” Psalm 22:1

<sup>51</sup> Anjoauwohr kahdenngo ma poaroa mwoal joarwiho nehn Umw Joarwiho soahroakpijoang in riau, jang puwoa lel pah. Jampah roarda, sakai kan pwalpijoang, <sup>52</sup> joaujoau kan rispjoang. Palwoaroan nihn Koahs armaj dihrdir ma ne mehdi iejda. <sup>53</sup> Arai injang nehn ahr joaujoau kan; a mwerin en Jesus Ah iejda, irai pwokda nehn Kahnihmw Joarwiho pwokkoang armaj dir.

<sup>54</sup> Koaunin jounpei apel jounpeihok ma pwili jiljiloa Jesus inenin majpwehkda nehn irai kapang roarroarin jappwo apel joang ohroj ma wiawi. Irai pwa, “Mehlel minmene uhdahn Nihn Koahs.”

<sup>55</sup> Li dir ma pel pwilihdo mine wijahu, pwili kapkapang mehkan ma wihwiawi, a irai mine ekij doh jang wijahu; ioar irai koa ma pwili Jesus jang Galilee apel kin papah Ih. <sup>56</sup> Mary mihn Magdala, Mary inen James apel Joseph apel inen nihn Zebede jermweinnok ma pwili mine ipen lihok.

### *Palwoaroan Jesus Neknekid oang nehn Joaujoau.*

<sup>57</sup> Injoausikdi, woal koapwoahpwoa men jang Arimathea ma adanki Joseph, ih pel sohnpadahk in Jesus men. <sup>58</sup> Ih inla ipen Pilate poakihda palwoaroan Jesus. Pilate koajoanehdi pwa en mweimwei oang ih. <sup>59</sup> Joseph oaloo palwarro kidimkihpene likkoau roairoai oau. <sup>60</sup> Ih wahlahng nehn pein ah joaujoau kapw, ma kapwehsene wiawihda nehn sakai. Ih kasahpwroahng sakai koalik oau nehn wanihmw in joaujoauwo ih injang. <sup>61</sup> Mary mihn Magdala apel emen Mary mwindi koaroonoang kapkapang joaujoauwo.

### *Jilepen Joaujoauwo*

<sup>62</sup> Rehnwa mwerin, ioar rehn keiou in kasman in Passover — jamwrou laplappok apel Pharisee-ok pokonpene ipen Pilate. <sup>63</sup> Irai pwehng ih, “Maing, kamai samanda in min likamw meno Ah pwa anjoauwo Ih pe mour: **‘Ngoahi pirin pwuroahng mourda mwerin rehn jiluh.’** <sup>64</sup> Koawoa en ruwoj pwa irai en jiloo ah joaujoauwo oaroh lel kajiluh in rehn, pwadoar nah sohnpadahk indoa pirapoahjang palwarro, ken pwehng armaj pwa ‘Ih iejdahjang mehdi.’ Pwa likamw pase pirin nauna jang minin mijkoalkoallo.”

<sup>65</sup> Pilate pwehng irai “jiloapoahwa men, alwe jiloahdi mwehu joaujoauwo uhwen amwai kak.”

<sup>66</sup> Irai inla pinahla joaujoauwo ki sakai oau apel kioang jiloapoahpwi pwa en jiljiloo.

## 28

### *Iejda*

<sup>1</sup> Mwerin Sabbath, injohrehn in Rehn Joarwi, Mary mihn Magdala apel emen Mary inlahng kapang joaujoauwo. <sup>2</sup> A nehn anjoauwohr jampah roarda; sohnloang en Koaunno men indihdo jang nehnloange kasahpwroahjang sakaiho, ih mwindihoang puwoa. <sup>3</sup> Mwomwe inenin ling, doahroar lingin joarom, ah likkoauwo korohro doahroar sinoh. <sup>4</sup> Jiloapoahk inenin jalohda dauluhl apel roarroarkihda irai majpwehkda, irai ken kipdihoang nehn pwirej doahroar armaj mehdihpwi.

<sup>5</sup> A sohnloango pwehng lihok, “kamwa joah mijik, pwa ngoahi kidal pwa kamwa raprapahki Jesus ma kalohpwuhla. <sup>6</sup> Ih joh me! Ih ne iejda, doahroar Ah pwehng kamwaiho. Kamwa indoa, kadehde wijahu ma Ih neknekid. <sup>7</sup> A apkas, kamwa pispis alwe pwehng Nah sohnpadahkok pwa ‘Ih ne iejda jang mehdi, Ih pirin inla Galilee mijen kamwai. Ioar wijahwa ma kamwai pirin kapang Ih.’ Kamwa samsaman da ma ngoahi pwehng kamwa.”

<sup>8</sup> Ira ken pispis pwurla jang in joaujoauwo, ira inenin majpwehk apel peren, ira kijkioulahng pakair kioang sohnpadahkok irair oauwe.



<sup>9</sup> A anjoauwohr Jesus uhda mijara pwehng ira **“Popohl.”** Ara sohla ipoa rukdi mwowoa koldi ehnnok pwongi Ih. <sup>10</sup> A Jesus pwehng ira, **“Kamwa joah mijik, kamwa alwe pwehng rioaihok arai en inla Galilee, pwa ioar wijahwa ma kamai pirin suhpene.”**

*Rong jang Jilepen Joaujoauwo*

<sup>11</sup> Nehn en lihok ara kijkioula ipen sohnpadahkkok, epwi jounpeihok ma jiljiloo joaujoauwo lelloang nehn kahnihmmwo pwa irai en pwehng jamwrou laplappok me ohroj ma wiawi <sup>12</sup> Jamwrou laplap apel koaunnok pokonpene pwa irai en wia lamlamki da ma pirin wiawi. Irai en kioang jounpeihok uhwen mwani koalik oau. <sup>13</sup> Irai pwehng jounpeihok, **“Kamwai pirin pwa, ‘Nihn Jesus sohnpadahkkok indoa inpwonngo nehn amai moair pirapoahla palwarro.’** <sup>14</sup> A ma koapina rongda, kamai pirin kadehde, a kamwai jehpirin perki mehkij.”

<sup>15</sup> Jiloapoahk oaloo nihrai mwanihok, irai wiahda doahroar ma jamwrouwok padahkihoang irai. Sikesik pase lohkjili ipen mihn Jew jang rehno indoa lel rehnoauwe.

*Jesus Pwokkoang Nah Sohnpadahkkok*

<sup>16</sup> Sohnpadahk eijek emenno injang pohn dolin Galilee, wijahu Jesus pwehng irai en inlahng. <sup>17</sup> Nehn irai kapangda Jesus wijahu, irai rukdi pwongi Ih; a epwi irai pwen kahjikkoar kamehlele! <sup>18</sup> Jesus sohdo iparai pwehng irai, **“Manman ohroj nehnloange apel jampah ne liklikkoang Ngoahi.** <sup>19</sup> Doari, kamwai alwe wija ohroj padahkihoang sohn wei kan ohroj; pwa irai en wiahla Noai sohnpadahk: poapdaijihla irai in oadoan Koahs Jahm apel Nah apel Ngen Joarwi. <sup>20</sup> Apel padahkihoang irai, ahr en peikkoang me ohroj ma Ngoahi ne koajoanehdihoang kamwai. Doari, kamwai en kidal pwa Ngoahi pirin pwilpwili kamwai anjoau ohroj lel in imwin kawa.”



## Rongmwehu ma insingdi jang ipen Mark Oarlap

Rongmwehu in Mark, ioar “Rongmwehu doahr Jesus Christ ma Nihn Koahs.” Puk oauwe kajalehioang kisai doahr Jesus, armaj men ma kin mwoakmwoakidki sihkei apel manman. Ah manman dehde mwehu jang in Ah padahk, jang in Ah manman pohn ngen jaussok, apel jang in Ah manmanin lapwadda dipen armaj kan. Jesus pel siko doahr pein Ih Nihn-Armaj ma indoahng sohnmesseikihla Ah mour pwa en kajaldekihla armaj jang nehn diparai kan.

Mark kin siko doahr en Jesus sikesik apel padahk kan, a ih kin siko koalik doahr Ah wihwia kan in sikesik sihkei apel dehde. Mark sapda insingehdi sikesik mwosmwos doahr John jounpoapdaij apel doahr en Jesus poapdaijla apel oalooa jongjong pehn Jehsen; a mwerin, ih sikoahda doahr en Jesus doadoahk in kemwehuwihla johmwehu kan apel padpadahk. Nehn nihn Jesus sohnpadahkkok ahr kin rongrongrong apel kapkapang Ih, irai ken koalikla ahr woahwoahki apel dehdehki; Ah imwinsihsi kan kin koalikla arai lioassoang Ih. Iroa koalik kan ma kaimwjekla puk oauwe, ioar sikesikin wihwia kan ma pwoaida nehn kaimwjeklahn wihk ma Jesus mour pohn jampah, a mehlel a mehdi pohn lohpuwuhwo apel iejda.

Imwin Rongmwehu oauwe min riau, ma mine nehn kilel doahroar me [...]. Emen jouninsing sohrohr likin armajjo ma insingehdi pukin Mark dapwa ioar ih ma insingehdi.

### Audoapoa in Oarlap

1. Sapin Rongmwehu 1.1-13
2. En Jesus doadoahk nehn Galilee 1.14—9.50
3. Jesus injang Galilee inla Jerusalem 10.1-52
4. Kaimwjeklahn wihk nehn Jerusalem apel ipoa 11.1—15.47
5. Iejdahn Jesus 16.1-8
6. Koan Jesus ma iejda pel pwokkoang nah sohnpadahkkok apel indahla nehnloange 16.9-20

### *En John jounpoapdaij kapahrak*

<sup>1</sup> Me ioar sapin Rongmwehu doahr Jesus Christ Nihn Koahs, <sup>2</sup> doahr lallo ma ne insingdi ipen joukohp Isaiah:

“Koahs pwa, ‘Ngoahi pirin kadarwe Noai jounpakairro mwohn Koawoa, ma pirin koaunopda Oamw allo.’

<sup>3</sup> Mine ngilloau ma kin poangpoangpoang nehn japwsoahn:

‘Kamwai koaunopda al kan ohroj oang Koaunno, kamwai kainenehla Ah al kan ma Ih pirin alu loaloo!’ ”

<sup>4</sup> John ken pwokda nehn japwsoahn, poapdaiji armaj kan, pwehpwehpwehng irai, “Kamwai koaluhla, wiliakapwla apel poapdaijla, Koahs pirin mahkoahng kamwai dipamwai kan.” <sup>5</sup> Armaj dir jang koujapw ohroj nehn wein Judea apel jang Jerusalem inla pwa en rong en John ah kapahrak. Irai kin woahkda diparai kan, a ih poapdaijihla irai nehn Pillap Jordan.

<sup>6</sup> John kin kol likkoau oau ma wiawihda jang in winen kamel, apel kin piroahki lopkoa kangir kilin kahu; a da ih kin kangkangkang: padda apel jukehn loanglap in nehn woallo. <sup>7</sup> A me ioar mwomwen koaloklok ma ih kin pwehng armajjok: “Mine woal men ma pirin indoa mwerin ngoahi, ma laplapjang ngoahi dauluhl; ma

ngoahi johpwa warroang rukdi mwohn Ih pwa ngoahi en lapwadda joalin Ah juhwo.  
<sup>8</sup> Ngoahi kin poapdaijihki kamwai pil, Ih pirin poapdaijihki kamwai Ngen Joarwi.”

### *Jesus Poapdaijla apel Oaloo Jongjong pehn Jehsen*

<sup>9</sup> Mwerin en Jesus indoa jang Nazareth, kahnihmw siksik oau nehn wein Galilee, poapdaijla ipen John nehn Pillap Jordan. <sup>10</sup> Nehn anjoauwo ma Jesus doauda jang nehn pillo, Ih kapang nehnloanngge rispjoang a Ngen Joarwi indihdo doahr dinin mwurei men mine pohn Ih. <sup>11</sup> Ih pel rongda ngilloau indihdo jang nehnloanngge pwa, “Koawoa ioar Noai jermwein kahpwil wa, ma Ngoahi kin malauki.”

<sup>12</sup> Doari, nehn anjoauwohr Ngen Joarwi ken kahlwahlahng Jesus nehn japwsoahn.  
<sup>13</sup> Jesus ken mine wijahu rehn pahijek, Jehsen ken kajongjongi Ih. Mahn ingkel kan kin pel pwili Jesus wijahu; a sohnloang kan pel kin indoa pel jeuweje.

### *Jesus Pangin Sohnloakjid Pahmen*

<sup>14</sup> Mwerin John peidekkoang nehn kalpwuhj, Jesus inla Galilee lohkihjili Rongmwewu jang ipen Koahs, pwa, <sup>15</sup> **“Ne lel anjoauwo, Wein Koahs ne koaroando! Kamwai koaluhla apel wiliakapwla apel kamehlelehla Rongmwewu!”**

<sup>16</sup> Rehn oau Jesus allaluhla pohn poahrinjedind Lehn Galilee; Ih kapangda sohnloakjid roahmen, Simon apel riah Andrew, loakjidki nihra ukko nehn lehu.  
<sup>17</sup> Jesus pwehng ara, **“Kamwa indoa pwilihla Ngoahi; a Ngoahi pirin wiahkihla kamwa sohnloakjidi armaj.”** <sup>18</sup> Anjoauwohr, ara kihdi nihra ukko pwilihla Ih.

<sup>19</sup> Ih injang wijahu, pel kapangda riarihoau, James apel John, nihn Zebedee. Ara minmine pohn pohs pas winwina nihra ukkok. <sup>20</sup> Nehn en Jesus kapangda ara, Ih pangin ara. Ara ken kihdi jamarahu ma pwili mine pohn pohs siksik pas ipen sohndoadoahk pwi, ara ken pwilihla Jesus.

### *Woalmen ma Ngen Jaus Dilingla*

<sup>21</sup> Irai inla Capernaum a Sabbath Jesus dilda nehn jinakokehu sapda Ah padahk.  
<sup>22</sup> Armaj ohroj ma pwili rong ken pwuriamweikihla doahr Ah kin kihwe Ah padahk; pwa manman in Ah padahk johpwa doahroar en jounpadahk in Kojoneddok arai padahk.

<sup>23</sup> Woal men ma ngen jaus dilingla inla nehn jinakokehu rahrahuki pwa, <sup>24</sup> “Jesus mihn Nazareth, da Koawoa nimen wiahng kamai? Koawoa indoahng koauwehla kamai! Ngoahi kidal inje Koawoa, Koawoa ma Nihn Koahs jounpakair joarwihwa!”

<sup>25</sup> Jesus pwehng ngen jausso, **“Nennenla, koawoa diljang nehn armaj menen!”**

<sup>26</sup> Ngen jausso ken isikda woallo oaroh ken roarda, rahrahu diljang ih. <sup>27</sup> Armaj ohroj pwuriamweikihla, peipeidekpenene nehn pwungarai pawhpawhpwa, “Dahki me? Joangoan padahk kapw dahioau me? Woalmene inenin manman. Ih pwen lalloar, pel ngen jaus kan pel peikkoang!”

<sup>28</sup> Rongin Jesus ken pispis lohkhjili wija ohroj nehn wein Galilee.

### *Jesus Kemwehuwihla Armaj Dir*

<sup>29</sup> Doari, Jesus apel Nah sohnpadahkkok, pwilihki James apel John injang nehn jinakokehu inla umwen Simon apel Andrew. <sup>30</sup> Inen pahien Simon-o onohn nehn ummwo johmwewu karkar, nehn en Jesus lel wijahu arai pwehng Ih doahr iren liho.  
<sup>31</sup> Ih ken inla kolda poahn liho jeuwegehda pwa en uhda. Nehn anjoauwohr, karkarro injang ipen liho; ih ken sapda apwali irai.

<sup>32</sup> Injoausikdi, nehn en joauwo pirin ken duhla, armaj kan wahpenehng Jesus min johmwewu apel min ngen jaus kan dilingla irai. <sup>33</sup> Sohn kahnihmwo ohroj pwili pokonpenene mijen ummwo <sup>34</sup> Jesus kemwehuwihla armaj dir ma anki joangoan johmwewu dir apel kaujjang ngen jaus dir ipen armaj kan. Ih ken kauhdi ngen jausok arai en joah lallal, pwa irai kidal Ih.

### *Jesus Lohkihjili Rongmwehu nehn Galilee*

<sup>35</sup> Pwohrdahng rehnno, injohrehn, Jesus pwohrda inlahjang in ummwo, inla likin kahnihmmwo wijahkij pwa en kalahpwukla kapkap. <sup>36</sup> Simon apel pwilihoahk rapahkihla Ih; <sup>37</sup> nehn irai kapangda, irai pwehng, “Maing, armaj ohroj raprapahki koawoa.”

<sup>38</sup> A Ih japoang irai, “Kisai dauluhlwehng nehn koaujoan koaroan kan, pwa Ngoahi en pel lohkihjili Rongmwehu wijahk, pwa ioar Ngoahi indoahki.”

<sup>39</sup> Ih ken allaluhjili nehn Galilee pwon, kapkapahrakjili nehn jinakoke kan apel kahkaujjang ngen jaus ipen armaj kan.

### *Jesus Kemwehuwihla Woal Lepahmen*

<sup>40</sup> Woal lepahmen pel indoa ipen Jesus, poadpwomwla mwohn Ih, jarda pwehng en jeuweje, pwehng Ih, “Maing, ma koawoa nimen, koawoa kak kamwkelehda\* ngoahi.”

<sup>41</sup> Doari Jesus ipwilkihda, kailla poah pukkoang woallo, “Ngoahi nimen,” Ih pwehng ih, “Ken mwakelkelda!” <sup>42</sup> Anjoauwohr lepahu ken jarjang ipen woallo; doari ih ken mwakelkella. <sup>43-44</sup> Jesus kainoapwihdi, pwehng Ih, “Kapang, pwa koawoa en johpwa pwehng emen. Inla kajalehioang jamwrou a koawoa wia oamw meiroang joango ma Moses koajoanehdi, en wia oamw mihn kadehde oang irai.” Doari Ih ken kadarla woallo.

<sup>45</sup> Woallo inlahr lohkihjili wija ohroj ah ne mwakelkelda; ma kahrehda Jesus johla kak aluhjili nehn pokon janjal nehn kahnihmmwok, Ih kin kalkalahpwukjili likin kahnihmmwo. A joah, pwa armaj dir kin pokondo Ipoa jang wija ohroj.

## 2

### *Jesus Kemwehuwihla Woal Mwoasor Men*

<sup>1</sup> Mwerin rehnpwi, Jesus pel pwuroahng inla Capernaum. Rongin Ah minmine in umwahu lohkihjili; <sup>2</sup> ma kahrehda armaj dir pokondo in ummwo apel koaisla loaloa pel in wanihmmwo. Ih ken padahkki oang irai lallo. <sup>3</sup> Nehn Ah padpadahk, woal mwoasor men ne wijwijik allaluhdohng Ipoa; ih mine nehn mihn wijik oau, wijik in pahmen. <sup>4</sup> Doari, nehn ahr johkak kadilihda apel sohlahng ipen Jesus ki koais in pokonno, irai pwukulda pohn ummwo kainenehdi wijahu ma Jesus mine, kadilidihong nehn ummwo ipen Jesus mihn wijikko ma mwoasorro mine puwoa. <sup>5</sup> Nehn en Jesus kapang arai pwojon, Ih pwehng woal mwoasorro, “Noai jeri! Dipoamw kan ne lapwda.”

<sup>6</sup> Jounpadahk in Kojoneddohpwi pwili mwindi nehn ummwo, irai lemlemehng pein arai, <sup>7</sup> “Imdoahr woalmene Ah kak wia joangoan sikesik oauwe? Pwa Ih lahlahwe Koahs. Inje ma kak lapwadda dihp kan, jaudi Koahs kalahpwuk?”

<sup>8</sup> Anjoauwohr Jesus kidalda ahr lamlam; Ih pwehng irai, “Da kamwai wiahki joangoan lamlam pwiai? <sup>9</sup> Dahioau moangoai en pwehng woal mwoasor mene, ‘Dipoamwkan ne lapwda,’ ke, ‘Uhda, oaloa kioammwen, alu?’ <sup>10</sup> A Ngoahi en kamehlele oang kamwai en kidal pwa Nihn-Armaj\* anki manmanin mahkoahng dipen jampah.” Ih ken pwehng woal mwoasorro, <sup>11</sup> “Uhda, oaloa kioammwen, alwe in umwoammwo!”

<sup>12</sup> Woal mwoasorro uhda mwohn mijarai, pwoakda kiahu, anjoauwohr ken inla. Irai ohroj pwuriamweikihla mehlel apel kapkapingahki Koahs, pwa, “Kamai kahjikkoar kapang mehki ma doahroar me.”

### *Jesus Pangin Levi*

\* **1:40** kamwkelehda: Johmwehu oauwe kin kajaminihla armaj oang kaudek. oang Jounkoamoaur (Daniel 7)

\* **2:10** Nihn-Armaj Daidel oau

<sup>13</sup> Jesus pel pwuroahng pwurlahng in oaroahr in Lehn Galilee. Armaj dir pel pokonpene Ipoa, Ih ken pel sapda padahk oang irai. <sup>14</sup> Nehn Ah allaluhla wija, Ih kapangda jounrik daksis men, oadoa Levi nihn Alphaeus, ma onnonohn nehn ah oahpisso. Jesus pwehng, **“Indoa pwilihla Ngoahi.”** Levi ken uhdahr pwilihla Jesus.

<sup>15</sup> Doari Jesus ken mwindihoang mwinge in umwen Levi-o. A jounrik daksis pwi apel armaj dipan dir pwili Jesus apel Nah sohnpadahkkok mwindihoang in sehpyllo, pwa irai dir kin pwilpwili kahkahkauj Jesus. <sup>16</sup> Epwi jounpadahk in Kojonneddo, ma kijehn Pharisee-ok, nehn irai kapangda Jesus Ah pwili mwinge ipen joangoan armaj dipan pwiai apel ipen jounrik daksis pwiai, irai idoakkoang Nah sohnpadahkkok pwa, **“Da Ih kin pwilihki mwinge ipen joangoan armaj pwiai?”**

<sup>17</sup> A nehn en Jesus rongda me, Ih pwehng irai, **“Jaudi armaj sihkei ioar anahne jounwini, a armaj johmwehu. Ngoahi joah indoahng pangin armaj pwung, a armaj dipan kan.”**

### *Peidek Doahroar Kaijihjol*

<sup>18</sup> Pehn oau nihn John jounpoapdaij sohnpadahkkok apel Pharisee-ok kaijihjol. A armaj pwi indoa ipen Jesus idoak Ipoa, pwa, **“Amwda nihn John Jounpoapdaijok apel nihn Pharisee-ok kin kaijihjol, a nihmw kan johkin pwili?”**

<sup>19</sup> Jesus ken japoang irai, **“Pwa da? Kamwai lemleme ma sohnkapar in kamdipw in koapwoapwoaud oau pirin kaijihjol nehn en woal kamwohddo ne lel iparai? Irai johkak. <sup>20</sup> A oau anjoau ma pirin indoa ma woal kamwohddo pirin wijik jang irai; doari, ioar anjoauwo irai pirin kaijihjol.”**

<sup>21</sup> **“Joh armaj kin deipinihoang dipwin likkoau kapw pohn likkoau in joakid mering, pwa dapwa likkoau kappwo pirin nurpene, soahrjang ekij likkoau merinngo doari soahroakko pirin koalikla. <sup>22</sup> Pel joh armaj kin widekihoang wain kapw nehn pehk in kilin mahn mering, pwa wain kappwo nen koauwehla pehk merinngo; ohroj ara, wainno apel pehkko, nen ohla mwahl. Ioar ma wain kapw pwen mwehuwoangoar pehk kapw.”**

### *Peidek Doahr Sabbath*

<sup>23</sup> Sabbath oau Jesus wudla nehn mwoaswel in wihd oau. Nah sohnpadahkkok pwili Ih; irai ken dolihdi wehn wihd pwi. <sup>24</sup> Pharisee-ok ken pwehng Jesus, **“Kapang! Nihmw sohnpadahkkok wia me ma uhwoang kojoned in Sabbath.”**

<sup>25</sup> Jesus japoang irai, **“Kamwai johkin wadek da David wiahdahu anjoauwo ma ih apel pwilihoahk mwakohkohla? <sup>26</sup> Ih dilda nehn umwen Koahs, kangla pilahwa joarwihok, nehn mwein Jamwrou Laplap Abiathar. Doahr kojoneddo, jamwrouwok oar ioar mweimweioang kang pilahwa pwiai. A David kangla apel kioang pwilihoahk irai en pwili kang.”**

<sup>27</sup> Jesus pel pwa, **“Sabbath wiawihdahng mihn kemwehupen armaj, a jaudi armaj oang mihn kemwehupen Sabbath. <sup>28</sup> Ioar mehwa Nihn-Armaj ioar Koau apel Koau in Sabbath.”**

## 3

### *Waal Poah Mwoasor men*

<sup>1</sup> Jesus pwuroahng dilda nehn jinakokehu, wijahu ma waal mwoasor poah men pwili minmine. <sup>2</sup> Armaj pwi ma pwili mine wijahu nimen kadipoahki Jesus mehkij japwung, irai kin mwajmwajahnnoar Jesus ma Ih pirin kemwehuwihla min mwoasor poahu rehnin Sabbath. <sup>3</sup> Jesus ken pwehng min mwoasor poahu. **“Sohdahdo uhda mijen pokonne.” <sup>4</sup> Ih ken idoak iparai pwa, “Da kojoneddo mweidoahng kisai en wia Sabbath? Kisai en wia mehkij ma mwehu ke nauna? Kisai en jeuweje mourin armaj ke koauwehla?”**

Irai nennenla johpwa wia mehkij. <sup>5</sup> Jesus ken lioasla kapkapang irai, ih ken injinjuwedkihla irai koapsakai apel lamlam japwung. Ih ken lallahng woal mwoasor poahu, **“Kailwe poahmmwen.”** Min mwoasorro kaillahr poahu, poahu ken mwehula dauluhl. <sup>6</sup> Pharisee-ok ken diljang nehn jinakokehu pokonpene ipen epwi ma kin nihn Herod pwihhno; irai ken pilahnehda pwa irai en kojukdi Jesus.

### *Pokon Laplap oau in Poahrinjed in Lehu*

<sup>7</sup> Jesus apel Nah sohnpadahkkok inla in poahrinjed in Lehn Galilee, a pokon laplap oau kaujla Ih. Armajjok indoa jang Galilee, jang Judea, <sup>8</sup> jang Jerusalem, jang Idumea, jang oaloap Jordan, apel jang kahnihmw in Tyre apel Sidon. Armaj pwiai pokonpene ipen Jesus pwa ihr rongda joang kapwuriamei kan ma Ih kin wihwia. <sup>9</sup> Ih pwehng Nah sohnpadahkkok irai en koaunopda oau pohs siksikko, ma Ih en doauda puwoa, pwa pokonno en joah jakahpajihla Ih. <sup>10</sup> Pwa Ih kin kemwehuwihla armaj johmwehu dir, ioar mehwa irai kin jakahpajihla Ih nehn irai kin nimen pukkoang Ih. <sup>11</sup> Pel armaj ma ngen jaus dilingla irai, nehn irai kin kapangda Ih irai kin kipdi mwohn Ih, rahrahu, pwahpwahpwa, **“Koawoa ioar Nihn Koahs wa!”**

<sup>12</sup> A Jesus ken iroahdi ngen jaussok en johpwa pwa inje Ih.

### *Jesus Pilda Woaroak Eijek Roahmen*

<sup>13</sup> Jesus indahla pohn dol oau; Ih ken pangin ariahok ma Ih kin ipwilki en indoa Ipoa. <sup>14</sup> Ih ken pilda min eijek roahmen ma Ih panginki woaroak, Ih pwa, **“Ngoahi pilda kamwai pwa kamwai en kin pwilpwili Ngoahi. Ngoahi pirin pel kadarwe kamwai pwa kamwai en lohkihjili Rongmwehu; <sup>15</sup> kamwai pirin pel anki manman in kaujjang ngen jaus kan ipen armaj.”**

<sup>16</sup> Doari, ioar oadoan min eijek roahmennok ma pilpilda: Simon (Jesus kioang oadoa Peter); <sup>17</sup> James apel John, nihn Zebedee (Jesus kioang oadoara, Boanerges\*, woahwoahn mour in addoauwe nihn palar ke mwosmwos jongpoa); <sup>18</sup> Andrew, Philip, Bartholomew, Matthew, Thomas, James nihn Alphaeus, Thaddaeus, apel Simon sohn pwihnin Zealot, † <sup>19</sup> apel Judas Iscariot, woallo ma pangla Jesus.

### *Jesus apel Beelzebul*

<sup>20</sup> Jesus injang wijahu inlahng in umwahu. A pokon laplap oau pel pokonpene wijahu, ma kahrehda Ih apel Nah sohnpadahkkok johla kak mwinge ki johla anjoau. <sup>21</sup> Nehn epwi Ah peneineihok rongda me, irai inla ipoa pwa irai en oaloo apwali Ih; pwa armaj kan pwahpwahpwa pwa Ih ne japwungla nehn moange.

<sup>22</sup> Epwi jounpadahk in Kojonneddok ma indihdo jang Jerusalem siksikoa pwa Beelzebul ne dilingla Ih. Epwi pwa koaunin ngen jaus kan ma kioang Jesus manman in kajroahjang ngen jaus ipen armaj.

<sup>23</sup> Ih panginpene armajjok pwehng irai karajraj pwi: **“Imdoahr Jehsen ah kak kajroahla Jehsen? <sup>24</sup> Ma wei oau pirin pwalpijoang wiahda pwihn pwi ma pirin uhpene nehn pwungarai, weiho johkak pwoaida, pwa ih pirin mwoarpijoang. <sup>25</sup> Ma peneinei oau pirin pwalpijoang wiahda pwihn pwi ma pirin uhpene nehn pwungarai, peneineihok johkak pwoaida pwa ih pirin mwoarpijoang. <sup>26</sup> Doari ma wein Jehsen pirin pwalpijoang wiahda pwihn pwi ma pirin uhpene nehn pwungarai, ih johkak woaroai, pwa ih pirin mwoarpijoang apel johla.**

<sup>27</sup> **“Joh emen kak koauwehla umwen woal sihkei men pwa en pirapoa ah koapwoa kan ma ih johpwa koldi piroahpene woal sihkeiho. Ioar wioapoawahr doari ih kak pirapoa ah koapwoa kan.**

\* **3:17** Boanerges Loapin lalin Aramaic kije uhdahn woahwoahki “nihn palar” a mourin woahwoahn addoauwe in loapin lal in Mwoakilloa: “mwosmwos jongpoa.” Jesus kioang addoauwe nihn Zebedee kan pwa ara kin lamlam karwaro ke nehn kapehd karwaro (pel soahk Luk 9. 54-55). † **3:18** Zealot Soahk Mat. 10.4.



<sup>28</sup> “Ngoahi pwehng kamwai in mehleh pwa armaj kan kak oaloo mahkpen diparai kan ohroj, pel dipen lahlahwe. <sup>29</sup> A emen ma pirin lahlahwe Ngen Joarwi, johpwa kak oaloo mahk in dihp oauwe, pwa ih ne wiahda dihp oau ma johpwa kak lapwda.”

<sup>30</sup> (Jesus pwa me pwa epwi ihr pwahpwhpwa pwa ngen jaus ne dilingla Ih.)

### *Inen Jesus apel Riah kan*

<sup>31</sup> Inen Jesus apel riahk leldo. Irai mine likin ummwo nimen lalloang Ih. <sup>32</sup> Pokonno ma mwindi pidekihpene Ih pwehng, “Koawoa kidal pwa inoammwo apel rioammwok minmine likinno, irai nimen suhwoang Koawoa.”

<sup>33</sup> A Jesus japoang irai, “Inje inoai, apel inje rioai kan?” <sup>34</sup> Ih pel kapkapangjili pohn irai ma minmine ipoa, doar Ih ken pwa, “Ioar inoai apel rioaikoa me. <sup>35</sup> Emen ma kin kapwaihahda injenen Koahs, ioar arai rioai apel inoai.”

## 4

### *Karajraj in Jounkamwoaroo*

<sup>1</sup> Jesus pel sapda padahkjili in poahrinjed in Lehn Galilee. Pokon laplap oau pokonpene Ipoa kahrehda Ih ken doauda mwindi pohn pohn pas. Pohsso peipeipei nehn jeddo, a pokonno mine in poahrinjeddo. <sup>2</sup> Ih ken padahkihoang irai joang dihrdir in karajraj, doahroar Ah kin kalap wia nehn Ah padahk. Ih pwehng irai:

<sup>3</sup> “Kamwai rong. Armaj men mine ma inlahng kamwroa ah liporrohk. <sup>4</sup> Doari, nehn ah kamwkamwroa ah liporrohk, epwi mwoardi oang nehn alin nehn mwoaswello, mahsang pwi sangdo kangjang. <sup>5</sup> Epwi liporro kipdi nehn wija sakaikai ma pwirejjo poadpoad. Liporrohk pispisin koapda pwa pwirejjo poadpoad. <sup>6</sup> A anjoauwo ma joauwo dakda, suhkoahk pispisinnoar mengla pwa koalohraiok johpwa lel nehn wija loal. <sup>7</sup> Epwi liporrohk kipdi nehn pwungen suhkoa soaksoak. A suhkoa soaksoakkok koapda kajasihkeihla irai; ioar irai ken johpwa uhwahki. <sup>8</sup> A epwi liporrohk nehn pwirej mwehu; irai koapda, koalikla, uhwa mwehu; epwi uhwa min jilihjek, a epwi weneijek, a epwi epwiki.”

<sup>9</sup> Jesus pel pwa, “Doari, Armaj men ma mine sioa mihn rongrong, a ih en rong.”

### *Kahrpoan Karajraj kan*

<sup>10</sup> Doari, nehn in Jesus kalahpwukla, arai eijek roahmenno apel epwi ma pwili rong indoa ipoa pwa irai en poaki en kawoahwoahng irai karajraj kan. <sup>11</sup> Ih ken japoang irai, “Oang kamwai mweimweioang en kidal manman rir kan doahr wein Koahs. A oang irai kan ma minmine likin, irai pirin kidal joang ohroj jang in karajraj. <sup>12</sup> Pwa, ‘Irai en kapkapang,

a pwen johpwa kapang,

Irai en rongrongrong,

a pwen johpwa woahwoahki,

pwa ma arai kapang, rong, oh woahwoahki, Irai nen okdeklahng Koahs apel oaloo lapwdahn diparai kan.’ ”

### *Jesus Kawoahwoahda Karajraj in Jounkamwoaroo*

<sup>13</sup> Jesus idoak iparai, pwa, “Kamwai johpwa woahwoahki karajraj pase? A imdoahr amwai kak woahwoahki karajraj pwiok? Doari, ioar doahr me: <sup>14</sup> Jounkamwoaroo, ioar ma kin kamwoar mahjan in Koahs. <sup>15</sup> Epwi armaj doahr Liporrohk ma mwoardi oang nehn al kan. Nehn ahr kin rong mahjanno, Jehsen kin indoa koawehjang irai.

<sup>16</sup> Liporro ma kin mwoardi oang nehn wija sakai woahwoahki irai kan ma kin rong oalooahda apel perenkihda. <sup>17</sup> A johkin soangdi iparai, ma apwal oau ke kojkoj kin lel irai pwa padahkko, a irai kin pispis in lohdi. <sup>18</sup> Epwi armaj kin doahroar Liporro siksikkok ma mwoardi oang nehn pwungen suhkoa soaksoak. Ioar irai ma



kin rong mahjanno, <sup>19</sup> a ki pwunod in mourin jampah kan, noaroak in koapwoa kan, apel joangoan inoang sohrohr kan kin pwokda jakahpajihla mahjanno, kahrehda ken johpwa uhwahda. <sup>20</sup> Epwi doahroar liporro siksikoa ma mwoardi oang nehn pwirej mwehu. Irai kin rong mahjanno, oaloo, ken uhwa: epwi uhwa min jilihjek, epwi weneijek, a epwi uhwahda min epwiki.”

### *Lahm pehn Jepjep*

<sup>21</sup> Jesus pel uhjehla Ah sikesik oang irai, “Mine ipamwai ma kin okojsa nah lahm kihdi pehn jepjep ke pehn pehd? Ih joah nen kihdahng nehn uhdahn dohiah? <sup>22</sup> Johpwa me joaloang kij mine, ma johpwa pirin kajanjalda; pel johpwa me oakkoak kij mine, ma johpwa pirin kalohkjili. <sup>23</sup> Doari armaj men ma mine sioa mihn rongrong, a ih en rong!”

<sup>24</sup> Ih pel pwehng irai, “Kamwai soahk mwehu mehkije ma kamwai pirin rong! Mihn jonngohr ma kamwai pirin jongki epwi, ioar Koahs pirin jongki kamwai — apel koalikjang mehleh. <sup>25</sup> Pwa armaj ma anki mehkij, ekij pirin pel aluhwoang; a ma joh ah mehkij, pirin pel kihekjang mehu ma mine ipoa.”

### *Karajraj en Koakoairdahn Liporro siksik*

<sup>26</sup> Ih pel pwehng irai, “Wein Koahs doahroar armaj men ma kamwoar liporro siksikpwi nehn japwahu. <sup>27</sup> Nehn ah moair inpwong apel poahd in rehn, liporrohk kin koap apel koalkoalikla, a ih johpwa woahwoahki doahr mehpwai kin wihwiawi. <sup>28</sup> Pwa pwirejjo ma kin kakoapihda liporrohu, kakoalikhla, apel kioang wah: sapdahu dipwdipw siksik kij, mwerin, ih kin wiahla suhkoa siksik, apel mwerin, uhwahda; a nehn wahu dirin liporro siksik. <sup>29</sup> Nehn en wah kan kin mah, armaj kin poaloahdi, kihpene, pwa anjoauwo ioar anjoau in doddol.”

### *Karajraj in Liporrohn Mustard*

<sup>30</sup> Ih pel pwa, “Da kisai pirin karjahng wein Koahs? Ke karajraj da kisai pirin doadoahkki pwa kisai en kawoahwoahda? <sup>31</sup> Ih doahroar liporrohn Mustard, ma keiou siksik nehn pwungen liporrohn suhkoa kan. <sup>32</sup> A nehn a kamwoarmwoardi oang nehn pwirej, ih kin koapda apel koalikla wiahla suhkoa koalik pas, koalikjang suhkoahn nehn mwoaswel kan ohroj. Ih kjangpijoang, a mahnsang in pehnloange kan kin jokdo wiahda irai paj pehn ririn rah kan.”

<sup>33</sup> Jesus kawoahwoahng armaj kan en Koahs mahjan in joangoan karajraj pwiai doahroar arai en kin kak woahwoahki. <sup>34</sup> Joh kapahrak oau Ih kin wiahng armaj kan ma Ih johkin doadoahkki karajraj; a nehn Ah kin kalahpwukla ipen Nah sohnpadahkkok, Ih kin kawoahwoahng irai karajraj ohroj.

### *Jesus Kamoahjihdi Melmel oau nehn Jeddo*

<sup>35</sup> Injoausikin rehnohr Jesus pwehng Nah sohnpadahkkok, “Kisai dauluhlla oaloap pille.” <sup>36</sup> Nehn irai koamwurla pokonno, sohnpadahkkok kerda pohn pohsso ma Jesus mine puwoa pwili jeila; epwi pohs pel pwili irai kijekjoula loappoauwo. <sup>37</sup> Doahr ken eng koalikda, ne koalik jaudahdo pohn pohsso, enkennoar kamweihi. <sup>38</sup> Jesus mine mwerin pohsso, moair a moange mine pohn Ah pilahu. Sohnpadahkkok panginda Ih, pwehng Ih, “Maing Jounpadahk, koawoa johpwa kaspoahki irai ne pirinken mehdi?”

<sup>39</sup> Jesus pwohrdahr, ruwojehda melmello, pwa, “Uhdi!” Ih pel pwehng nohk, “Kamwai moaloailoaidi!” Anjoauwohr melmello uhdi, ken molundi dauluhl. <sup>40</sup> Ih ken pwehng irai, “Da kamwai majpwehk ki? Da, kamwai kahjikkoar pwojonla?”

<sup>41</sup> Irai majpwehkda koalik, pwahpene nehn pwungarai, “Inje min mine, ma eng apel no kin peikkoang?”

## 5

*Jesus Kemwehuwihla woal men ma Ngen Jausso Dilingla ih*

<sup>1</sup> Jesus apel Nah sohnpadahkkok kijoula oaloap Lehn Galilee apel dauluhllahng oaloap pillo, nehn japwen mihn Gerasa. <sup>2</sup> Jesus kerdihjang pohn pohsso, a woalmen ma ngen jaus dilingla ken aluhdo ipoa; ih indoa jang nehn joaujoau pwi, wija ih kin minmine. <sup>3</sup> Joh armaj men kakkoang woallo, pel joal pahrang kan johkak joalihdi; <sup>4</sup> pwa pehn dir ih kin joalkihdi joal pahrangok in poah apel in ehn, a ih kin kamweidpijoang joal pahrangok; johpwa emen kak koldi pwa ih sihkei. <sup>5</sup> In rehn inpwong, ih kin allaluhjili nehn joaujoau kan, apel nehnwoallo in pohn dol kan, rahrahu koauwehla palwoaroa ki sakai ingkoang kan.

<sup>6</sup> Doari, ih kapangdahr Jesus jang wija doh, ih kijoula, kipdi mwohn Ih, <sup>7</sup> rahrahu, pwahpwahpwa, “Maing Jesus, Nihn Koahs Laplap! Dahioau Koawoa nimen wiahng ngoahi? In oadoan Koahs, joah koalkoa ngoahi!” <sup>8</sup> (Ih pwahki me pwa Jesus pwa, **“Koawoa ngen jaus, injang ipen armaj menen!”**)

<sup>9</sup> Jesus idoak ipoa, **“Ia oadoammwen?”**

A woallo japoang Ih, “Oadoaioa ioar ‘Karej’ pwa kamai min dir!” <sup>10</sup> Ih ken engdehnki Jesus en joah kaujjang ngen jausok nehn japwahu.

<sup>11</sup> A ipen wijahu, pwihnin pij oau minmineo, mwingmwinge in imwin dol oau. <sup>12</sup> Ngen jausok ken poakihda ipen Jesus en kadarla irai apel mweidoahng irai en inla dilloang nehn pijjok. <sup>13</sup> Doari Jesus ken mweidoahng. Ngen jausok ken injang ipen woallo, wud inla dilloang nehn pijjok. Dapwa pij riekid, kijoudihla duhla nehn lehu.

<sup>14</sup> Sohn apwali pijjok kaula nehn kahnihmmwo, nehn koaujoankan likin kahnihmmwo, pwehng armaj kan da wiawi. Doahr ihr ken inla kapang dahkij ma wiawi. <sup>15</sup> Nehn ahr lel wijahu ma Jesus mine, irai liskihla ahr kapangda woalwa ma kin dirin ngen jaus mwowoa, ne mwindi wijahu moaloailoaidi, mine nehn likkoau mwehu, mwomwen armaj mwehmwehu men. Irai ken mijikda. <sup>16</sup> A iraihok ma kadehdehki mijarai manmanno, irai pwehng ihr da ma wiawihoang woallo ma dirin ngen jaus apel mwomwen pijjok. <sup>17</sup> Irai ken poakihda Jesus en injang nehn japwaraiho.

<sup>18</sup> Nehn en Jesus doaudahng pohn pohsso, woallo ma ngen jaus dilingla poaki ih pwehng Jesus, “Mweidoahng ngoahi pwa ngoahi en pwilihwe Koawoa!”

<sup>19</sup> A Jesus johpwa mweidoahng, Jesus pwehng ih, **“Inla in umwoammwo, ipen oamw peneineihok, pwehng irai doahr manman koalik ma Koainno wiahng koawoa, apel doahr Ah kalahngan oang koawoa.”**

<sup>20</sup> Woallo ken inlahr pwahjili nehn wein Decapolis\* manman koalikko ma Jesus wiahng ih; irai ken inenin pwuriamweikihla.

*Jesus Kasihkeida nihn Jairus Jerpein*

<sup>21</sup> Jesus pwuroahng pwurla oaloap lehu. Pokon koalik oau aluhpene pidekihpene Ih in poahrinjeddo. <sup>22</sup> A koainin jinakoke men, oadoa Jairus, rukdihoang in pwoalkoa, <sup>23</sup> engdehnla nehn ah poakpoak, pwa “Maing, noai jerpein siksik kij nimwennoar mehdi. Menlau inla kihdahng poahmmwen pohn ih pwa en sihkeida apel kak mour.”

<sup>24</sup> Jesus uhda pwilihla koainno. A pokon koalikko pel kaujla. Wija ohroj nehn allo ken koaisla.

<sup>25</sup> Lihmen pel pwili mine wijahu, ma anki johmwehuin insa pwilpwil oaroain johnpar eijek riau. <sup>26</sup> Ih ken roaproapooan mour ipen jounwini dir, doadoahkkihla nah mwani kan ohroj. Apwen johpwa kaspoa, pwa pwen naunaunahlahr. <sup>27</sup> Nehn en liho rongda doahr Jesus jang ipen armaj kan, ih ken sohlahng likinjarkin, pukkoangdi

\* 5:20 Decapolis Loapin lal in Greek ma woahwoahki “kahnihmw eijek.”

Ah likkoauwo, <sup>28</sup> pwehng pein ih, “Ma pwen Ah likkoauohr ngoahi pukkoang, ngoahi nen sihkeida.”

<sup>29</sup> Doari, ih ken pukkoang en Jesus likkoauwo, a nehn anjoauwohr koarkoarin insahu enngengla; liho ken poahmda jang nehn palwoaroa pwa ih ne sihkeidahjang ah johmwehuwo. <sup>30</sup> Nehn anjoauwohr Jesus poahmda sihkei kij injang ipoa, Ih ken jipwjipwoaljili nehn pokonno, pwehng ihr **“Inje ma pukkoang Oai likkoauwe?”**

<sup>31</sup> Nah sohnpadahkkok pwehng Ih, “Koawoa kapang pwa pokonne koaisihla koawoa; a koawoa ken pwa **‘Inje pukkoang Ngoahi?’** ”

<sup>32</sup> Jesus ken jipwjipwoaljili pohn pokonno pwa en kapangda inje ma wia mehu. <sup>33</sup> A liho, nehn ah kidalda dahkij wiawihang, ih ken majpwehkda roarroarroar, sohdo ipoa, rukdi in pwoalkoa, pwehng Jesus me ohroj. <sup>34</sup> Jesus ken pwehng liho, **“Noai jerpein, oamw pwojon ioar kasihkeida koawoa. Doari, alwe in peren pwa koawoa ne sihkeidahjang oamw johmwehu en.”**

<sup>35</sup> A nehn Ah lallallal, pakair oau lel ipen Jairus, jang in umwahu, ma pwa, “Nihmw jerpeinno ne mehdi; joah kadroapwoahki Jounpadahkken en indoa.”

<sup>36</sup> Jesus johpwa soahk; Ih pwehng Jairus, **“Koawoa en joah mijik, a koawoa pwojonnoar.”** <sup>37</sup> Ih ken johpwa mweidoahng emen en pwilihla Ih, ioarroar Peter, James apel riau John. <sup>38</sup> Nehn ahr lel umwen koaunno Ih kapang doahr ahr loakloakoa apel joangoangoang <sup>39</sup> Ih ken dilda pwehng irai, **“Da kamwai loakloakloakoa apel joangoangoangki? Jerihn johpwa mehdi, ih moahmoahmoair.”**

<sup>40</sup> Irai uruhrki apel kapiski Ih. Doari, ih ken kadilihjang arai ohroj nehn ummwo, a mwerin, Ih ukda jemen jeriho apel inah apel Nah sohnpadahk jilmunno, Ih ken dilda nehn wijahu ma jeriho okdekda. <sup>41</sup> Ih ken kolda poahn jeriho pwehng, **“Talitha koun,”** ma woahwoahki, **“Jerpein pwohrda!”**

<sup>42</sup> Doari, nehn anjoauwohr jerpeinno ken pwohrda sapda allaluhjili. (Ih johnpar eijek riau) Arai ken inenin pwuriamweikihla mehkije. <sup>43</sup> Jesus ken inoapwihdi arai en johpwa pwahpwahpwahjili mehkije; Ih ken pwehng irai en kamwinge jerpeinno.

## 6

### *Mihn Nazareth Kajohwe Jesus*

<sup>1</sup> Jesus injang wijahu, inlahng nehn uhdahn Ah kahnihmmwo, a Nah sohnpadahk kan pel pwilihla. <sup>2</sup> Nehn Ah lel Sabbath, Ih ken sapda padahk nehn jinakokehu. Mine min dir mine wijahu pwuriamweikihla nehn ahr rong Ah padahk. Arai ken pwahpene nehn pwungarai, “Woalmene oaloahjang ia joangpwiai? Joangoan loalkoang dahioau mine Ipoa? Imdoahr Ih kak wia joangoan manman pwiai? <sup>3</sup> Jaudi kahpinsoa wa me, nihn Mary, rien James, Joses, Judas apel Simon? Jaudi riah lihkoa ma kin minmine ipasai?” Arai ken kajohwe Ih.

<sup>4</sup> A Jesus pwehng irai, **“Wija ohroj joukohp kin woan, ioarroar wija ma joh wahu in ih, ioar nehn ah wijahu, ipen ah peneinei.”**

<sup>5</sup> Ioar Ih johpwa wiahda manman oau nehn Ah wijahu, a min johmwehu pwi ma Ih kihda poah puwoa, kemwehuwihla. <sup>6</sup> Ih ken pwuriamweikihla ahr joah pwojon.

### *Jesus karpajoang min Eijek roahmennok*

Jesus aluhjili nehn koujapw kan, padpadahk oang armaj kan. <sup>7</sup> Mwerin, Ih panginpene eijek roahmenno, karpajoang wad roahmen. Ih kioang irai manman in kajroahjang ngen jaus kan. <sup>8</sup> Ih pwehng irai en johpwa wa mehkij nehn arai jeiloak oauwe, ioarroar jokonpas; arai en johpwa wijik mwinge ke pehk in jeiloak, ke mwani nehn ahr pwoaloj kan. <sup>9</sup> Irai kak sandel, a irai en joah wahda joakid riau mihn ngalngal. <sup>10</sup> Ih pel pwehng irai **“Nehn amwai pirin lel ekij wija, kamwai minminehr ipen irai ma kajarwo kamwai nehn umwaraihok, oaroh kamwai injang wijahu.”** <sup>11</sup> A

wijahkij ma irai johpwa nimen kajamwo kamwai ke nimen rong kamwai, kamwai diljang wijahu jiped jang pwirejpar in pwoalkoamwai mihn kapoahm oau me oang irai.”

<sup>12</sup> Min eijek roahmenno ken aluhpijoang kapahrak oang armaj ohroj irai en koaluhla apel wiliakapwla. <sup>13</sup> Irai kauj jang ngen jaus dir ipen armaj kan apel salipki le min johmwehu dir kemwehuwihla irai.

### *Kojkojdihn John jounpoapdaj*

<sup>14</sup> Nahmwarki Herod rongda mehpwiai ohroj, pwa Jesus wadwadla wija ohroj. Epwi pwahpwahpwa pwa ma John jounpoapdaj ioar ne pwuroahng mourda, ioar kahrehda Ih kak wia joangoan manman pwiak.

<sup>15</sup> Epwi pwa Ih Elijah.

Epwi pwahpwahpwa pwa joukohp men Ih, doahroar epwi joukohp in mehjjok.

<sup>16</sup> Nehn en Herod rongda me, ih pwa, “Ioar John jounpoapdaj me, ma ngoahi poaloahjang moange, ih ne pwuroahng mourda.” <sup>17</sup> Pwa ih kadarla John en joaldi, ih pwa en peidek oang nehn kalpwuhj pwa Herodias, pahien riahua Philip ioar Herod wud painkihla. <sup>18</sup> John jounpoapdaj johkin uhdihsjang koapwung oang Herod ah japwunngo, ih pwa, “Johpwa pwung koawoa painkihla pahien rioammwo.”

<sup>19</sup> Ioar kahrehda Herodias lioassoangkihda John, nimen kojukdi; a johkak; <sup>20</sup> pwa Herod kin mijik John, pwa ih kidal pwa John woal pwung apel joarwi men. Ioar mehwa ih ken kin jiloahjang me nauna apel kin perenki rong ah sikesik kan, mihndahr ma nehn kapehdin kin soausoaula anjoau ohroj nehn ah kin rong.

<sup>21</sup> Doari Herodias kidalda anjoau mwehu rehnin en Herod noaisikdiho. Pwa rehno Herod wiahda kamdipw oau oang nah koaun in armaj kan, oang koaunin nah karejjok, apel oang armaj laplapin wein Galilee. <sup>22</sup> Doari nihn Herodias jerpeinno pwokdo kahkahlek in kamdippwo; Herod apel sohn kamdippwo inenin perenkihda. Ioar Herod pwehngkihoang jerpeinno, “Mine mehkij koawoa anahne? Poaki ipoai, pwa ngoahi pirin kioang koawoa.” <sup>23</sup> Ih ken kahula apel inoaukihdi pwa, “Ngoahi pirin kihwe mehkij joah lipilpil, mihnda ma pel oaloap in oai wei.”

<sup>24</sup> Jerpeinno dilla idoak ipen ah nohnohu, pwa, “Nohno, da ngoahi en poaki?”

A ah nohnohu japoang, “Moangoan John jounpoapdaj.”

<sup>25</sup> Jerpeinno pwurlahng ipen nahmwarkiho, pwehng ih, “Noah nimen koawoa en kihdoahng ngoahi apkas moangoan John jounpoapdaj nehn oau pileis en!”

<sup>26</sup> Me ken kainjinjuwedihla nehn kapehdin nahmwarkiho; ih ken johpwa nimen kainjinjuwedihla jerpeinno pwa ih inoau mwohn sohn kamdippwo ohroj. <sup>27</sup> Doahr ih ken pispis kadarla nah jounpei, pwehng pwa moangoan John jounpoapdaj en wijikdo. Jounpeiho inlahr nehn kalpwuhjjo, poaloa jang moangoan John jounpoapdaj. <sup>28</sup> Ih pwurdo wa moangehu nehn pileis oau, ih ken kioang jerpeinno; jerpeinno ken wud kioang ah nohnohu. <sup>29</sup> Nehn nihn John sohnpadahkkok rongda me, arai pwurla oaloa palwoaroa wahla jaripdi nehn joaujoau oau.

### *Jesus Kamwinge Woal Limekid*

<sup>30</sup> Mwerin woaroakkok ahr pwurpene, irai pokonpene ipen Jesus pwa arai en kajalehioang me ohroj ma irai ne wiahda apel padahk ohroj ma irai kawoahwoahda.

<sup>31</sup> Armaj dir kin pwurpwuroa Jesus apel Nah sohnpadahkkok kahrehda johla anjoau in arai mwinge. Ioar Jesus pwehngkihoang sohnpadahkkok, “Kisai inla kalahpwukla mijkoalkoal nehn japwsoahnno, wijahu ma kamwai kak koammoal.” <sup>32</sup> Arai ken doauda pohn pohs oau pwa irai en inlahng kalahpwukla wija kij.

<sup>33</sup> A armaj dir kapang arai mwoakid doahr ken kidal da. Irai ken kijoulahng wijahu jang nehn kahnihmwok, irai lello mwohrai. <sup>34</sup> Nehn en Jesus doaudihjang pohn pohsso, Ih kapangda pokon koalik oau, Ih ken ipwilkihda irai. Pwa irai doahroar

polohn jihpw oau ma ne joh jiloapoarai. Doari, Ih ken sapda kawoahwoahng irai joang dir. <sup>35</sup> Injoausik pene, Nah sohnpadahkkok indoa Ipoa, pwehng Ih, “Maing, ne pwong a japwsoahn oau me. <sup>36</sup> Ken karpajoang pokon oauwe, pwa irai en alwe nehn kahnihmw siksik kan apel koujapw koaroan kan pwa irai en pein dupukda kanrai mwinge.”

<sup>37</sup> A Jesus japoang irai, “**Kamwai kapwa kamwinge irai.**”

A irai pwehng Ih, “Doari, koawoa mwehuki kamai en inla dupukda mwinge woahroar mwani silper riepwiki\* kamwingehki irai?”

<sup>38</sup> Jesus idoak, “**Lopwonin pilahwa doapoa mine ipamwai? Kamwai kapang apel wadek.**”

Nehn ahr ne wadekda irai pwehng Ih, “Lopwonin pilahwa limoau apel mwumw roahmen.”

<sup>39</sup> Jesus pwehng sohnpadahkkok en wiahda pwihn siksikpwi pokonno apel kamwindihoang irai pohn re kan. <sup>40</sup> Irai ken mwindi in pwihnpwi, epwi wad epwiki a epwi wad limejek. <sup>41</sup> Doahr Jesus ken pwoakda lopwonin pilahwa limoau apel mwumw roahmen, jardahla nehnloange kapingkalahngannoang Koahs. Ih ken sipwangpijoang pilahwahk kioang Nah sohnpadahkkok pwa irai en nehkkoang armajjok. Ih pel nehkkoang irai ohroj mwumw roahmenno. <sup>42</sup> Armaj ohroj mwinge oaroh moadla, <sup>43</sup> Sohnpadahkkok dowihda luhwen pilahwahk apel mwummwok wiahda kiam eijek riau. <sup>44</sup> Woal ma pwili kang pilahwahk, irai min limekid.

### *Jesus Alu Pohn Jeddo*

<sup>45</sup> Mwerin me Jesus pispis pwehng Nah sohnpadahkkok, irai en doauda pohn pohs oau jeila Bethsaida mwohn Ih, oaloap jeddo, nehn Ah pirin karpajoang pokonno. <sup>46</sup> Nehn Ah karpajoang irai, Ih doaudahla pohn dol oau pwa en kapkap.

<sup>47</sup> Injoausikdi, pohsso ne mine oh nehn pwungen lehu, a Jesus kalkalahpwuk in poahrinjeddo. <sup>48</sup> Ih kapang doahr en sohnpadahk kan engdehn jeijeiei nehn lehu pwa irai jei pallan enngo. Doari inlahng injohrehn, nehn pwungen kiloak jiluh apel wonou, Ih inla iparai alu pohn lehu, <sup>49</sup> a irai kapang Ah allalu pohn lehu, irai pwa eni men, <sup>50</sup> ioar irai rahukihda majpwehkda nehn irai kapangda Jesus. Ih ken pispisinoar lallahng irai, pwa, “**Kamwai sihkei! Ngoahi me, kamwai joah majpwehk.**”

<sup>51</sup> Ih ken doauda pohn pohsso pwilihda irai; anjoauwohr enngo uhdi. Sohnpadahkkok pwuriamweikihla <sup>52</sup> Pwa irai johpwa woahwoahki manmanno ma Jesus kamwingehki armaj limekiddo, pwa nehn kapehdirai pe ros oar.

### *Jesus Kemwehuwihla Armaj Johmwehu kan nehn Gennesaret*

<sup>53</sup> Irai kosehla lehu, lellahng Gennesaret peidi ipen jappwo, piroahdi pohsso. <sup>54</sup> Nehn irai doaudi jang pohn pohsso, armaj kan pispisinoar kidalda Jesus. <sup>55</sup> Irai kijoupijoang wija ohroj sapda wahdohng ipen Jesus johmwehuwok pohn mihn wijik kan wija kan ma irai rong pwa Ih mine. <sup>56</sup> Apel wija ohroj ma Ih kin inla, nehn kahnihmw siksik kan, ke nehn kahnihmw koalik kan, ke nehn likin kahnihmw kan, armaj kan kin kihdi nihrai johmwehu kan wijahn noasnoas kan, poaki Ih en mweidoahng irai en pukkoang ikin Ah likkoauwo. Doari, irai ohroj ma kin pukkoang Ah likkoauwo kin sihkeida jang arai johmwehu kan.

## 7

### *Doahr Padahk in mihn Mehjjok*

\* **6:37** MWANI SILPER: mwani silper oau ioar dupkoan sohn doadoahk men rehn oau nehn anjoauwo (soahk MAT 20.2)



<sup>1</sup> Pharisee pwi apel jounpadahk in Kojonnedpwi indoa jang Jerusalem pokonpene ipen Jesus. <sup>2</sup> Irai soahkda doahr epwi Nah sohnpadahkkok kin mwingehki poa jamin — nehn ahr johkin amwumw doahr siahkko ma Pharisee-ok pwehng armaj ohroj en wia.

<sup>3</sup> (Pwa Pharisee-ok apel mihn Jew ohroj, kin jappang siahkkok ma irai oaloea jang ipen mihn Jew in mehjjok: ioar ma irai johkin mwingehki ma arai johpwa amwumwla doahr siahk kodoaudoaudo jang jamasai mihn mehjjok. <sup>4</sup> Irai johkin kang mehkiij ma wijikdo jang wijahn noasnoas kan, ma irai johpwa amwunla.\* Irai kin pel wia siahk dir ma irai oaloahjang mihn mehj kan: doahroar amwumw mwoak, amwumw pileis, amwumw pwohl prahs, apel pehd kan.)

<sup>5</sup> Pharisee-ok apel jounpadahk in Kojonneddok idoak ipen Jesus, pwehng Ih, “Maing, amwda nihmw sohnpadahk kan johkin pwilihki kapwaihahda siahk kodoaudoaudo en jamasai mihn mehjjok, nehn irai kin pwili mwinge a johkin amwumwla.”

<sup>6</sup> A Jesus japoang irai, “Mehlel oar pwa uhdahn pwung en Isaiah kohpda doahr amwai mwalaun en, doahr ma ne insingdi.

‘Koahs pwa, armaj pwiai kin woauki Ngoahi jang in arai lal a mohngiongirai inenin dohjang Ngoahi.

<sup>7</sup> Johpwa kaspoan ahr kin joarwihoang Ngoahi, pwa irai kin padahkki kojoned in armaj, a irai karaunki pwa en Koahs Kojoned.’ ”

<sup>8</sup> Ih pel pwa, “Kamwai kin kerpwihla kojoned in Koahs, a kin injinohkihoar kapwaihahda siahk kodoaudoau in armaj kan.”

<sup>9</sup> Ih pel doaudoaula pwa, “Kamwai inenin loalkoangin joah oaloahda kojoned in Koahs, pwa kamwai en kauj pein amwai padahk kan. <sup>10</sup> Pwa Moses koajoanehdi pwa, ‘Koawoa woauki joamoamw apel inoamw,’ apel ‘Ma emen ma pirin lahlahwe jamah ke inah, ih pirin kojkojdi.’ <sup>11</sup> A kamwai wud kin padahkihwe, ‘Ma armaj men anki ekij ma ih kak jeuwejehki jamah apel inah, a kin pwa, “Corban me” (woahwoahki “oang Koahs”), <sup>12</sup> ih pwa ih ne johla anki pwukoahn jeuweje jamah apel inah.’ <sup>13</sup> Doari, ioar doahr amwai kin koauwehla mahjan in Koahs nehn amwai kin pein padahkihoang armaj kan siahk kan ma kamwai kin pein wiahda. Apel mine siahk dir ma doahroar me ma kamwai kin wihwia.”

### *Dahioau kin Kajaminihla Armaj*

<sup>14</sup> Jesus pel pangindo pokonno Ipoa, pwehng irai, “Kamwai rong apel woahwoahki mwehu me: <sup>15</sup> Johpwa mehkiij ma kin aluhwoang nehn koawoa jang likin kak kajaminihla koawoa, pwa mehkan ma kin injang loaloea, ioar ma kin kajaminihla koawoa. <sup>16</sup> (Kamwai rong ma mine siamwai mihn rong wija.)”

<sup>17</sup> Nehn Ah injang ipen armajjok dilda nehn ummwo, Nah sohnpadahkkok idoak Ipoa woahwoahn karajraj oauwe. <sup>18</sup> Ih ken pwehng irai, “Da, kamwai johpwa loalkoang jang armaj pwian? Kamwai jehjoa pwa joh mehkiij mihn likin armaj kin dilda loaloea kajaminihla, <sup>19</sup> pwa ih johkin inla nehn mohngiong, pwa nehn ah pehk in mwingehu, wijahu a ih kin injang loaloea inla likin palwarro.” (Nehn Ah pwa me, Jesus kadehdehda pwa joangoan mwinge ohroj mwehu oang armaj.)

<sup>20</sup> Doahr Ih ken pwa, “Me kin indahjang nehn armaj, ioar ma kin kajaminihla armaj <sup>21</sup> pwa jang loaloan armaj, jang nehn ah mohngiong, ma lamlam nauna kan kin indahjang, ma kin kahrehioang nehn dipen siahk nauna, nenek, pirap, kojarmaj, kamwahl, <sup>22</sup> noaroak apel wia joangoan siahk nauna kan ohroj; kapweipwei armaj,

\* **7:4** Irai johkin kang mehkiij ma wijikdo jang wijahn noasnoas kan, ma arai johpwa amwunla. Ke: Irai johkin kang mehkiij jang nehn wijahn noasnoas kan ma irai johpwa amwumwla



nauna joaroa, pihrin, lahlahwe aklaplap apel joah injino — <sup>23</sup> joang nauna pwiai ohroj kin sapjang loaloan armaj, ioar kin kajaminihla armaj.”

### *En Lihmen Pwojon*

<sup>24</sup> Jesus ken inlahjang wijahu, inlahng nehn wein Tyre. Ih dilda nehn ummwo a Ih johpwa nimen armaj kan en kidal pwa Ih mine wijahu; a Ih johkak joaloangla. <sup>25</sup> Pwa lihmen ma ngen jaus dilingla nah jerpeinno, liho kidalda pwa Jesus mine wijahu, ih ken dildahr Ipoa nehn ummwo dairukdihoang in pwoalkoa. <sup>26</sup> Lihn likin men ih, ih noaisikdi Phoenicia nehn wein Syria. Ih ken poaki ipen Jesus en kaujjang ngen jausso ipen nah jerpeinno. <sup>27</sup> Doari Jesus ken japoang, pwehng ih, “Kisai kamwinge jerihkan mijoa, johpwa pwung en kihjang kenen jerihkan mwinge peidlahng doahk kan.”

<sup>28</sup> Liho japoang pwehng Ih, “Mehlel Maing, a doahk kan kin pel pwili kang in kenen jerihkan pehn sehpi kan!”

<sup>29</sup> Jesus ken japoang, “Pwa doahroar oamw pajpoang en, alwe in umwoammwo; pwa ngen jausso ne injang ipen nihmw jerpeinno.”

<sup>30</sup> Liho ken pwurla in umwahu kidalda pwa nah jerpeinno onohn nehn dohiahu; a ngen jausso ne injang ipoa.

### *Jesus Kemwehuwihla Woal Pongpong apel Jehjoa Lallal men*

<sup>31</sup> Jesus inlahjang Tyre, Ih wud ipen Sidon, inlahng Lehn Galilee, kosehla wein Decapolis. <sup>32</sup> Armaj pwi ken ukdohng Ih woal pongpong apel jehjoa lallal men, poaki en kihdahng poah pohn ih. <sup>33</sup> Jesus ken ukjang woallo nehn pokonno, Ih ken dilimmoang jandin poah nehn pwokin sioa, kioang pilen oawoa in jandin poah, jairki loawoan woallo. <sup>34</sup> Jesus ken jardahla nehnloange, pwahla, “Ephphatha,” ma woahwoahki, “woahjekpijoang!”

<sup>35</sup> Anjoauwohr pwokin sien woallo woahjekpijoang apel joalin loawoa lapwadekla; ih ken sapda lallal. <sup>36</sup> Jesus ken pwehng ihr ohroj en johpwa pwehng emen mehkije. A doahr uhwen lal sihkei ma Ih wiahng arai, ioar doahr sihkei in ahr lohkihjili manman oauwe. <sup>37</sup> Irai ohroj ma pwili rong wioapoan manman oauwe, irai ken pwuriamweikihla pwahpwahpwa, “Me ohroj Ih kin wiahda inenin mwehu! Pwa Jesus kin nimen armaj pongpong kan en rongda wija apel kalallalihda armaj loahsoang kan!”

## 8

### *Jesus Kamwinge Armaj Pahkid*

<sup>1</sup> Pokon koalik oau pel pwuroahng wiawi ipen Jesus rehnnok, a joh me irai en kang. Ih ken panginpene Nah sohnpadahkkok pwehng irai, <sup>2</sup> “Ngoahi ipwilkihda armaj pwiai pwa irai minminehki Ipoi rehn jiluh, doahr ne pel rojla kanrai mwinge. <sup>3</sup> Ma Ngoahi kadarla irai in umwaraihok joah kang mehkij, irai kak oar mwehlehla nehn al kan, pwa epwi irai indoahjang wija doh.”

<sup>4</sup> Nah sohnpadahkkok idoak, “Armaj pirin kihjang ia nehn japwsoahn oauwe mwinge ma pirin isar oang kamwingehla joangoan koalik in pokon oauwe?”

<sup>5</sup> Jesus idoak oang irai, “Lopwon in pilahwa doapoa mine ipamwai?”

A irai japoang, “Lopwon ijuh.”

<sup>6</sup> Jesus ken pwehng pokonno en mwindi pohn mohk. Ih ken pwoakda lopwon in pilahwa ijuhwo, kapingkalahnganki oang Koahs, sipwangpijoang, kioang Nah sohnpadahkkok pwa irai en nehk oang pokonno. Irai ken nehkpjoang. <sup>7</sup> Mwumw pwi pel mine iparai; Jesus pel kapkapki, pwehng sohnpadahkkok irai en pel nehk oang pokonno. <sup>8</sup> Pokonno ken mwinge oaroh moad — ihr ohroj dapwa armaj pahkid. <sup>9</sup> Sohnpadahkkok audohda kiam ijuh oaroh dir, luhen mwingehk. Jesus

ken kadarpijoang pokonno, <sup>10</sup> Ih ken doauda pohn pohs pas pwili Nah sohnpadahkkok dauluhlhang nehn wein Dalmanutha.

*Pharisee-ok Poaki Manman oau jang ipen Jesus*

<sup>11</sup> Pharisee pwi indoa sapda akpwung oang Jesus. Irai nimen widingehdi, ioar ihr poakihki en wiahda oau manman jang nehnloange. <sup>12</sup> Jesus pwuriamweikihla pwa, “Da armaj in anjoau kije poakihki manman oau jang nehnloange? Ngoahi pwehng kamwai in mehlel, johpwa manman pirin aluhwoang di oauwe.”

<sup>13</sup> Ih ken injang irai pwuroahng doauda pohn pohsso japahllahng oaloap jeddo.

*Ihs in Pharisee-ok apel Ihs in Herod*

<sup>14</sup> Sohnpadahkkok moalkoahla wahda kanrai pilahwa; ioarroar pilahwa pas mine iparai pohn pohsso. <sup>15</sup> Jesus koahkoahlik oang irai pwa, “Kamwai kalke kamwai jang ihs in Pharisee kan apel ihs in Herod.”

<sup>16</sup> Irai sapda siksikoahpene nehn pwungarai, pwa, “Pwa joh pilahwa ipasai ioar Ih pwahki me.”

<sup>17</sup> Jesus kidal pwa da irai pwahpwahpwa, Ih idoak iparai, “Dahkij kamwai siksikoa pwa joh pilahwa ipamwai? Kamwai kahjikkoar marainkihla joang kan? Kamwai inenin nehn kapehd rosros! <sup>18</sup> Mine pwoaroan mijamwaikan — a da kamwai joah kapangki wija? Mine siamwaikan — a da kamwai joah rongki wija? <sup>19</sup> Kamwai moalkoahla lopwon in pilahwa limoauwo ma Ngoahi kamwingehkihla armaj limekiddo? Kiam doapoa kamwai audohda jang luhwen mwingehk?”

Irai pwehng Ih, “Min eijek riau.”

<sup>20</sup> “A lopwon in pilahwa ijuhwo ma Ngoahi kamwingehkihla armaj pahkiddo? Kiam doapoa kamwai audohda jang luhwen mwingehk?”

Irai pwehng Ih, “Min ijuh.”

<sup>21</sup> A Ih idoak iparai, “A kamwai kahjikkoar woahwoahkihla?”

*Jesus Kemwehuwihla Woal in Bethsaida Majkun men*

<sup>22</sup> Irai lel Bethsaida; wijahu armaj pwi ukdohng Jesus woal majkun men poaki en pukkoang. <sup>23</sup> Jesus oalao poahn min majkunno uklahng likin koaujoan. Mwerin Ah andipoahdi pohn pwoaroan mijoahk, kihdahng poah pohn woallo, Jesus idoak ma ih ne kapang wija ke joah.

<sup>24</sup> Woal majkunno poahdpijoang pwehng Jesus, “Maing, ngoahi kak kapang armaj kan, a doahrma ma pwen suhkoahpwi allaluhjili.”

<sup>25</sup> Jesus pel pwuroahng kihda poahk pohn pwoaroan mijen woallo, woallo pwuroahng poahdpijoang; a me ne mwehula, ih ne kak kapang me ohroj mwehu.

<sup>26</sup> Jesus ken kadarla ih in umwahu, pwehng, “Alwe in umwoammwo, koawoa johpwa pwurla nehn koaujoanno.”

*En Peter ah Kajalehda doahroar Jesus*

<sup>27</sup> Jesus apel Nah sohnpadahkkok inlahng nehn koujapw pwi ipen Caesarea Philippi. Ih idoak iparai nehn allo, pwa, “Inje ma armaj kan kin pwahki Ngoahi?”

<sup>28</sup> A irai japoang, “Epwi kin pwa koawoa John jounpoapdaij, epwi pwa koawoa Elijah, a epwi pwa koawoa emen joukohp in mehjjok.”

<sup>29</sup> A Ih idoak iparai, “A kamwai, inje kamwai pwahki Ngoahi?”

Peter japoang, “Koawoa ioar Messiah.”

<sup>30</sup> Jesus kainoapwihdi irai en johpwa pwehng emen.

*Jesus pwa doahroar Ah pel Loklok apel Mehdi*

<sup>31</sup> Jesus sapda kawoahwoahng Nah sohnpadahkkok doahroar Nihn-Armaj uhdahn pirin loklok koalik, jekenkenla pehn koannok, jamwrou laplappok apel jounpadahk

in Kojonneddok. Ih pirin kojkojdi, a mwerin rehn jiluh Ih pirin iejda. <sup>32</sup> Ih pwehng irai mehpuwai in janjal. Peter kalahpwukihla Jesus wijahu, sapda koapwung oang Ih. <sup>33</sup> A Jesus pwurla kapang Nah sohnpadahkkok, koapwung oang Peter, “Alwe jang Ngoahi Jehsen, pwa oamw lamlam en, jaudi jang ipen Koahs a jang ipen armaj.”

<sup>34</sup> Jesus ken kapokonpene armaj dir apel Nah sohnpadahkkok, pwehng irai, “Ma emen in kamwai nimen indoa pwili Ngoahi, en uhdahn moalkoahla pein ih, wahda ah lohpuwu, pwilihla Ngoahi. <sup>35</sup> Pwa emen ma nimen doaroahla ah mour ih pirin luh jang; a emen ma mihndahkihla ah mour ki Ngoahi, apel rongmwehuwo, ih pirin mourla. <sup>36</sup> Pirin mine kaspoan oamw en ankihla jampah pwon, a luh jang oamw mour? <sup>37</sup> Joh douluhl, joh mehkij koawoa kak kihda pwa en japahl oang oamw mour. <sup>38</sup> Ma emen pirin mehkki Ngoahi apel Oai padahk ipen armaj in di nauna apel dipan oauwe, ioar Nihn-Armaj pirin pel mehkki ih nehn Ah pirin indoahki lingin Jamahu pwilihki Nah sohnloang joarwi kan.”

## 9

<sup>1</sup> Ih pel pwehng irai, “Ngoahi pwehng kamwai in mehlel, pwa epwi kamwai ma mine me, jehpirin mehdi, oaroh irai kapang wein Koahs ah pirin indoa in manman koalik.”

### *Jesus Lingla*

<sup>2</sup> Mwerin rehn wonou Jesus ukda Peter, James apel John, ukdahla irai pohn dol illoahioau, pwa irai en kalahpwukla. Ih ken wikla mwohrai <sup>3</sup> Ah likkoauwok lingla pel korohrohla. Joh armaj men nehn jampah kak kakorohroiha likkoau doahroar me. <sup>4</sup> Sohnpadahk jilmanno kapangda Elijah apel Moses ara siksikesik oang Jesus. <sup>5</sup> Peter pwehng Jesus, “Jounpadahk, inenin mwehu asai minmine wijahkije. Kamai en kouda umpwal jiluh wijahkije, oau umwoamw, oau umwen Moses, a oau umwen Elijah.” <sup>6</sup> Irai majpwehkda, doahr ih ken jehjoahla pwa da ih en pwa.

<sup>7</sup> Koasoau oau pwaindi irai; a ngilloau indihdo jang nehn koasoauwo, pwa, “Ioar Noai jermwein kajampwalwa me, kamwai rong Ih!” <sup>8</sup> Irai jipwoaljili ne johla armaj irai kapang pwen Jesus kalahpwuk.

<sup>9</sup> Nehn irai indihdohjang pohn dollo, Jesus inoapwihdi irai en, “Johpwa pwehng emen da kamwai kapang, oaroh Nihn-Armaj iejda jang mehdi.”

<sup>10</sup> Irai ken kapwaihahda da Ih pwa; irai ken sapda peipeidekpenen nehn pwungarai ia woahwoahn lal kije, “Iejda jang ipen armaj mehdi kan.” <sup>11</sup> Irai idoak oang Jesus, “Amwda jounpadahk in Kojonneddok pwa Elijah uhdahn pirin sapin indoa?”

<sup>12</sup> A Ih japoang irai, “Mehlel, Elijah uhdahn pirin sapin indoa pwa en koaunopda me ohroj. A amwda Puk Joarwi pwahki pwa Nihn-Armaj pirin oaloo loklok koalik apel wia mwahlla? <sup>13</sup> A Ngoahi pwehng kamwai, Elijah ne indoa a armaj kan wiahng me ohroj ma irai mwehuki, doahroar ma ne insingdi nehn Puk Joarwi.”

### *Jesus Kemwehuwihla Jermwein men ma Ngen Nauna Dilingla*

<sup>14</sup> Anjoauwo irai lellahng ipen epwi Nah sohnpadahkkok, irai kapangda pokon koalik oau ma pidekihpene irai. A jounpadahk in Kojonneddo pwi akkakaimehoang sohnpadahkkok. <sup>15</sup> Nehn armajjok ahr kapangda Jesus, irai inenin pwuriamweikihla irai kijoupenen rahnmwahuwi. <sup>16</sup> Jesus idoak ipen sohnpadahkkok, “Da kamwai akkakaimehoang irai?”

<sup>17</sup> Emen sohn pokonno japoang, “Maing, ngoahi wahdohng koawoa noai jermweinne ma ngen jaus dilingla ken jehjoahla lallal. <sup>18</sup> Anjoau ohroj ma ngenno kin dilingla ih, ih kin kipdihoang nehn pwirej, nehn oawoa kin pwuroarda, keikeikesakai, a palwoaroa kin dengla. Ngoahi pwehng nihmw sohnpadahk kai irai en kauj jang ngen jausso, a irai johkak.”

<sup>19</sup> Jesus japoang irai, “Kamwai inenin joah pwojon! Ia woaroai in Oai pirin minmine ipamwai? Ia woaroai in Oai pirin kanangmahng kamwai? Kamwai wahdohng Ngoahi jermweinnen!” <sup>20</sup> Irai ken wahdohng jermweinno ipoa.

Ngen jausso kapanngoar Jesus, a ih sihda pohn jermweinno, karoarroarihda, kapkihdihoang nehn pwirejjo, kasahpwroahjili oaroh pwuroarda nehn oawoa.

<sup>21</sup> Jesus idoak ipen jamahu, “Ia woaroai in ah wihwia joanngoauwe?” A jamahu pwehng Jesus, “Jang oh in ah siksik, Maing. <sup>22</sup> A pehn dir ngen jausso kin nimen kojukdi ih nehn ah kin peiddoang ih nehn oai apel nehn pil. Doari, jeuweje kama, ma koawoa kak.”

<sup>23</sup> Jesus ken pwehng ih, “ ‘Ma koawoa kak?’ Me ohroj kak pwoaida ipen inje ma pwojon.”

<sup>24</sup> Nehn anjoauwohr jemen jermweinno pwehng Jesus, “Maing, ngoahi pwojon. A johpwa isar. Koawoa en jeuweje kakoalikhla oai pwojon.”

<sup>25</sup> Nehn en Jesus kapangda doahr pokonno ne diddiddirla Ih ken weringda ngen jausso, “Koawoa, ngen pongpong apel jehjoa lallal, injang ipen jermweinnen. Johpwa pwuroahng dilloang nehn ih.”

<sup>26</sup> Ngen jausso rahula, peiddi jermweinno nehn pwirej, diljang nehn ih. Jermweinno doahrla armaj mehdi men, epwi ken pwahpwahpwa pwa ih ne mehdi.

<sup>27</sup> Jesus ken koldi poah jeuweje kauhda jermweinno.

<sup>28</sup> Jesus dilda nehn ummwo kalahpwukla. Nah sohnpadahkkok idoak Ipoa, “Amwda kamai ke johkak kaujjang ngen jausso ipen jermweinno?”

<sup>29</sup> A Ih japoang irai, “Joangoan ngen jaus oauwe johkak kajroahkjang, a ioarroar kapkap.”

### *Jesus pel Pwuroahng Kohpda doahr Ah pirin Mehdi*

<sup>30</sup> Jesus apel Nah sohnpadahkkok injang wijahu, kosehla wein Galilee. Jesus johpwa nimen armaj kan en kidal doahr Ah mwoakid kan. <sup>31</sup> Pwa Ih kin kawoahwoa oang Nah sohnpadahkkok: “Nihn-Armaj pirin ken likliklahng ipen armaj kan, ma pirin kojukdi Ih. A mwerin rehn jiluh Ih pirin iejda.”

<sup>32</sup> A irai johpwa woahwoahki da Ih pwehng irai, a irai pel mijik in idoak ipoa.

### *Inje ma Keiou Laplap*

<sup>33</sup> Irai lel Capernaum nehn irai mwindi nehn ummwo Jesus kalelpoak iparai pwa, “Da kamwai akkakraiki allaluhdo nehn allo?”

<sup>34</sup> A irai johpwa japoang; pwa nehn allo irai akmaipene nehn pwungarai, ki inje ma keiou laplap. <sup>35</sup> Jesus ken mwindi pangindo sohnpadahk eijek roahmenno ipoa pwehng irai, “Ma emen in kamwai nimen koanda a en minehla mwerin, en wiahla en ohroj papah.”

<sup>36</sup> Ih ken oaloo jeri men kihdi nehn pwungarai; jupwurpene jeriho, Ih pwehng irai, <sup>37</sup> “Ma emen ma kin kajamwo emen jeri siksik pwiai in oadoaioa, Ngoahi ioar ma ih kin kajamwo; A ma emen ma kin kajamwo Ngoahi, jaudi Ngoahi oar doari ih kin kajamwo, apel Ih ma kadardo Ngoahi.”

### *Armajjok ma Johkin Uhwoang Kisai kin Uhpali Kisai*

<sup>38</sup> John pwehng Jesus, “Maing Jounpadahk, kamai kapang emen ma pwili kaujjang ngen jaus kan in oadoammwen, kamai ken inoapwihdi pwa jaudi kijehmai ih.”

<sup>39</sup> A Jesus japoang, “Kamwai joah kainoapwihdi, pwa joh armaj ma kin wia manman in oadoaioa kak lahlahwe Ngoahi <sup>40</sup> Pwa emen ma johkin uhwoang kisai kin uhpali kisai. <sup>41</sup> Ngoahi pwehng kamwai in mehlel, ma emen mihndahkihla mwoakin pil oau oang emen in oadoaioa, ih nen uhdahn oaloo dupkoa.”

### *Doahroar Kahrehioang Emen nehn Dihp*

<sup>42</sup> “Ma emen ma kahrehioang jeri siksik pwiai ma kin pwojon Ngoahi en wiahda dihp, mwehuwoang oau sakai koalikko en pirapirroang in sipinwoaroa, kapwuhrihekla nehn madauwo. <sup>43</sup> Ma oaloap poahmmwen kahrehioang koawoa nehn dihp, poaloahjang; pwa mwehu oang koawoa loapinpoa dilda nehn mour joahsuk jang poa riau peidek oang nehn ehl, nehn oai johkin kunlahu. <sup>44</sup> [Wijahu arai mwajjok johkin mehdi, a oaiho johkin kunla.] <sup>45</sup> A ma oaloap ehmmwen kahrehioang koawoa nehn dihp, poaloahjang; pwa mwehu oang koawoa en loapin e dilda nehn mour joahsuk jang e rahpas peidek oang nehn ehl. <sup>46</sup> [Wijahu arai mwajjok johkin mehdi, a oaiho johkin kunla.] <sup>47</sup> A ma oaloap pwoaroan mijoammwen kin kahrehioang koawoa nehn dihp, roahkjang! Mwehu ma koawoa loapin pwoaroan maj dilda nehn wein Koahs jang pwoaroan maj riau a peidek oang nehn ehl. <sup>48</sup> Wijahu irai mwajjok johkin mehdi a oaiho johkin kunla.

<sup>49</sup> “Armaj ohroj pirin mwakelkelkihla oai, doahroar meiroang kan kin mwakelkelkihla jed.\* <sup>50</sup> Jed mehkij ma mwehu; a ma nimen jeddo johla, da kamwai kak wiahng pwa nimen jeddo en pwuroahng minehda? Amwai mour en mwehu anjoau ohroj doahroar jed, a kamwai nen injenmwahupene nehn pwungamwai kan.”

## 10

### *En Jesus Padahk doahr Mweipijoang in Pwoapwoaud*

<sup>1</sup> Jesus injang wijahu, inlahng wein Judea, inla oaloap Pillap Jordan. Armaj dir pel pwuroahng pokondohng ipoa, Ih padahk oang ihr doahr Ih kin kalap wia.

<sup>2</sup> Pharisee pwi indoa ipoa pwa irai en jong lidipihdi Ih. Irai idoak, “Padahkihoang kamai ma asai Kojoneddo mweidoahng woal men en mweijang pahioa?”

<sup>3</sup> A Ih japoang, wud pwehng irai, “**Dahkij Moses koajoanehdi oang kamwai?**”

<sup>4</sup> A arai pajpoangwa pwa, “Moses koajoanehdi kijinlikoau in kamweid en wiawi, a woal men kak mweijang pahioahu.”

<sup>5</sup> Jesus pwehng irai, “**Moses insingehdi kojoned oauwe oang kamwai, pwa jang in amwai nohn koapsakai.** <sup>6</sup> Puk Joarwi pwa, jang in sapin kawa, ‘Koahs wiahda armaj woal apel li.’ <sup>7</sup> ‘Jang in kahrpoahioauwe woal men pirin mweijang jamah apel inah ih pasohng pahioahu, ara roahmenne paspene wiahla oau.’ <sup>8</sup> Ara ne johla wia roahmen a emennoar. <sup>9</sup> Doari, joh armaj men en kamweidpijoang da ma Koahs ne kapsahpene.”

<sup>10</sup> Nehn ahr dilda nehn ummwo, Nah sohnpadahkkok idoak ipoa irair oauwe. <sup>11</sup> Ih pwehng irai, “**Ma woalmen pirin mweijang pahioa, painkihla emen li sohrohr, ih wiahda dipen kamwahl.** <sup>12</sup> Pel doahroar ma lihmen pirin mweijang pahioa apel painkihla emen woal sohrohr, ih pel kamwahl.”

### *Jesus Kapaiahda Jeri siksik pwi*

<sup>13</sup> Armaj pwi wahdohng Jesus jeri pwi pwa en kihdahng poah pohrai; sohnpadahkkok ken lipwoarehda armajjok. <sup>14</sup> Nehn en Jesus kidal da me, Ih lioas pwehnglahng sohnpadahkkok, “**Mweidoahng jerihkan en indoa ipoi. Kamwai joah iroahdi irai; pwa wein Koahs ioar wein joangoan armaj pwiai.** <sup>15</sup> Ngoahi pwehng kamwai in mehlel, pwa emen ma jehpirin oaloe Wein Koahs doahroar jeri siksik men, ih johkak dilda loaloe.” <sup>16</sup> Ih ken oaloe jerihok, kihda poahk pohn emenemen Ih kapwaihahda irai.

### *Mwahnkapw Koapwoahpwoa men*

\* **9:49** Jed: kijakijki jed oang mihn indoa kan kin kajalehda kilel in limpoak.



<sup>17</sup> Jesus onnonop pwa en wia jeiloak oau, a mwahnkapw men kijoudo ipoa, poadpwomwla mwohn Ih pwehng Ih, "Jounpadahk Mwehu, da ngoahi en wia pwa ngoahi en kak oalooa mour joahsuk?"

<sup>18</sup> Jesus pwehng ih, "Amwda koawoa ke panginki Ngoahi jounpadahk mwehu? Joh emen ma mwehu, Koahs oar doari. <sup>19</sup> Koawoa kidal kojoneddok: 'Joah kojukdi armaj; joah kamwahl; joah pirap; joah likamw; joah kapweipwei armaj; wounki joamoamw apel inoamw.' "

<sup>20</sup> Mwahnkappwo japoang Ih, "Maing oai jounpadahk, jang oh in oai siksik ngoahi ne kapwaihahda mehpwiai ohroj."

<sup>21</sup> Jesus ipwilkihda ih, pwehng ih, "Mehkij oar luhwoa, alwe noaskihla meohroj ma koawoa anki, kioang dupkoa kan armaj joamwoahmwoa kan, oamw pai nehnloange nen koalikla; indoa pwilihla Ngoahi." <sup>22</sup> Nehn en mwahnkappwo rong lal pwiai, ih injinjuwedla, ken allaluhla. Pwa woal koapwoahpwoa men ih.

<sup>23</sup> Jesus jipwoalwehng Nah sohnpadahkkok pwehng irai, "Ia apwal in armaj koapwoahpwoa en dilda nehn Wein Koahs!"

<sup>24</sup> Sohnpadahkkok pwuriamweikihla sikesik pwiai. A Jesus uhjehlahr pel pwa, "Noai jeri, kamwai en kidal doahr apwal in dilda nehn Wein Koahs. <sup>25</sup> Apwal oang armaj koapwoahpwoa men en dilda nehn wein Koahs jang kamel men en dilda nehn pwokin si pas."

<sup>26</sup> Sohnpadahkkok pel pwuriamweila dauluhl ki me, irai pwahpene nehn pwun-garai, "Doari, a inje kak mourla?"

<sup>27</sup> Jesus jipwoallahng irai, ih pwa, "Me johkak ipen armaj, a ipen Koahs ih kak; pwa ipen Koahs meohroj kak pwoaida."

<sup>28</sup> Peter pwehnglahng Jesus, "Maing, kamai ne kihdi joang ohroj pwa kamai en pwilihla koawoa."

<sup>29</sup> Jesus pwehng irai, "Eh! Ngoahi pwehng kamwai in mehlel, pwa ma emen ma pirin mweidla umwah, riah, inah, jamah, nah jeri, japwah kan, ki Ngoahi apel rongmwehuwo, <sup>30</sup> pirin oalooa koalik jang nehn mour in di oauwe. Ih pirin oalooa pak epwiki in umwah, in riah, in inah, in nah, in japwah kan — apel in loklok kan. A nehn mour ma pirin indoa, ih pirin oalooa mour joahsuk. <sup>31</sup> Armaj dir anjoau oauwe kin mine mijoa, irai pirin mwerinla, a armaj dir ma kin mine mwerin, irai pirin mijoahla."

### *Kajiluh in en Jesus Kohpda doahr Ah pirin Loklok apel Mehdi*

<sup>32</sup> Jesus apel Nah sohnpadahkkok allaluhla nehn allo indahlahng Jerusalem, Ih aluhla mijen Nah sohnpadahkkok; a irai ma kauj ih allalu dirkihla majpwehk. Ih pel pwuroahng kalahpwukla ipen irai eijek roahmenno pwehng irai da ma pirin wiawihoang Ih, <sup>33</sup> "Kamwai kidal pwa kisai allaluhdahlahng Jerusalem, wiahwa ma Nihn-Armaj pirin likliklahng ipen jamwrou laplap apel jounpadahk in Kojoned kan. Irai pirin kadeikda Ih pwa Ih en kojkojdi. Irai pirin kihlahng Ih ipen mihn likin kan. <sup>34</sup> Ih pirin wiahla mihn kapis iparai; irai pirin andipoa, poki, apel kojukdi Ih. A in rehn kajiluh Ih pirin iejda."

### *En James apel John Poakpoak*

<sup>35</sup> Nihn Zebedee jermwein roahmen, James apel John, ara indoa ipen Jesus pwehng, "Maing Jounpadahk, mine mehkij kama nimen koawoa en wiahng kama."

<sup>36</sup> Jesus idoak ipara, "A dahkij, kamwa nimen Ngoahi en wiahng kamwa?"

<sup>37</sup> Ara pwehng Ih, "Kama nimen koawoa en kihdoahng kama lingin oamw wei nehn anjoauwo ma koawoa pirin Nahmwarkihla, apel mweidoahng pwa kama en kak mwindi ipoamw, emen loap moaun in koawoa, a emen loap meing."



<sup>38</sup> Jesus pwehng ara, “Kamwa jehjoa pwa dahkij kamwa poakpoakien. Kamwa kak nim mwoakin loklokko ma Ngoahi pirin nim? Kamwa kak poapdaijki ma Ngoahi pirin poapdaijki?”

<sup>39</sup> Ara pwehng Ih, “Eh kama kak.”

Jesus pwehng ara, “Doari, ne mwehu; Kamwa pirin nim mwoakko ma Ngoahi pirin nim apel poapdaijki poapdaijjo ma Ngoahi pirin poapdaijki. <sup>40</sup> A mwindi loap moaunin apel loap meingin, joah mweimwei oang Ngoahi en pilda; pwa Koahs ma pirin kioang irai kan ma Ih koaunopdahng.”

<sup>41</sup> Nehn en sohnpadahk eijekko ahr rongda poakpoak oauwe, irai lioassoangkihda James apel John. <sup>42</sup> Jesus ken panginpene irai pwehng, “Kamwai kidal doahroar armaj laplap in nehn rosros kan, doahroar ahr kin kolkol sihkei manman in koaunda armaj rosros kan, apel koaun kan kin anki manman ohroj. <sup>43</sup> A ih jehpirin doahr me ipamwai. Inje ma nimen laplap ioar ih pirin papah ohroj; <sup>44</sup> A inje ma nimen keiou ioar ih pirin wiahla lidu in ohroj. <sup>45</sup> Pwa pel Nihn-Armaj indihdo, jaudi pwa armaj en papah, a Ih en papah armaj ohroj apel mihndahkihla Ah mour pwa en koamoaurla armaj dihrdir.”

### *Jesus Kemwehuwihla Woal Majkun men*

<sup>46</sup> Irai lel Jericho; a nehn en Jesus apel Nah sohnpadahkkok apel pokon koalik oau diljang nehn kahnihmmwo, woal majkun joamwoahmwoa men, oadoa Bartimaeus, nihn Timaeus, mwindi imwin allo mehlahn poakpoak. <sup>47</sup> Nehn ah rongda pwa Jesus mihn Nazareth ioar allaluhla, ih sapda rahrahu pwa, “Maing Jesus, kijehn kadaudok in David, jeuweje ngoahi!”

<sup>48</sup> Dirin ihr lipwoarehda pwa en nennenla. Ih kapwa kakoalikhla ah rahrahu, pwahpwahpwa, “Koawoa ma kijehn kadaudok in David, jeuweje ngoahi.”

<sup>49</sup> Jesus uhdi pwa, “Kamwai ukdohng Ngoahi.”

Irai pwehng woallo, “Koawoa, injenmwahula! Uhda! Ih pangpangin koawoa.”

<sup>50</sup> Ih pispisinnoar kejpwihi ah joakiddo, uhda inla ipen Jesus.

<sup>51</sup> Jesus idoak oang ih, “Da koawoa mwehuki Ngoahi en wiahng koawoa?”

A woal majkunno japoang, “Maing, ngoahi nimen pwuroahng kapang wija.”

<sup>52</sup> Jesus pwehng ih, “Alwe; oamw pwojonnen ne kemwehuwihla koawoa.” Nehn anjoauwohr ih kapangda wija; ih ken pwilihla Jesus nehn allo.

## 11

### *Dilda Jerusalem ki Rojon in Kalwehdi*

<sup>1</sup> Nehn arai koaroanlahng Jerusalem in kahnihmw en Bethphage apel Bethany, irai lel Dolin Olip. Jesus kdarla Nah sohnpadahk roahmen, <sup>2</sup> pwehng ara, “Kamwa alwe nehn koujapw oauwen mijen kamwa. Nehn amwa pirin dilda wijahu, kamwa pirin pispis kapangda ejel pwulopwul men ma pirpirpir ma kahjikkoar armaj men dako. Kamwa lapwadda ukdo me. <sup>3</sup> A ma emen idoak ipamwa, da kamwa wihwiahng mahnnen a kamwa japoang, ‘Koaunno ioar anahne,’ a Ih pirin pispisin kajpahlihdo.”

<sup>4</sup> Ara ken inla kapangda ejel pwulopwul men a pirpir in wanihmw in umw oau nehn allo. Nehn ara lapwadda, <sup>5</sup> armaj pwi mine wijahu idoak ipara, “Da kamwa wihwia? Mihnda kamwa lapwadda ejel siksik menen?”

<sup>6</sup> Ara japoang irai doahr ma Jesus pwehng ara. Armajjok ken mweidoahng ara. <sup>7</sup> Ara wahdohng ejel siksikko ipen Jesus. Arai piroakihdihoang likkoau puwoa, Jesus ken doauda pohn ejello. <sup>8</sup> Pokonno piroakihdi ahr likkoauwok nehn allo. A epwi poaloahdi rahn suhkoa pwi pel inapoahkihda nehn allo. <sup>9</sup> Irai ohroj ma alu mijoa apel iraihok ma kaujdo pokonno rahrahuki koaul in kaping pase: “Kisai kapnga Koahs!”

Koahs en kapaiahda Ih ma indoa in oadoan Koahunno. <sup>10</sup> Koahs en kapaiahda wein jamasai David ma pirin indoa. Kaping oang Koahs.”

<sup>11</sup> Jesus dilda nehn Jerusalem, inlahng nehn Umw Joarwiho, kapkapangjili meohroj loaloa. A pwa ne joausikpene, Ih ken inlahng Bethany pwilihki sohnpadahk eijek roahmenno.

### *Jesus Kariahla Suhkoa Fig Pas*

<sup>12</sup> Rehnwa mwerin, nehn arai allaluhla jang Bethany, Jesus ken mwakohkohda. <sup>13</sup> Ih kapangda suhkoa fig pas jang wija doh ma dir soah; Ih inla pwa en kapang ma joh wah Ih nen kapangda. Nehn Ah lel wijahu Ih johpwa kapangda wah, pwa soahr doari; pwa jaudi anjoau in roak. <sup>14</sup> Ih ken pwehng suhkoahu, “**Joh armaj men pirin pwuroahng kang wehn fig jang ipoamw.**”

Nah sohnpadahkkok rong sikesik oauwe.

### *Jesus Dilda nehn Umw Joarwiho*

<sup>15</sup> Nehn irai lel Jerusalem, Jesus inla nehn Umw Joarwiho, sapda kajroahjang loaloa irai ohroj ma noaski apel dupdupuk koapwoa wijahu. Ih ukuddi en sohnkawiliali mwanihok ahr sehpihlok apel en jounnoaski mwureiok ahr mihn mwindi kan. <sup>16</sup> Ih pel johla mweidoahng armaj en wahjili mehki nehn Umw Joarwiho. <sup>17</sup> Ih ken pwehng armajjok, “**Ne insingdi nehn Puk Joarwi, Koahs pwa, ‘Umwoaie pirin adanki umwen kapkap oang sohn wei ohroj.’ A kamwai wiahkihla dohn jounpirap kan.**”

<sup>18</sup> Jamwrou laplappok apel jounpadahk in Kojonneddok rongda me; irai sapda lemleme doahr ahr pirin kojukdi Jesus; pwa irai perki koalik, pwa armaj ohroj kajampwalki dauluhl Ah padahk.

<sup>19</sup> Injoausik in rehnno, Jesus apel Nah sohnpadahkkok diljang nehn kahnihmmwo.

### *Padahk jang Suhkoa Fig*

<sup>20</sup> Pwohrdahng injohrehnin rehnno, nehn irai allaluhla nehn allo, irai kapangda suhkoa fig-o ne mengla jang in sabin lel in koadkoa. <sup>21</sup> Peter samanda da me ne wiawihlahu, ih ken pwehng Jesus, “Maing, kanah kapang suhkoa fig-e ma koawoa kariahla, ne mengla.”

<sup>22</sup> Jesus japoang irai, “**Kamwai pwojon Koahs!** <sup>23</sup> Ngoahi pwehng kamwai in mehleh, ma emen ma pirin pwehng dol oauwe, ‘Sohjang me kasoahdihla pein koawoa nehn jeddo,’ a johpwa peikajal kij mine nehn kapehdin, a pwojon da ih pwa, doari, dahioau ih pwahla pirin pwoaida. <sup>24</sup> Ioar me Ngoahi nimen kamwai en kidal pwa me ohroj ma kamwai pirin poaki nehn amwai kapkap kan, kamwai pwojon pwa kamwai nen oaloa, ih ken pwoaida oang kamwai. <sup>25</sup> Doari, nehn amwai pirin uhda kapkap, kamwai mahkoahng japwung ohroj ma armaj men wiahng kamwai pwa jamamwaiho nehnloange en pel mahkoahng kamwai dipamwaihok. <sup>26</sup> [Pwa ma kamwai johpwa mahkoahng emen, Jamamwaiho ma mine nehnloange johpwa pirin mahkoahng kamwai dipamwaihok.]”

### *Peidek doahr Manmanin Jesus*

<sup>27</sup> Irai pwurlahng Jerusalem. Nehn en Jesus allaluhjili nehn Umw Joarwiho, jamwrou laplap apel jounpadahk in Kojonneddo pwi apel koaun pwi indoa, <sup>28</sup> pwehng Ih, “Manmanin inje koawoa wihwiahki joang pwiai? Inje kioang koawoa manman oauwe?”

<sup>29</sup> Jesus japoang irai, “**Ngoahi pirin wiahng kamwai peidek oau. Doari, ma kamwai japoang Ngoahi, Ngoahi pirin wud pwehng kamwai manman en inje ma Ngoahi wihwiahki mehpiwai. <sup>30</sup> Kamwai pwehng Ngoahi, en John ah manman in poapdaij, sapjang ipen Koahs ke jang ipen armaj?”**

<sup>31</sup> Irai sapda akmaipene nehn pwungarai, pwahpwahpwa, “Ma kisai pwa, ‘sapjang ipen Koahs,’ Ih pirin pwa, ‘A da kamwai joah kamehlelehki John?’ <sup>32</sup> A ma kisai pwa sapjang armaj...” (Irai mijik armaj kan, pwa ohroj kin wiahki John joukohp mehlel men.) <sup>33</sup> Irai ken japoang Jesus, pwehng, “Kamai jehjoa.”

Jesus ken pwehng irai, “Doari, Ngoahi pel jehpirin pwehng kamwai manmanin inje ma Ngoahi wihwiahki mehpwiai.”

## 12

### *Karajraj in Jounmwoaswel pwi nehn Mwoaswelin Wain oau*

<sup>1</sup> Jesus padahk oang irai in karajraj, “Armaj men poadokdi pein ah mwoaswelin wain oau; ih ken kelihpene apel weirda dohien ungede wain oau, apel kouda wijahn iroir oau. Ih ken kioang jounmwoaswel pwi pwa irai en kohwahki oang ih. Ih ken jeiloaklahng nehn japw doh oau. <sup>2</sup> Oaroh, anjoau in roak ih kadarla lidu men ipen jounmwoaswellok pwa en oaloahjang irai ah pwaij jang nehn mwoaswello. <sup>3</sup> Jounmwoaswellok koldi liduhwo, poki oaroh kadarla kaip. <sup>4</sup> Ih pel kadarlahng jounmwoaswellok emen lidu. Irai pel pokihjili apel koauwehla moange kajarohdi ih. <sup>5</sup> Ih pel kadarla emen, irai oaloahr kojukdi. Armaj dir pel koadoaddoarla mwerin, irai pel diar joangoan apwallohr: epwi pwen pokpokkoar, a epwi kojkojdi. <sup>6</sup> Doari, woal emen oar luhwoa ih kak kadarla, ioar nah jermwein iehrojjo ma ih inenin kajampwalki. Ih ken kadarla keiou mwuhr, ih pwa, ‘Ngoahi uhdahn koapwoarpwoarki pwa irai pirin woaunki noai jermweinno.’ <sup>7</sup> Jounmwoaswellok ken pwahpene nehn pwungarai, ‘Ioar jerihn johjo wa me. Kamwai indoa, kisai kojukdi, pwa kisai en ankihla mwoaswelle.’ <sup>8</sup> Irai koldihoar jermweinno, kojukdi, kejpwhijang nehn mwoaswelin wainno.”

<sup>9</sup> Jesus ken idoak, “Doari, da koaun in mwoaswelin wainno pirin wia? Ih pirin inla kojukdi jounmwoaswellok apel kioang epwi jounmwoaswel sohrohr mwoaswello pwa irai en koadoahkoa apel kohwahki oang ih. <sup>10</sup> Kamwai johkin wadek lal oauwe nehn Puk Joarwi?

‘Sakai ma jounkou umw kan ne kerpwhila,  
wud wiahla sakain pwukoakoaimw

<sup>11</sup> KOAUNNO ma wiahda me;  
mehkij ma kapwuriamwei mehlel oang kisai.’ ”

<sup>12</sup> Koaunin mihn Jew-ok ken jong en joalihdi Jesus; pwa irai kidal pwa Ih kin pwahpwahpwahki irai karajraj pase. A pwa irai mijik pokon in armajjok, irai ken okdekla inlahjang.

### *Peidek doahr Daksis*

<sup>13</sup> Pharisee pwi apel sohn nihn Herod pwihnno kadarekdohng ipen Jesus pwa irai en lidipihki joangoan peidek pwi. <sup>14</sup> Doari, nehn ahr leldo, irai pwehng Ih, “Maing Jounpadahk, kamai kidal pwa woal poadidi men koawoa, ma johkin kasohrohri joangoangoan armaj; pwa koawoa kin padahkihoang armaj doahroar en Koahs koajoandi in mehlel. Doari, da oamw lamlam oang irair oauwe: pwung oang asai kojonnend kan, kisai en nohpweiki mwani oang Caesar in Rome, ke joah? Da kisai pirin wia? Kisain kihda daksis, ke joah?”

<sup>15</sup> Doari, nehn Ah kidal uhwen ahr mwalaun, Jesus pwehng irai, “Da kamwai indoahng lidipihki Ngoahi? Kajalehdohng Ngoahi mwani silper en, pwa Ngoahi en kapang.”

<sup>16</sup> Irai ken kajalehioang mwani silper oau; Ih ken idoak oang irai, “Kilelin inje apel oadoan inje me?”

Irai pwehng Ih, “Nahmwarki Caesar.”

<sup>17</sup> Doari Jesus ken pwa, “Doari, mwehu; kamwai kioang Caesar mehkan ma uhdahn en Caesar; a oang Koahs mehkan ma uhdahn en Koahs.”

Irai ken pwuriamweikihla pajpoang oauwe.

### *Peidek doahroar Iejda jang Mehdi*

<sup>18</sup> Sadducee pwi pwokdohng ipen Jesus. (Ioar irai ma kin pwa armaj jehpirin iejda mwerin mehdi.) <sup>19</sup> Irai idoak ipen Jesus pwa, “Maing Jounpadahk, Moses koajoanehdi oang kisai nehn Pukin Kojonned kan pwa ma woal men pirin mehdi jang pahioa a joh nihra, a rien woallo en wud painkihla liohdiho pwa en wiahda kadaudokin riahua ma mehdi. <sup>20</sup> Doari pwihnin riari oau mine, irai woal ijimen. Woal koalikko iparai painkihla lihmen oaroh mehdi jang joh nihra jeri. <sup>21</sup> Karoahmenno pel painkihla liho oaroh pel mehdi jang joh nihra jeri. Pel doahrwahr wiawihang kajilmnenno. <sup>22</sup> Doari, riari ijimenno ohroj painkihda liho, ohroj mehdi joh nihra jeri. Inlahroh liho pel mehdi. <sup>23</sup> Doari nehn anjoauwo ma armaj mehdi kan ohroj pirin mourda, nehn rehn in iejda, inje in irai ijimenno ma liho pirin painki?”

<sup>24</sup> Jesus japoang irai, “Kamwai inenin japwung! Kamwai kidal pwada? Pwa kamwai johpwa woahwoahki lalin Puk Joarwi ke manman in Koahs. <sup>25</sup> Pwa nehn armaj mehdi kan ahr pirin iejda, irai pirin doahroar sohnloang in nehnloange kan, woal apel li johla pirin pwoapwoaud. <sup>26</sup> Doari, doahroar iejdahn min mehdi kan, kamwai johpwa wadek nehn Pukin Moses doahroar sikesikin Koahs Ah pwokkoang jang nehn suhkoa siksikko ma umpwumpwul? Nehn iroahu Koahs pwehng Moses, ‘Ngoahi ma Koahs in Abraham, Koahs in Isaac, apel Koahs in Jacob.’ <sup>27</sup> Doari, me woahwoahki ma Ih Koahs in armaj mour kan, a jaudi Koahs in armaj mehdi kan. Ioar ma kamwai inenin japwungki koalik.”

### *Kojonned Koalik*

<sup>28</sup> Jounpadahk in Kojonneddo men pwili mine wijahu, rongrongrong lal pwiai. Ih ken pwuriamweikihla mehleh pwungin en Jesus japoangekkok. Ioar ih ken sohlahng ipen Jesus ki peidek oau, “Maing, kojonned dahioau ma keiou kajampwal nehn kojonned ohroj?”

<sup>29</sup> Jesus japoang ih, “Ioar kojonned wa ma keiou kajampwal nehn kojonned kan ioar: ‘Rong, koawoa Israel! Koahunno, asai Koahs, ioar Ih ma Koahun wahr doari. <sup>30</sup> Doari, koawoa uhdahn pirin ipwilki Koahunno, oamw Koahs, nehn kapehdimwen unjek, ngenimwen unjek, oamw lamlam unjek, apel oamw sihkei unjek.’ <sup>31</sup> A kariau, doahr me: ‘Ipwilki mihn ipoamw doahroar oamw ipwilki pein koawoa.’ Joh oau kojonned mine ma kajampwal jang mehpwiai.”

<sup>32</sup> Jounpadahk in Kojonneddo pwehng Jesus, “Mehleh ipoamw, Jounpadahk! Pwung da koawoa pwa: pwa Koahunnohr ma Koahs, joh pel emen. <sup>33</sup> Armaj uhdahn pirin ipwilki Koahs nehn kapehdin unjek, ah lamlam ohroj unjek, apel ah sihkei unjek; apel ipwilki mihn ipoa doahr ah kin ipwilki pein ih. Kapwaihahda kojonned riau pwiai mwehujang dauluhl asai pirin meiroangkihoang Koahs mahn pohn pei joarwi kan apel wia joangoan meiroang sohrohr kan.”

<sup>34</sup> Nehn en Jesus kapang doahr pwungin pajpoang oauwe, Ih ken pwehng woallo, “Koawoa johpwa dohjang Wein Koahs.”

Mwerin me johla armaj idoak mehkij.

### *Peidek doahroar Messiah*

<sup>35</sup> Nehn en Jesus padpadahk nehn Umw Joarwiho, Ih pwa, “Da jounpadahk in Kojonneddo kan kin pwehngkihoang kamwai pwa Messiah pirin kijehn kadaudok en David? <sup>36</sup> Pwa Ngen Joarwi ne audohkihda David pwa en pwahda lal oauwe: ‘Koahunno pwehng oai koahun:

Koawoa en mwindi oang in loap moahun in Ngoahi,

Oaroh Ngoahi kihdihoang oamw imwinsihsi kan pehn pwoalkoamwen kan.'

<sup>37</sup> "Doari, ma pein David kahdanki Ih 'oai Koaun,' a imdoahr Messiah en kak wia kijehn kadaudokin?"

### *Jesus Kaperki Pokonno Jounpadahk in Kojonned kan*

Pokon koalik oau kin rongrongrong en Jesus padahk kan in peren. <sup>38</sup> Nehn Ah pel padahk oang irai, Ih pwa, "Kamwai kalkehjang kamwai jounpadahk in Kojonned kan ma kin mwehuki allaluhjili nehn likkoau roairoai apel kin mwehuki armaj en rahnmwahuwi irai nehn pokon kan. <sup>39</sup> Apel kin pilda dohiarai lampahnsamw nehn jinakoke kan, apel kin mwehuki mwindi oh in mijen sehpil kan nehn kamdipw kan. <sup>40</sup> Ioar joangoan armaj pwiai ma kin doapwoahjang koanngoan umwen liohdi kan, apel kin lioajoahjki kapkap roairoai. Arai koaloklok uhdahn pirin koalik."

### *En Liohdi men ah Meiroang*

<sup>41</sup> Jesus mwindihoang wijahkij nehn Umw Joarwiho koaroannoang dohien meiroanngo. Ih ken kin kapkapangjili doahroar armajjok ahr kin peiddihoang nihrai mwanihok nehn dohien meiroanngo. Dirin armaj koapwoahpwoa pwili peiddi mwani koalik nehn irai en kin meiroang. <sup>42</sup> A liohdi joamwoahmwoa men pwili leldo pel peiddi send wahssa riau. <sup>43</sup> Jesus panginpene Nah sohnpadahkkok pwehng irai, "Ngoahi pwehng kamwai in mehleh, pwa en liohdi mene ah meiroang inenin koalik jang araihok ohroj. <sup>44</sup> Pwa armaj pwiok peiddi oang nihrai mwani nehn dohien meiroang jang nehn ahr pai; a liohdi mene jang nehn ah paijuwed, ih kihdi me ohroj ma ih anki apel kin mourki."

## 13

### *Jesus Siksikoa doahr Imwlahn Umw Joarwiho*

<sup>1</sup> Nehn en Jesus injang nehn Umw Joarwiho, emen Nah sohnpadahkkok pwehng Ih, "Maing, kapang koalik in sakai pwiai apel wioapoan ummwoauwe!"

<sup>2</sup> A Jesus japoang, "Kapang koalik in umw pwiai? Johpwa oau sakai pirin minminehr nehn dohiahu; pwa ohroj pirin mwoardi."

### *Apwal kan apel Koaloklok kan*

<sup>3</sup> Jesus mine pohn Dolin Olip, jipwoallahng Umw Joarwiho, a Peter, James, John apel Andrew sohla ipoa pwehng Ih, <sup>4</sup> "Maing, pwehng kamai ngehd mehpwai pirin wiawi, apel kilel da ma pirin kajalehda ma mehpwai en ken pwoaida."

<sup>5</sup> Jesus pwehng irai, "Kamwai mwajahn pwa armaj en joah kapweipweidi kamwai. <sup>6</sup> Pwa armaj dir pirin indoa pwahpwahpwa oadoaioa, 'Ioar Ngoahi Messiahu!' Irai ken pirin kapweipweidi armaj dir. <sup>7</sup> Kamwai johpwa jalohda, ma kamwai rong ngilen mahwin koaroan apel sikesik in mahwin jang wija doh kan. Joang pwiai uhdahn pirin wiawi, a johpwa woahwoahki pwa imwin jampah ne leldo. <sup>8</sup> Oau japw pirin mahwin oang oau japw; oau wei pirin mahwin oang oau wei. Wija ohroj roar in japw pirin wiawi apel lehk koalik pirin mine. Ioar joang pwiai ma pirin indoa, doahroar sapin moadoak in noaisik.

<sup>9</sup> "Kamwai mwajahn apel kalke pein kamwa! Pwa armaj kan pirin joalihdi kamwai apel kihla kamwai nehn mwoalen koapwung kan. Kamwai pirin woswos nehn jinakoke kan; kamwai pirin wijikdohng mwohn koaun kan apel nahmwarki kan ki Ngoahi, pwa kamwai en kadehde oang irai doahroar Rongmwehu. <sup>10</sup> Pwa mwohn rehno pirin indoa, rongmwehuwo uhdahn pirin lohkjili nehn wei ohroj. <sup>11</sup> Doari, nehn amwai pirin joaldi apel wijikdohng nehn mwoalen koapwung kan, kamwai johpwa pwunodki mwohn anjoauwo da kamwai en siko a mwohrai; pwa da kamwai pirin audohkihda anjoauwo, ioar mehwa kamwai pirin pwehng irai. Pwa jaudi



kamwai ma pirin lallal nehn anjoauwo, a Ngen Joarwi. <sup>12</sup> Woal kan pirin kihla riarai kan pwa irai en kojkojdi, jahm kan pirin pel wiahng joanngoahr ipen nihrai jerihkan; Jerihkan pirin uhwoang arai nohno apel pahpa kan, apel kihlahng irai pwa irai en kojkojdi. <sup>13</sup> Armaj ohroj pirin lioassoang kamwai ki Ngoahi. A armajjok ma daur oaroh lel in imwin, ioar ma pirin mourla.

### *Janjal Kamajpwehk Naunahu*

<sup>14</sup> “Kamwai pirin kapang ‘Janjal Kamajpwehk Naunahu’ ih uhda nehn wija ma johpwa koanoahng en uhda.” (Emen ma wadwadek en woahwoahki ia woahwoa!) “Doari, irai kan ma mine Judea irai pirin kijou oang pohn dol kan. <sup>15</sup> Armaj emen ma mine pohn umwahu, en joah koauwehla anjoau doaudi oaloo mehki loaloo. <sup>16</sup> Armajjo ma nehnjapw jehpirin pwurdohng oaloo ah likkoau. <sup>17</sup> Inenin kainjinjuwed oang li lijaian apel li kan ma kadihdi in rehnnok ma pirin leldo! <sup>18</sup> Kamwai kapkap pwa joang pwiai en joah wiawihang kamwai anjoau in kopou!” <sup>19</sup> Pwa apwal in rehnnok pirin koalikjang apwal ohroj jang oh in sapin kawa indoa lel apkas, apel joh apwal pirin doahroar jang apkas pel allaluhla. <sup>20</sup> A Kounno ne kajipidihla rehnnok; pwa ma Ih johpwa wia, a joh armaj pirin pislá. A pwa Nah armaj pilpil kan, ioar Ih kajipidihla ki rehnnok.

<sup>21</sup> “Doari, ma emen pirin pwehng kamwai, ‘Messiah wa me!’ Ke ‘Ih men!’ — kamwai johpwa kamehlele. <sup>22</sup> Pwa Messiah likamw apel joukohp likamw pwi pirin pwarda. Irai pirin wiahda kilel kapwuriamei pwi apel manman pwi pwa irai en kapweipweidi nihn Koahs armaj pilpil kan ma irai kak. <sup>23</sup> Doari, kalke kamwai. Ngoahi padahkihoang kamwai mehpwiai ohroj mwohn anjoauwo pirin leldo.

### *Indoahn Nihn-Armaj*

<sup>24</sup> “Doari, nehn rehnnok mwerin apwal koalikko, joauwo pirin rosla, johnpwoonngo pirin johla maram in, <sup>25</sup> ujuhn pehnloange kan pirin kipdi apel koajoandihn nehn woahwoa kan pirin johla mine nehn dohiarai. <sup>26</sup> Ioar anjoau wa ma Nihn-Armaj pirin pwokda, indoa pohn koasoau kan in sihkei apel ling koalik. <sup>27</sup> Ih pirin karpajoang Nah sohnloang kan oang in koaimw pahu in jampah pwa irai en kapokonpene nihn Koahs armaj pilpilda kan jang in imwin jampah ohroj.

### *Padahk jang Suhkoa Fig*

<sup>28</sup> “Kamwai padahki me jang in suhkoa fig; rahn joangoan suhkoa pase kin mwoahroan soahn suhkoa apel mwis, a nehn ah kin wialali soah, kamwai kidal pwa roak ne koaroan. <sup>29</sup> Pel doahroar kamwai, nehn amwai pirin kapang mehpwiai pirin wiawi, kamwai pirin kidalki pwa anjoauwo ne koaroando. <sup>30</sup> Ngoahi pwehng kamwai in mehlel, pwa mehpwiai ohroj pirin pwoaida mwohn armaj ohroj in dioauwe ahr pirin mehdi. <sup>31</sup> Nehnloange apel jampah pirin johla, a Oai lal kan johpwa pirin johla.”

### *Johpwa Emen ma kidal Rehnno ke Awahu*

<sup>32</sup> “A doahroar rehnno ke awahu, johpwa emen kidal ngehd pirin leldo. Pel sohnloang in nehnlange kan jehjoa, Nahu pel johpwa kidal; Jamahuoar doari ma kidal. <sup>33</sup> Kamwai mwajmwajahn apel poahd, pwa kamwai jehjoa anjoau. <sup>34</sup> Ih pirin doahroar armaj men ma kin wia jeiloak roairoai oau ma kioang nah liduhwok in umwahu pwa irai en apwali apel kioang irai ohroj doadoahk; ih ken pwehng sohn jiloo wanimmwo en jiloo mwehu apel mwajmwajahn. <sup>35</sup> Doari, kamwai mwajahn pwa kamwai jehjoa ngehd koaunin ummwo pirin pwurdo — ma injoausik, ke in lopkoan pwong, ke injohrehn, ke inminjoang. <sup>36</sup> Ma ih pispissoar pwurdo, ih jehpirin kapangda amwai moair. <sup>37</sup> Doari, da Ngoahi pwehng kamwai, Ngoahi pel pwehng armaj ohroj: kamwai poahpoahpoahd apel mwajmwajahn!”



## 14

### *Koajoanpen Kojkojdihn Jesus*

<sup>1</sup> Rehn riauwoar luhwoa mwohn Joarwihn Passover apel Pilahwa Joah Doal Ihs. Jamwrou laplap apel jounpadahk in Kojoneddok raprapahki doahr irai en widingehdi apel joalihdi Jesus pwa irai en kojukdi. <sup>2</sup> Irai ken pwahpene nehn pwungarai, “Kisai joah wia anjoau in kamdipw oauwe, pwadoar armaj kan loakloakoahkihda.”

### *Jesus Salipekla nehn Bethany*

<sup>3</sup> Jesus minmine nehn Bethany nehn umwen Simon, woal lepahu. Nehn irai mwingmwinge, lihmen dilda ipoa, wa rume siksik oau ma dirin le ma inenin karahdin apel koalik dupkoa, ma wiawi jang in pwilin suhkoa ma adanki nard. Liho ken koauwehla rume siksikko widekihdihoang pohn moangoan Jesus. <sup>4</sup> Epwi ma pwili mine wijahu ken lioasla pwahpene nehn pwungarai, “Amwda le karahdin oauwe ken ohla mwahl? <sup>5</sup> Nehn ah kakkoar noasla in mwani silper jilipwiki mihn jeuweje irai ma paijuwed.” Irai ken liplihnedi liho.

<sup>6</sup> Jesus pwa, “Kamwai pijekjang! Kamwai joah diroapwki lihe! Siahk mwehu, oau me ih wiahng Ngoahi. <sup>7</sup> Irai ma paijuwed kan kin minminehr ipamwai rehn ohroj; doari anjoau ohroj ma kamwai mwehuki, kamwai kak jeuweje irai; a Ngoahi, Ngoahi jehpirin pwilpwili kamwai anjoau ohroj. <sup>8</sup> Ih ne wiahda uhwen ma ih kak: Ih wiahda soal oauwe oang palwoaroaioa pwa en koaunopda dahkij ma pirin wiawihang Ngoahi mwohn oai pirin joajjoardi. <sup>9</sup> Doari, kamwai en kidal pwa wija ohroj nehn jampah ma Rongmwehu pirin lel dahkij ma ih ne wiahda pirin pel pwili lohkjili pwa en kin wia mihn kasman Ngoahi.”

### *Judas Pwungkihla en Pangla Jesus*

<sup>10</sup> Judas Iscariot, emen irai eijek roahmenno, ken inla ipen jamwrou laplappok pwa en panngoang irai Jesus. <sup>11</sup> Irai ken perenkihda dahkij Judas pwehng irai. Irai ken inoaukihoang ih pwa irai pirin dupukki mwani. Doari, jang nehn anjoauwo johpwa me Judas nimen wia, ioarroar en kidalda anjoau mwehu ih en kak pangla Jesus.

### *Jesus apel Nah Sohnpadahkkok Mwingehpene nehn Kamdipw in Passover*

<sup>12</sup> Nehn keiouin rehnin Joarwihn Pilahwa Joah Doal Ihs, rehnno ma irai kin kalap kojukdi jihpw pwulopwul in Passover, nihn Jesus sohnpadahkkok ken pwehng, “Ia wija koawoa nimen kamai en koaunopda oamw kamdipw in Passover-o?”

<sup>13</sup> Jesus ken kadarla ara roahmen, pwehng, “Kamwa alwe nehn kahnihmwen; kamwa pirin suhwoang woal men ma wahwahwa dohn pil oau. Kamwa ken kaujwe. <sup>14</sup> Wija ma ih pirin dilda, kamwa pel dilda kamwa pwehng koaunin ummwo pwa Jounpadahkko iloakihdo pwa kama en idoak ipoamw, ‘Ia pere ma Ngoahi apel Noai sohnpadahkkok pirin wia amai kamdipw in Passover?’ <sup>15</sup> A ih pirin kajalehioang kamwa pere koalik oau puwoa, ma ne koajoanjoandi apel koaunopda. Doari, kamwa koaunopda joang ohroj wijahu.”

<sup>16</sup> Sohnpadahkkok lella nehn kahnihmwo; ira kidalda me ohroj doahr ma Ih pwehng ira. Ara ken koaunopda me ohroj.

<sup>17</sup> Injoausikpene, Jesus apel Nah sohnpadahk eijek roahmenno inla Jerusalem. <sup>18</sup> Nehn irai mwingmwinge in sehpyllo, Jesus pwehng irai, “Ngoahi pwehng kamwai in mehlel, pwa emen kamwai pirin pangla Ngoahi emen ma pwili Ngoahi mwingmwinge me.”

<sup>19</sup> Sohnpadahkkok ken pwunodkihda lalloauwe, irai ken sapda wademen idoak ipoa, “Maing, ngoahi ma koawoa pwahki lalloauwe?”

<sup>20</sup> Jesus japoang, “Eh, emen jang kamwai eijek roahmen pwiai, emen ma pwili kadkadu kanah pilahwahu nehn Oai mwoakke. <sup>21</sup> Mehlel pwa Nihn-Armaj uhdahn

pirin mehdi doahroar Puk Joarwi ne pwa, nen naunahng armajjo ma pirin pangla Nihn-Armaj! Mwehuwoanngoar armaj mene en johpwa noaisikdi!”

### *En Koaunno Kamdipw Joarwi*

<sup>22</sup> Nehn anjoauwo ma irai mwingmwinge Jesus kihda pilahwahioau kapingkalahn-gankihoang Koahs, sipwang pijoang kioang Nah sohnpadahkkok, pwehng, “Kamwai oaloo, pwa ioar palwoaroaioahwa me.”

<sup>23</sup> Ih pel oaloo mwoak oau kapingkalahngankihoang Koahs, kioang irai. Irai ohroj ken pwili nimjang. <sup>24</sup> Ih pel pwa, “Ioar insahihoawa me ma pirin widekdihoang armaj ohroj, insahihoa ma pirin kadehde en Koahs inoau kapw. <sup>25</sup> Ngoahi pwehng kamwai in mehlel, pwa jang mwerin rehnnoauwe, Ngoahi johla pirin pwuroahng nim wain oaroh lel rehnno ma Ngoahi pirin pwuroahng nim wain kapw nehn wein Koahs.”

<sup>26</sup> Mwerin irai koaulki koaul pas, irai ken allaluhlahng in Dolin Olip.

### *Jesus Kohpda en Peter ah pirin kahmahmkihla Ih*

<sup>27</sup> Jesus ken pwehng irai, “Kamwai ohroj pirin kaupijoang apel kerpwihla Ngoahi, pwa Puk Joarwi ne pwa, ‘Koahs pirin kojukdi jiloapoahu, a jihpw kan pirin kaupijoang.’ <sup>28</sup> A mwerin Oai pirin iejda, Ngoahi pirin inla mwohmwai Galilee.”

<sup>29</sup> Peter japoang Jesus, “Maing, mihnda ma ohroj pirin kerpwihla koawoa, a ngoahioahr joah!”

<sup>30</sup> Jesus pwehng Peter, “Ngoahi pwehng koawoa in mehlel, pwa pwongoauwe, mwohn joang jummwa kariau, koawoa pirin kahmahmkihla Ngoahi pehn jiluh, pwa koawoa jehjoa Ngoahi.”

<sup>31</sup> A Peter japoang Jesus, in ngil sihkei, “Ngoahi johpwa pirin kahmahmki pwa ngoahi jehjoa koawoa, Maing, mihnda ma ngoahi pel pwili koawoa mehdi.”

Doari, sohnpadahkkok ohroj pel pwili wia joangoan sikesikkoauwe.

### *Jesus Kapkap nehn Mwoaswel Gethsemene*

<sup>32</sup> Irai lel nehn mwoaswel ma adanki Gethsemene. Jesus ken pwehng Nah sohnpadahkkok, “Kamwai mwindi, pwa Ngoahi pirin kapkap.”

<sup>33</sup> Ih ken ukda Peter, James apel John. Ih kupwurohla apel pahsoaula, <sup>34</sup> Ih ken pwehng irai, “Nehn kapehdihoa inenin pwunodda doahrma Ngoahi pirin mehdi. Kamwai jowi Ngoahi me johpwa moairla.”

<sup>35</sup> Ih ken inla ekij dohlahjang irai, poadpwomwla pohn pwirej kapkapki ma awahn loklokko johkak dauluhl jang Ih. <sup>36</sup> Ih ken pwa, “Pahpa, Pahpa, me ohroj kak ipoamw. Koawoa kihwehjang Ngoahi dal oauwe. A joah, jaudi injenoai en pwoaida, pwa dahkij Koawoa kupwurki ioar en pwoaida.”

<sup>37</sup> Ih ken japahldo ipen irai jilmnenno kidalda pwa irai moair. Ih ken pwehng Peter, “Simon, koawoa moair? Koawoa joh kak pwili poahpoahpoahdki awa oauwoar?”

<sup>38</sup> Ih ken pwehng irai, “Kamwai pwili poahd apel kapkap pwa doar kamwai lohdihoang nehn jongjong. Pwa ngen ma peik a palwar ma jasihkei.”

<sup>39</sup> Ih pel japahlla kapkap, in joangoan mwommwohr. <sup>40</sup> Ih ken pel japahldohng ipen Nah sohnpadahkkok kidalda pwa irai moahmoahmoair, pwa mijaraihok inenin soausoaukihla arai nimmen moair. Irai ken jehjoahla pwa da irai en pwehng Jesus.

<sup>41</sup> Mwerin, kajiluh in a pwurla iparai, Ih pwehng irai, “Kamwai ken moair koamkoammoal? Ne isar! Awahu ne leldo, ma ioar Nihn-Armaj pirin pangpangla ipen irai dipan kan. <sup>42</sup> Kamwai pwohrda! Kisai! Kapang, ioar armaj wa ma pirin pangla Ngoahi ne leldo.”

### *Jesus ne Joaldi*

<sup>43</sup> Jesus kahjik kadoarihla Ah sikesik, a Judas, emen arai eijek roahmenno, lel Ipoa. Pokon koalikkoau ma pwili; irai wijik kodlaij apel koapwoahn pei, indoahjang ipen

jamwrou laplappok, jounpadahk in kojoneddok apel koaunnok. <sup>44</sup> Judas kioang pokonno kilél oau, pwa, “Armajjo ma Ngoahi pirin misik, ioar Ih, kamwai joalihdi. Kamwai ukwe jilóa Ih.”

<sup>45</sup> Nehn en Judas lel wijahu, ih ken inlahng ipen Jesus, pwehng, “Jounpadahk!” ih ken misik Jesus. <sup>46</sup> Pokonno ken koldi Jesus joalihdi Ih soang. <sup>47</sup> A emen iraihok ma mine wijahu, wijda nah kodlaijjo ngap pijoang poaloahjang sien nihn emen Jamwrou Laplappo lidu. <sup>48</sup> Jesus ken pwehng irai, “Imdoahr, kamwai indoahng koldi Ngoahi wijik jahr apel koapwoahn pei, doahr ma Ngoahi pwen lollap nauna men? <sup>49</sup> Rehn ohroj Ngoahi kin minminehr ipamwai, padpadahk nehn Umw Joarwiho, kamwai johpwa joalihdi Ngoahi. Doari, me pirin wiawi pwa lalin Puk Joarwi en pwoaida.”

<sup>50</sup> Nah sohnpadahkkok ohroj ken kerpwihla Ih kaula.

<sup>51</sup> Mwahnkapw men pwili kauj Jesus; pidkihpene palwoaroa upuhp oau. Irai jong in koldi ih. <sup>52</sup> Ih kaula kiljoau, kaujjang ah likkoauwo.

### *Jesus Uhda Mwohn Mwoalen Koapwunngo*

<sup>53</sup> Irai ken uklahng Jesus in umwen Jamwrou Laplappo, wija ma ohroj Jamwrou Laplappok, koaunnok apel jounpadahk in Kojoneddok pokonpene. <sup>54</sup> Peter pwen kahkahkaujjoar Jesus a ekij dohlahjang, oaroh lel nehn kelin umwen Jamwrou Laplappo. Ih ken mwindihoang wija ipen jounpei pwi pwa ih en pwili irai koaroangroang ipen oaiho. <sup>55</sup> Jamwrou laplappok apel Sohn Mwoalen Koapwung ohroj ken engdehnikihla rapahkihda kadehdehpwi ma pirin kahrehioang Jesus en kojkojdi, irai ken johpwa diar. <sup>56</sup> Dirin jounkadehde pwi kinehioang Jesus likamw pwi, a arai kadehde kan johpwa pwungpene.

<sup>57</sup> Armaj pwi uhda ken kinehioang Jesus likamw oauwe, <sup>58</sup> “Kamai pein rongjang woalmene, pwa, Ngoahi pirin koauwehla Umw Joarwihe, ma armaj kouda, a mwerin rehn jiluh Ngoahi pirin kouda oau ma johpwa wiawihkihda poahn armaj.” <sup>59</sup> A pel arai sikestik kan johpwa pwungpene.

<sup>60</sup> Jamwrou Laplappo ken uhda jang nehn dohiahu mwohrai ohroj, ih ken idoak ipen Jesus, “Johpwa mehkij koawoa pirin japoangki kadip pwiai ma wiawihioang koawoa?”

<sup>61</sup> Jesus nennenla, johpwa japoang, Jamwrou Laplappo ken pel pwuroahng idoak ipoa, “Koawoa ma Messiah, Nihn Koahs Kapaiho?”

<sup>62</sup> Jesus ken japoang, “Ioar Ngoahi ma Ih; kamwai ohroj pirin kapang Nihn-Armaj Ah pirin mine in loap moaunin Wija Laplap apel ma allaluhdo pohn koasoau kan in pehnloanngé.”

<sup>63</sup> Jamwrou Laplappo ken uhdahr soahrpijoang ah likkoauwo, ken pwahla, “Kisai johpwa anahne pel epwi jounkadehde! <sup>64</sup> Kamwai ne pein rong Ah lahlahwe. Dahkij kamwai lemléme?”

Irai ohroj ken pwa Ih ne dipda doari Ih koanoahng kojkojdi.

<sup>65</sup> Epwi irai ken sapda andipoa, poaroahla mijoa, poki, apel idoak, “Kohpda pwa inje ma poki koawoa?” Jounpeihok ukla Ih poki.

### *En Peter Kahmahmki Jesus*

<sup>66</sup> Nehn en Peter minmine ijoan nehn kelin umwen Jamwrou Laplappo, lidu in Jamwrou Laplap men lel wijahu. <sup>67</sup> Nehn ah kapangda Peter pwili koaroangroang wijahu, ih ken kapkapang Peter, pwehnglahng, “Koawoa pel emen ioangen Jesus mihn Nazareth.”

<sup>68</sup> Peter ken kahmahmkihla, pwa, “Ngoahi jehjóa... Ngoahi jehjóa dahkij koawoa pwahpwahpwa.” Ih ken dilla nehn palanngo; nehn anjoauwohr joang jummwa keiou wiawi.

<sup>69</sup> Liduhwo pel pwuroahng kapangda ih wijahu pwehnglahng araihok ma minmine wijahu, “Uhdahn emen irai me.” <sup>70</sup> Peter pel pwuroahng kahmahmkihla.

Mwerin anjoaukij, irai ma minmine wijahk pel pwehng, “Koawoa johkak kahmahmki pwa koawoa emen kijehrai, pwa koawoa mihn Galilee.”

<sup>71</sup> Peter ken pwahla, “Ngoahi kahukihla pwa ngoahi lallal mehle! Koahs en koalkoa ngoahi ma ngoahi likamw. Ngoahi jehjoa armaj menen ma kamwai pwahpwahpwa.”

<sup>72</sup> Nehn anjoauwohr joang jummwa kariau wiawi. Peter ken samanda en Jesus pwehng ih, “Mwohn joang jummwa kariau pirin wiawi, koawoa pirin kahmahmki Ngoahi pehn jiluh pwa koawoa jehjoa Ngoahi.” Ih ken sapda joang.

## 15

### *Jesus Mwohn Pilate*

<sup>1</sup> Oh inminjoang jamwrou laplappok pwilihki koaunnok apel jounpadahk in Kojoneddok, pel Sohn Mwoalen Koapwung ohroj, wiahda arai koajoandi. Irai joalikhidi Jesus jihn, irai ukla Ih ipen Pilate. <sup>2</sup> Pilate ken idoakkoang Jesus, “Koawoa ioar nahmwarkihn mihn Jew?”

Jesus japoang, “Koawoa ma pwa.”

<sup>3</sup> Nehn en jamwrou laplappok irai karkaraunki Jesus joang dirpwi, <sup>4</sup> Pilate pel pwuroahng idoak Ipoa, “Koawoa jehpirin japoang? Rong meohroj irai kadmipoahki koawoa?”

<sup>5</sup> Jesus johpwa nimen pwahla lal oau a ioar Pilate pwunodkihda dauluhl.

### *Jesus Kadeikda Pwa En Kojkojdi*

<sup>6</sup> Nehn anjoau in joarwihn Passover ohroj Pilate kin oapwoahnki kajaldekihla emen sohn kalpwuhjjok ma armajjok poaki. <sup>7</sup> A doari anjoauwo mine woal men, adanki Barabbas, ma pwili lollap naunahpwi joaldi nehn kalpwuhj pwa ih kojukdi armaj men nehn pingping in armaj pwi. <sup>8</sup> Doari, anjoauwo ma pokonno dirla ihr sapda poaki ipen Pilate en wiahng irai joangoan kalahnganno ma ih kin wiahng irai mijkoalkoalwa. <sup>9</sup> Ih idoak iparai, “Kamwai nimen ngoahi en lapwaddahng kamwai nahmwarkihn mihn Jew-ok?” <sup>10</sup> Pwa ih inenin kidal pwa jamwrou laplappok pangdohng ih Jesus pwa irai pihrianoang.

<sup>11</sup> Jamwrou laplappok kangoangehki pokonno pwa irai en poaki Pilate en lapwad-dohng irai Barabbas. <sup>12</sup> Pilate pel pwuroahng idoakkoang pokonno, “A da kamwai mwehuki ngoahi en wiahng woalmene ma kamwai kin panginki nahmwarkihn mihn Jew-kan?”

<sup>13</sup> Irai rahukihlahng, “Kalohpwuhla Ih!”

<sup>14</sup> A Pilate idoakkoang irai, “Pwa dihp dahioau Ih wiahda?”

Irai kapwa kakoalikhla ngilarai rahuki, “Kalohpwuhla Ih!”

<sup>15</sup> Pilate nimen kainjenmwahuwi pokonno, ioar ih jaladoang irai Barabbas; a mwerinno ih mweidoahng Jesus en pokpok, apel kioang irai en kalohpwuhla.

### *Jounpei pwi Kapiski Jesus*

<sup>16</sup> Jounpei pwi ukla Jesus nehn kelin umwen koapinahu, irai panginpene ohroj jounpeihok ma wia kijehn arai pwihno. <sup>17</sup> Irai ken kalikkoauwihkihda Jesus robe pwijehnmwoal oau, pel pahda rahn suhkoa soaksoak pwi in mwomwen mwarmwar irai kihdahng pohn moange. <sup>18</sup> Mwerinno, irai kin dairukdi mwohn Ih, pwahpwahpwa, “Nahmwarkihn mihn Jew-kan en mour woaroai!” <sup>19</sup> Irai kin pokihki moangehu pehri pas apel andipoa mijoa apel poadpwomwla mijen Ih dairukdihoang mwohn Ih. <sup>20</sup> Mwerin irai kapwroa Jesus, irai kihjang Ah robe pwijehnmwoallo, kajpahlihoang Ah likkoauwok. Irai ken ukla Ih pwa en kalohpwuhla.

### *Jesus Kalohpwuhla*

<sup>21</sup> Nehn irai allaluhla irai suhwoang woal men nehn allo, adanki Simon, mihn Cyrene, jemen Alexander apel Rufus. Ih allaluhdohng nehn kahnihmmwo jang nehn a weiho, a jounpeihok iponngoang en wahda en Jesus lohpuwuhwo. <sup>22</sup> Irai ken uklahng Jesus wijahu ma adanki Golgotha, ma woahwoahki, "Wijahn Sih Moang." <sup>23</sup> Irai jongin kioang Ih wain doalki joangoan wini oau ma adanki myrrh, a Jesus johpwa nim. <sup>24</sup> Doari, irai ken kalohpuwuhla, apel nehkpijoang Ah likkoauwok nehn pwungarai, wijwijki dama emenemen pirin anki. <sup>25</sup> Kiloak duwoau inminjoang anjoauwo irai kalohpuwuhla Jesus. <sup>26</sup> Insing oau mine pohn lohpuwuhwo ma kawoahwoahda kahrpoan Ah lohpuwuhla, ma pwa,

"Nahmwarkihn mihn Jew-kan."

<sup>27</sup> Irai pel kalohpuwuhla lolap nauna roahmen pwilihki Jesus, emen mine in Ah loap moaun a emen loap meing. <sup>28</sup> [Ioar pirin doahr pwoaidahn lalin Puk Joarwi, ma pwa, "Ih ken pwili wadwaddoang armaj dipannok."]

<sup>29</sup> Armaj ohroj ma kin alu wijahu kin isik moangoarai apel lahlahwe Jesus, "Aha! Ioar Koawoa ma kak koauwehla Umw Joarwiho, apel pwuroahng kouda nehn rehn jiluh! <sup>30</sup> Apkas kerdihjang in lohpuwuhwen apel doaroahla pein Koawoa."

<sup>31</sup> Jamwrou laplap apel jounpadahk in Kojonneddo pwili kapwroa Jesus pwahp-wahpwahpene, "Ih kapisla epwi, a johkak kapisla pein Ih! <sup>32</sup> Kisai kapang Messiah, nahmwarkihn Israel, kerdihdohjang in lohpuwuhwen apkas, kamai kapwa kamehlele Ih!"

Lollap roahmenno ma pwili lohpuwuhlahu, ara pel lahlahwe Ih.

### *Mehdihn Jesus*

<sup>33</sup> Injauwajjo ros oau indihohang pohn jappwo pwon oaroain awa jiluh. <sup>34</sup> A kiloak jiluh Jesus kakoalikhla ngiloa, Ih pwa, "Eloi, Eloi, lema sabachthani?" ma woahwoahki, "Oai Koahs, Oai Koahs, amwda Koawoa ke moalkoahla Ngoahi?"

<sup>35</sup> Epwi armajjok ma pwili mine wijahu, nehn irai rong Ih, irai pwa, "Rong, Ih pangpangin Elijah." <sup>36</sup> Emen irai ken kijoukihla limw oau kaduhdi nehn wain siksik dupkoa oau, kioang in imwin suhkoa pas, ih koudalahng in oawoan Jesus a ih pwa, "Jowi, kisai kapang ma Elijah pirin indihdo kihdihjang Ih in lohpuwuhwen!"

<sup>37</sup> Jesus rahrahula, Ih kadarla ngenin.

<sup>38</sup> Kahdenngo ma kin poaroa mwoal joarwiho nehn Umw Joarwiho soahroakpijoang nehn pwunge jang puwoa lel pah. <sup>39</sup> Koahunin jounpei men, ma uhda oh in mwohn lohpuwuhwo kapang mwomwen en Jesus mehdi. Ih pwa "Mehlel pwa woal mene uhdahn nihn Koahs!"

<sup>40</sup> Lihpwi pel pwili mine wijahu, kapkapang, a irai ekij dohjang. Irai ioar: Mary mihn Magdala, Salome, apel Mary inen James siksikko apel Joses. <sup>41</sup> Ioar irai pwiai ma kin pwilpwilihjili Jesus pwa irai en kin papah Ih anjoauwo Ih mine Galilee pel li dir pwili mine wijahu, ma pwili Jesus indoahjang Jerusalem.

### *Joajjoardihn Jesus*

<sup>42-43</sup> Allaluhlahng injoausik ioar anjoauwa Joseph mihn Arimathea leldo. Ih kijehn Sohn Mwoalen Koapwunngo ma armajjok kin woauki; ih kin pel pwili joujowihdo Wein Koahs. Doari, rehnno, pwa ih wia rehnin koahunopda (rehnwa mwohn Sabbath). Joseph inla ipen Pilate, johpwa perki mehkij, pwa ih en poaki palwoaroan Jesus. <sup>44</sup> Pilate pwuriamweikihla ah rongda pwa Jesus ne mehdi; ih ken pangindo koahunin pwihnin jounpei men pwa ih en kadehde ipoa ma mehlel pwa Jesus ne mehdi. <sup>45</sup> A mwerin ah oaloo kadehde jang jounpeiho, ih kapwa mweidoahng Joseph en oaloo palwoaroan Jesus. <sup>46</sup> Joseph dupukda likkoau linen oau, ih lapwaddi palwarro jang in lohpuwuhwo, kidimkihpenne likkoauwo, apel nekiddi nehn joaujoau ma wiawihda nehn sakai oau. Ih ken kasahpwroahng sakai koalik oau poaroahkihla wijahn dildahn



joaujoauwo. <sup>47</sup> Nehn anjoauwo ma mehpwiai wihwiawi, Mary mihn Magdala apel Mary inen Joses, ira widwidahli apel kadehde mwehu wijahu palwoaroan Jesus liklikdi.

## 16

### *Jesus Iejda*

<sup>1</sup> Mwerin Sabbath-o, Mary mihn Magdala, Salome, apel Mary inen James, irai dupukda le karahdin pwi irai en inla salipki palwoaroan Jesus. <sup>2</sup> Oh inminjoang in rehnin Joarwi anjoauwo ma joauwo dakda, irai inla in joaujoauwo. <sup>3-4</sup> Nehn irai allaluhlahng in joaujoauwo irai pwahpene nehn pwungarai, “Inje pirin jeuweje kisai kasahpwroahjang sakaiho in oawoan joaujoauwo.” (Pwa ausoapoan sakaihoau.) Nehn irai lel wijahu irai kapangda pwa sakaiho ne kasahpwroahkjang. <sup>5</sup> Irai ken dilda nehn joaujoauwo kapangda mwahnkapw men, ma mwindi loop moaunin joaujoauwo robe korohrohioau ma — kanuhla irai.

<sup>6</sup> Mwahnkappwo pwehng irai, “Kamwai joah majpwehk, ngoahi kidal pwa kamwai raprapahki Jesus mihn Nazareth ma ne kalohpwuhla. Joh Ih me — Ih ne iejda! Kamwai kadehde, me ioar wijahwa Ih liklikdi. <sup>7</sup> Kamwai alwe padahkihoang Nah sohnpadahkkok, a mehlel Peter. ‘Ih pirin inla Galilee mwohn kamwai; ioar wijahwa kamwai pirin kapang Ih, doahr Ah ne inoaukihoang kamwai.’ ”

<sup>8</sup> Lihok diljang nehn joaujoauwo, irai ken kau pwa irai inenin majpwehkda apel jalohda. Irai pel johpwa pwehng armaj men mehkij, pwa irai majpwehkda.

### *Jesus pwokkoang Mary mihn Magdala*

[<sup>9</sup> Mwerin Jesus iejda oh inminjoang in rehnin Joarwi, keiou, Ih pwokkoang Mary mihn Magdala, liho ma Ih kajroahjang ipoa ngen jaus ijimen. <sup>10</sup> Mary ken inla padahkihoang iraihok ma kin pwilpwilihjili Jesus ma injinjuwed apel joangjoangjoang. <sup>11</sup> Anjoauwo irai rong Mary pwa Jesus mour a ih pel kapang Jesus, irai johpwa kamehlele ih.

### *Jesus Pwokkoang Sohnpadahk Roahmen*

<sup>12</sup> Mwerin me Jesus pel pwokkoang Nah sohnpadahk roahmen in oaujoangoan mwomw anjoauwo ira allaluhlahng in umwara likin kahnihmmwo. <sup>13</sup> Ira japahldo pel padahkihoang epwi irai, a irai ma rong johpwa kamehlele.

### *Jesus pwokkoang Sohnpadahk Eijek Emenno*

<sup>14</sup> In koarjoahklahu Jesus pwokkoang Nah sohnpadahk eijek emenno anjoauwo ma irai mwingmwinge. Jesus koapwung oang irai doahr arai joah pwojon apel koapsakai in kamehlele iraihok ma ne kapang Ih mwerin Ah iejda. <sup>15</sup> Ih pwehng irai, “Kamwai alwe wija ohroj nehn jampah padahkihoang armaj ohroj rongmwehuwo. <sup>16</sup> Inje ma pwojon apel poapdaijla, pirin mourla; a inje ma joah pwojon, pirin kerpwihekla. <sup>17</sup> Manman pwiai pirin aluhwoang iraihok ma kin pwojonla; irai en kin kajroahjang ngen jaus kan ipen armaj in oadoaioa; irai pirin lalki lalin japwen likin kan; <sup>18</sup> ma irai pwoakda sinek kan, ke pel nimla mehkij ma pwoaisin, irai jehpirin mehkildi; irai pirin kihdahng poahraiok pohn armaj johmwehuwok a ihr pirin mwehula.”

### *Jesus Pwoakpwoakdahla Nehnloanng*

<sup>19</sup> Mwerin en Koaun Jesus sikesikkoang irai, Ih pwoakpwoakdahla nehnloanng Ih mwindi loop moaunin Koahs. <sup>20</sup> Sohnpadahkkok ken japahlla padpadahkjili wija



ohroj; Koaunno kin pel pwilpwili irai nehn arai doadoahkkok pwa en kadehdehda pwa arai padahkkok mehlel jang in manmannok ma irai wiahda.] \*

---

\* **16:20** Epwi iren puk joarwi mehj pwi ma kawoahwoahda iroa siksik 18-20, epwi mwerin iroa siksik 20: *Lihok ken kijoula ipen Peter apel pwilihoahk pel padahkihoang me ohroj ma irai ne rong. Mwerin me, Jesus doadoahkki nah sohnpadahkkok pwa irai en kalohkihpjoang ah kaweidin koamoaur joh inwinno jang palimese lel palikapi in jampah.*

## Rongmwehu ma ne Insingdi jang ipen LUKE

### *Oarlap in Puk Oauwe*

*Rongmwehu in Luke* kajalehda doahroar en Jesus Ah wia jounkoamoaur in Israel apel en armaj ohroj, ma inoapoa wiawihla kawahu. *Luke* kajalehda (kilelehdi) doahroar en Ngenin Kounno Ah ne pangin Jesus pwa en “Kapahrakkihoang armaj joamwoahmwoa kan Rongmwehu;” ioar ma puk oauwe pel kajalehda doahroar Rongmwehu in Jesus ah kin jeuweje armaj kan ma kin minmine nehn joangoan anahn ohroj. Irait en peren ma pel dehde mwehu nehn *Luke* a mehlel nehn iroa koalik kan in sapdahu, wija ma pakairin indoahn Jesus wihwiawi, apel in imwin, anjoau ma Jesus indahla nehnloange. Jouninsing in puk oauwe pel insingehdi *Wihwiahn Woaroakkok* ma siko doahroar pwojon Christ ah koairda apel parpijoang mwerin Jesus indahla nehnloange.

Loap 2 apel 6 (Soahk nehn audoapoa in oarlap ma mine pah) ne audohkihda iroa ngoadoar ma johkin diarek nehn Pukin Rongmwehu sohrohr kan, a ioar oar nehn Rongmwehu oauwe, ma doahroar sikesik in sohnloangok ahr koaul nehn noaisikdihn Jesus, apel jilepen jihppwok ahr pajlahng ipen Jesus; sikesik in Jesus nehn Ah minmine nehn pwungen jounpadahk in Kojonneddok nehn Umw Joarwiho nehn Jerusalem; apel karajraj in Mihn Samaria Kadekko apel karajraj in Jermweinno ma joaloangla. Puk oauwe kin kajampwalki mehlel padahk doahroar kapkap, doahroar Ngen Joarwi, doahroar en lihkan ahr jauwaj oang Jesus nehn Ah padahk, apel doahroar en Koahs Ah kin mahkoahng dipen armaj kan.

### **Audoapoa in Oarlap**

Sapin jakardahn jouninsing Luk 1.1-4

Noaisikdihn apel sikdahn John jounpoapdaij apel Jesus 1.5—2.52

Doadoahk in John jounpoapdaij 3.1-20

Jesus poapdaijla apel oalao jongjong pehn Jehsen 3.21—4.13

En Jesus doadoahk nehn Galilee 4.14—9.50

Jesus injang Galilee inlahng Jerusalem 9.51—19.27

Kaimwjeklahn wihk nehn Jerusalem apel kahnihmw ipoa 19.28—23.56

Koan Jesus iejda, pwokkoang Nah sohnpadahk kan, Ih indahla nehnloange 24.1-

53

### *Sapin Jakardahn Jouninsing Luke*

<sup>1</sup> Koampoakpoi Theophilus:

Armaj ngoadoar engdehn insingehdi sikesik in mehkan ma ne pwoaida ipasai. <sup>2</sup> Irai insingehdi da ma kamai ne oaloahjang iraihok ma widahliki mijarai kan apel padahkihoang armaj kan joang pwiai jang in sapdahu indoa. <sup>3</sup> A doar maing Theophilus, nehn oai leleme mwehu doahroar mengihsik in mehpmwiak ohroj jang in sapdahu, ngoahi lemehta pwa pirin mwehu mehlel ma ngoahi wiahda oau pukin poadpoad oang koawoa doahroar mehpmwiak. <sup>4</sup> Ngoahi wia me pwa koawoa en woahwoahkihla joang ohroj ma koawoa ne oalao padahkin.

### *Pakair in noaisikdihn John jounpoapdaij*

<sup>5</sup> Nehn mwein Herod, nahmwarkihn Judea, mine jamwrou men oadoa Zechariah, kijehn loapin jamwrou ma adanki Abijah. Pahioahu oadoa Elizabeth, pel kijehn kadaudok in jamwrou oau. <sup>6</sup> Ira inenin mour poadidi mwohn mijen Koahs, ira kin

pel kapwaihahda mwehu mahjan apel kojoned ohroj in Koahunno. <sup>7</sup> A joh nihra jeri pwa Elizabeth johkak noaisik, a ira ne moadohla.

<sup>8</sup> Rehn oau Zechariah wihwia ah doadoahk in jamwrou nehn Umw Joarwiho. <sup>9</sup> In doahroar ma kin wiawi ipen jamwrou kan, ih pilpildahng en wia meiroang in okoj warpwohmwehu nehn Umw Joarwihn Koahunno pohn pei joarwi, doari ih ken dildahng nehn wijahu, <sup>10</sup> a pokon koalik oau minmine likin kapkapkap nehn anjoaun okjekko. <sup>11</sup> Sohnloang in Koahunno men pwokkoang Zechariah uhda loap moaun in mwoal in meiroanngo wija ma warpwohmwehuwo kalkalahs. <sup>12</sup> Nehn Zechariah kapangda sohnloanngo, ih nuhkihla apel majpwehkda. <sup>13</sup> A sohnloanngo pwehnglahng, "Zechariah, koawoa en joah mijik, pwa oamw kapkap ne pwoaida ipen Koahs! Pahioamw Elizabeth pirin noaisikihdi jermwein men ma koawoa pirin kioang oadoa John. <sup>14</sup> Ih pirin kahrehioang koawoa peren apel popohl, apel armaj ngoadoar pirin perenda nehn ah pirin noaisikdi! <sup>15</sup> Pwa ih pirin laplap mwohn mijen Koahunno. Ih jehpirin jair wain ke jakau sihkei. Mwohn ah pirin noaisikdi ih pirin dirkihla Ngen Joarwi. <sup>16</sup> Ih pirin kajpahlihdo mihn Israel ngoadoar ipen Koahunno, asai Koahs. <sup>17</sup> Ih pirin indoa mwohn Koahunno in rojon apel manman doahroar joukohp Elijah. Ih pirin kemwehuwihla nehn pwungen mwahmwa kan apel nihrai jerihkan; Ih pirin pel ukudla armaj japeik kan oang in al pwung kan, apel koaunopda nihn Koahunno armaj oang Ih."

<sup>18</sup> Zechariah pwehnglahng sohnloanngo, "Da ngoahi en kidalki pwa mehkije pirin pwoaida ipoai, pwa ngoahi apel pahioaiho ne moadohla?"

<sup>19</sup> A sohnloanngo japoangla, "Ngoahi Gabriel, ma kin ariri Koahs, Ngoahi pwa ngoahi en pakairkihoang koawoa rong mwehu pase. <sup>20</sup> A pwa oamw joah kamehlele oai pakair, ma pirin pwoaida nehn anjoau in, koawoa pirin loahsoangla; koawoa johla pirin kak lallal oaroh lel nehn rehnno ma mehpwiak pirin pwoaida."

<sup>21</sup> Nehn anjoauwo pokonno joujowi Zechariah, pwonpwonkihda pwa dahkij ih woaroaikihla loaloa. <sup>22</sup> Nehn ah dildohjang nehn Umw Joarwiho ih johla kak lalloang irai. Irai kidal da pwa ih widahlihda mehkij kapwuriamwei loaloa. Ih uhda mwohn mijarai, jeioahl pwa ih nimen lallal a johkak pwa ih ne loahsoangla.

<sup>23</sup> Nehn en Zechariah ah anjoau in pwukoa doadoahk in nehn Umw Joarwiho doarihla, ih japahllahng nehn umwahu. <sup>24</sup> Mwerin anjoau kij, pahioahu Elizabeth lijaianda, ih minminehki nehn umwahu oaroain johnpwong limoau. <sup>25</sup> Ih kin pwa, "Ioar doahroar en Koahunno jeuwejhda ngoahi me, nehn Ah kihjang ngoahi oai kamehk ipen armaj kan!"

### *Pakair in Noaisikdihn Jesus*

<sup>26</sup> Nehn en Elizabeth kawonou in johnpwong, Koahs pel kadardo sohnloang Gabriel nehn kahnihmw in Galilee oau ma oadoa Nazareth, <sup>27</sup> ipen meipwon men ma ne inoau in pwoapwoaud oang woal men ma oadoa Joseph, kijehn kadaudok in Nahmwarki David. A jerpein meipwonno adanki Mary. <sup>28</sup> Sohnloanngo inla ipoa rahnmwahuwi, ih pwa, "Mary, popohl oang koawoa! Koahunno minmine ipoamw apel ne kapaiahda koawoa!"

<sup>29</sup> Mary majpwehkkihda sikesik oauwe apel lamlam koalikki ia pirin woahwoahn sikesik pase. <sup>30</sup> Sohnloanngo pwehng, "Mary, koawoa en joah perki mehkij, pwa kalahngan en Koahs uhdahn koalik ipoamw. <sup>31</sup> Koawoa pirin lijaianda, noaisikihdi jermwein men ma koawoa pirin kioang oadoa Jesus. <sup>32</sup> Ih pirin laplap apel adanki Nihn Koahs, Keiou Laplap. Koahunno Koahs pirin kajapwilda en nahmwarki doahroar jamah David. <sup>33</sup> Ih pirin pel nahmwarkihn kadaudok in Jacob kan allaluhla; Ah wei jehpirin doari!"

<sup>34</sup> Mary pwehng sohnloanngo, "Imdoahr me en kak wiawi, nehn oai meipwon?"

<sup>35</sup> Sohnloanngo japoang, “Ngen Joarwi pirin mine pohmmwen apel rojon in Koahs pirin mine ipoamw, ioar kahrehda jeri joarwiho pirin adanki Nihn Koahs. <sup>36</sup> Koawoa en samsaman kijehmw Elizabeth doahroar en armaj kan ahr wiahki li johkak nainki jeri; a apkas ih ne lijaianda ne mine nehn kawonou in ah johnpwong, mihndahr ma ih ne li moadohla. <sup>37</sup> Pwa joh mehkij ma johkak ipen Koahs.”

<sup>38</sup> Mary pwehnglahng sohnloanngo, “Ngoahi lidu in Koahunno en wiawihong ngoahi dahkij ma koawoa pwahla.” Sohnloanngo ken inlahjang ih.

### *Mary Paj ipen Elizabeth*

<sup>39</sup> Mwerin me, Mary koaunopda me ohroj apel pispis inlahng nehn kahnihmw oau mine in japw nahnahn Judea, <sup>40</sup> ih dilda nehn umwen Zechariah pwa en rahnmwahuwi Elizabeth. <sup>41</sup> Nehn en Elizabeth rongda en Mary rahnmwahu, jeriho ken mwoakidda nehn kapehdin. Elizabeth ken dirkihla Ngen Joarwi, <sup>42</sup> ih kakoalikhla ngiloa, pwehng Mary, “Koawoa meid pai ipen lihkan! Meid pai jeri ma koawoa pirin noaisikihdi! <sup>43</sup> Dahkij joang kapwuriamwei oauwe wiawihkihoang ngoahi, ma inen oai Koahun paj ki ipoai? <sup>44</sup> Pwa nehn anjoauwohr ma koawoa rahnmwahuwi ngoahi, jeri siksikko nehn kapehdihoa mwoakidkihda ah malau. <sup>45</sup> Koawoa meid pai pwa oamw pwojon ma kahrehda sikesik in Koahunno pirin pwoaida ipoamw!”

### *En Mary ah Koaulin Kaping*

<sup>46</sup> Mary pwa,  
 “Mohngiongihoa kin kapnga Koahunno;  
<sup>47</sup> Ngenihoa kin perenki Koahs, oai Jounkoamoaur,  
<sup>48</sup> pwa Ih lemlemehr Nah lidu siksik mene!  
 Jang apkas inla di ohroj pirin kapnga ngoahi  
<sup>49</sup> pwa joang kapwuriamwei kan ma Koahs, Keiou Laplap ne wiahda ipoai.  
 Oadoaioa ioar ma joarwi;  
<sup>50</sup> Ah kalahngan kin janjal oang ohroj ma kin woauki,  
 jang oau di lel oau di.  
<sup>51</sup> Ih ne kihwe poah sihkei,  
 apel kajohla lamlam in ihr aklaplap kan ohroj.  
<sup>52</sup> Ih jinoakdi nahmwarki laplap jang nehn ahr mwoal kan,  
 a wud kajapwilda min siksik kan.  
<sup>53</sup> Ih kamoadihkihla mwinge mwehu ihr ma duhpek kan,  
 a karpajoang ihr ma koapwoahpwoa kan kaip.  
<sup>54</sup> Ih pwa en kolkolloar Ah inoau oang jamasaihok,  
 apel indoahng jeuweje Ah lidu Israel;  
<sup>55</sup> Ih johpwa moalkoahla kalahngan ma Ih wiahng Abraham  
 apel kadaudokoa kan ohroj allaluhla!”  
<sup>56</sup> Mary minminehki ipen Elizabeth johnpwong jiluh, mwerin ih japahllahng in umwahu.

### *Doahroar Noaisikihn John jounpoapdaj*

<sup>57</sup> Anjoau in en Elizabeth noaisik ne lel; ih noaisikihdi jermwein kij. <sup>58</sup> Nehn en mihn ipoahk apel peneinei irai rongda doahroar kalahngan en Koahunno ah pwoaida ipoa, irai ohroj pel pwili inenin perenkihda.

<sup>59</sup> Nehn kawaluh in rehn mwerin jeriho ah noaisikdi, irai wahla ih en jorkomjaijla apel kioang ih en adankihla oadoan jamahu, Zechariah. <sup>60</sup> Inahu japoang irai, “Joah! Ih pirin adanki John.”

<sup>61</sup> Irai pwehng ih, “A imdoahr? Johpwa oamw peneinei men adanki John!” <sup>62</sup> Irai jeioahli jemen jeriho apel kalelpoak ad dahioau ma ih nimen kioang jeriho.

<sup>63</sup> Zechariah poakihda puk oau, ih insingehdi puwoa, "Ih pirin adanki John." Irai ohroj ken inenin pwuriamweikihla! <sup>64</sup> Nehn oar anjoauwo Zechariah pwuroahng lallalda, apel sapda kapkapnga Koahs. <sup>65</sup> Sohn wija ohroj inenin majpwehkda, apel rongin mehpiwak lepijoang wija ohroj nehn japw nahnahn Judea. <sup>66</sup> Apel ohroj ma pwili rong mehpiwak kin lemleme apel idoak, "Da jeri mene pirin wiahla?" Pwa ne janjal pwa manman in Koahunno mine pohn ih.

### *En Zechariah ah Kokohp*

<sup>67</sup> Jemen John, Zechariah, dirkihla Ngen Joarwi ih kohpda in doahroar me:

<sup>68</sup> "Kisai kapnga Koahunno, Koahs in Israel!

Pwa Ih ne indoa pwa en jeuweje Nah kan apel koamoaurihla irai.

<sup>69</sup> Ih kajapwildahng kisai Jounkoamoaur manman men, jang nehn kadaudok in David, Nah lidu.

<sup>70</sup> Ih ne pwen inoaukihdihoang ipen Nah joukohp joarwihn kawa kan

<sup>71</sup> pwa Ih pirin doarohla kisai jang asai imwinsihsi kan, apel jang nehn manmanin irai ohroj ma kin lioassoang kisai.

<sup>72</sup> Ih pel pwa Ih pirin kalahngan oang jamasaihok, apel samsaman oar Ah inoau koalik joarwiho.

<sup>73</sup> Ih kahukihoang jamasai Abraham,

<sup>74</sup> apel inoaukihoang pwa Ih pirin kapisla kisai jang asai imwinsihsi kan, apel mweidoahng pwa kisai en papah Ih joah perki mehkij;

<sup>75</sup> a kisai en kin mwakelkel apel pwung mwohn mijoa rehn ohroj in asai mour.

<sup>76</sup> A koawoa, noai jeri siksik, koawoa pirin adanki joukohp in Koahs, Wija Laplap. Koawoa pirin inla mwohn Koahunno, pwa koawoa en koaunopda Ah al kan oang Ih;

<sup>77</sup> pwa koawoa en padahkihoang Nah kan doahroar ahr pirin mourla nehn ahr pirin oaloo mahk in diparai kan.

<sup>78</sup> Pwa asai Koahs ma kupwur kalahngan apel kadek.

Ih pirin kamaramihki kisai maram in koamoaur,

<sup>79</sup> apel joarohki maram jang nehnloange pohn ohroj ma minmine nehn ros in mehdi,

pwa en kahkahlwahwe kisai nehn alin popohl."

<sup>80</sup> Jeriho koalikla apel koahiokla in pali ngen. Ih kin koaukoaujoan nehn japwsoahn oaroh lel rehno ma ih pwokda janjal mwohn mihn Israel.

## 2

### *Noaisikdihn Jesus*

<sup>1</sup> Nehn anjoauwo Nahmwarki Caesar Augustus kouda kojoned oau ma pwa sohn ah wei ohroj en insingdi. <sup>2</sup> Ioar keiou in insingdihn armaj me ma wiawi nehn mwein Quirinius, koapinahn Syria. <sup>3</sup> Armaj ohroj ken mwoakidlahng nehn uhdahn arai wija ma irai noaisikdi pwa irai en pwili insingdi.

<sup>4</sup> Joseph injang kahnihmw Nazareth nehn Galilee inlahng Judea nehn kahnihmw kij oadua Bethlehem, wijahu ma nahmwarki David noaisikdi pwa ih kijehn kadaudok in David. <sup>5</sup> Ih inla o pwa en pwili insingdi, pwilihki Mary ma ih inoau in pwoapwoaudoang, lijaiian anjoauwo. <sup>6</sup> Nehn ara ne lel Bethlehem, en Mary ah anjoaun noaisik ne lel. <sup>7</sup> Ih noaisikihdi nah mehjeni jermwein men. Ih kidimkihpenne likkooun jeri kihdihoang nehn dohien kamwinge mahn oau — pwa ne johla wija nehn umwen keiru.

### *Jounjiloo Jihpw pwi apel Sohnloang pwi*



<sup>8</sup> Jounjilooa jihpw pwi jiljilooa nihrai pwihn in jihppwok inpwonngo nehn jappwo. <sup>9</sup> A sohnloang in Koaunno men pwokdohng irai, apel maram in Koahs joarohda apel pidekihpene irai. Irai inenin majpwehkda. <sup>10</sup> A sohnloanggo pwehng irai, “Kamwai joah mijik, pwa ngoahi wahdohng kamwai rong mwehu oau, ma pirin kamalauihda armaj ohroj. <sup>11</sup> Pwa pwongoauwe Jounkoamoaurro ne noaisikdi oang kamwai nehn kahnihmw in David — ioar Koaun Messiah <sup>12</sup> A ioar kilelin wa oang kamwai: kamwai pirin kapang jeri siksik men ma kidkidki likkoaun jeri onohn nehn dohien kamwinge mahn.”

<sup>13</sup> Nehn oar anjoauwo pwihn in sohnloang dihrdir oau pwokda wijahu pwili sohnloanggo kapkapnga Koahs koahkoahkoaulki:

<sup>14</sup> “Kaping oang Koahs nehnloange wija illoa,

apel popohl nehn jampah oang armaj kan ma Ih kin kapaiahda!”

<sup>15</sup> Nehn en sohnloangok injang irai japahldahla nehnloange, jounjilooa jihppwok pwahpene nehn pwungarai, “Kisai inla Bethlehem apel kapang mehkan ma wiawihla wijahu ma doahroar en Koaunno ne pwehng kisai.”

<sup>16</sup> Irai ken karwarohla kapangda Mary, Joseph apel jeriho ma minmine nehn dohien kamwinge mahnno. <sup>17</sup> Nehn en jounjilooa jihppwok kapangda Jeri siksikko, irai pwehng ira me ohroj ma pweiekkooang irai doahroar jeriho. <sup>18</sup> Apel ohroj ma rongda audoapoan en jounjilooa jihppwok sikesikkok inenin pwuriamweikihla. <sup>19</sup> Mary kin lemlemehr mehpiwak ohroj apel lamlam koalikki nehn kapehdin. <sup>20</sup> Jounjilooa jihppwok japahllahng nehn arai wija, johpwa uhdihjang arai koaul kapkapnga Koahs pwa me ohroj arai rongda apel widahlihda pwoaida in doahroar en sohnloanggo pwehng irai.

### *Jesus Oalooa Oadoo*

<sup>21</sup> Mwerin wihk oau, jeriho jorkomjaijla, Ih adankihla Jesus, adwa ma sohnloanggo kioang Mary mwohn ah kahjik lijaianda.

### *Kajarwihlahn Jesus*

<sup>22</sup> Anjoaun kamwkel ma insingdi nehn kojoned in Moses ne dauli, Joseph apel Mary wahdahlahng jeriho Jerusalem pwa Ih en kajarwihoang Koaunno, <sup>23</sup> doahroar Ah ne koajoandi jang ipen Koaunno: “Jeri woal ohroj ma mehjeni pirin kin kajarwihoang Koaunno.” <sup>24</sup> Ira pel wa indahla ara mihn meiroang, doahroar ma ne pel koajoandi jang ipen Koaunno: mwurei roahmen ke pigeon roahmen.

<sup>25</sup> Nehn anjoauwo woal men kin minmine Jerusalem, oadoo Simeon. Woal mene inenin poadidi apel kin mijik Koahs; ih kin pwili joujowi koamoaur in Israel, apel Ngen Joarwi kin minmine ipoa. <sup>26</sup> Ngen Joarwi kajalehng ih pwa ih nen joah mehdi mwohn ah pirin widahli Messiah ma Koaunno ne inoaukihda. <sup>27</sup> Ngennohr pel kaweidki Simeon en inla nehn Umw Joarwiho. Nehn en jemen jeriho apel inahu ira wahla Jesus nehn Umw Joarwiho pwa en kapwaihahda siahk in kojoneddo, <sup>28</sup> Simeon oalohr jeriho, pwoakda kapkapnga Koahs, pwahla,

<sup>29</sup> “Maing oai Koaun, koawoa en mweidla nihmw lidu

en allaluhwe nehn popohl, in doahroar oamw ne inoaukihda.

<sup>30</sup> Pwa pwoaroan mijoaihoa kai ne kapangla oamw koamoaur,

<sup>31</sup> ma Koawoa ne onopdahng mwohn wei ohroj:

<sup>32</sup> Maram oau mihn joarohda mihn likinnok

apel kalingihla sohn oamw wei, Israel.”

<sup>33</sup> Jemen jeriho apel inahu pwuriamweikihla mehkan ma Simeon siksikoahki doahroar nihra jeriho. <sup>34</sup> Simeon kapaiahda ira ih pwehng Mary inen jeriho, “Jeri mene ne pilpilda pwa en wiahla mihn koauwehla apel koamoaurla armaj ngoadoar ipen mihn Israel kan; Ih pirin wiahla kilel oau ma armaj dir pirin

pallanda, <sup>35</sup> kajalehkihda lamlam rir in nehn kapehdirai kan. Injinjuwed koalik pirin koauwehla nehn kapehdimwen, doahroar kodlaj ingkoang pas.”

<sup>36-37</sup> Pel mine li joukohp men, oadoa Anna, nihn Phanuel, kijehn kadaudok in Asher. Ih pwoapwoaudki johnpar ijuh oar, pwa apkas ih ne lihdihla, ih johnpar 84. Ih johkin diljang nehn Umw Joarwiho; pwa inpwong apel inrehn ih kin pwongi Koahs, kapkap apel kaijihjol. <sup>38</sup> Nehn anjoauwohr ih pel lella wijahu, ih kapingkalahngan oang Koahs apel siko doahroar jeriho oang irai ohroj ma joujowihdo koamoaur oang Jerusalem.

### **Irai Pwurlahng Nazareth**

<sup>39</sup> Nehn irai ne kapwaihahda me ohroj ma ne kileldi nehn kojonnend in Koahunno, irai ken japhallahng Galilee, nehn kahnihmw Nazareth. <sup>40</sup> Jeriho koalkoalikla apel sihsihkeila; Ih pel koahiokla apel kalahngan in Koahs kin mine pohn Ih.

#### *Jesus Nehn Umw Joarwiho*

<sup>41</sup> Nehn pahr ohroj jemen Jesus apel inahu kin indahla Jerusalem pwa ira en pwili Joarwihn Passover. <sup>42</sup> Nehn en Jesus ne mahki johnpar eijek riau, irai pel indahla pwa irai en pel pwili joarwiho in doahroar irai kin pwen wia. <sup>43</sup> Nehn Joarwihn Passover-o ne doarihdi, irai japhallahng nehn uhdahn irai wija, a Jesus minminehr Jerusalem. Jamahu apel inahu johpwa kidal; <sup>44</sup> Ira lemleme pwa Ih ne pwilihla pokonno inla mwohn ira. Mwerin ira ne allaluhki rehn oau pwon, ira sapda rapahki nihra jeriho ipen ara peneinei apel koampoakpara kan. <sup>45</sup> Nehn ira joah kapangda, ira pwurlahng Jerusalem apel raprapahkihjili Ih. <sup>46</sup> Nehn kajiluh in rehn ira kapangda Ih nehn Umw Joarwiho, mine nehn pwungen jounpadahk en kojonneddok rongrongrong apel peipeidek oang irai. <sup>47</sup> A ohroj ma pwili rongrongrong inenin pwuriamweikihla loalkoang ma pwokda nehn Ah japoang peidek kan. <sup>48</sup> Nehn en jamahu apel inahu kapangda Ih, ira inenin pwuriamweikihla. Inahu pwehnglahng Ih, “Noai jeri, amwda koawoa ke wiahkihoang kama joang oauwe? Ngoahi apel joamoammwo inenin sihwokihla ama raprapahkihjili koawoa.”

<sup>49</sup> Ih japoangkihla ira, “Amwda kamwa ke raprapahkihjili Ngoahi? Kamwa johpwa kidal pwa Ngoahi uhdahn pirin kin minmine nehn Umwen Joamoaiho?” <sup>50</sup> Ira johpwa woahwoahki sikesik pase.

<sup>51</sup> Jesus ken pwili ira allaluhlahng Nazareth, wijahu Ih kin peikkoang ira. Inahu kin samsaman mehpiwak ohroj apel joh kin moalkoahla. <sup>52</sup> Jesus koalkoalikla apel loalloalkoangla, Ih pel kajampwalla ipen Koahs apel ipen armaj.

## **3**

#### *En John jounpoapdaij Kapahrak*

<sup>1</sup> Kaeijek limoau in johnpar in mwein Caesar Tiberius, Pontius Pilate koapinahn Judea, a Herod koaun in Galilee, riau Philip ma koaunda in Iturea apel Trachonitis; Lysanias koaunda in Abilene, <sup>2</sup> a Annas apel Caiaphas ioar Jamwrou Laplap; ioar anjoauwa mahjan in Koahs indoahng ipen John nihn Zechariah, ma minmine nehn japwsoahn. <sup>3</sup> John kin allalu wija ohroj ma koaroonoang pohn Pillap Jordan, kapkapahrakkihoang armajjok, “Kamwai koaluhla, wiliakapwla apel poapdaijla, a Koahs pirin mahkoahng dipamwai kan.” <sup>4</sup> Doahroar ah ne insingdi nehn pukin joukohp Isaiah:

“Mine ngilloau ma kin poangpoangpoang nehn japwsoahn:

‘Kamwai koaunopda alin Koahunno,

kamwai kainenehla Ah al kan ma Ih pirin alu loaloa!

<sup>5</sup> Wahu ohroj uhdahn pirin audohda,

dol apel dokdok ohroj pirin kapasasihekla.

Al piroak ohroj uhdahn pirin kainenehkla,  
wija japaharak ohroj pirin kapahrakla.

<sup>6</sup> Armaj ohroj pirin widahli koamoaur jang ipen Koahs!' "

<sup>7</sup> A ih pwehng irai armaj ngoadoar ma indoa ipoa pwa irai en poapdaijla. Ih pwa, "Kamwai doahroar sinek kan! Inje pwehng kamwai pwa kamwai kak pisjang koaloklok in Koahs ma nimenoar lel kamwai? <sup>8</sup> Kamwai wiahda siahk kan ma pirin kajalehda amwai ne koaluhla apel wiliakapwla. Kamwai joah siksikoa pwa, 'Kamai jamanki Abraham,' pwa ngoahi pwehng kamwai pwa Koahs kakkoar wiahjang in sakai pwiak nihn Abraham jeri! <sup>9</sup> Jiloahu ne onopdahng poaloahdi sipin suhkoa ohroj ma johkin kihda wah mwehu, en poalpoaldi peidekla nehn oaiho."

<sup>10</sup> Armajjok kin idoak ipen John, "A doar da kamai pirin wia?"

<sup>11</sup> Ih japoangkihla irai, "Inje ma anki joakid riau, en kioang inje ma joh ah, a inje ma mine kanah mwinge a en pel kioang ih ma joh kanah mwinge."

<sup>12</sup> Jounrik daksis pwi pel pwili indoa pwa irai en pwili poapdaijla ipen John; irai idoak ipoa, "Jounpadahk, a kamai, da kamai en pel wia?"

<sup>13</sup> A ih japoangki irai, "Kamwai joah rikpene uhwen mwani oau ma koalikjang da ma ne kileldi."

<sup>14</sup> Jounpei pwi pel idoak, "A kamai, da kamai pirin wia?"

A ih pwa, "Kamwai joah jerkihjang nihn armaj mwani ke karaun mwahli emen armaj; a kamwai en isarki dupkoamwai kan."

<sup>15</sup> Armaj kan lemehkihoang pwa John ioar Messiah, lamlam pase ken koalkoalikla nehn kapehdirai kan. <sup>16</sup> A John pwehng ihr ohroj, "Ngoahi kin poapdaijihki kamwai pil; a mine emen ma uhdahn laplap jang ngoahi ma pirin indoa mwerin ngoahi, joal in ah juhwo ngoahi johpwa warroang lapwadda. Ih ioar pirin poapdaijihki kamwai Ngen Joarwi apel oai. <sup>17</sup> Ih kol nah poahkko, onopdahng pwa en kasohrohrihpijoang liporrohn wihd kan jang in kilinnok. Ih pirin nekidla wah kan nehn johkoku, a okojla kilinnok nehn oaiho ma johkak kunla."

<sup>18</sup> Joangoan iroa ngoadoar John kin pangpanginki armaj kan nehn ah kin kapkapahrakkihoang irai Rongmwehu pwa irai en wiliakapwla. <sup>19</sup> Ih pel kapaharak oang Koapina Herod, koapwung oang ah japwung nehn ah painkihla Herodias ma uhdahn pahien riah Philip, apel joang dir ma nauna ih wiahda. <sup>20</sup> Herod pel wiahda joangoan nauna koalik oau nehn ah joalihdi John, peiddoang nehn kalpwuhj.

### *Jesus Poapdaijla Ipen John*

<sup>21</sup> Mwerin en armaj kan ne poapdaijla, Jesus pel pwili poapdaijla a nehn Ah wia kapkap nehnloange rispjoang. <sup>22</sup> Ngen Joarwi indihdoang pohn Ih in mwomwen mwurei men; a ngilloau indihdo jang nehnloange, ma pwahla, "Koawoa ma ioar Noai jermwein kajampwalwa ma Ngoahi kin perenkihda."

### *Iroakdihn Dihkan en Jesus*

<sup>23</sup> Jesus dapwa johnpar jilihjek nehn Ah sapkihda Ah doadoahk: armaj kan kin pwahki pwa Ih nihn Joseph, a Joseph nihn Heli, <sup>24</sup> Heli nihn Matthat, Matthat nihn Levi, Levi nihn Melchi, Melchi nihn Jannai, Jannai nihn Joseph, <sup>25</sup> Joseph nihn Mattathias, Mattathias nihn Amos, Amos nihn Nahum, Nahum nihn Esli, Esli nihn Naggai, <sup>26</sup> Naggai nihn Maath, Maath nihn Mattathias, Mattathias nihn Semein, Semein nihn Josech, Josech nihn Joda, <sup>27</sup> Joda nihn Joanan, Joanan nihn Rhesa, Rhesa nihn Zerubbabel, Zerubbabel nihn Shealtiel, Shealtiel nihn Neri, <sup>28</sup> Neri nihn Melchi, Melchi nihn Addi, Addi nihn Cosam, Cosam nihn Elmadam, Elmadam nihn Er, <sup>29</sup> Er nihn Joshua, Joshua nihn Eliezer, Eliezer nihn Jorim, Jorim nihn Matthat, Matthat nihn Levi, <sup>30</sup> Levi nihn Simeon, Simeon nihn Judah, Judah nihn Joseph, Joseph nihn Jonam, Jonam nihn Eliakim, <sup>31</sup> Eliakim nihn Melea, Melea nihn Menna, Menna nihn

Matthata, Matthata nihn Nathan, Nathan nihn David, <sup>32</sup> David nihn Jesse, Jesse nihn Obed, Obed nihn Boaz, Boaz nihn Salmon, Salmon nihn Nahshon, <sup>33</sup> Nahshon nihn Amminadab, Amminadab, nihn Admin, Admin, nihn Arni, Arni nihn Hezron, Hezron nihn Perez, Perez nihn Judah, <sup>34</sup> Judah nihn Jacob, Jacob nihn Isaac, Isaac nihn Abraham, Abraham nihn Terah, Terah nihn Nahor, <sup>35</sup> Nahor nihn Serug, Serug nihn Reu, Reu nihn Peleg, Peleg nihn Eber, Eber nihn Shelah, <sup>36</sup> Shelah nihn Cainan, Cainan nihn Arphaxad, Arphaxad nihn Shem, Shem nihn Noah, Noah nihn Lamech, <sup>37</sup> Lamech nihn Methuselah, Methuselah nihn Enoch, Enoch nihn Jared, Jared nihn Mahalaleel, Mahalaleel nihn Kenan, <sup>38</sup> Cainan nihn Enosh, Enosh nihn Seth, Seth nihn Adam, Adam ma nihn Koahs.

## 4

### *Jesus Jongjong nehn Japwsoahn*

<sup>1</sup> Jesus pwurdo jang Jordan, dirkihla Ngen Joarwi; Ngennohr pel kahlwahla ih nehn japwsoahn, <sup>2</sup> wija ih minminehki rehn pahijek, kajongjong pehn Jehsen. Oaroain rehnnok ih joah mwinge, kahrehda rehn pahijekko doarihla ih mwakohkohda.

<sup>3</sup> Jehsenno pwehnglahng, “Ma koawoa ioar Nihn Koahs, a koawoa en pwehng sakai oauwe en wiahla pilahwa.”

<sup>4</sup> A Jesus japoang, “**Ne insingdi nehn Puk Joarwi pwa ‘Jaudi pilahwahr doari ma armaj kak mourki.’ ”**

<sup>5</sup> Jehsenno pel uklahng Ih wija illoa oau apel kajalehioang wein jampah ohroj nehn marip oau, <sup>6</sup> apel pwehng Ih, “Ngoahi pirin kioang koawoa joangoan manman ohroj apel lingin wei pwiai ohroj. Pwa ohroj ne liklikoang ngoahi a ngoahi kak kioang inje ma ngoahi kak kioang. <sup>7</sup> Ohroj mehpwai pirin oamw ma koawoa poardi pwongi ngoahi.”

<sup>8</sup> Jesus japoang, “**Ne insingdi nehn Puk Joarwi pwa, ‘Pwongi Koaunno oamw Koahs, papah ih kalahpwuk.’ ”**

<sup>9</sup> Jehsenno pel uklahng ih Jerusalem kihdahng ih pohn wija ma keiou illoa pohn koadkoan Umw Joarwiho, pwehng ih, “Ma koawoa ioar Nihn Koahs wa, a koawoa en lujdihwe jang me. <sup>10</sup> Pwa ne insingdi nehn Puk Joarwi: ‘Koahs pirin ruwoj nah sohnloangok, irai en apwali mwehuwi koawoa, <sup>11</sup> apel kolkihda koawoa poahrai pwa ehmmwen kan en joah ohla pohn sakai.’ ”

<sup>12</sup> Jesus pel japoang, “**Ne pel insingdi ‘Koawoa en joah kajongjongi Koaunno, oamw Koahs.’ ”**

<sup>13</sup> Jehsenno koarjoahla ah kajongjong ohroj oang Jesus, ih injang Ih anjoau kij oaroh pel lel oaroain anjoau kij.

### *Jesus Sapkihda Ah Doadoahk nehn Galilee*

<sup>14</sup> Jesus japahldohng Galilee manman in Ngen Joarwi mine ipoa. Rongin Ih lohkjili nehn wija ohroj. <sup>15</sup> Ih kin padahk nehn arai jinakoke kan, armaj ohroj kin kapkapnga.

### *Mihn Nazareth kan lioassoangda Jesus*

<sup>16</sup> Jesus inla Nazareth, wijahu ma Ih sikda, Ih inla nehn jinakoke oau rehnin Sabbath doahroar Ah siahk. Ih uhda pwa Ih en wadek Puk Joarwi. <sup>17</sup> Pukin joukohp Isaiah ma irai kioang. Ih wilikpijoang pukko wadekda wijahu ma siksikoa,

<sup>18</sup> “**Ngenin KOAUNNO audohda Ngoahi**

**Ih ne kajarwihla Ngoahi**

**pwa Ngoahi en lohkihoang armaj joamwoahmwoa kan rongmwehu.**

**Ngoahi en lohkihoang armaj joaldi kan ahr jaldek**

**apel jaldek oang arai kan ma minmine nehn kalpwuhj**

**apel kapoahdpijoang mijen ihr majkun kan,**

apel kajaledekla iraihok ma mine nehn apwal,

<sup>19</sup> apel kalohkihda pwa anjoauwo ne leldo, ma Koaunno pirin koamoaurla nah armaj kan.”

<sup>20</sup> Jesus wilikpene pukko kioang papah men. Ih mwindihoang nehn dohياهو. Armaj ohroj nehn jinakokehu ken kakili ih. <sup>21</sup> Ih sapda pwehng irai, “Rehn oauwe iren Puk Joarwi ne pwoaida doahroar amwai ne rong ah wadwadda.”

<sup>22</sup> Ihr ohroj kadehde apel pwuriamweikihla lal mwehu kan ma Ih pwa, “Jaudi ih nihn Joseph jermwein wa?”

<sup>23</sup> Ih pwehng irai, “Uhdahn kamwai pirin pwehng ngoahi loopin lal oauwe: ‘Doahksa pein kemwehuwihla koawoa.’ Apel kamwai pirin pel pwa, ‘Joang kapwuriamwei ohroj ma kemi ne rong pwa koawoa ne wiahda nehn Capernaum, a koawoa en pel wiahda nehn uhdahn oamw wija.’ ” <sup>24</sup> Ih pel pwa, “Ngoahi pwehng kamwai in mehlel, pwa johpwa joukohp men kin kenken nehn ah wija ipen kijeh kan. <sup>25</sup> Mehlel pwa mine liohdi dir Israel nehn mwein Elijah, anjoauwo ma johla wud oaroain johnpar jiluh oaloap apel lehk koalik lel oang jappwo pwon. <sup>26</sup> A johpwa emen irai ma Elijah inla ipoa, a oang oar liohdi men ma minmine Zarephath nehn Sidon. <sup>27</sup> Pel nehn mwein joukohp Elisha dirin armaj lepa mine nehn Israel; a johpwa emen in irai mwakelkella, ioarroar Naaman mihn Syria.”

<sup>28</sup> Armaj ohroj nehn jinakokehu inenin lioas nehn ahr rongda lal pwiai. <sup>29</sup> Irai uhdahr warahkihla Jesus jang nehn kahnihmmwo wahdahlahng Ih pohn dollo ma ahr kahnihmmwo kokouda puwoa pwa irai en jinoakla Ih. <sup>30</sup> A Jesus alu nehn pwungarai inla jang irai.

### *Waal men ma Ngen Jaus Dilingla*

<sup>31</sup> Jesus allaluhlahng Capernaum, kahnihmw in Galilee oau; Ih ken padahk oang armajjok rehnin Sabbath. <sup>32</sup> Armaj ohroj ken pwuriamweikihla mwomwen Ah padahk, pwa Ah lal kan kin manman. <sup>33</sup> Mine waal men ma pwili mine nehn jinakokehu, ma ngen jaus dilingla ih. Ih rahrahu koalik pwahla, <sup>34</sup> “Ah! Jesus mihn Nazareth, da koawoa nimen wiahng kamai? Koawoa indoahng koauwehla kamai! Ngoahi kidal pwa inje koawoa; Koawoa ioar Nihn Koahs jounpakair joarwihwa!”

<sup>35</sup> Jesus ruwoj ngen jausso, “Nennenla, diljang nehn armaj menen!” Ngen jausso peiddi woallo mijarai ohroj, diljang nehn ih, apel johla wiahng woallo me nauna.

<sup>36</sup> Ihr ohroj ken pwuriamweikihla pwahpene nehn pwungarai, “Dahkij mine nehn en waal mene ah lal kan? Pwa Ah lal sihkei apel manman oang ngen jaus kan, a irai kin peikkoang!” <sup>37</sup> Rongin Jesus ken lohkla wija ohroj nehn jappwo.

### *Jesus Kemwehuwihla Armaj Dihrdir*

<sup>38</sup> Jesus injang nehn jinakokehu allaluhlahng in umwen Simon. Inen pahien Simon-o onohnki nehn ummwo ki johmwwehu karkar koalik. Irai pwehng Jesus en jeuweje liho. <sup>39</sup> Jesus ken sohla ipoa apel ruwoj karkarro. Karkarro injang ipen liho, ih ken pwohrda apwali arai.

<sup>40</sup> Injoausikdi, armaj ohroj ma mine nihrai armaj johmwwehu joah lipilpil wijikdohng ipoa; Ih kihdihoang poah kan pohrai ohroj kemwehuwihla irai. <sup>41</sup> Ngen jaus kan pel kin injang ipen armaj dir ma kin rahrahu pwahpwahpwa, “Koawoa ma Nihn Koahs!”

Jesus lipwoarehda irai apel johpwa nimen mweidoahng irai en lallallal, pwa irai kidal pwa ioar Ih ma Messiah.

### *Jesus Kapahrakki Rongmwwehu nehn Judea*

<sup>42</sup> In ah rehnpijoang Jesus injang nehn kahnihmmwo inla kalahpwukla wijahkij. Armajjok sapda raprapahkihjili; nehn ahr kapangda Ih, ihr engdehnikhoang Ih en joah injang iparai. <sup>43</sup> Ih pwehng irai, “Ngoahi uhdahn pirin pel kapahrakki



rongmwehuin in Wein Koahs oang kahnihmw kan, pwa ioar mehwa ma Koahs kadarkihdo Ngoahi.”

<sup>44</sup> Ih ken kapkapahrakjili nehn jinako ke kan nehn Judea.

## 5

### *Jesus sapin pangin Nah Sohnpadahkkok*

<sup>1</sup> Oau rehn Jesus minmine in oaroahr in Lehn Gennesaret, a armaj dir pokondohng Ipoa pwa irai en pwili rong mahjan in Koahs. <sup>2</sup> Ih kapangda pohs rahpas ma nihdekda poahrinjeddo; a sohnloakjid pwi ne kerdihang puwoa pwa irai en inla duhpla nihrai nehk kan. <sup>3</sup> Jesus doaudahng pohn apas pohssok, woaroan Simon, pwehng ih en ekij woaroahjang in oaroahrro. Jesus ken mwindihoang pohn pohsso padahk oang pokonno.

<sup>4</sup> Nehn Ah kadoarihla Ah padahk, a Ih pwehng Simon, “Simon, kasohdihwe ekij pohssen nehn wija loalen, pwa kamwai en kak karpajoang nihmwai nehk kan.”

<sup>5</sup> Simon japoang, “Maing, kamai ne loakjid oaroh rehnpijoang a pwen joh koanoahmai. A ma koawoa ma pwa, ngoahi pirin kadardi nihmai nehk kai.”

<sup>6</sup> Irai kadardi nihrai nehkkok; irai koldi dirin mwumw, nimwennoar soahrdis nihrai nehkkok. <sup>7</sup> Irai ken jeioahlihdo ioangoaraiok ma kijouki apas pohs, pwa irai en jeido jeuweje irai, irai ken jeido. Irai ken audohkihda mwummwok pohs rahpasso oaroh dir nimwennoar mwoidi. <sup>8</sup> Nehn en Simon Peter kapang dahkij ma ne wihwiawi, ih poadpwomwla mwohn Jesus, pwehng Ih, “Alwehjang ipoai Maing! Pwa armaj dipan men ngoahi!”

<sup>9</sup> Ih apel pwilihoahk ohroj inenin pwuriamweikihla dirin koanoarai in loakjid oauwe ma irai ne koldi. <sup>10</sup> Apel doahroar ioange kan; James apel John, nihn Zebedee-ok. Jesus pwehnglahng Simon, “Simon koawoa en joah majpwehk, pwa jang apkas inla koawoa pirin loakjidi armaj.”

<sup>11</sup> Irai ken nihdda wararai pohssok nehn japw, kihdi arai me ohroj ken pwilihla Jesus.

### *Jesus Kemwehuwihla Woal Lepahmen*

<sup>12</sup> Pehn oau Jesus minmine nehn kahnihmw oau ma woal men johmwehuki lepa mine. Nehn en woallo kapangda Jesus, ih rukdioaroh lel pwirej mwohn ih poaki, “Maing, ma koawoa nimen, a koawoa kak kamwkehda ngoahi!”

<sup>13</sup> Jesus koula poah pukkoang woallo, Ih pwa, “Ngoahi nimen. Ken mwakelkelda!” Nehn anjoauwohr lepahu johla mine ipen woallo. <sup>14</sup> Jesus ruwoj ih, “Koawoa en johpwa pwehng emen. Inla ipen jamwrouwo en kajawi koawoa; pwa en kamehlelehng armaj ohroj pwa koawoa ne mwehula, a koawoa wia meiroanngo ma Moses koajoandi.”

<sup>15</sup> Rongin Jesus ne kalohkla nehn wija dihrdir, apel armaj dir kin pokondo ipoa pwa ihr en rong Ih apel kemwehuwihla arai johmwehu kan. <sup>16</sup> A Ih kin inla kalahpwukla nehn japwsoahn kan, wija ma Ih kin kapkap.

### *Jesus Kasihkeida Woal Mwoasor men*

<sup>17</sup> Oau rehn nehn en Jesus wihwia Ah padahk, a Pharisee pwi apel jounkawoahwoa kojoneddo pwi pwili mine ipoa pidekihpene Ih; irai indoahjang nehn kahnihmw ohroj in Galilee apel Judea apel jang Jerusalem. Manman in Koaunno mine ipen Jesus pwa Ih en kemwehuwihla armaj johmwehu kan. <sup>18</sup> A, woal pwi pel leldo wah woal mwoasor men nehn rohp oau. Irai engdehn in dilkihda woal mwoasorro nehn ummwo kihdi mwohn mijen Jesus. <sup>19</sup> Nehn irai johkak dilkihda pwa jakahpaj in pokonno. Irai doaukihda pohn ummwo pwukulpijoang kadardi woal johmwehuwo

nehn pwungen armajjok mwohn Jesus. <sup>20</sup> Nehn en Jesus kapang arai pwojon, Ih pwehng woallo, **“Koampoakpoai! Dipoamw kan ne lapwda.”**

<sup>21</sup> Jounpadahk in Kojonneddok apel Pharisee-ok sapda peidek oang pein irai, “Inje woal mene ma lahlahwe Koahs? Inje ma kak lapwadda dihp? Jaudi Koahs kalahpwuk kak mahkoahng dihp?”

<sup>22</sup> Jesus ne kidal arai lamlam, ioar mehwa Ih pwehngkihoang irai, **“Amwda amwai lamlam doahrenki? <sup>23</sup> Ia mehwa moangoai in pwa, ‘Dipoamw kan ne lapwda,’ ke pwa, ‘Uhda alu?’ <sup>24</sup> A Ngoahi en kamehlele oang kamwai en kidal pwa Nihn-Armaj anki manmanin mahkoahng dihp pohn jampah.”** Ih pwehng woal mwoasorro, **“Uhda oalao kioammwen koawoa inla in umwoammwo!”**

<sup>25</sup> A nehn anjoauwohr woallo mwoasorro ken uhda mwohrai ohroj, oalao kiahu ma ih kin mine loalao, inla in umwahu kapkapnga Koahs. <sup>26</sup> Ihr ohroj ken pwuriamweikihla mehlel! Nehn ahr majpwehk, irai kin kapnga Koahs pwahpwahpwa, “Ia woahr joangoan kapwuriamwei kan ma kamwai ne kapang rehnnoauwe!”

### *Jesus Pangin Levi*

<sup>27</sup> Mwerin mehpwiai, Jesus inlahjang wijahu, Ih kapangda jounrik daksis men oadoa Levi, ma mine nehn ah oahpisso. Jesus pwehng ih, **“Pwilihla Ngoahi.”** <sup>28</sup> Levi uhdahr kihdi me ohroj ma ih anki ken pwilihla Jesus.

<sup>29</sup> Levi ken wiahda kamdipw koalik oau nehn umwahu oang Jesus; jounrik daksis dir apel armaj pwi pel pwili mwindihoang in sehpyllo. <sup>30</sup> Pharisee pwi apel irai jounpadahk in Kojonneddo pwi lipahnedkihda apel pwehng nihn Jesus sohnpadahkkok, “Amwda kamwai ke kin pwili mwinge ipen jounrik daksis apel armaj dipan kan?”

<sup>31</sup> Jesus japoang irai, **“Jaudi armaj sihkei ioar anahne doahksoa, a armaj johmwehu. <sup>32</sup> Ngoahi joah indoahng pangin armaj pwung kan en wiliakapwla, a pwen armaj dipan kan.”**

### *Peidek doahroar Kaijihjol*

<sup>33</sup> Epwi armaj pwehng Jesus, “Nihn John sohnpadahk kan kalap kaijihjol apel kapkap, apel doahroar sohnpadahk in Pharisee kan kin wia, a nihmw kan kin mwinge apel nim.”

<sup>34</sup> A Jesus japoangla irai, **“Imdoahr, kamwai lemleme pwa kamwai kak kaijihjoli sohnkapar in kamdipw in koapwoapwoaud nehn en woal kamwohddo ah minmine iparai? Kamwai johkak! <sup>35</sup> A oau anjoau ma pirin indoa ma woal kamwohddo pirin wijik jang irai; doari, ioar anjoauwo irai pirin kaijihjol.”**

<sup>36</sup> Jesus pwehng irai karajraj pase: **“Joh armaj kin soahr jang kijehn joakid kapw apel kioang in joakid dehn, pwa likkoau dehnno pirin koauwehla likkoau kappwo, a kijehn likkoau kappwo johpwa pirin pahrekkoang likkoau dehnno. <sup>37</sup> Pel doahroar, joh armaj kin widekihoang wain kapw nehn pehk in kilin mahn mering, pwa ma ih pirin wia me, wain kappwo pirin kahrehioang pehk merinngo ah pirin pwohngek pijoang apel soahroak pijoang, wain kappwo pirin widekla apel pehkko pirin ohla. <sup>38</sup> A, armaj kin widekihoang wain kapw nehn pehk kapw. <sup>39</sup> Apel joh armaj men nimen nim wain kapw mwerin ah ne nimla wain dehn. Ih pirin pwa, ‘Wain dehnno ioar mum.’ ”**

## 6

### *Peidek doahroar Sabbath*

<sup>1</sup> Rehnin Sabbath oau Jesus alu nehn mwoaswel in wihd oau. Nah sohnpadahkkok dolihdi wehn wihd pwi irij nehn poahrai, kangkangkang allaluhla. <sup>2</sup> Pharisee pwi

pwehng irai, “Da kamwai wihwiahki mehkij ma asai kojoneddo inoapwihdi en joah wiawi nehn rehnin Sabbath?”

<sup>3</sup> Jesus japoang, “Kamwai johkin wadek da ma David wiahdahu anjoau ma ih apel pwilihoahk mwakohkohla? <sup>4</sup> Doahroar ah dilda nehn Umwen Koahsso, oaloo lopwon in pilahwa joarwi pwi, kangla apel kioang pwilihoahk en pel pwili kang. A asai kojoneddo kainoapwi armaj en jehpwili kang pilahwa joarwihok pwa jamwrou kan oar doari en kang?”

<sup>5</sup> Jesus pel pwa, “Nihn-Armaj ioar ma pel Koaun in Rehnin Sabbath.”

### *Waal Mwoasorpoah Men*

<sup>6</sup> Pel rehnin Sabbath oau Jesus dildahng nehn jinakoke oau pwa Ih en padahk. A woal men pel pwili minmine wijahu ma loap kidalin poah mwoasor. <sup>7</sup> Jounpadahk in Kojoneddo apel Pharisee pwi kin nimen kapangda mehkij japwung ipen Jesus pwa irai en kadipoahki Ih. Irai kin mwajmwajahn oar ma Jesus nen joah kemwehuwihla woallo ma mwoasor poah rehnin Sabbath. <sup>8</sup> A nehn en Jesus Ah woahwoahki arai lamlam, Ih pwehnglahng woal mwoasor poahu, “Koawoa, uhda indahdo in mijoahi.” Woallo indahla uhda inenda mwohrai. <sup>9</sup> Jesus pwehnglahng jounpadahk in Kojoneddo apel Pharisee-ok, “Ngoahi nimen idoak mehkij ipamwai; dahioau asai kojoneddo mweidoahng kisai en wia rehnin Sabbath? Kisai en wia mehkij ma mwehu ke nauna? Kisai en jeuweje mourin armaj ke koauwehla?” <sup>10</sup> Ih jipwoaljili pohrai ohroj; a Ih pwehnglahng woal mwoasor poahu, “Kailwe poahmmwen.” Woallo kailla poah ken mwehula.

<sup>11</sup> Jounpadahk in Kojoneddo apel Pharisee-ok ken inenin lioasla apel sapda siksikoahpene nehn pwungarai da ma irai kak wiahng Jesus.

### *Jesus Pilda Nah Woaroak Eijek Roahmen*

<sup>12</sup> Anjoauwohr Jesus indahla pohn dol oau pwa en kapkap. Ih kapkap oang Koahs oaroh rehn. <sup>13</sup> Inminjoang in rehnno Ih panginpene Nah sohnpadahkkok apel pilda jang iparai eijek roahmenno, ma Ih kahdanki Woaroak. <sup>14</sup> Simon ma ih kahdanki Peter, apel Andrew rien Simon, pel James apel John, Philip apel Bartholomew; <sup>15</sup> Matthew apel Thomas, James nihn Alphaeus apel Simon (sohn pwihnin Zealot), <sup>16</sup> Judas nihn James, apel Judas Iscariot ma pirin pangla Jesus.

### *Jesus Kapahrak apel Kemwehuwihla min Johmwwehu kan*

<sup>17</sup> Jesus doaudihjang pohn dollo a woaroakkok pel pwili: Ih uhda wija paspas kij pwilihki Nah sohnpadahk dir. Armaj inenin dir pwili pokondo wijahu jang wija ohroj nehn Judea, jang Jerusalem, jang kahnihmw in oaroahr kan in Tyre apel Sidon. <sup>18</sup> Ihr indoahng pwili rong Ih apel Ih en kemwehuwihla ahr johmwwehuwok. Pel iraihok ma ngen jaus ne dilingla pwili mine wijahu, pwa Jesus en kemwehuwihla irai. <sup>19</sup> Armaj ohroj kin nimen pukkoang Jesus, pwa manman injang Ipoa apel kin kasihkeida ahr johmwwehu kan ohroj.

### *Pai apel Injinjuwed*

<sup>20</sup> Jesus kapkapangjili pohn Nah sohnpadahkkok, Ih pwa,  
“Meid pai kamwai ma joamwoahmwoa kan;  
pwa ioar amwai wei, Wein Koahs!

<sup>21</sup> Meid pai kamwai ma nimen mwinge da anjoau oauwe;  
pwa kamwai pirin moadla!

Meid pai kamwai ma kin joangjoangjoang anjoau oauwe;  
pwa kamwai pirin uruhr!

<sup>22</sup> “Meid pai kamwai nehn en armaj kan ahr pirin lioassoang, kajohwe, kajarohdi apel koauwehla oadoamwai kan ki Nihn-Armaj. <sup>23</sup> Kamwai perenda apel rahrahuki

amwai malau anjoauwo, pwa dupkoamwai nehnloanngge inenin koalik. Pwa ioar doahroar en jamaraihok wiahng joukohppok.

<sup>24</sup> A, meid nauna oang kamwai kan ma koapwoahpwoa anjoau oauwe; pwa kamwai ne oaloahdi mour in injenmwahu nehn jampah!

<sup>25</sup> Meid nauna oang kamwai kan ma moad anjoau oauwe; pwa kamwai pirin duhpekla!

Meid nauna oang kamwai kan ma kin uruhr anjoau oauwe; pwa kamwai pirin injinjuwed apel joang!

<sup>26</sup> “Meid nauna oang kamwai ma armaj ohroj pirin kapnga kamwai; pwa ioar doahroar ma jamaraihok wiahng joukohp likammwok.

### *Ipwilki Asai Imwinsihsi kan*

<sup>27</sup> “A, Ngoahi pirin pwehng kamwai ohroj ma rongrong Ngoahi: kamwai ipwilki amwai imwinsihsi kan; kamwai wia mwehu oang ihr kan ma kin lioassoang kamwai; <sup>28</sup> kapaida ihr ma kin kariahla kamwai; kamwai kapkapki ihr ma kin wia naunahng kamwai. <sup>29</sup> Ma emen poki oaloap joapoamwen, mweidoahng oaloap. A ma emen kihjang oamw joakid, mweidoahng en pel oaloo oamw jehs. <sup>30</sup> Kioang armaj ohroj mehkij ma irai poaki ipoamw; apel ma emen kihjang mehkij ma uhdahn oamw, johpwa pwehng ih en kajpahliho. <sup>31</sup> En doahroar ma kamwai nimen armaj en wiahng kamwai, a ioar en doahroar amwai en wiahng irai.

<sup>32</sup> “Ma kamwai pirin ipwilki iraihok oar ma ipwilki kamwai; joangoan pai da ma kamwai koapwoarpwoarki kamwai nen oaloo? Pwa armaj dipan kan pel kin ipwilki iraihok ma kin ipwilki irai. <sup>33</sup> Apel ma kamwai pirin wia me mwehu oang oar ma kin wia mwehu oang kamwai, joangoan pai da ma kamwai koapwoarpwoarki kamwai nen oaloo? Pwa armaj dipan kan kin pel wia joanngohr. <sup>34</sup> Apel ma kamwai pirin kioang mehkij oang irai kan oar ma kamwai kajik mehkij jang iparai, joangoan pai da ma kamwai joujowi kamwai nen oaloo? Pwa irai ma dipannok pel kin kioang ihr ma dipan kan pwa irai en pel oaloo dupkoa! <sup>35</sup> A joah! Kamwai en limpoak oang amwai imwinsihsi kan apel wia mwehu oang irai; kamwai kioang irai mehkij a joah kahjik kajpahlin jang iparai. Pwa dupkoamwai pirin koalik apel kamwai pirin wiahla nihn Koahs, Wija Laplap. Pwa Ih kin kalahngan oang ihr ma johkin kalahngan apel oang armaj nauna kan. <sup>36</sup> Kamwai en kin mahk doahroar Jamamwai ma kin pel mahk.

### *Doahroar Kadeik*

<sup>37</sup> “Joah kadeik irai kan pwa kamwai en joah kadeikda ipen Koahs; Kamwai joah kariahla irai kan pwa kamwai en joah oaloo amwai karia ipen Koahs; kamwai mahkoahng irai kan pwa Koahs en pel mahkoahng kamwai. <sup>38</sup> Kamwai kihwe pwa kamwai en oaloo dupkoa jang ipen Koahs; kamwai wia kijakij japan, a Ih pirin kajpahlihdohng kamwai in woahioau ma isar, ma koalikjang, ma jikjang mehlel. Pwa mihn jonngohr ma kamwai pirin jongki irai kan, ioar ma Koahs pirin pel jongki kamwai.”

<sup>39</sup> Jesus pel pwehng irai karajraj pase, “Joh armaj majkun men kak kahlwa emen majkun. Pwa ma ih pirin wia me, ira pirin kipdihoang nehn warwar. <sup>40</sup> Joh sohnpadahk men kin laplap jang ah jounpadahkko; a sohnpadahk ohroj, nehn ahr pirin koahiokla mehlel, irai pirin kin doahroarla ahr jounpadahk kan.

<sup>41</sup> “Amwda koawoa ke soahk dipoar siksik kij nehn mijen rioammwo a koawoa joah injinohki pwilein suhkoahn nehn mijoammwen? <sup>42</sup> Ia mwomwen oamw kak pwehng rioammwo, ‘Menlau jowi mijkoalkoal, ngoahi en kihjang dipoar siksik kij in nehn mijoammwen’; nehn oamw johkak pein poahmda pwilein suhkoa nehn pwoaroan mijoammwen? Mwalaun men koawoa! Kihjang mijkoalkoal pwilein suhkoa nehn

pwoaroan mijoammwen, koawoa kapwa kak kapang imdoahr oamw pirin kihjang dipoar siksik kij nehn mijen rioammwo.

### *Suhkoa Pas apel Wah kan*

<sup>43</sup> “Suhkoa mwehu pas wah joh kin nauna; pel suhkoa nauna pas wah joh kin mwehu. <sup>44</sup> Kisai kin kidalki suhkoa ohroj jang in wahrai. Joh armaj kak dolihdi wehn fig jang in wehn suhkoa soaksoak, ke dolihdi jang wain in suhkoa mwahl. <sup>45</sup> Armaj mwehu men kin kajalehda mehkan ma mwehu pwa nehn ah mohngiong dirkihla me mwehu; doahroar armaj nauna men kin kajalehda me nauna pwa nehn ah mohngiong dirkihla me nauna. Pwa oawoan armaj kin kajalehda dahkij mine nehn mohngiong.

### *Jounkou Umw Roahmen*

<sup>46</sup> “A, da kaspoan amwai pangpanginki Ngoahi ‘Oai Koaun, oai koaun,’ a kamwai joah via dahkij ma Ngoahi kin pwehng kamwai? <sup>47</sup> Ngoahi pirin kajalehioang kamwai armaj joah lipilpil men ma kin indoahng rong Oai padahk kan apel kapwaihahda. <sup>48</sup> Ih pirin doahroar armaj ma kin kouda umwah: ih kin jaripda pwirej oaroh lel paip, ih kin poajoanihdi umwahu pohn paippo. A nehn en lapake kin koardo lel ummwo, ih johkak kamwoakidda, pwa ih kokouda pohn paip. <sup>49</sup> A, ih ma kin rong Oai padahk kan, a johkin kapwaihahda, ih doahroar armaj ma kin kouda umwah pohn pwirej apel joh poahjoan in. Nehn anjoauwo ma lapake kin koardo lel ummwo ih kin kipdi apel mwoarpijoang. Ia pirin woahr ohla oauwe!”

## 7

### *Jesus Kemwehuwihla en Koaunin Jounpei in Rome men nah Lidu*

<sup>1</sup> Nehn en Jesus kadoarihla Ah padahk oang pokonno, Ih inla Capernaum. <sup>2</sup> Koaunin jounpei in Rome men mine wijahu ah lidu men ma johmwehu koalik enken oar mehdi. Lidu mene inenin kajampwal ipen koaunin jounpeiho. <sup>3</sup> A nehn en koaunin jounpeiho rongda doahr Jesus, ih kadarla laplap in Jew pwi pwa en poaki Jesus en indoa kemwehuwihla nah liduhwo. <sup>4</sup> Mihn Jew-ok inla ipen Jesus poaki in ngidngid en inla, pwa, “Woal mene koanoahng oaloo kalahngan, <sup>5</sup> pwa ih kin ipwilki sohn asai wei, apel pein koudahng kisai oau jinakoke.”

<sup>6</sup> Doari, Jesus ken pwilihla irai. A nehn Ah ne koaroanlahng ummwo, koaunin jounpeiho kadarla koampoakpah pwi pwa irai en pwehng Jesus, “Maing, koawoa en joah koakoahkihla oamw indoa pwa ngoahi johpwa warroang kadilihda koawoa nehn umwoaie; <sup>7</sup> ngoahi pel johpwa warroang alwe ipoamw. Koawoa en pwen lal oar, a noai liduhwo ken sihkeida. <sup>8</sup> Pwa ngoahi armaj men ma ne mine pehn koaun pwi, ngoahi pel koaunda jounpei pwi. Nehn oai kin pwehng emen irai, ‘Alwe,’ a ih kin inla; oang emen, ‘Indoa,’ a ih kin indoa; a oang oai lidu, ‘Wiahda me,’ a ih kin wiahda.”

<sup>9</sup> Nehn en Jesus rongda mehpiwak, Ih ken pwuriamweikihla, jipwoallahng pokonno ma pwilpwilihwe Ih, Ih pwehnglahng irai, “**Ngoahi kahjik kidalda uhwen koalik in pwojon oauwe, pel joh nehn Israel.**”

<sup>10</sup> Iraitok ma ne koadoaddoarla japahldo in ummwo, kidalda pwa liduhwo ne sihkeida.

### *Jesus Kamourihda Nihn Liohdi men Jermweinno*

<sup>11</sup> Mwerin anjoau kij, Jesus inlahng kahnihmw oau ma adanki Nain; Nah sohnpadahkkok apel pokon koalik oau pel pwili Ih. <sup>12</sup> Nehn Ah koaroanlahng wanihmw in kel in kahnihmmwo, a kapar in mehdi oau allaluhdo jang loaloo. Armaj mehdiho, nihn liohdi men nah jeri iehroj, ma ihr wahwahla likin, armaj dir pwi ma pwili liohdiho. <sup>13</sup> Nehn en Koaunno kapangda liohdiho, Ih ipwilkihda pwehng, “**Li,**



joah joang.” <sup>14</sup> Ih ken sohlahng ipen jepjeppo kihdahng poah puwoa, a iraihok ma wa jepjeppo ken uhdi. Jesus pwa, “Mwahnkapw! Pwohrda!” <sup>15</sup> Nehn anjoauwohr armaj mehdiho pwohrda sapda lallal. Jesus kapwurihlahng inahu.

<sup>16</sup> Irai ohroj inenin majpwehkda, irai kapkapnga Koahs pwahpwahpwa, “Joukohp laplap men ne pwokda nehn pwungasai,” irai pwa “Koahs ne indoa pwa en koamoaurla Nah armaj ohroj!”

<sup>17</sup> Rong in en Jesus manman oauwe lohkjili nehn wija ohroj nehn Judea apel nehn jappwok ma pidekihpene.

### *Jounwijik Pakair pwi Jang ipen John jounpoapdaij*

<sup>18</sup> Nihn John sohnpadahkkok kajalehioang ih doahroar mehpwiai ohroj. John ken pangindo nah sohnpadahk roahmen <sup>19</sup> kadarlahng ipen Koaunno pwa ira en idoak, “Ioar koawoa ma John pwa pirin indoa, ke kamai en joujowi oar emen sohrohr?”

<sup>20</sup> Nehn ara lel ipen Jesus, ira pwehng Ih, “Maing, John jounpoapdaij ma kadardo kama en kalelpoak ipoamw ma ioar koawoa ma pirin indoa, ke kamai en joujowihoar emen sohrohr?”

<sup>21</sup> Nehn anjoauwohr Jesus pel kemwehuwihla armaj dihrdir jang ahr johmwehu kan, jasihkei kan, ngen jaus kan, apel kapoahdpijoang mijen armaj majkun dir.

<sup>22</sup> Ih japoang, “Kamwa pwurwe pwehng John da ma kamwa ne kapang apel rong; doahroar en majkun kan ahr ne kak kapangda wija, doahroar ihr ma johkak alu ne kak alu, ihr lepa kan ne mwakelkelda, doahroar ihr ma pongpong ne rongda wija, ihr ma mehdi kan ne mourda, apel doahroar Rongmwehu kin kalohk oang ihr ma joamwoahmwoa kan. <sup>23</sup> Meid pai armaj men ma johkin jakoapwoarpwoarki Ngoahi!”

<sup>24</sup> Mwerin nihn John jounwijik pakairrok ne inla, Jesus sapda kadehde oang pokonno doahroar John, Ih pwa, “Nehn amwai inlahng ipen John nehn japwsoahnno, dahkij kamwai nimen kapang? Alek pas ma kin jahjahjakhkihjili eng? <sup>25</sup> Da kamwai inlahng kapang? Armaj men ma mine nehn likkoau mwehu? Joangoan armaj ma kin mine nehn likkoau mwehu kan apel anki dir in koapwoa kin diarek nehn Umwen Nahmwarki kan. <sup>26</sup> A, dahkij kamwai nimen kapang? Joukohp men? Eh mehlel, kamwai en kapang pwa ih laplap jang joukohp men. <sup>27</sup> Pwa ioar John ma ne insingdi doahroar ih nehn Puk Joarwi, ‘Koahs pwa, Ngoahi pirin kadarwe Noai jounpakairo mwohn Koawoa, ma pirin koaunopda allo mwohn Koawoa.’ ”

<sup>28</sup> Jesus pwa, “Ngoahi en pwehng kamwai, John laplap jang ohroj ma mour, a nehn Wein Koahs armajwa keiou siksik laplap jang John.”

<sup>29</sup> Armaj ohroj apel jounrik daksissok ne rong Jesus, ioar irai ma peikkoang Koahs apel oaloa poapdaij ipen John. <sup>30</sup> A Pharisee-ok apel jounpadahk in Kojonneddok ioar irai ma kajohwe Koahs nehn arai johpwa nimen poapdaijla ipen John.

<sup>31</sup> “A dahkij Ngoahi pirin karjahkihoang armaj in anjoau oauwe? Dahkij irai en doahroar? <sup>32</sup> Irai doahroar jerihkan ma kin ummwummwoais wijahn noasnoas kan. Oau pwihn kin rahrahu pwehpwehpwehnglahng oau pwihn, ‘Kamai koajkoajoang in malau oang kamwai, a kamwai johpwa nimen kahlek; kamai koaulki koaul in injinjuwed in mehdi oang kamwai, a kamwai johpwa nimen joang!’ <sup>33</sup> Pwa nehn en John jounpoapdaij ah indoa ih kin wia kaijihjol apel johpwa nim wain, a kamwai kin pwa, ‘Ngen jaus dilingla ih.’ <sup>34</sup> A Nihn-Armaj ne indoa mwinge apel nim wain, a kamwai pel pwa, ‘Kapang woal mene! Oawoan mwinge apel mumki wain, pirienki jounrik daksis apel armaj jekenken kan!’ <sup>35</sup> A, en Koahs erpis kin janjalkihda Nah kan ohroj ma oaloahda.”

### *Jesus nehn Umwen Pharisee men, oadoa Simon*

<sup>36</sup> Pharisee men pangin Jesus en pwili ih mwinge in umwahu. Jesus inla in umwahu mwindi orang mwinge. <sup>37</sup> A lihmen mine nehn kahnihmwo ma anki mour in dihp. Ih rongda pwa Jesus pwili mwingmwinge nehn umwen Pharisee-o, ioar ih wahkihdo rumehn le karahdin oau. <sup>38</sup> Ih mwindi likinjarkin Jesus ipen pwoalkoa, ih ken joang, pilen mijoa dundundihoang pohn pwoalkoan Jesus, ih limwihki pisen moange, kiski pwoalkoa kan apel salipki lehu pwoalkoan Jesus-ok. <sup>39</sup> Pharisee-o ma lukehdo Jesus, nehn ah widahli me, ih pein pwahla nehn kapehdin, "Ma uhdahn joukohp men woal mene, Ih pirin kidal inje lihmene ma pukpukkoang Ih; Ih pirin kidal joangoan mour in dihp ma ih kin wihwia!"

<sup>40</sup> Jesus pwehng ih, "Simon, mine mehkij ma Ngoahi nimen pwehng koawoa."

Simon japoang, "Maing, Jounpadahk, pwehng ngoahi."

<sup>41</sup> Jesus pwa, "Armaj roahmen mine ma pwaipwaniddoang woal men. Emen in ira pwaipwanidki mwani silper limepwki, a emen mwani silper limejiek. <sup>42</sup> Joh ara mihn koapwungla ara pwaipwaniddok, ioar mehwa woallo mahkoahngki ira. Doari, menlau japoang Ngoahi, inje in ira ma ah limpoak koalik orang woallo?"

<sup>43</sup> Simon japoangkihla Jesus, "Ngoahi lemleme pwa armaj ma oaloe mahk koalik ipen woallo."

A Jesus pwa, "Oamw pajpoangen pwung." <sup>44</sup> Ih jipwoallahng liho, ih pwehnglahng Simon, "Koawoa en kapang da lihmene wia? Nehn Oai indoa in umwoammwe, koawoa johpwa kioang Ngoahi pil mihn Ngoahi en duhpki pwoalkoaoia kai, ah ih duhpkihla pwoalkoaoia kai pilen mijoa apel dahlimwihkihda pisen moange. <sup>45</sup> Koawoa joah misik Ngoahi in doahroar asai rahnmwahu in popohl, a ih johpwa uhdihjang ah mismisik pwoalkoaoia kai jang nehn Oai dildahdo. <sup>46</sup> Koawoa johpwa salip Ngoahi, ah ih salipkihla pwoalkoaoia kai le karahdin. <sup>47</sup> Doari, Ngoahi pwehng koawoa en kidal pwa ih ne oaloe mahk in dipoa kan ma inenin dir, pwa jang ah limpoak koalik. Pwa ma ih ma pirin oaloe mahk siksik in dipoa kan, ah limpoak kin siksik."

<sup>48</sup> Jesus pwehnglahng liho, "Dipoamw kan ne lapwda."

<sup>49</sup> A iraihok ma pwili mine in sehpi in mwingehu sapkihda pwahpene nehn pwungarai, "Inje woalmene ma pel kin lapwadda dihp kan?"

<sup>50</sup> Jesus pwehnglahng liho, "Oamw pwojon ma koamoaurla koawoa, alwe nehn popohl."

## 8

### *Lihpwi Ma kin Pwilpwili Jesus*

<sup>1</sup> Mwerin anjoau oau Jesus allaluhjili nehn kahnihmw apel nehn koujapw kan, kapkapahrakki Rongmwehu in Wein Koahs. Irai eijek roahmenno pwilpwilihjili Ih, <sup>2</sup> apel lihpwili ma Ih kemwehuwihla jang ahr johmwehuwok apel ngen jaus kan: ma ioar Mary mihn Magdala ma Ih kaujjang ngen jaus ijimen ipoa; <sup>3</sup> Joanna, pahien Chuza, koaunin jounpei en Herod, Susanna, apel li ngoadoar pwi ma kin pwili appwapwali Jesus apel en Nah sohnpadahk kan arai dipwjoauwok.

### *Karajraj in Jounkamwoaroe*

<sup>4</sup> Armaj kan pokpokondohr ipen Jesus jang nehn kahnihmw ohroj; apel nehn ahr lel pene ipoa, Ih pwehng irai karajraj oauwe:

<sup>5</sup> "Armaj men mine ma inlahng kamwroa ah liporrohk. Doari, nehn ah kamwkamwroa ah liporrohk, epwi mwoardi orang nehn al in nehn mwoaswello, armaj kan siakpijoang, mahnsanngok sangdo kangjang. <sup>6</sup> Epwi mwoardi orang wija sakaikai, irai koapda apel mengla; pwa joh pil in kamwolouwi nehn pwirejjo. <sup>7</sup> Epwi liporrohk kipdi nehn pwungen suhkoa soaksoak. A suhkoa soaksoakkok koapda

kajasihkeihla irai. <sup>8</sup> A epwi liporrohk mwoardi oang nehn pwirej mwehu, koapda mwehu ken uhwahda, apas kihda wa epwiki.”

Jesus kadoarihkihla karajraj pase, Ih pwa, “Armaj men ma mine sioa, en rong!”

### *Kahrpoan Karajraj kan*

<sup>9</sup> A sohnpadahk kan kalelpoak ipoa, “Maing, ia woahwoahn karajraj pase?” <sup>10</sup> Ih japoangla irai, “Kamwai oar doari mweimwei en dehdehkihla manman rir kan doahroar Wein Koahs; a iraihok likin kamwai joah; pwa irai pirin kidal jang in karajraj, pwa irai en kin widahli a pwen joah kapang, irai en rong, apwen joah woahwoahki.

### *Jesus Kawoahwoahda Karajraj in Jounkamwoaroa*

<sup>11</sup> “Ioar woahwoahn karajraj pase: liporrohk woahwoahki mahjan in Koahs. <sup>12</sup> Liporro kan ma mwoardi pohn al kan woahwoahki irai kan ma kin rong a Jehsen kin indoa apel kihjang lallo nehn arai mohngiong pwa irai en joah pwojon apel mourkihla. <sup>13</sup> Liporro ma kin mwoardi oang nehn wija sakai woahwoahki irai kan ma kin rong oaloahda apel perenkihda. A ih johpwa kin lel nehn kapehdirai kan, pwa irai kin pwojon anjoau kij oar; apel nehn anjoau in jongjong irai kin pispis kip-wehjang. <sup>14</sup> Liporrohk ma mwoardi oang nehn pwungen suhkoa soaksoakkok doahroar iraihok ma rong lallo, a pwunod in koapwoa kan apel peren in jampah oauwe kin jakahpajihla apel kin pinahla jang lallo nehn kapehdirai kan. <sup>15</sup> A liporro kan ma mwoardi oang nehn pwirej mwehu, woahwoahki irai kan ma kin rong, irai kasoangehdi oang nehn kapehdirai in peik apel mwakelkel in kanangma oaroh kin uhwahda mwehu iparai.

### *Lahm Pehn Pahn*

<sup>16</sup> “Joh armaj kin akanda lahm oau, kioang pehn pahn oau ke kioang pehn pehd. A ih kin kihdihoang nehn dohiahu pwa armaj kan en kak kapangki wija nehn ahr pirin dilda nehn umw.

<sup>17</sup> “Me joaloang ohroj uhdahn pirin janjalda, apel me oakkoak ohroj pirin diarekda apel kalohkjili.

<sup>18</sup> “Kamwai en kanaihoahng doahroar amwai kin rong, pwa armaj ma anki mehkij kakoalikihekin pirin aluhwoang, a emen ma johpwa anki mehkij, ih pirin luhj jang mehkijjo ma ih lemleme pwa ah.”

### *Inen Jesus apel Riah kan*

<sup>19</sup> Inen Jesus-o apel riahk indoa pwa irai en suhwoang, a irai joh kak sohla ipoa pwa jakahpaj in pokonno. <sup>20</sup> Armaj men pakair kioang Jesus pwa, “Inoammwo apel rioammwok minmine likinno pwa irai nimen suhwoang koawoa.”

<sup>21</sup> A Jesus pwehnglahng ihr ohroj, “Ioar inoai apel rioai kan, ma kin rong mahjan in Koahs apel kin kapwaihahda.”

### *Jesus Kamolunihdi Melmel oau*

<sup>22</sup> Oau rehn Jesus apel Nah sohnpadahkkok doaudahng pohn pohs pas, a Ih pwehng irai, “Kisai jeiwe dauluhllahng loappoauwo pillo.” Irai ken doauda apel kijoula. <sup>23</sup> Nehn irai kijkijoula nehn pillo Jesus moairla, a eng koalikla kamwoakidihda pillo, pohsso dirkihla pil, ekij oar ken mweidi. <sup>24</sup> Sohnpadahkkok ken pokon pene ipen Jesus pwa irai en kapwohrihda Ih, irai pwa, “Maing Jounpadahk, kisai en ken mweidi!”

Jesus pwohrda lipwoarehda enngok apel nohk, doar nehn anjoauwohr enngok pispis oar uhdi, apel pillo molundi mehleh. <sup>25</sup> Ih pwehnglahng irai, “**Ia amwai pwojon en?**”

A irai ken pwuriamweikihla apel majpwehkda, pwahpene nehn pwungarai, “Inje woal mene? Ma pwen lallal oar eng apel no kan, peikkoang Ih!”

*Jesus Kemwehuwihla Woal men ma Ngen Jaus pwi Dilingla Ih*

<sup>26</sup> Jesus apel Nah sohnpadahkkok lella wein Gerasa loappo janjallahng Galilee. <sup>27</sup> Nehn en Jesus doaudi jang pohn pohsso woal men jang nehn kahnihmmwo suhwoang Ih, ma ne woaroaila en ngen jaus minehki ipoa. Anjoau roairoai ih kin kilkiljoaujili, joh kin mine nehn umw, a ih kin allaluhjili nehn pwungen joaujoau kan. <sup>28</sup> Nehn ah kapangda Jesus, ih rahula apel poardi mwohn Ih, ngil koalikla, pwahla, “Maing Jesus nihn Koahs Laplap! Dahkij koawoa nimen wiahng ngoahi? Ngoahi poaki ipoamw, koawoa en joah koalkoa ngoahi!” <sup>29</sup> Ih pwahla me pwa Jesus ne pwehng ngen jausso en diljang ipoa. Pehn dir ngen jausso kin dilingla ih, nehn armajjok kin piroahdi ehn apel poah kan, ih kin uhdahr mweidla joal kan ma piroahdi ih, ngen jausso kijoukihla ih nehn japwsoahn.

<sup>30</sup> Jesus idoak ipoa, **“Ia oadoammwen?”**

Ih japoang, “Karej,” pwa ngen jaus dihrdir kin dilingla ih. <sup>31</sup> Ngen jausso ken poakihda ipen Jesus en joah kajroahla irai oang nehn pwoar loal joh kapinno.

<sup>32</sup> Pwihnin pij oau minmine wijahu, mwingmwingehjili in kilin dol. Ngen jausso ken poakihda ipen Jesus en mweidoahng pwa irai en inla dilloang nehn pijjok, Ih ken mweidoahng. <sup>33</sup> Ngen jausso ken diljang ipen woallo inla dilloang nehn pijjok. Nehn anjoauwohr pijjok kijoudihla duhla nehn pillo.

<sup>34</sup> Nehn en sohn apwali pijjok arai kapangda dahkij wiawi, irai kaula kalohkihjili mwoakid oauwe ipen armaj kan nehn kahnihmmwo nehn jappwo. <sup>35</sup> Armajjok aluhla pwa irai en pein kadehde mehu. Nehn ahr lel ipen Jesus, irai kidalda pwa woallo ma ngen jausso ken injang ipoa, ih ne onohn ipen ehn Jesus, a ih ne likkoauda, mwomwen armaj mwehumwehu men. Irai ken majpwehkda. <sup>36</sup> Iraitok ma pwili kapang dahkij wiawi, irai pwehng sohn kahnihmmwo doahroar en woallo ah ne mwehula. <sup>37</sup> Mihn Gerasa kan ohroj wiahkioar oau pwehng Jesus pwa en inlahjang iparai, pwa irai inenin majpwehkda koalik. Jesus doaudahng pohn pohs pas kijoujang iparai. <sup>38</sup> A woallo ma ngen jausso ken injang ipoa, poaki ipen Jesus, “Koawoa en mweidoahng ngoahi en pwilihwe koawoa.”

Jesus johpwa mweidoahng. Ih pwehng, <sup>39</sup> **“Pwurwe in umwoammwo kalohkihoang armaj kan manman ma Koahs ne wiahda ipoamw.”**

Woallo pwurla kalohki wija ohroj nehn kahnihmmwo manman ma Jesus ne wiahng ih.

*Nihn Jairus Jerpeinno apel Liho ma Pukkoang Ikin en Jesus Likkoauwo*

<sup>40</sup> Nehn en Jesus japahldo jang loappoauwo pillo, armajjok kajamwo Ih, pwa irai ohroj pwen joujowi Ih. <sup>41</sup> A woal men adanki Jairus, koaunin jinakoke men. Ih leldo apel poardi oang in ehn Jesus, poaki Ih en inlahng in umwahu, <sup>42</sup> pwa nah jerpein iehroj men ma johnpar eijek riau nimenoar mehdi.

Nehn en Jesus allaluhla armaj kan jakahpajihla ih. <sup>43</sup> Lihmen pwili mine wijahu ma johmwehuki insa pwilpwil johnpar eijek riau; joh kak mwehula. Ih ne kejpwiwhihla me ohroj ma ih anki oang in koadoahkpen ah johmwehuwo ipen jounwini kan. <sup>44</sup> Ih dildahng nehn pokonno likinjarkin Jesus pukkoangdi ikin Ah likkoauwo. Nehnoar anjoauwo ah johmwehu in insa pwilpwillo uhd. <sup>45</sup> Jesus idoak pwa, **“Inje ma pukkoang Ngoahi?”**

Irai ohroj japoangki pwa jaudi irai. Peter japoangla Jesus, “Maing, imdoahr en armaj kan pideki pene pel jakahpajihla koawoa?”

<sup>46</sup> A Jesus japoang, **“Mine armaj pukkoang Ngoahi pwa Ngoahi ne poahmda manman oau ne injang Ngoahi.”** <sup>47</sup> Liho ne kidalda pwa ih ne diarekda, ih ken roarroarroar sohla ipen Jesus, rukdihoang ipen ehn Jesus. Ih pwehng Jesus mwohn armaj kan ohroj kahrpoan ah pukkoang Jesus apel doahroar ah mwehula nehnoar

anjoauwo ma ih pukkoang. <sup>48</sup> Jesus pwehnglahng, “Noai jerpein, oamw pwojon en ne kasihkeida koawoa. Alwe nehn popohl.”

<sup>49</sup> Nehn en Jesus pwahpwapwa mehpwai, jounpakair men ne leldohng ipen koaunin jinakokehu pakairkihoang, “Nihmw jerpeinno ne mehdi; koawoa en joah kadroapwoahki Jounpadahkken.”

<sup>50</sup> A Jesus ne rongda pakairro, Ih pwehnglahng jemen jerpeinno, “Joah mijik, pwojonnoar, a ih pirin pwen mwehu.”

<sup>51</sup> Nehn Ah leldohng in ummwo Ih joah mweidoahng emen en pwili dilda loaloa, likin Peter, James apel John, apel jemen jerpeinno apel inahu. <sup>52</sup> Armaj ohroj in ummwo joangjoangjoang apel injinjuwedki jerpeinno. Jesus pwehnglahng irai, “Kamwai joah joang, pwa jerpeinne johpwa mehdi, ih moair!”

<sup>53</sup> Irai wia kauruhrki, pwa irai kidal pwa jerpeinno ne pwen mehdi. <sup>54</sup> Ih kadilihjang ihr ohroj nehn perehu, Ih pwoakda poahn jerpeinno ngil koalikda, pwa, “Jerpein, pwohrda!” <sup>55</sup> Nehnnoar anjoauwo mour pwur oang jerpeinno apel ih pispis oar uhda. Jesus pwehng irai en kamwingehla. <sup>56</sup> Jamahu apel inahu, ira inenin pwuriamweikihla mehlel. A Jesus pwehng ira en johpwa pwehng emen da ma ne wiawihlahu.

## 9

### *Jesus Kadarpijoang Sohnpadahk Eijek Roahmenno*

<sup>1</sup> Jesus panginpene sohnpadahk eijek roahmenno kioang arai manman apel sihkei in kajroahjang ngen jaus ohroj apel manman in kasihkeida johmwewu kan. <sup>2</sup> Ih kadarpijoang irai pwa en kapahrakki doahroar Wein Koahs apel kemwewuwihla johmwewu kan. <sup>3</sup> Ih pel pwehng irai, “Kamwai en johpwa wa mehkij nehn jeiloak oauwe: joh jokon, joh pehk mihn kioang mwinge loaloa, joh pilahwa, joh mwani pel joh ngalngal. <sup>4</sup> Wijahkij ma irai pirin kajamwo kamwai, kamwai minminehr iparai ma kajamwo kamwai nehn umwaraihok, oaroh kamwai injang wijahu. <sup>5</sup> A wijahkij ma armaj kan joah nimen kajamwo kamwai, kamwai diljang wijahu jiped jang pwirejpar in pwoalkoamwai, kapoahm oau me oang irai.”

<sup>6</sup> Sohnpadahkkok aluhpijoang, aluhjili nehn koaujoan kan ohroj, kapkapahrakki doahroar Rongmwewu apel kemwkemwewuwihla johmwewu kan wija ohroj.

### *Nahmwarki Herod Pwonpwonda*

<sup>7</sup> Herod, koaunin Galilee rongda mehkan ohroj ma ne wiawi; ih ken pwonpwon kihda, pwa epwi pwa John jounpoapdaj ne mourda; <sup>8</sup> A epwi pwa Elijah ma pwokda, a epwi pwa emen joukohp in mehjjok ma ne pwuroahng mourda. <sup>9</sup> Herod pwa, “Ngoahi ne poaloahjang moangoan John, a inje woal mene ma ngoahi rongrongrong doahroar Ih?” Ih jongjong in pwa en kapang Jesus.

### *Jesus Kamwinge Woal Limekid*

<sup>10</sup> Woaroakkok japahldo pwehng Jesus me ohroj ma irai ne wiahda. Jesus ukla irai pwa en kalahpwukla wijahkij nehn kahnihmw Bethsaida. <sup>11</sup> Nehn en pokonno rongda me, ihr kaujla Ih. Jesus kajamwo ihr pwehng ihr doahroar Wein Koahs, apel kemwewuwihla ihrrok ma anahne jauwaj.

<sup>12</sup> Anjoau ma joauwo en ken dilla, sohnpadahk eijek roahmenno indoa ipen Jesus pwehng, “Maing, koawoa en ken kadarpijoang pokonne pwa irai en inlahng rapahki kanahr mwinge apel wijahn ahr moair nehn koaujoan kan. Pwa japwsoahn oau me.”

<sup>13</sup> A Jesus pwehnglahng irai, “Kamwai kapwa pein kamwinge irai.”

Irai pwa, “Lopwonin pilahwa limoau apel mwumw roahmen ma mine ipamai. Koawoa mwewuki kamai en inla dupukda mwinge oang pokon koalik oauwe?” <sup>14</sup> (Dapwa woal limekid ma pwili mine wijahu.)



Jesus pwehng sohnpadahkkok, **“Kamwai wiahda pwihn pwi wad limeijek, pwehng ihr en mwindi.”**

<sup>15</sup> Sohnpadahkkok ken wiahda da ma Ih pwehng irai en wia. <sup>16</sup> Jesus pwoakda lopwonin pilahwa limoauwo apel mwumw roahmenno, jardahla nehnloange kapingkalahngannoang Koahs, sipwangpijoang, kioang Nah sohnpadahkkok pwa irai en nehkkoang pokonno. <sup>17</sup> Armaj ohroj mwingeroh moad, sohnpadahkkok dowihda luhwen mwingehk wiahda kiam eijek riau.

### *En Peter Kajalehda doahroar Christ*

<sup>18</sup> Oau rehn Jesus kalahpwukla kapkap, sohnpadahkkok indoa ipoa. Ih idoak oang irai, **“Inje ma pokonne kin pwahki Ngoahi?”**

<sup>19</sup> A irai japoang, “Epwi kin pwa John jounpoapdaij, epwi pwa Elijah, epwi pwa koawoa emen joukohp in mehjjok ma ne iejda.”

<sup>20</sup> A Ih pwa, **“A kamwai, inje ma kamwai pwahki Ngoahi?”**

Peter japoangla, “Koawoa ioar nihn Koahs Messiah.”

### *Jesus kohpda doahroar Ah pirin Koaloklok apel Mehdi*

<sup>21</sup> Jesus kainoapwihdi irai en johpwa pwehng emen mehkije. <sup>22</sup> Ih pel pwehng irai, **“Nihn-Armaj uhdahn pirin loklok koalik, jekenkenla pehn koaunnok, jamwrou laplappok apel jounpadahk in Kojonneddok. Ih pirin kojkojdi, a mwerin rehn jiluh Ih pirin iejda.”**

<sup>23</sup> A Ih pel pwehng irai ohroj, **“Ma emen nimen indoa pwilihla Ngoahi, ih uhdahn moalkoahla pein ih, wahda ah lohpuw rehn ohroj, kauj Ngoahi. <sup>24</sup> Pwa emen ma nimen doarohla ah mour ih pirin luhj jang; a emen ma mihndahkihla ah mour ki Ngoahi, ih pirin mourla. <sup>25</sup> Nen mine kaspoan oamw en wihnkihda jampah pwon, a mwuhr koawoa joaloangla ke lohdi? Joh douluhl! <sup>26</sup> Ma emen pirin mehkki Ngoahi apel Oai padahk, ioar Nihn-Armaj pirin pel mehkki ih nehn Ah pirin indoahki lingin Ih apel Jamahu pwilihki Nah sohnloang joarwi kan. <sup>27</sup> Ngoahi en kamehlelehng kamwai pwa epwi kamwai ma minmine me jehpirin mehdi oaroh irai pwili kapang Wein Koahs.”**

### *Jesus Lingla*

<sup>28</sup> Wihk oau mwerin en Jesus pwahla mehpwiai, ih ukda Peter, John apel James, indahla pohn dol pwa en kapkap. <sup>29</sup> Nehn Ah kapkap, mwomwen mijoa wikla, Ah likkoauwok korohro rapwrapwoalla. <sup>30</sup> Anjoauwohr, woal roahmen pwokda ipoa siksikesik oang Ih; ioar ira Moses apel Elijah. <sup>31</sup> Ira pwokdo nehn ling joarwi, pwehpwehpwehng Jesus doahroar Ah pirin kapwaihahda kahrpoan en Koahs kadardo en mehdi nehn Jerusalem. <sup>32</sup> Nehn en mehpwiai wihwiawi, Peter apel pwilihoa kan moair koalikla; a nehn arai pwohrda irai kapangda doahroar lingin Jesus apel woal roahmenno ma minmine ipoa. <sup>33</sup> Nehn en woal roahmenno injang Jesus, Peter pwehng Ih, “Maing oai Koaun inenin mwehu asai minmine wijahkije. Kamai pirin wiahda umpwal jiluh, oau oang koawoa, oau oang Moses apel oau oang Elijah.” (Ih johpwa uhdahn kidal pwa dahkij ih pwahpwahpwa.)

<sup>34</sup> Nehn ah siksikoa mehpwiai koasoau oau pwokda pwaindi irai, sohnpadahkkok ken majpwehkda nehn arai minehla pehn rir in koasoauwo. <sup>35</sup> Ngil oau indoa jang nehn koasoauwo pwa, “Ioar noai jermwein kajampwalwa ma Ngoahi pilda; kamwai rong Ih!”

<sup>36</sup> Nehn en ngillo johla, Jesus kalahpwuk oar mine wijahu. Sohnpadahkkok johpwa pwehng emen armaj doahroar mehu ma irai kapang.

### *Jesus Kemwehuwihla Jermwein men ma Ngen Jaus Dilingla*

<sup>37</sup> Rehnwahr mwerin, irai indihdo jang pohn dollo, pokon koalik oau suhwoang Jesus. <sup>38</sup> Woal men rahula jang nehn pokonno, “Maing Jounpadahk, ngoahi poaki koawoa en indoa kapang noai jermweinne — noai jermwein wahr doari! <sup>39</sup> Koawoa en kapang, nehn en ngen jausso ah kin dilingla ih, ih kin pwururdahr rahrahu, kipdihoang nehn pwirej sasjili, pwuroar kin koarjang nehn oawoa, ngenno kin koauwehla kilin apel johpwa nimen diljang ipoa! <sup>40</sup> Ngoahi ne poaki ipen nihmw sohnpadahkkok en kauj jang ngen jausso ipoa, a irai johkak.”

<sup>41</sup> Jesus japoang, “**Ia woahr amwai joah kamehlele apel japwung! Ia woaroai in Oai pirin minmine ipamwai? Ia woaroai in Oai pirin kanangmahng kamwai?**” Ih pwehng woallo, “**Ukdo nihmw jermweinnen me!**”

<sup>42</sup> Nehn en jermweinno allaluhdo ipen Jesus ngen jausso peiddi ih oang nehn pwirej, ih ken roarroar. Jesus kajroahla ngen jausso, ih ken kemwehuwihla jermweinno, ih kioang ipen jamahu. <sup>43</sup> Armaj kan ohroj ken pwuriamweikihla rojon apel manman koalik in Koahs oauwe.

### *Jesus Pwuroahng Sikoahda doahroar Ah pirin Mehdi*

Armajjok kahjikkoar uhdihjang ahr pwurpwuriamweiki da Jesus wihwia, a Ih pwehng Nah sohnpadahkkok, <sup>44</sup> “**Kamwai joah moalkoahla da ma Ngoahi pirin pwehng kamwai: Nihn-Armaj pirin likliklahng pehn manman in armaj.**” <sup>45</sup> A sohnpadahkkok johpwa kidal woahwoahn Ah lal kan. Ih kajoaloange jang irai pwa irai en joah woahwoahki, a irai mijikin idoak woahwoahn mehkije.

### *Inje ma Keiou Laplap?*

<sup>46</sup> Sohnpadahkkok akmaikihda pwa inje ma keiou laplap nehn pwungarai. <sup>47</sup> Jesus kidalda arai lamlam, ioar mehwa Ih oaloo jeri men, kauhda ipoa, <sup>48</sup> pwehng sohnpadahkkok, “**Inje ma kajamwo jeri mene in Oadoaioa, kin kajamwo Ngoahi apel kajamwo Ih ma kadardo Ngoahi. Pwa ih ma keiou jekenken ipamwai ohroj, ioar ih ma keiou laplap.**”

### *Emen Ma Johkin Uhwoang Kamwai, Ih kin uhpali Kamwai*

<sup>49</sup> John pwa, “Maing, kamai kapang emen ma pwili kaujjang ngen jaus kan in oadoammwen, kamai ken inoapwihdi pwa ih johkin pwili amai pwihno.”

<sup>50</sup> Jesus japoang, pwehng ih apel ohroj sohnpadahkkok, “**Kamwai en joah kainoapwihdi, pwa emen ma johkin uhwoang kamwai, ioar kin uhpali kamwai.**”

### *Koujapw oau nehn Samaria kia Kajamwo Jesus*

<sup>51</sup> Nehn anjoauwo ma Jesus pirin injang jampah indahla nehnloange ne koaroando, Ih lemehda Ih en indahla Jerusalem. <sup>52</sup> Ih kadarla epwi jounwijik pakair mwohn Ih pwa irai en inla onopda me ohroj nehn koujappwo nehn Samaria. <sup>53</sup> A, sohn koujappwo joah nimen kajamwo, pwa janjal Ih allaluhdahlahng Jerusalem. <sup>54</sup> Sohnpadahk James apel John nehn ara kidalda me, ira pwehng Jesus, “Koaun, koawoa mwehuki kama en pwa oai en mwardi jang nehnloange koauwehla irai?”

<sup>55</sup> Jesus pwurlahng ira woarwoarihda. <sup>56</sup> Jesus apel Nah sohnpadahkkok ken dauluhllahng nehn oau koujapw sohrohr.

### *Ihr Ma kin Mwomwehda Pwili Jesus*

<sup>57</sup> Nehn irai allaluhla nehn allo, woal men pwehng Jesus, “Ngoahi pirin pwili koawoa wija ohroj ma koawoa pirin inla.”

<sup>58</sup> A Jesus pwehnglahng ih, “**Fox kan mine arai pwoar apel mahnsang mine arai paj, a Nihn-Armaj joh wija Ih en ilwe koammoal.**”

<sup>59</sup> Ih pwehng emen woal, “Pwili Ngoahi.”

A woallo pwa, “Maing, a mwowoa mweidoahng ngoahi en japahlla jaripdi joamoaiho.”

<sup>60</sup> Jesus japoangla, “Mweidoahng irai kan ma ne mehdi en pein jaripdi arai mehdi kan. A koawoa alwe pwili kalohkihjili Wein Koahs.”

<sup>61</sup> Emen pel pwa, “Maing, ngoahi pirin pwilihla koawoa, a koawoa en mweidoahng ngoahi mwowoa en inla koamwurmwur oang oai peneineihok.”

<sup>62</sup> Jesus japoang, pwehng ih, “Emen ma sapkihda doadoahk kajampwal oau, a pwurla mwerin, ih johpwa warroang Wein Koahs.”

## 10

### *Jesus Kadarpijoang Nah Sohnpadahk Ijihjek Roahmen*

<sup>1</sup> Mwerin mehpwiai Koahunno pilda sohnpadahk ijihjek roahmen kadarpijoang irai, wad roahmen, pwa irai en inlahng nehn kahnihmw kan apel wija kan ma pein Ih pirin inlahng. <sup>2</sup> Ih pwehng irai, “Roakke inenin koalik, a sohndoadoahk kan ma pirin rikda jipid; kamwai en kapkap poaki Koahunin roakke pwa Ih en kadardohng sohndoadoahk dir nehn Ah roakke. <sup>3</sup> Doari, kamwai alwe, kamwai en kidal pwa Ngoahi kadarwe kamwai doahroar jihpw pwulopwul pwi nehn pwungen wolf. <sup>4</sup> Kamwai joah wa dohn mwani, ke pehk in jeiloak ke ju. Kamwai joah uhdi nehn al kan pwa kamwai en rahnmwahuwi armaj. <sup>5</sup> Nehn amwai pirin kin lel nehn oau umw kamwai pirin pwa, ‘Popohl oang umw oauwe.’ <sup>6</sup> A ma armaj in popohl men mine nehn ummwo, amwai popohl pirin minehla ipoa, a ma joh, a popohllo pirin pwurdohng kamwai. <sup>7</sup> Kamwai en minminehr nehn ummwo, pwili kang apel nim me ohroj ma irai pirin koahunopda kioang kamwai, pwa sohndoadoahk ohroj kin koanoahng oaloo dupkoan ahr doadoahk. Kamwai joah kin kajkajaujili injang oau umw inlahng nehn oau. <sup>8</sup> Ma kamwai pirin dildahng nehn oau koaujoan a irai kajamwo kamwai, kamwai kang mwinge kan ma irai pirin kioang kamwai. <sup>9</sup> Kamwai kemwehuwihla johmwehu kan nehn koaujoanno, apel padahkihoang irai pwa ‘Wein Koahs ne indoa koaroandohng kamwai.’ <sup>10</sup> A ma kamwai dildahng nehn oau koaujoan a irai joah nimen kajamwo kamwai, kamwai inlahng nehn al kan apel pwehng sowoa kan, <sup>11</sup> ‘Pwirej par in amwai koaujoan ma ne soangoang in pwoalkoamai kai, kamai jipedwehng kamwai. A kamwai en kidal pwa Wein Koahs ne koaroandohng kamwai!’ <sup>12</sup> Mehlel Ngoahi pwehng kamwai pwa nehn Rehnin Kadeikko Koahs pirin kajalehda Ah kadek oang Sodom koalik jang koaujoanno!

### *Koaujoan Joahpwojon pwi*

<sup>13</sup> “Ia woahr nauna oang koawoa Chorazin! Pel ia woahr nauna oang koawoa Bethsaida! Pwa ma manmannok ma ne wiawihang kamwa, wiawi ipen Tyre apel Sidon, Sohn kahnihmw pwiai nen minmine nehn likkoahun injinjuwed, apel kamwroahdi poahj pohrai, kajalehda ahr koaluhla apel wiliakapwla. <sup>14</sup> Nehn Rehnin Kadeikko Koahs pirin kajalehda Ah kadek oang Tyre apel Sidon koalik jang kamwa. <sup>15</sup> A oang koawoa, Capernaum, koawoa nimen pwoakdahlahng koawoa nehnloange? Koawoa pirin jinoakekdihlahng nehn ehl!”

<sup>16</sup> Jesus pel pwehng sohnpadahkkok, “Emen ma kin rong kamwai kin rong Ngoahi; a emen ma mwamwahlki kamwai kin mwamwahlki Ngoahi; a emen ma mwamwahlki Ngoahi kin mwamwahlki Ih ma kadardo Ngoahi.”

### *Japahldohn Irai Ijihjek Roahmeno*

<sup>17</sup> Sohnpadahk ijihjek roahmen pwurdo perperen koalik. Irai pwehng Jesus, “Maing, amai Koahun, ngen jaus kan kin pel peikkoang kamai nehn amai kin ruwoje irai ki Oadoammwen!”

<sup>18</sup> A Jesus japoang irai, “Ngoahi kapang Jehsen kipla doahroar joarom jang nehnloange. <sup>19</sup> Rong! Ngoahi ne kioang kamwai manman, pwa kamwai en alu pohn sinek apel scorpion kan apel powehdi manman in inwinsihsi ohroj, johpwa

mehkij pirin koauwehla kamwai. <sup>20</sup> Doari, kamwai en joah perenki en ngen jaus kan arai peik oang kamwai, a kamwai en malaukihda oadoamwai kan ne insingdi nehnloanngé.”

### *Jesus Malauda*

<sup>21</sup> Nehnoar anjoauwo Jesus dirkihla peren koalik jang Ngen Joarwi, Ih pwa, “Joamoai, Koaun in nehnloanngé apel jampah! Ngoahi kalahnganki oang koawoa oamw kajalehioang irai ma joaloalkoang kan dahkij ma Koawoa oakihjang irai ma loalkoang apel koahiok in jampah kan. Maing Joamoai, ioar me ma Koawoa kupwurki en wiawi.

<sup>22</sup> “Joamoai ne kioang Ngoahi me ohroj. Johpwa emen kidal inje Nihn Koahsso pwa Jahm oar doari. Pel joh emen ma kidal inje Jahm, pwa Nihn Koahsso oar doari, apel irai kan ma Nihn Koahsso pilda en kajalehioang.”

<sup>23</sup> Jesus wud jipwoallahng sohnpadahkkok, pwehnglahng irai in rir, “Meid pai kamwai kapkapang mehkan ma kamwai kapang apkas! <sup>24</sup> Ngoahi en pwehng kamwai pwa joukohp dir apel nahmwarki dir nimen kapang dahkij kamwai kapang, a irai johkak, apel rong mehkan ma kamwai rong, a irai johkak.”

### *Karajraj in Woalin Samaria Kadek men*

<sup>25</sup> Jounpadahk in Kojonned men indoa ipen Jesus apel jong in lidipi, idoakkoang Ih, “Jounpadahk, da ma ngoahi uhdahn wia pwa ngoahi en kak oaloahdi mour joahsuk?”

<sup>26</sup> A Jesus japoang, “Dahkij Pukin Kojonneddo pwa? Imdoahr oamw kawoahwoa?”

<sup>27</sup> Woallo japoangla, “ ‘Ipwilki Koaunno oamw Koahs ki oamw mohngiong unjek, ki ngenimwen unjek, ki oamw sihkei ohroj unjek apel ki oamw lamlam unjek,’ apel ‘Ipwilki mihn ipoamw doahroar oamw kin ipwilki pein koawoa.’ ”

<sup>28</sup> Jesus pwa, “Koawoa pwung. Wia me, a koawoa pirin mour.”

<sup>29</sup> A jounpadahk in Kojonneddo nimen kamehlele oang pein ih, ih idoak oang Jesus, “Inje mihn ipoai?”

<sup>30</sup> Jesus japoang, “Armaj men indihlahjang Jerusalem oang Jericho; lollap nauna pwi pallanda ih kihjang ah likkoauwok poki ih oaroh pirin oar ken mehdi, irai ken inlahjang ih. <sup>31</sup> Jamwrou men allaluhdihla nehn allohr; a nehn ah kapangda woallo, ih dauluhl wud oaloap allo. <sup>32</sup> Pel doahroar Levi men alu wijahu kapang woallo, ih pel dauluhlla jang alu oaloap allo. <sup>33</sup> A woalin Samaria men ma wia ah jeiloak wudla wijahu, nehn ah kapang armajjo nehn kapehdin poakehla. <sup>34</sup> Ih ken sohla ipoa, widekihdi le apel wain pohn wijahk ma ohla, ih kidimpene. Ih ken kihdahng pohn warahu wahlahng nehn umwen keiru oau apwali ih wijahu. <sup>35</sup> Rehnwa mwerin ih oaloa mwani silper riau kioang koaunin umwen keiruwo pwehng ih, ‘Apwali ih mwehu, a nehn oai pirin pwurdo ngoahi nen dupuk oang koawoa dahkij ma koawoa apwali ki ih.’ ”

<sup>36</sup> Jesus kadoarihla pwehng ih, “Inje ma koawoa leme nehn pwungen irai jilmenne ma wia mihn ipen woallo ma lohdihoang lollap naunahk?”

<sup>37</sup> A ih japoang, “Woallo ma kadek oang ih.”

Jesus pwehng ih, “Alwe, koawoa wiahda doahroar.”

### *Jesus Pas ipen Martha apel Mary*

<sup>38</sup> Nehn en Jesus apel Nah sohnpadahkkok allaluhla irai lel nehn koaujoan kij ma lihmen, oadoa Martha, kajamwo Ih oang nehn umwahu. <sup>39</sup> Rien Martha lihmen oadoa Mary ma mwindi ipen ehn Koaunno rongrongrong Ah padahk kan. <sup>40</sup> A Martha pwunodkihda doadoahkkok ohroj ma ih pirin wia ih indoa pwa, “Koaun, koawoa en kapang doahroar en rioai jerpeinne kihdoa doadoahk ohroj ngoahi en wia? Pwehng ih en indoa jeuweje ngoahi!”

<sup>41</sup> A Koaunno japoang, “Martha, Martha, koawoa pwunodkihda apel joahpijekkihla joang dihrdir, <sup>42</sup> a joang oau oar ma anahn. Mary ne pilda me pwungwa, doari jehpirin liklikjang ih.”

## 11

### *En Jesus Padahk doahroar Kapkap*

<sup>1</sup> Oau rehn Jesus kapkap wijahkij. Nehn Ah kadoarihla Ah kapkappo, emen Nah sohnpadahkkok pwehng Ih, “Koaun, padahkihoang kamai doahr kapkap, doahroar en John ah padahkihoang nah sohnpadahkkok.”

<sup>2</sup> Jesus pwehnglahng irai, “Anjoau in amwai kapkap kamwai pwa, ‘Jamamai:

oadoammwen en joarwi,  
oamw wei en pwoaida,

<sup>3</sup> Kihdoa rehnnoauwe kanmai mwingehn oauwoau rehn.

<sup>4</sup> Mahkoahng dipamai kan,

doahroar amai kin mahkoahng ohroj ma kin wiahda dihng oang kamai. Joah kahlwahng kamai nehn jongjong.’ ”

<sup>5</sup> Jesus pel pwehng irai, “Ma emen kamwai mine ah pirien a ih inla ipoa in umwahu lopkoan pwong poaki ipoa, ‘Oai pirien kihdoa lopwon in pilahwa jiluh. <sup>6</sup> Oai pirien men ma kapwehsen lel ipoai, a johpwa mwinge kij ipoai ngoahi en kioang ih!’ <sup>7</sup> A ma armajjo loaloa japoang, ‘Joah kadroapwi ngoahi, wanihmmwe ne loakdi, noai jerihkai apel ngoahi ne moair. Ngoahi johkak pwohrda kioang koawoa mehkij.’ <sup>8</sup> Kamwai en kidal pwa ma ih joah pwohrda pwa en kioang koawoa pilahwa pwa koawoa ah pirien, a ih pirin pwohrda kioang koawoa me ohroj koawoa anahne pwa koawoa johpwa mehkki poaden poakpoak. <sup>9</sup> Ioar mehwa Ngoahi pwehngkihoang kamwai; poaki, a kamwai pirin oaloo; rapahki, a kamwai pirin diar; lesles, a wanihmmwo pirin risdahng kamwai. <sup>10</sup> Pwa inje ma poaki pirin oaloo; apel inje ma kin rapahki pirin diar; apel wanihmmwo pirin risdahng inje ma lesles. <sup>11</sup> Mine kamwai jahm men ma pirin kioang nihmwai jermweinno sinek ma ih poaki kanah mwumw? <sup>12</sup> Ke nehn a poaki adroau, a koawoa kioang aihe? <sup>13</sup> Ia woahr amwai nauna a kamwai kidal kioang me mwehu oang nihmwai jerihkan. Ia woahr koalikin Jamamwai nehnloange pirin kioang Ngen Joarwi irai kan ma kin poaki Ih?”

### *Jesus apel Beelzebul*

<sup>14</sup> Jesus kauj jang ngen jaus men ipen woal loahsoang men. Nehn en ngen jausso injang ipoa, woallo ken kak sapda lallal. Pokonno pwuriamweikihla. <sup>15</sup> Epwi ihr pwa, “Ih ioar Beelzebul, koaunin ngen jaus kan ma kioang Ih manman in kajroahjang ngen jausok.”

<sup>16</sup> Epwi nimen lidipi Jesus, irai poaki Ih en wiahng irai oau manmanno jang nehnloange. <sup>17</sup> A Jesus kidal ahr lamlam, Ih pwehng irai, “Wei oau joah lipilpil ma kin pwalpijoang wiahda pwihn pwi ma kin uhpene nehn pwungarai johkak woaroi; peneinei oau ma kin uhpene kin mwoarpijoang. <sup>18</sup> A, imdoahr? Ma wein Jehsen mine pwihn pwi ma peipene nehn pwungarai, imdoahr ah wei en kak pwoaida? Kamwai siksikoa pwa Ngoahi kin kauj jang ngen jaus ipen armaj pwa Beelzebul kin kioang Ngoahi manman en wia me. <sup>19</sup> Ma ioar doahroar oai kin kauj ngen jaus kan, a imdoahr ioangoamwai kan kin kauj jang? Pein ioangoamwai kan kadehdehda amwai uhdahn japwung. <sup>20</sup> In oadoan Koahs ma Ngoahi kin kaujihjang ngen jaus kan, me kadehdehda pwa Wein Koahs ne lel kamwai.

<sup>21</sup> “Ma woal sihkei men ma ah koapwoahn mahwin ohroj onopda, ih jiloo umwahu, a ah koapwoa kan pirin nekidekla mwehu. <sup>22</sup> A ma emen ma sihkei jang pallanda



ih, kalwehdi, ih pirin wahjang ah koapwoahn mahwin ohroj ma ih kin sihsihkeiki, apel nehkpjoang dahkij ih pirapoahla.

<sup>23</sup> “Inje ma johkin pwili Ngoahi, kin uhwoang Ngoahi, a ih ma johkin jējuweje Ngoahi rikpene, kin kamwroahpjoang.

### *Japahldohn Ngen Jausso*

<sup>24</sup> “Nehn en ngen jaus men kin diljang nehn armaj men, ih kin allaluhjili nehn japwsoahn raprapahki wijahn koammoal. A ma ih johkak diar, ih kin pwehng pein ih, ‘Ngoahi en pwurla in umwoaiho.’ <sup>25</sup> Ih ken pwurla kapangda doahroar en ummwo ne mwakelkelda apel joandi mwehu. <sup>26</sup> Ih inla ukdo ngen ijimen ma jaus jang pein ih, irai ken dilda koaujoanla wijahu. A in imwlahn joang ohroj, armajjo pirin naunahla jang in sapdahu.”

### *Peren Mehlel*

<sup>27</sup> Nehn en Jesus Ah pwahla mehpwiai, a lihmen jang nehn pokonno pwehng Ih, “Ia woahr peren in liho ma noaisikihdi koawoa apel apwalihda koawoa!”

<sup>28</sup> Jesus japoang, “Ioar, a ia woahr peren in irai kan ma kin rong mahjan in Koahs apel kapwaihahda!”

### *Poakpoakin Manman oau*

<sup>29</sup> Nehn en armaj dir ahr pidekihpene Jesus, Ih pwa, “Ia uhwen nauna in armaj in rehn pwiai! Irai poakpoaki manman oau, a jehpirin aluhwoang irai, ioarroar kilel manmanno ma wiawi oang Jonah. <sup>30</sup> Doahroar joukohp Jonah a wia kilel oau oang mihn Nineveh, ioar doahroar Nihn-Armaj pirin wiahla kilel oau oang armaj in rehn pwiai. <sup>31</sup> Nehn Rehnin Kadeikko li nahmwarki Sheba pirin uhda kadipoa armaj in anjoau oauwe; pwa ih jeiloakdo jang in imwin jampah pwa en rong doahroar en nahmwarki Solomon kaweid loalkoang. A apkas mine emen ma laplap jang Solomon mine me. <sup>32</sup> Nehn Rehnin Kadeikko mihn Nineveh pirin uhda kadipoa kamwai, pwa ahr koaluhla apel wiliakapwla nehn ahr rong en Jonah kapahrakkok; a kamwai en kidal pwa mine emen me ma koalik jang Jonah!”

### *Maram in Palwar*

<sup>33</sup> “Johpwa emen kin akanda lahm oau apel oakihla ke kihdi oang pehn pahn oau; pwa ih pirin kioang nehn dohياهو, pwa armaj ohroj en kak kapang marammo nehn ahr dilda nehn ummwo. <sup>34</sup> Pwoaroan mijoammwen doahroar lahm oang palwoaroamwen. Ma pwoaroan mijoammwen mwakelkel, palwoaroamwen pwon pirin dirkihla maram. A ma pwoaroan mijoammwen nauna, palwoaroamwen pwon pirin dirkihla ros. <sup>35</sup> Kanaihoahng pwa marammo ma mine ipoamw jaudi ros oau. <sup>36</sup> Ma palwoaroamwen pwon dirki maram, johpwa wijahkij mine nehn ros, ih pirin maram wija ohroj doahroar lahm oau ma joajjoaroa koawoa ki ah maram.”

### *Jesus Koapwungoang Pharisee-ok apel Jounkawoahwoa in Kojonneddok*

<sup>37</sup> Nehn en Jesus kadoarihla Ah kapahrak, Pharisee men luke Ih pwa en pwili mwinge ipoa; Jesus dildahng nehn ummwo apel mwindi oang in sehпил. <sup>38</sup> Pharisee-o ken pwuriamweikihla nehn ah kapang Jesus johpwa amwumwla mwohn mwinge. <sup>39</sup> Doar Koahunno ken pwehnglahng Ih, “Kamwai Pharisee kan injinohkihoar kamweke likin nihmwai mwoak apel pileis kan, a loaloamwai dirkihla lioas in uhwoang apel mwoarjuwed. <sup>40</sup> Pweipwei kamwai! Koahs ma wiahda kamwai, likin apel loaloa! <sup>41</sup> A kamwai kijkijoahki armaj joamwoahmwoa kan koanngoan nihmwai mwoak apel pileis kan, a joang ohroj pirin mwakelkel ipamwai.

<sup>42</sup> “Ia woahr nauna oang kamwai Pharisee kan! Pwa kamwai kin meiroang kioang Koahs eijek kij oau in mihn deal mwinge kan doahroar mint, rue apel ohroj mihn deal mwinge sohrohr kan, a kamwai joh kin injinohki pwung apel limpoak oang Koahs.

Ioar mehkoa ma kamwai en wia mijkoalkoal, mwohn amwai pirin wia joang sohrohr kan.

<sup>43</sup> “Ia woahr nauna oang kamwai, Pharisee kan! Pwa amwai kin mwewhuki mwindi pohn jeia kasohrohrla kan nehn jinakoke kan apel nimen armaj kan en rahnmwahu in wahu nehn wijahn noasnoas kan. <sup>44</sup> Ia woahr nauna oang kamwai! Pwa kamwai doahroar joaujoau joah janjal pwi ma armaj allalu puwoa jehjoa.”

<sup>45</sup> Emen jounkawoahwoa in kojoneddo ken pwehnglahng Jesus, “Jounpadahk, nehn oamw pwahpwahpwa joang pwiai, koawoa kin pel koauwe kamai!”

<sup>46</sup> Jesus japoang, “Ia woahr pel nauna oang kamwai, jounkawoahwoa in Kojoneddo kan! Pwa amwai kin kasoausoauwihkihla armaj kan wijik ma irai johkak wahda, a pein kamwai johkin kailla jaid pas en jeuwejhda ahr wijik kan. <sup>47</sup> Ia woahr nauna oang kamwai! Kamwai kin wiahda joaujoau mwewhu oang joukohppok, ma jamamwaihok kojukdi. <sup>48</sup> Kamwai pein kadehdehda pwa kamwai pwungki da jamamwaihok wia; irai ma kojukdi joukohppok, a kamwai wiahdahng arai joaujoau. <sup>49</sup> Ki kahrpoa oauwe erpis in Koahs ne pwahla, ‘Ngoahi pirin kadarlahng irai joukohp kan apel woaroak kan; a irai pirin kojukdi epwi apel koalkoa epwi.’ <sup>50</sup> Pwa armaj in anjoau oauwe en koaloklokki kojkojdihn joukohp ohroj jang kapikipikdahn jampah, <sup>51</sup> jang in kojkojdihn Abel lel Zechariah, ma kojkojdi nehn pwungen pei joarwiho apel Wija Joarwiho. Eh, Ngoahi pwehng kamwai en kidal pwa armaj in anjoau oauwe pirin loklokki irai ohroj.

<sup>52</sup> “Ia woahr nauna oang kamwai, jounkawoahwoa in Kojoneddo kan! Amwai kin koldi kih-o ma kin risingda wanihmw in umwen loalkoang. Pein kamwai johkin dilda, a kamwai kin iroahdihjang irai kan ma kin jongjongin dilda!”

<sup>53</sup> Nehn en Jesus injang nehn ummwo, jounpadahk in Kojoneddo kan apel Pharisee-ok sapda koauwe Ih inenin koalik apel peidekki joang dihrdir. <sup>54</sup> Pwa ihr nimen lidipihkihdi Ih mehkij ma Ih pwahla japwung.

## 12

### *Mwalaun in Pharisee*

<sup>1</sup> Armaj kid pwi pokonpene, inenin koaisla epwi siak ehn epwi. Jesus sapkihda pwehng Nah sohnpadahkkok, “Kamwai kalke jang ihs in Pharisee kan — ma woahwoahki arai mwalaun kan. <sup>2</sup> Me ohroj ma kin oakkoakla, uhdahn pirin janjalda, apel me rir ohroj pirin pel janjalda. <sup>3</sup> A, me ohroj ma kamwai kin sikoah nehn ros, pirin janjalda nehn maram; apel me ohroj ma kamwai kin mwoanginnginki wija joaloang, pirin rahrahu koalik jang pohn koadkoan umw kan.

### *Inje Kamwai pirin Mijik*

<sup>4</sup> “Ngoahi pwehng kamwai, Oai pirien kan, kamwai joah mijik irai kan ma kin kojukdi palwar, a johkak wia mehkij nauna jang pwurlakoa. <sup>5</sup> Ngoahi pirin padahkihoang kamwai inje ma kamwai en mijik: mijik Koahs, ma kak kojukdi koawoa apel anki manman in peidla koawoa nehn ehl. Kamehlele Ngoahi, Ih oar doari kamwai en kin mijik!

<sup>6</sup> “Jaudi mahnsang siksik limmen kin noasla in send riau? A johpwa emen Koahs kin moalkoahla. <sup>7</sup> Pisen moangoamwai kan ohroj ne pel wadwaddi. Doari, kamwai joah perki mehkij; pwa kamwai inenin kajampwal jang mahnsang dir!

### *Kadehde Christ apel Pohnjehjoa Christ*

<sup>8</sup> “Ngoahi en pwehng kamwai, irai kan ma kadehde Ngoahi in janjal mwohn armaj kan, pwa ihr wia Noai, Nihn-Armaj pirin pel wia doahroar oang irai mwohn sohnloang in Koahs kan. <sup>9</sup> A inje ma pohnjehjoa Ngoahi ipen armaj kan nehn pokon janjal, Nihn-Armaj pirin pel pohnjehjoa irai mwohn sohnloang in Koahs kan.

<sup>10</sup> “Inje ma pirin pwahla mehki ma uhwoang Nihn-Armaj, kak mahkla; a inje ma pwahla mehki nauna ma uhwoang Ngen Joarwi, jehpirin mahkla.

<sup>11</sup> “Nehn ahr pirin wahla kamwai en koapwung nehn jinako ke ke mwohn koapina kan ke koaun kan, kamwai joah kin pwunodki imdoahr kamwai en doaroa kamwai ke da kamwai en pwa. <sup>12</sup> Pwa Ngen Joarwi ma pirin padahkihoang kamwai dahki kamwai pirin pwa.”

### *Karajraj in Woal Koapwoahpwoa Pweipwei men*

<sup>13</sup> Armaj men jang nehn pokonno pwehng Jesus, “Jounpadahk, pwehng rioai woallo kama en nehkpijoang ama johjohu.”

<sup>14</sup> Jesus japoang ih, “Koampoakpoi, inje kioang Ngoahi pwungin koapwung ke nehk koapwoa kan nehn pwungamwa?” <sup>15</sup> Ih ken pwehng irai ohroj, “Kalke kamwai jang noaroak nauna ohroj, pwa mour mehlel in armaj joh kin mine in koapwoa kan ma kamwai anki, mihndahr ia woahr dirin amwai koapwoa.”

<sup>16</sup> Ih pel pwehng irai karajraj oauwe, “Woal koapwoahpwoa men mine, ma japwahu dir koanng. <sup>17</sup> Ih sapda pein lemleme, ‘Joh wija ngoahi kak nekidla wehn joapwoaiho ohroj. Da ngoahi kak wia? <sup>18</sup> Ioar mehwa me ngoahi pirin wia; ngoahi pirin kamwroahdi oai umwen nahk kan, ngoahi wud kouda epwi ma koalik jang, wija ma ngoahi pirin nekidla wehn joapwoaie apel oai koapwoa ohroj. <sup>19</sup> Ngoahi pirin pein pwehng ngoahi, woal pai men koawoa! Koawoa anki koapwoa dir, ma koawoa anahne oang johpar dir. Koawoa, injenmwahu; mwinge, nim, perperen!’ <sup>20</sup> A Koahs pwehng ih, ‘Armaj pweipwei men koawoa! Pwongouwehr koawoa pirin mehdi! A inje ma pirin anki oamw koapwoahkan ohroj ma koawoa ne nekidpene?’ ”

<sup>21</sup> Jesus kadoarihkihla karajrajjo, Ih pwa, “Me ioar doahroar pirin wiawihang armaj kan ma kin koajokpene oang irai koapwoahn jampah, a joamwoahmwoa mwohn mijen Koahs.”

### *Koapwoarpwoarki Koahs*

<sup>22</sup> Jesus pel pwehng Nah sohnpadahkkok, “Ioar mehwa Ngoahi pwehng kioang kamwai; kamwai joah kin pwunodki amwai mour, dahki kamwai pirin kang, ke likkoau kamwai anahne oang palwoaroamwaikan. <sup>23</sup> Pwa mour inenin kajampwal jang mwinge apel palwar inenin kajampwal jang likkoau. <sup>24</sup> Kamwai kapang mahnsang kan: irai johkin poadokdi, pel johkin doli, pel joh arai umwen nekidek; a Koahs kin kamwinge irai. A kamwai inenin kajampwal mehlel jang mahnsang kan! <sup>25</sup> Inje nehn pwungamwai ma kak karoairoaihla ah mour nehn ah pwunpwunodki mehpwiai? <sup>26</sup> Ma kamwai johkak apwali joangoan moangoai oauwe, mihnda kamwai en pwunodki epwi me sohrohr? <sup>27</sup> Kamwai kapang rohs in nehn japw kan doahroar ahr kin koapda; irai joh kin doadoahk, irai johkin wiahda arai likkoau. A kamwai en kidal pwa pel Nahmwarki Solomon, nehn ah koapwoahpwoa, joh kin kapwaski likkoau ling doahroar apas rohs pwiai. <sup>28</sup> Koahs ma kin kapwasihda dipwdipw in nehn japw kan, ma mine rehn oauwe, a lakapw ne joh, peidek oang nehn sidohp pwidengla. A Ih joah nen pel uhdahn kalikkoauwi kamwai? Joangoan siksikin amwai pwojon!

<sup>29</sup> “Doari, kamwai joah kin pwunod, kalap raprapahki pwa da kamwai pirin kang ke nim. <sup>30</sup> (Pwa ihr ma rosros kan ioar irai ma kin kalap pwunpwunodki mehpwiai ohroj.) Jamamwai ma mine nehnlouange kidal doahroar amwai kin anahne mehpwiai. <sup>31</sup> Kamwai en kin injinohki Wein Koahs mijkoalkoal, a Ih pirin kioang kamwai mehpwiai.”

### *Koapwoahpwoahn Nehnlouange kan*

<sup>32</sup> “Joah majpwehk pwihtin jihpw siksik, pwa Jamamwaiho ne perenki en kioang kamwai Weiho. <sup>33</sup> Kamwai noaskihla amwai koapwoa kan, kioang mwani kan ihr joamwoahmwoa kan. Kamwai wiahng kamwai pwuko oau ma johkak dehnlä, nekidla nehnloange amwai pai kan, wija ma joh kin siksikla, pwa joh sohnpirap kak pirapoahjang, pel joh loanginmwoas kak koauwehla. <sup>34</sup> Pwa oamw mohngiong unjek kin uhlahng wijahu ma oamw pai kan mine.

### *Lidu kan ma kin Mwajmwajahn*

<sup>35</sup> “Onnonop oang dahkij ma pirin indoa, kapwaskihda likkoauwin papah apel nihmwai lahm kan en okjekda. <sup>36</sup> Doahroar lidu kan ma kin joujowi arai koaun ma pirin japahldo jang kamdipw in koapwoapwoaud. Nehn ah leldo apel lesles, irai kin risingdahng ih wanihmmwo anjoauwohr. <sup>37</sup> Joangoan peren in papah kan ma arai koaun kapang irai kin poahd apel onop nehn ah japahldo! Ngoahi pwehng kamwai in mehlel, pwa ih pirin kihjang ah joakiddo kamwindihdi irai, apel papah irai. <sup>38</sup> Ia woahr peren in irai ma ih kapang arai onopda mihndahr ma ih indoa lopkoan pwong ke kosjang! <sup>39</sup> Kamwai en kamehlele me; ma koaunin umw oau kidal anjoau sohnpirap men pirin indoahng in umwahu, ih jehpirin mweidoahng en koauwehla dilda. <sup>40</sup> Doari, kamwai pel pwili onnonop, pwa Nihn-Armaj pirin indoa nehn anjoau oau ma kamwai johpwa kajik.”

### *Lidu Loalpwoas ke Lidu Joaloalpwoas*

<sup>41</sup> Peter pwa, “Koaun, karajraj pase doakoa kamai ke oang armaj ohroj?”

<sup>42</sup> Koaunno japoang, “Inje ma koawoa wiahki jounkouwa loalpwoas apel loalkoang? Ioar ih ma ah koaun pirin kajapwildahng ih en apwali ah wijahu apel kioang lidu sohrohr kan kanrai mwinge nehn anjoau ma koanoahng. <sup>43</sup> Ia woahr peren in lidu meno, ma ah koaun kajaingdi ah wihwia me, nehn ah pirin pwurdohng in umwahu! <sup>44</sup> Mehlel Ngoahi pwehng kamwai, pwa koaunno pirin kioang lidu mene en koaunda ah dipwjoau kan ohroj. <sup>45</sup> A ma liduhwo pwehng pein ih pwa ah koaunno nen kosin japahldo, ih ken sapda poki lidu sohrohr kan, woal apel li, a ih pel mwinge, nim apel jakaula; <sup>46</sup> koaunno pirin pwurdo rehn apel awa ma liduhwo johpwa kidal. Koaunno pirin poaloahpijoang ih apel kejpwih eklahng nehn pwungen ihr ma joaloalpwoas.

<sup>47</sup> “Doari, lidu ma kidal dahkij ah koaun mwehuki ih en wia, a johpwa koaunopda pein ih, ih pirin uhdahn oaloo pokpok koalik. <sup>48</sup> A ih ma jehjoo dahkij ah koaun mwehuki ih en wia, a ih wia mehkij ma koanoahng en pokpokki, ih pirin oaloo pokpok siksik. Koanoahng me koalik en injang iraihok ma oaloo koalik, iraihok ma oaloo inenin koalik en kihda woahioau ma inenin koalik.

### *Jesus ioar Kahrpoan Sohrohrpijoang*

<sup>49</sup> “Ngoahi indoa pwa Ngoahi en jaunnoang oai jampah; a, ia woahr Oai nimen pwa en ken okda! <sup>50</sup> Ngoahi pirin oaloo poapdaj oau, apel ia woahr pwunod ma mine ipoai, oaroh ngehd en doarihla! <sup>51</sup> Kamwai lemleme pwa Ngoahi wahdohng jampah moaloailoi! Joah! Jaudi moaloailoi, pwa sohrohrpijoang. <sup>52</sup> Jang me inla peneinei oau ma sowoa limmen pirin sohrohrpijoang nehn pwungarai — jilmen pirin pallan roahmen, apel roahmen pirin pallan jilmen. <sup>53</sup> Jahm kan pirin uhwoang nihrai jermwein kan apel jermwein kan pirin uhwoang jamarai kan. Nohno kan pirin uhwoang nihrai jerpein kan, apel jerpein kan pirin uhwoang inarai kan; nohno kan pirin uhwoang pahien nihrai jermwein kan, apel jerpein kan pirin uhwoang inen pahioaraihok.”

### *Woahwoahki Anjoau*

<sup>54</sup> Jesus pel pwehng armajjok, “Nehn amwai kin kapang koasoau oau jang in palikapin loanng, kamwai kin pispis in pwa, ‘Pirin wud,’ a kin pwoaida. <sup>55</sup> Nehn

amwai kin kapang eng ah kin koaljang in palieir, kamwai kin pwa, 'Ih pirin pwideng,' a kin pwoaida. <sup>56</sup> Mwalaun kamwai! Kamwai kapang jampah apel mijen loannge, kajawihda iren nehn woahwoa, da kahrehda kamwai jehjoa kajawihki woahwoahn anjoau oauwe?

*Koapwungla nehn pwungen Koawoa apel Oamw Imwinsihsi*

<sup>57</sup> "Da kahrehda kamwai joah pein kajawihki dahkij pwung ma kamwai en wia? <sup>58</sup> Ma armaj men pirin lelki koawoa mwoalen koapwung, engdehunki koapwungla nehn pwungamwa mwohn amwa pirin wia koapwung. Pwa ma koawoa johpwa, koawoa nen warahkiheklahng jounkoapwunngo, a jounkoapwunngo wud panglahng koawoa ipen pilijmehn, a pilijmehn oaloo koawoa peiddoang nehn kalpwuhj. <sup>59</sup> Ngoahi pwehng koawoa in mehlel, pwa koawoa johkak diljang wijahu, oaroh koawoa pirin koapwungla mwanihok ohroj lel send mwoarmwoar in oamw pwaipwanid o."

## 13

*Kerpwihla Dipamwai kan ke Mehdi*

<sup>1</sup> Nehn anjoauwo mine armaj pwi wijahu ma pwehnglahng Jesus da ma wiawi oang mihn Galilee pwi, ma Pilate kojukdi nehn ahr wihwia arai meiroang kan oang Koahs. <sup>2</sup> Jesus japoangkihla irai, "Kamwai lemleme pwa mihn Galilee pwiai, ma mehkihdi joangoan kojkojjoauwe, ihr uhdahn armaj dipan naunahjang mihn Galilee-ok ohroj? <sup>3</sup> Joh douluhl! Kamwai en kidal pwa ma kamwai en kerpwihla dipamwai kan, kamwai ohroj pirin mehdi doahroar irai. <sup>4</sup> A imdoahr woal eijek walmennok ma wijahn iroir in Siloam kipdi pohrai, kojukdi irai. Kamwai lemleme pwa me kadehdehda pwa irai nauna jang armaj ohroj ma kin koaujoan Jerusalem? <sup>5</sup> Joh douluhl! Kamwai en kidal pwa ma kamwai johpwa kerpwihla dipamwai kan, kamwai ohroj nen pel mehdi doahroar irai."

*Karajraj in Suhkoa Fig ma Joh Wah*

<sup>6</sup> Jesus pel pwehnglahng irai karajraj pas, "Mine armaj men ah suhkoa fig pas mine nehn ah mwoaswello. Ih inlahng doli wah, a johpwa wah oau ih kapangda. <sup>7</sup> Ih pwehng nah jounmwoaswello, 'Kapang pwa ne johnpar jiluh ngoahi indoa kapkapang wehn suhkoa fig pase, a joh mehki ngohai kapangda. Poaloahdihjang! Joh kaspoan a mohmohmourki pwirejje.' <sup>8</sup> Jounmwoaswello japoangkihla woallo, 'Maing, mweidoahng mijkoalkoal ma ih joah nehn uhwa nehn johnpar oauwe. Ngoahi pirin jaripdi koiaji pidekihpene suhkoahu. <sup>9</sup> Ma ih pirin uhwa nehn johnpar allaluhdo, a mwehu; a ma joah koawoa kapwa mweidoahng en poalpoaldi.' "

*Jesus Kemwehuwihla Li Johmwewuki Sihn men Rehnin Sabbath*

<sup>10</sup> Rehnin Sabbath oau Jesus wihwia Ah padahk nehn jinakoke oau. <sup>11</sup> Lihmen pwili mine wijahu, ma ngen jaus dilingla ih oaroain johnpar eijek waluh ma kahrehda ih johmwewu. Liho johmwewuki sihn, kojprene, johkak inenda. <sup>12</sup> Nehn en Jesus kapangda liho, Ih pwehnglahng, "Li, koawoa en mwehuda jang oamw johmwewu!" <sup>13</sup> Ih ken kihdahng poahk pohn liho, a nehn anjoauwohr liho ken inenpijoang apel uhda kapkapnga Koahs.

<sup>14</sup> Koaunin jinakokehu lioaskihla en Jesus kemwehuwihla lihmene rehnin Sabbath. Ih uhda pwehng pokonno, "Mine rehn wonou ma kisai en doadoahk; a ioar rehn koa ma kamwai en indoa pwa kamwai en kin oaloo kasihkeipamwai, a jaudi rehnin Sabbath!"

<sup>15</sup> Koaunno japoangkihla ih, "Mwalaun kamwai! Jaudi kamwai ohroj kin jaladda kahu mwein ke ejel jang nehn dohiarai apel ukla irai oang in pil pwa irai en nimpil rehnin Sabbath. <sup>16</sup> A lihmene ma kadaudok en Abraham ma ne joajjoajjoalki ipen



Jehsen johnpar eijek waluh; a joah koanoahng ih en lapwda jang nehn ah joal rehnin Sabbath?" <sup>17</sup> En Jesus pajpoang oauwe kajarohdi irai ohroj ma uhwoang, a armaj ohroj likin irai perenkihda wihwia kapwuriamei ohroj ma Ih kin wiahda.

*Karajraj in Liporro in suhkoa ma Keiou Siksik*

<sup>18</sup> Jesus pel pwa, "Dahkij Wein Koahs doahroar? Dahkij Ngoahi kak karjahkihoang? <sup>19</sup> Ih doahroar liporro mustard oau ma armaj men oaloo apel poadokdi nehn ah mwoaswello. Liporro siksikko koapda wiahla suhkoa pas, mahnsang kan kin koammoal nehn rah kan."

*Karajraj in Ihs*

<sup>20</sup> Jesus pel idoak, "Da Ngoahi en karjahioang Wein Koahs? <sup>21</sup> Ih doahroar ihs ma lihmen oaloo doaloahkihda pilahwa kij, pilahwahu ken pwoaipjoang."

*Wanihmw Soahsiksik*

<sup>22</sup> Jesus allaluhlahng nehn kahnihmw apel koujapw kan padpadahk oang armaj kan nehn Ah allaluhlahng Jerusalem. <sup>23</sup> Armaj men idoak oang Ih, "Maing, mehleh pwa armaj jipidpwi oar pirin mourla?"

Jesus japoangla irai, <sup>24</sup> "Kamwai engdehn in alu nehn wanihmw soahsiksikko; pwa Ngoahi pwehng kamwai, armaj ngoadoar pirin jong dilda, a irai pirin johkak. <sup>25</sup> Nehn en koaunin umw men ah pirin uhda apel risingdi wanihmw in umwahu, kamwai pirin mine likin apel lesles apel pwa, 'Maing, risingdahng kamai.' Ih pirin japoangki kamwai, 'Ngoahi jehjoa mihn ia pwi kamwai.' <sup>26</sup> Kamwai pirin japoangki, 'Kamai ma pwili koawoa mwinge apel nim, apel koawoa ma ne padpadahk nehn amai kahnihmw!' <sup>27</sup> Ih pirin pel pwa, 'Ngoahi pel jehjoa ia wija kamwai injang. Kamwai alwe jang ngoahi, kamwai ohroj armaj mwoarjuwed pwi!' <sup>28</sup> Ia woahr amwai pirin joang apel keikeikeisakai nehn amwai pirin widahli Abraham, Isaac, Jacob apel joukohp ohroj nehn Wein Koahs, a kamwai pirin kerpwihek jang loaloo! <sup>29</sup> A mihn palimese apel palikapi, mihn paliepeng apel palieir, pirin wud indoa mwindihoang kamdipw nehn Wein Koahs. <sup>30</sup> Kamwai en kidal pwa iraihok ma mwerin anjoau oauwe, irai pirin mijoahla anjoauwo; a armaj in mijoa kan apkas irai pirin mwerinla."

*En Jesus Limpoak oang Jerusalem*

<sup>31</sup> Nehn oar anjoauwo Pharisee pwi pwokdohng Jesus apel pwehng, "Maing, koawoa pirin uhdahn injang me, inlahng ekij wija sohrohr, pwa Herod nimen kojukdi koawoa."

<sup>32</sup> Jesus japoangla irai, "Kamwai alwe apel pwehng fox menen: 'Koawoa en kidal pwa rehn oauwe apel lakapw, Ngoahi pirin kauj jang ngen jaus kan ipen armaj kan, kemwehuwihla johmwewu kan; apel nehn kajiluh in rehn Ngoahi pirin kadoarihla Oai doadoahk.' <sup>33</sup> A, rehn oauwe, pel lakapw, pel pali, ma Ngoahi uhdahn allaluhla; pwa joh wijahkij koanoahng joukohp men kin kojkojdi likin Jerusalem.

<sup>34</sup> "Jerusalem, Jerusalem! Koawoa ma kin kojukdi joukohp kan, apel kin kasoahki sakai jounpakair kan ma koadoaddoahng koawoa! Ia woahr koalik in Oai nimen jupwurkihpene poaihoa kai nihmw armaj kan, doahroar jummwa pein men kin pwainkihpene nah kan pehn poah kan, a koawoa kia mweidoahng Ngoahi! <sup>35</sup> Doari, pirin johla sohn oamw Umw Joarwihen! Koawoa en kidal pwa koawoa johla pirin kapang Ngoahi, oaroh lel anjoau ma koawoa pirin pwa, 'Koahs en kapaiahda Ih ma indoa in oadoan Koaunno!' "

<sup>1</sup> Rehnin Sabbath oau Jesus pwili mwinge ipen Pharisee janjal men nehn umwahu; a armaj kan inenin mwajmwajahni Ih. <sup>2</sup> Woal men, ma ehn apel poah kan likammasda, indoa ipen Jesus. <sup>3</sup> Jesus pwehnglahng jounpadahk in Kojonneddok apel Pharisee-ok, Ih idoak, “Ma asai Kojonneddo mweidda pwa kisai en kemwehuwihla armaj rehnin Sabbath, ke joah?”

<sup>4</sup> Irai nennenlahr johpwa lallal. A Jesus oaloo woallo kemwehuwihla, kadarla ih. <sup>5</sup> Ih pel pwehng irai, “Mine emen ipamwai ma nah jeri ke nah kahu men pirin kipdihoang nehn lipw oau rehnin Sabbath, a ih jehpirin pispis oapihdahjang loaloo, mihnda ma rehnin Sabbath?”

<sup>6</sup> Irai ken johkak japoangki Ih mehkij.

#### *Aksiksik apel Kadek*

<sup>7</sup> Jesus soahkda doahroar epwi ma lukdo kan ahr kin pilda dohiarai wija kan ma keiou mwehu, Ih pwehng irai ohroj karajraj pase: <sup>8</sup> “Ma emen luke koawoa oang in kamdipw in koapwoapwoaud oau, joah mwindi nehn wijahu ma keiou mwehu. Pwa emen ma laplap jang koawoa pel kakkoar pwili lukdohng in kamdippwo, <sup>9</sup> ih ma luke kamwa doar indoa, pwehng koawoa, ‘Kioang woal mene dohioamwen.’ Koawoa nen jarohdi sohdiha in mwerinno. <sup>10</sup> A ma koawoa pirin oaloo luk, indoa mwindi in mwerin pwa ih ma luke koawoa en indoa pwehng koawoa, ‘Oai pirien, menlau indahdo in mijoa,’ Me pirin kahrehioang oamw woanla ipen ohroj lukdo kan. <sup>11</sup> Pwa irai ohroj ma kin kajapwilda pein ihr, nen siksikla; a ihr ma kin aksiksikki pein ihr, nen laplapla.”

<sup>12</sup> Jesus pel pwehng woallo ma luke ih, “Nehn oamw pirin wiahda mwingehn injauwaj ke injoausik, joah luke oang oamw pirien kan, ke rioamw kan, ke pel kijehmw kan, ke mihn ipoamw koapwoahpwoa kan — pwa doar irai dupuk oang koawoa luke oang koawoa in arai kamdipw. <sup>13</sup> Ma koawoa pirin wia oamw kamdipw, a koawoa en luke armaj joamwoahmwoa kan, armaj dangpel kan, armaj mwoasor kan, apel armaj majkun kan. <sup>14</sup> A, koawoa pirin kapaيدا, pwa irai johkak dupuk oang koawoa. Koawoa pirin oaloo dupkoan oamw kadek jang ipen Koahs nehn anjoau ma ihr ma lelpoak kan pirin iejda jang mehdi.”

#### *Karajraj in Kamdipw Koalik*

<sup>15</sup> Nehn en emen sohnkapparok ma pwili mwindi in sehpyllo ah rongda mehpywai, ih pwehnglahng Jesus, “Ia woahr kaperen in iraihok ma pirin pwili mwindihoang in kamdippwo nehn Wein Koahs!”

<sup>16</sup> Jesus pwehnglahng ih, “Mine woal men ma wiahda kamdipw koalik oau; ih luke armaj ngoadoar oang in kamdippwo. <sup>17</sup> Ne lel anjoaun mwinge, ih kadarla nah lidu men ipen ihrrok ma ne oaloo luk, ‘Indoa pwa joang ohroj ne onopda.’ <sup>18</sup> A emenemen irai ken pwahda kahrpoan ah johkak pwili inla. Emen pwehng liduhwo, ‘Ngoahi dupukda japw oau, ngoahi uhdahn pirin inla kapang; menlau oalohda oai poakmahk e.’ <sup>19</sup> A emen pel pwehng ih, ‘Ngoahi dupukda noai kahu mwein eijek, ngoahi allaluhlahng jongda irai apkas. Menlau oalohda oai poakmahk e.’ <sup>20</sup> A emen pel pwa, ‘Ngoahi kapwehsen pwoapwoaudla, ioar kahrehda ngoahi joh kak pwilihki alwe.’ <sup>21</sup> Liduhwo pwurla pwehng ah koaunno mehkan ohroj. Koaunno inenin lioas, ih pwehng nah liduhwo, ‘Alwe nehn allap kan apel aljop kan in nehn kahnihmw oauwe, koawoa ukdo ihr joamwoahmwoa kan, ihr dangpel kan, ihr majkun kan apel mwoasor kan.’ <sup>22</sup> Mwerin anjoau oau, liduhwo pel pwa, ‘Maing, joang ohroj ne wiawi doahroar da ma koawoa pwahla; apel minminehr dohn epwi.’ <sup>23</sup> Koaunno pel pwehng liduhwo, ‘Alwe nehn alin likin kahnihmw oauwe, pwehng armaj kan en indoa pwa umwoaie en dirla. <sup>24</sup> Kamwai ohroj en kidal pwa johpwa emen in irai ma oaloo lukkok pirin pwili jong oai kamdippwe!’ ”

### *Mourin Pwili Jesus*

<sup>25</sup> A pokon koalik oau kahkahkauj Jesus, Ih pwurlahng irai pwa, <sup>26</sup> “Ma emen nimen kauj Ngoahi apel pwilihla Ngoahi, a ih ipwilki jamah, inah, pahioa, nah jerihkan, riah kan apel pein ih koalik jang ah ipwilki Ngoahi, ih joh kak en wiahla Noai sohnpadahk. <sup>27</sup> Apel emen ma johkak wahda ah lohpuw apel kaujdo Ngoahi, ih johkak wiahla Noai sohnpadahk. <sup>28</sup> Pwa ma emen ipamwai, nehn ah koajkoajoane en kouda ah umwen iroir oau, a ih pirin mwindi lemleme ma isar nah mwanihn kadoarihla doadoahkko. <sup>29</sup> Pwa ma joah, ih johpwa nen kak kadoarihla umwen iroirro mwerin ah ne kihdihoang poahjoanno. Armaj ohroj ma kapang, irai pirin uruhrkihda ke kapiski, pwa, <sup>30</sup> ‘Armaj mene sapkihda kouda umw oau, ih johkak kadoarihla!’ <sup>31</sup> Ma nahmwarki men pirin mahwinki armaj 10,000 (nen) oang emen nahmwarki sohrohr ma nainki armaj 20,000 (rienen), ih uhdahn pirin mwindi lemleme ma ih kak kalwehkihdi armaj rienenno nah armaj nenno. <sup>32</sup> A ma ih johkak, a ih pirin kadarla nah jounpakair nehn ara dohpjoang pwa en poakmahk apel nehnpwungmwehula.” <sup>33</sup> Jesus pel pwa, “Ioar pel doahroar kamwai; johpwa emen kamwai kak wiahla Noai sohnpadahk, ma ih joah mweijang me ohroj ma ih anki.”

### *Jed ma Joh Kaspoa*

<sup>34</sup> “Jed mehkij ma mwehu, a ma nimen jeddo johla, joh mehkij kak kajpahlihdo nimen jeddo. <sup>35</sup> Ih pel johla kaspoahng pwirej ke koiaji; ih kin kejpwihlekla. Rong, ma mine sioammwen!”

## 15

### *Jihpw ma Joaloangla*

<sup>1</sup> Rehn oau dirin jounrik daksis apel armaj jekenken kan indoa pwa irai en rong Jesus. <sup>2</sup> Pharisee-ok apel jounpadahk in Kojonneddok sapda lipahned, pwa, “Woal mene kin kajamwo ihr ma jekenken kan apel kin pwili mwinge iparai.” <sup>3</sup> Jesus pwehng irai karajraj pase:

<sup>4</sup> “Ma mine emen kamwai ma nah jihpw epwiki, a emen joaloangla — da ih pirin wia? Ih joah pirin kihdi min duweijek dohmenno nehn mohj, apel inla raprapahkihjili jihppwo ma joaloanglahu oaroh ih kapangda? <sup>5</sup> A nehn ah ne kapangda, ih perenda kihdahng pohn aproa <sup>6</sup> wahlahng in umwahu apel kapokonpene ah piriennok apel mihn ipoahk, pwehng irai, ‘Kamwai pwili ngoahi malauda pwa ngoahi ne kapangda noai jihppwo ma joaloangla. Kisai kamdipw!’ <sup>7</sup> Ngoahi pwehng kamwai, pwa me pirin doahroar perenno ma mine nehnloange ma armaj dipan mennoar koaluhla jang armaj 99 (duweijek dohmen) ma pwung apel joah anahne koaluhla.”

### *Mwaniho ma Joaloangla*

<sup>8</sup> “Imdoahr ma mine lihmen ma nah mwani silper eijek, a oau joaloangla, da ih pirin wia? Ih akanda lahm oau, pohkda nehn umwahu apel rapahki mwehu wija ohroj, oaroh ih kapangda mwaniho. <sup>9</sup> A nehn ah ne kapangda, ih pirin panginpene ah piriennok apel mihn ipoahk, pwehng irai, ‘Kamwai pwili ngoahi malauda, pwa ngoahi ne kapangda noai mwani wa ma joaloangla!’ <sup>10</sup> Ngoahi pwehng kamwai ioar doahroar nihn Koahs sohnloang kan, irai kin malaukihda armaj dipan men ma koluhla.”

### *Jermweinno ma Joaloangla*

<sup>11</sup> Jesus pel pwa, “Mine woal men ma nah jermwein roahmen. <sup>12</sup> Jermwein siksikko pwehng jamahu, ‘Pahpa, kihdoahng ngoahi oai pwaij ma uhdahn oai jang in johjo.’ Jamahu ken nehkpjoang johjo oang nah jermwein roahmenno. <sup>13</sup> A mwerin rehn pwi, jermwein siksikko noaskihla ah pwaij jang in ah johjo, wahda mwanihok, jeiloaklahng japw doh oau wija ih kerpwihla mwahl nah mwanihok

in mour juwed apel siahk nauna. <sup>14</sup> Nehn ah koarjoahla ah me ohroj, a lehk koalik oau lel jappwo, jermweinno sapda mwakohkohla. <sup>15</sup> Ih inla ipen pwildak in jappwo men pwa en doadoahk ipoa, ih ken kadarla jermweinno en apwali nah pijjok. <sup>16</sup> Jermweinno kin nimen pwili kang kenen pijjok, joh armaj kioang ih en kang. <sup>17</sup> Nehn ah poahmda ah japwung, ih pwa, 'Ia woahr dirin mwinge ipen nihn joamoaiho sohndoadoahk, a ngoahi ken pirin mehkihdi oai mwakohko! <sup>18</sup> Ngoahi pirin uhda, pwurla ipen joamoaiho pwehng ih, "Pahpa, ngoahi ne dipda ipen Koahs apel ipoamw. <sup>19</sup> Ngoahi ne johla koanoahng koawoa en nainki; wiahkihla ngoahi emen nihmw sohndoadoahk." ' <sup>20</sup> Ih uhdahr ken pwurla ipen jamahu.

"Ih kahjikkoar koaroannoang ummwo, a jamahu ne kapangda ih. Nehn kapehdin mwoakidkihda koalikin ah ipwilkihda nah jermweinno. Ih kijoulahr jupworpene misik. <sup>21</sup> A, jermweinno pwa, 'Pahpa ngoahi ne dipda ipen Koahs apel ipoamw; ngoahi ne johla koanoahng en adanki nihmw jermwein.' <sup>22</sup> A jamahu pangin nah liduhwok, pwehng irai, 'Kamwai pispis wahdo likkoauwa ma keiou mwehu kalikkoauwihkihda ih. Kamwai kioang rihng in jandin poah apel ju in ehn. <sup>23</sup> Kamwai wahdo kahu pwulopwul moad kojukdi, pwa kisai en kamdipwki! <sup>24</sup> Pwa noai jermweinne ne mehdi, ah ne pel mourda, ih ne joaloangla, a ne pel diarekda.' Irai sapda kamdipw.

<sup>25</sup> "Anjoauwohr jermwein koalikko minmine nehn japw. Anjoauwo ih koaroandohng ummwo, ih rongda ahr koajkoajoang apel kahkahlek. <sup>26</sup> Ih pangindo emen liduhwok, idoak ipoa, 'Dahkij wihwiawi?' <sup>27</sup> A liduhwo japoang pwa, 'Rioammwo ne pwurdo, joamoammwo kojukdi kahu pwulopwul moaddo, pwa ih pwurdohng ih, mour apel sihkei.' <sup>28</sup> Jermwein koalikko inenin lioas johpwa nimen dilda nehn ummwo. Jamahu dilla likin, poaki ipoa en dilda. <sup>29</sup> Ih japoangki jamahu, pwa, 'Johnpar dihrdir ngoahi ne doadoahk oang koawoa doahroar lidu men apel johpwa koauwehla oamw kojoned oau. A dahkij koawoa kioang ngoahi? Pel johpwa kuhs men ma ngoahi en kamdipwihki oai piriennok! <sup>30</sup> A, nihmw jermweinno ma ne koarjoahkihla ah johjo oang li juweddok, a koawoa ken kojuk oang kahu pwulopwul moaddo nehn ah pwurdo!' <sup>31</sup> Jamahu japoang, 'Noai jeri, koawoa kin minminehr ipoai anjoau ohroj, apel oai koapwoa ohroj oamw. <sup>32</sup> Mwehu koawoa en pwili kamai perenda wia kamdipw oauwe, pwa rioammwo ne mehdi, a ne pel mourda; ah ih ne joaloangla, ih ne pel diarekda.' "

## 16

### *Jounkouwa Mwoarjuwed*

<sup>1</sup> Jesus pel pwehng Nah sohnpadahkkok, "Woal koapwoahpwoa men mine, ma nah lidu men kin kohwahki ah koapwoahk. Woal koapwoahpwoahu rongda pwa jounkouwahu kin wia koauwehla ah koapwoahk. <sup>2</sup> Ih pangindo nah jounkouwahu idoak ipoa, 'Imdoahr rong pase ma pid koawoa? Kajalehda me ohroj doahroar oamw apwali oai koapwoa kan, pwa koawoa ne johla wia noai jounkouwa.' <sup>3</sup> Jounkouwahu pwehng pein ih pwa, 'Dahkij ngoahi en wia? Pwa oai koaunno ne pirin kihjang oai kouwa doadoahk. A ngoahi jasihkei in doadoahk nehn pwirej, ngoahi mehk in poakpoakjili. <sup>4</sup> Apkas ngoahi ne kidal pwa da ngoahi en wia! Pwa ma ngoahi ne johla doadoahk, oai pirien kan en kak kajamwo ngoahi oang nehn umwarai kan.' <sup>5</sup> Ih pangindo armaj ohroj ma pwaipwanid oang ah koaunno. Ih idoak ipen armajjo ma indoa keiou, 'Ia woahr oamw pwaipwanid oang koaunno?' <sup>6</sup> A ih japoang, 'diroam in oail olip epwiki.' A ih pwehng, 'Oaloa nihmw pukken pwaipwanid en, mwindi insingehdi diroam limeijek.' <sup>7</sup> A ih pel idoak ipen emen, a koawoa, 'Ia woahr oamw pwaipwanid?' A ih japoang, 'Pehk in pilahwa kid.' A ih pwehng, 'Oaloa

nihmw pukken, mwindi insingehdi pehk walipwki.’ <sup>8</sup> Nehn en koaunno kidalda, ih kapngahla loalkoang mwoarjuwed in jounkouwahu; pwa armaj kan ma kijehn jampah, irai ma kin lemlemehr pein irai koalikjang armaj kan ma kijehn maram.”

<sup>9</sup> Jesus pel pwa, “Ngoahi pwehng kamwai, kamwai en doadoahkkihoang armaj kan amwai koapwoahn jampah kan, pwa irai en wiahla amwai pirien, pwa nehn amwai koapwoa kan nen johla, Koahs pirin kajamwo kamwai oang nehn dohiamwai joahsuk.

<sup>10</sup> Inje ma kin mehlel oang mehkij ma siksik, ih pirin pel mehlel oang mehkij ma koalik; apel ih ma kin joah mehlel oang mehkij ma siksik, ih pirin pel joah mehlel oang mehkij ma koalik. <sup>11</sup> Ma kamwai johpwa pirin mehlel oang pai in jampah kan, a inje pirin mehlel oang kamwai in pai mehlel kan in puwoa? <sup>12</sup> Apel ma kamwai joah mehlel oang doadoahk in kouwahki oang emen ah dipwjoau, a inje ma pirin kioang kamwai mehkij pwa en wia uhdahn amwai?

<sup>13</sup> “Joh lidu men kak papah koaun roahmen, pwa ih pirin lioassoang emen a ipwilki emen; ih pirin kajampwalki emen, a mwamwahlki emen. Doari, kamwai johkak papah Koahs apel mwani.”

### *En Jesus Lal pwi*

<sup>14</sup> Pharisee-ok pwili rongrong mehpwaii ohroj; irai kin kapkapiski Jesus, pwa ahr kajampwalki mwani. <sup>15</sup> Jesus pwehng irai, “Kamwai kin akpwungki pein kamwai mwohn mijen armaj kan, a Koahs pwen kidal nehn mohngiongimwai kan. Dahkij ma armaj kin kajampwalki, kin wiahla mehkij mwahl mwohn mijen Koahs.

<sup>16</sup> “Manmanin Kojonned in Moses apel padahk in joukohppok ne mine jang kawahu indoa lel nehn mwein John jounpoapdaij; a jang nehn anjoauwo Rongmwehu doahroar Wein Koahs lolohkjili apel armaj ohroj kin engdehunki en dildahng nehn Wein Koahs. <sup>17</sup> A pwen moangoai oang nehnloannge apel jampah en johrla jang iroa keiou siksik kij in Kojonneddo en johrla.

<sup>18</sup> “Ma woalmen mweijang pahioa, painkihda emen li sohrohr; ih wiahda dipen kamwahl; apel emen ma painkihda li ma pahioahu ne mweijang, ih pel wiahda dipen kamwahl.”

### *Waal Koapwoahpwoa men apel Lazarus*

<sup>19</sup> “Anjoau oau waal koapwoahpwoa men mine ma kin likkoauki likkoau keiou mwehu apel mourki mour koalik dupkoa rehn ohroj. <sup>20</sup> Pel mine waal joamwoahmwoa men oadoa Lazarus, ohla kilin, ma kin wijiklahng in wanihmw in umwen waal koapwoahpwoahu; <sup>21</sup> pwa ih kin nimen kang mwoarmwoar in mwinge ma ki kipdihjang pohn en waal koapwoahpwoahu ah sehpyllo. Doahkkok kin pel samwsamwe ah ohlahk. <sup>22</sup> Waal joamwoahmwoahu mehdi, sohnloanngek wahdahla ih nehnloannge ipen Abraham. Waal koapwoahpwoahu pel mehdi joajjoardi, <sup>23</sup> nehn ah weiweiroak nehn Hades, ih jipwoaldahla kapangda Abraham wija doh, a Lazarus mine ipoa. <sup>24</sup> Ih poangpoangdahla pwa, ‘Pahpa Abraham, ipwilkihda ngoahi! Kardo Lazarus pwa en kadu jandin poah nehn pil, ih kamwolouwihki loawoaiou, pwa ngoahi ne inenin pwidengla nehn oai oauwe.’ <sup>25</sup> Abraham japoang, ‘Noai jeri, lemleme pwa koawoa ne oalou me mwehu ohroj nehn oamw mour, a Lazarus oalou joang nauna ohroj, ioar mehwa ih injenmwahuki anjoau oauwe, a koawoa mine nehn oamw moadoak. <sup>26</sup> A pel oau, wahu koalik oau mine nehn pwungasai; ihr ok ma nimen doauwe jang loappoauwe johkak, pel ihr ok ma nimen doado jang men pel johkak.’ <sup>27</sup> Waal koapwoahpwoahu japoang, ‘A ngoahi poaki ipoamw, pahpa Abraham, karda Lazarus in umwen joamoiho, <sup>28</sup> ipen rioai jermwein limmenno. Karda ih en kaperki irai pwa irai en joah indoahng wija kamadoak kije.’

<sup>29</sup> “Abraham pwehng ih, ‘Moses apel joukohppok mine ipen rioammwok pwa en kaperki irai joang ohroj; rioammwok en rong da irai pwa.’ <sup>30</sup> Waal



koapwoahpwoahu japoang, pwa, 'Maing, Pahpa Abraham, joang oauwe johpwa isar! Ma emen jang ipen irai ma ne mehdi kan iejda inla iparai, a irai nen pwurjang diparai kan.' <sup>31</sup> A Abraham japoang, 'Ma irai joah rong Moses apel joukohppok, irai pel jehpirin kamehlele emen ma pirin iejda jang ipen ihr ma ne mehdi.' "

## 17

### *Dihp*

<sup>1</sup> Jesus pwehng Nah sohnpadahkkok, "Joang kan ma kin kahrehioang armaj nehn dih p uhdahn kin pwen wiawi; a meid naunahng armajjo ma kin kahrehda joang pwiai! <sup>2</sup> Ma emen ma kahrehng jeri siksik pwiai nehn dih p, mwehu oang oau sakai koalikko en pirapirroang in sipinwoaroa peidekla nehn madauwo. <sup>3</sup> Kamwai en kalke pein kamwai!

"Ma rioamw men dipda, woarwoarihda; ma ih koaluhla, mahkoahng. <sup>4</sup> A ma ih wiahda japwung oang koawoa pehn ijuh nehn rehnoau, a pehn ijuhwo ih indoa ipoamw pwa, 'Ngoahi koaluhkihla oai japwung,' a koawoa uhdahn pirin mahk oang."

### *Pwojon*

<sup>5</sup> Woaroakkok pwehng Koaunno, "Maing, kakoalikhla amai pwojon."

<sup>6</sup> Koaunno japoang irai, "Ma amwai pwojon woahr liporrohn mustard oau, kamwai kak pwehng suhkoa pase, 'Pein wijjekda jang men inla poaddi nehn madauwo,' a ih nen peik oang kamwai.

### *En Lidu men ah Pwukoa*

<sup>7</sup> "Ma emen in kamwai mine nah lidu ma mwoasmwoaswel ke appwapwali jihpw nehn japw; a nehn ah pirin pwurdo jang nehn japw, kamwai kin pwehng en karwaro inla mwingehla? <sup>8</sup> Joh douluhl! Koawoa en pwehng ih, 'Koaunopda koanoai mwingehn joausik, koawoa sahpis oang ngoahi nehn oai mwingmwinge apel nim pil; mwerin, koawoa kapwa mwinge.' <sup>9</sup> Lidu men joah koanoahng oaloo kajpahl kalahngan, ma ih peik oang ah koaunno. Ke da? <sup>10</sup> Ioar pel doahroar kamwai; kamwai pirin pel kapwaihahda meohroj ma kileldi oang kamwai en wia, kamwai en kin pwa, 'Kamai lidu pwi; ioar oar pwoaijoamai, kamai en kapwaihahda amai pwukoa.' "

### *Jesus Kemwehuwihla Woal Lepa Eijek*

<sup>11</sup> Nehn en Jesus allalulahng Jerusalem, Ih wud nehn pwungen Samaria apel Galilee. <sup>12</sup> A nehn Ah dilda nehn koujapw oau Ih suhwoang woal lepa eijek. Irai uhda ekij dohla, <sup>13</sup> rahrahulahng, pwa, "Maing, Jesus amai Koaun! Jeuweje kamai."

<sup>14</sup> Jesus kapangda irai, Ih pwa, "Kamwai alwe ipen jamwrouwok oaloo kajau iparai."

A nehn anjoau ma irai allaluhla, irai ne mwakelkelda. <sup>15</sup> Emen in irai, nehn ah kapangda doahroar ah ne mwakelkelda, ih pwurdo ipen Jesus, ngil koalikda kapkapnga Koahs. <sup>16</sup> Ih poadpwomwla mwohn ehn Jesus pel kapkapnga Ih. A woallo mihn Samaria men. <sup>17</sup> Jesus pwa, "Jaudi irai woal eijek ma ne mwakelkelda? A ia irai dohmenwa? <sup>18</sup> Da wia mihn likin menehr ma pwurdo pwa en kajpahl kalahngan oang Koahs?" <sup>19</sup> Jesus pwehnglahng woallo, "Doari, uhda, alwe pwa oamw pwojonnen ne kemwehuwihla koawoa."

### *Indoahn Wein Koahs*

<sup>20</sup> Pharisee pwi kalelpoak ipen Jesus, "Ngehd Wein Koahs pirin indoa?" Ih japoang irai, pwa, "Wein Koahs joh kin indoa in mwomw janjal. <sup>21</sup> Joh emen pirin pwa, kapang ioar ih me, ke ioar ih o; pwa Wein Koahs ne mine nehn kamwai."

<sup>22</sup> A ih pwehnglahng Nah sohnpadahkkok, “Anjoau oau pirin indoa ma kamwai nen nimen kapang rehn in Nihn-Armaj, a kamwai nen johkak. <sup>23</sup> Mine irai pwi pirin pwehng kamwai, ‘Kamwai rapahki o! Ke, rapahki me!’ A kamwai joah alwe rapahki. <sup>24</sup> Pwa doahroar en joarom kin kamaramihda jampah jang oaloap lel oaloap, me ioar doahroar pirin wiawi rehn in Nihn-Armaj. <sup>25</sup> A keiou, Ih pirin oaloo loklok koalik, a armaj in nehn mwei oauwe joah nimen oalooahda Ih. <sup>26</sup> Dahkij ma wiawi nehn mwein Noah, ioar nen pel wiawi nehn mwein Nihn-Armaj. <sup>27</sup> Armaj ohroj kamkamdipw, jakjakau, pwoapwoaud mwahl, oaroh lel rehnno ma Noah dilloang nehn warihmmwo, nohlik koalikko leldo, kojukdi ihr ohroj. <sup>28</sup> Pel doahroar da ma ne wiawi in mwein Lot, armaj ohroj kamkamdipw, jakjakau, noasnoas, japwjpaw, kokou umw; <sup>29</sup> A rehnno ma Lot injang nehn Sodom, oai apel sulfur mwoardi jang nehnloange, kojukdi ihr ohroj. <sup>30</sup> Ioar doahroar ma pirin wiawi nehn rehn in Nihn-Armaj Ah pirin janjalda.

<sup>31</sup> “Nehn rehnno armaj men ma mine pohn umwahu, ih en joah doaudi oaloo ah koapwoa. Pel doahroar armaj men ma minmine nehn japw, ih en johpwa pwurdo in umwahu. <sup>32</sup> Samsaman pahien Lot-o! <sup>33</sup> Inje ma nimen doaroahla ah mour, ih pirin luhj jang; a emen ma nimen mindahkihla ah mour, ih pirin mourla. <sup>34</sup> Ngoahi pwehng kamwai pwa pwonngo armaj roahmen pirin moair pohn pehd oauwoar, emen pirin wijikjang, a emen pirin luhwoahdi. <sup>35</sup> Li roahmen pirin daulahk pilahwa; emen pirin wijikjang, a emen pirin luhwoahdi. <sup>36</sup> [Armaj roahmen pirin minmine nehn japw, emen pirin wijik jang, a emen pirin luhwoahdi.]”

<sup>37</sup> Sohnpadahkkok idoak ipen Jesus, “Maing, ia wija mehpwai pirin wiawi?”

Jesus japoangki irai, “Wija ma palwar mehdi oau mine, ioar wijahwa vulture kin pokonlahng.”

## 18

### *Karajraj in Liohdi apel Jounkoapwung men*

<sup>1</sup> Jesus pwehng Nah sohnpadahkkok karajraj pase, pwa en padahkihoang irai en kin poaden kapkap, joah koakoahkla. <sup>2</sup> “Jounkoapwung men mine nehn kahnihmw oau, ih johkin mijik Koahs apel joh kin woauki armaj. <sup>3</sup> Liohdi men pel minehr nehn kahnihmwo, ma kin pwurpwuroa jounkoapwunngo en rapahki ah pwung, poaki ipoa, ‘Jeuweje ngoahi nehn roapoan pwung oang poalloaiho!’ <sup>4</sup> Anjoau roairoai jounkoapwunngo johpwa nimen wia mehkij, mwuhr ih pein lemehda nehn kapehdin, ‘Mihndahr ma ngoahi joh kin mijik Koahs apel joh kin woauki armaj, <sup>5</sup> a ngoahi pirin jeuweje lihmene en rapahkihda ah pwung, pwa ih en johla kadroapwoa ngoahi apel johla kin pwurdo koauwehla oai anjoau.’”

<sup>6</sup> Jesus pel pwa, “Rong da ma jounkoapwung nauna mene pwahpwahpwa. <sup>7</sup> A, imdoahr, Koahs nen joah pirin jeuweje Nah armaj kan ma kin poak jauwaj inrehn apel inpwong? Ih pirin kos in jeuweje irai? <sup>8</sup> Kamwai en kidal pwa ih uhdahn pispis in jeuweje irai ki arai anahn kan. A Nihn-Armaj pirin diar pwojon nehn jampah nehn Ah indoa?”

### *Karajraj in Pharisee apel Jounrik Daksis men*

<sup>9</sup> Jesus pel pwahla karajraj pase oang armaj pwi ma kin akpwungki pein ihr apel lioassoang epwi: <sup>10</sup> “Armaj roahmen inlahng kapkap nehn Umw Joarwiho; emen ira Pharisee, a emen jounrik daksis. <sup>11</sup> Pharisee-o uhda kapkap ih pwa, ‘Maing Koahs, ngoahi kapingkalahngan kioang koawoa oai joh kin noaroak, oai joh kin mwoarjuwed, oai joh kin kamwahl doahroar armaj kan. Ngoahi pel kapingkalahngan kioang koawoa oai pel johpwa doahroar jounrik daksis mene. <sup>12</sup> Ngoahi kin kaijihjol pehn riau nehn wihk oau, apel ngoahi kin meiroangki eijek kij oau jang

nehn meohroj ma ngoahi anki.' <sup>13</sup> A jounrik daksisso uhda ekij dohlahjang, ih joah nimen jardahlahng nehnloange, a ioar mehwa ih wihwia, pokpoki nehn pwalah, pwa, 'Maing Koahs, mahk oang ngoahi, armaj dipan men!' " <sup>14</sup> Jesus pwa, Ngoahi pwehng kamwai, "Kamwai en kidal pwa jounrik daksisso pwungla ipen Koahs, ih pwurla in umwahu; a Pharisee-o joah. Pwa ohroj ma kin akplapki pein ihr, pirin siksikla; a ohroj ma kin aksiksikki pein ihr, pirin laplapla."

### *Jesus Kapaiahda Jeri Siksik pwi*

<sup>15</sup> Armaj pwi wahdohng Jesus nihrai jeri siksik pwi pwa en kihdahng poah pohrai. Sohnpadahkkok kapangda ken woarwoarihda irai. <sup>16</sup> A Jesus pangindo jeri siksikkok apel pwehnglahng sohnpadahkkok, "Mweidoahng jerihkan en indoa ipoi. Kamwai joah iroahdi irai; pwa wein Koahs ioar wein joangoan armaj pwiai. <sup>17</sup> Mehlel Ngoahi pwehng kamwai, pwa emen ma jehpirin oaloahda Wein Koahs doahroar jeri siksik men, ih johkak dilda loaloa."

### *Waal Koapwoahpwoa men*

<sup>18</sup> Emen koaunin mihn Jew-ok idoak ipen Jesus, "Jounpadahk mwehu, dahkij ngoahi uhdahn wia pwa ngoahi en kak oaloahki mour joahsuk?"

<sup>19</sup> Jesus pwehng ih, "Amwda koawoa ke panginki Ngoahi jounpadahk mwehu? Joh emen ma mwehu, Koahs kalahpwuk. <sup>20</sup> Koawoa ne kidal kojoned kan: 'Joah kamwahl; joah kojukdi armaj; joah pirap; joah likamw; woaunki joamoamw apel inoamw.'" "

<sup>21</sup> Woallo japoang Jesus, "Ngoahi ne kapwaihahda kojoned pwiai jang nehn oai siksik."

<sup>22</sup> Nehn en Jesus rong, Ih pwa, "Pel mine mehki koawoa anahne wia. Noaskihla meohroj koawoa anki, kioang dupkoa kan armaj joamwoahmwoa kan, oamw pai nehnloange nen koalikla; indoa pwilihla Ngoahi." <sup>23</sup> Nehn en woallo rongda me, ih inenin injinjuwedla, pwa ih waal inenin koapwoahpwoa men.

<sup>24</sup> Jesus kapang doahroar ah injinjuwed, Ih pwa, "Ia woahr apwal in armaj koapwoahpwoa en dilda nehn Wein Koahs! <sup>25</sup> Apwal oang armaj koapwoahpwoa men en dilda nehn Wein Koahs jang kamel men en dilda nehn pwokin sihpas."

<sup>26</sup> Irahok ma rongrong Jesus kalelpoak pwa, "A doar inje ma kak mourla?"

<sup>27</sup> Jesus japoang, "Mehki ma johkak ipen armaj, a uhdahn kak ipen Koahs."

<sup>28</sup> Peter pwehng Jesus, "Maing, kapang! Kamai ne injang umwamai kan, pwa kamai en pwilihla koawoa."

<sup>29</sup> Jesus pwa, "Ngoahi pwehng kamwai in mehlel, ma emen injang umwah, pahioa, riah, jamah, inah, nah jerihkan ki Wein Koahs, <sup>30</sup> pirin oaloa dupkoa koalik nehn mour oauwe, apel nehn mour joahsuk ma allaluhdo."

### *Kajilpak in en Jesus siko doahroar Ah pirin Loklok apel Mehdi*

<sup>31</sup> Jesus kalahpwukihla Nah sohnpadahk eijek roahmenno, pwehng irai, "Kapang! Pwa kisai allaluhlahng Jerusalem, wijahu ma meohroj joukohppok ne insingehdi doahr Nihn-Armaj, pirin pwoaida. <sup>32</sup> Ih pirin likliklahng ipen mihn likinnok, ma pirin kapiski Ih, kihjang woan in Ih, apel andipoa Ih. <sup>33</sup> Irai pirin poki apel kojukdi Ih, a rehn kajiluh Ih pirin iejda."

<sup>34</sup> A sohnpadahkkok johpwa woahwoahki da Ih pwa; woahwoahn lal pwiai rirjang irai, irai joh kak en woahwoahki dahkij Jesus pwahpwapwa.

### *Jesus Kemwehuwihla Waal Majkun men*

<sup>35</sup> Nehn en Jesus ne allaluhla koaroanlahng Jericho, mine waal majkun men minmine imwin allo mehlahn poakpoak mwani. <sup>36</sup> Nehn ah rongda pokonno daulihla ih, ih idoak, "Dahki wiawi?"

<sup>37</sup> Irai pwehng ih, "Jesus mihn Nazareth ma allaluhla."

<sup>38</sup> Woallo rahulahng, "Jesus! Nihn David! Jeuweje ngoahi!"

<sup>39</sup> Armajjok ma mine mijen pokonno woarwoarihda ih, apel pwehng ih en nennenla. A ih kapwa kakoalikhla ngiloa, pwa, "Maing, koawoa ma nihn David! Jeuweje ngoahi!"

<sup>40</sup> Jesus uhdi ruwoj woal majkunno en wijikdo ipoa. Nehn en woallo koaroando ipoa, Ih idoak oang, <sup>41</sup> "Da koawoa nimen Ngoahi en jeuwejehki koawoa?"

A ih pwa, "Maing, ngoahi anahne pwuroahng kapangda wija."

<sup>42</sup> Jesus pwehng ih, "Ken kapangda! Oamw pwojon en ma kemwehuwihla koawoa."

<sup>43</sup> Nehn anjoauwohr ih kak kapangda wija, ih ken pwilihla Jesus apel kapkapnga Koahs. Nehn en pokonno kapang manman oauwe, irai ohroj pel kapkapnga Koahs.

## 19

### *Jesus apel Zacchaeus*

<sup>1</sup> Jesus dilda apel allaluhla nehn Jericho. <sup>2</sup> Woal koapwoahpwoa men mine wijahu, oadoa Zacchaeus, ma laplap ipen jounrik daksissok. <sup>3</sup> Ih nimen kapang pwa inje Jesus, a jang in ah mwosmwos, ih johkak kapang Jesus nehn pokonno.

<sup>4</sup> Ih ken kijoula mwohn pokonno, doaudahng nehn suhkoa sycamore pas, pwa ih en kapang Jesus ma pirin wuddo wijahu. <sup>5</sup> Nehn en Jesus lel wijahu Ih jarda pwehng Zacchaeus, "Zacchaeus pispis daudi pwa rehn oauwe Ngoahi pirin lel ipoamw nehn umwoammwo."

<sup>6</sup> Zacchaeus ken pispis daudi, peren koalik kjamwo Jesus oang nehn umwahu.

<sup>7</sup> Armaj ohroj ma ne pwili kapang me, irai sapda lipahnedki, pwa, "Woal mene ne pwili inla jang in Ah luk oang nehn umwen woal dipan men!"

<sup>8</sup> Zacchaeus uhda mwohn Koahunno, pwehng, "Maing, ngoahi pirin kijkijoahki oaloap in oai koapwoa joamwoahmwoa kan, a ma mine emen ma ngoahi kapweipweidi, ngoahi pirin koapwung oang pak pahu koalikjang."

<sup>9</sup> Jesus japoang, "Rehn oauwe koamoaur ne lelloang in umw oauwe, pwa pel nihn Abraham armaj mene. <sup>10</sup> Pwa Nihn-Armaj indoahng rapahki apel koamoaur la ih ma joaloangla."

### *Karajraj in Mwani Kohl*

<sup>11</sup> Nehn en armajjok ahr rongrong mehpwai, Jesus pel kapsahng apas karajraj. Ih ne koaroanlahng Jerusalem, armajjok kin lemleme pwa Wein Koahs ne pirin oar janjalda. <sup>12</sup> Ih pwa, "Woal laplap men mine ma jeiloaklahng nehn japw dohioau pwa en kajapwildahng nahmwarki; a ih pirin pel japahldohng nehn uhdahn ah wija. <sup>13</sup> A mwohn ah pirin kijoula, ih panginpene nah lidu eijek, kioang emenemen mwani kohl oau, ih pwehng irai, 'Kamwai kapang da ma kamwai kak wihn kihda jang in mwani pwiai, oaroh ngoahi pwurdo.' <sup>14</sup> A armaj in jappwo kin loassoang mehlel woallo, ioar mehwa irai kadarkihla jounpakair pwi mwerin ih en pwa, 'Kamai joah mwehuki woal mene en wia amai nahmwarki.'

<sup>15</sup> "Woallo ne wiahla nahmwarki ih japahldo. Ih pispis ruwoj nah liduhwok en indoa ipoa, pwa ih en kapang ia woahr mwani irai wiahda. <sup>16</sup> Lidu keiouwo indoa, pwa, 'Maing, me ioar mwani kohl eijek ma ngoahi wihnki jang in mwaniho ma koawoa kioang ngoahi.' <sup>17</sup> Woallo pwehng ih, 'Inenin mwehu! Lidu lelpoak men koawoa. A pwa jang in oamw loalpwoas in mehkij ma siksik, ngoahi pirin kioang koawoa en koaun kahnimw eijek.' <sup>18</sup> Karoahmen in liduhwo pel leldo pwehng ih, 'Maing, me ioar mwani kohl limoau ma ngoahi wihnki jang in mwaniho ma koawoa kioang ngoahi.' <sup>19</sup> A ih pwehnglahng, 'Ngoahi pirin kioang koawoa en koaun kahnimw limoau.' <sup>20</sup> Pel emen lidu indoa pwehng ih, 'Maing, kapang nihmw

mwanihwa me, ngoahi nekidla nehn dipwin likkoau kij. <sup>21</sup> Ngoahi mijik koawoa pwa koawoa woal jakon men. Koawoa kin oaloo mehki ma jaudi oamw apel dolihdi mehki ma koawoa joah poadokdi.' <sup>22</sup> Woallo pwehng ih, 'Lidu naunahmen koawoa! Ngoahi pirin doadoahkki pein oamw lal kan pwa en kadeikda koawoa. Koawoa kidal pwa ngoahi woal jakon men, ma kin oaloo mehki ma jaudi oai apel doli mehki ma jaudi ngoahi poadokdi. <sup>23</sup> A amwda koawoa joah nekidla noai mwanien nehn pangk? Pwa nehn oai pwurdo ngoahi en pwuroahng oaloo pwilihkihla wihnin.' <sup>24</sup> Ih pwehng irai ma pwili mine wijahu, 'Kamwai kihjang mwani kohl en jang ih, kioang ih ma nainki mwani kohl eijekko.' <sup>25</sup> A irai pwehng, 'Maing, ne mine nah mwani kohl eijek!' <sup>26</sup> A ih japoang irai, 'Kamwai en kidal pwa emen ma anki mehki, a mehki koalikjang pirin liklikoang, a irai ma joh arai mehki mihndahr ma siksik pirin liklikjang. <sup>27</sup> Doari, iraihok ma oai imwinsihi ma joah mwehuki ngoahi en wia arai nahmwarki, wahdo kojukdi irai mwohn ngoahi.' "

### *Dilda Jerusalem ki Rojon in Kalwehdi*

<sup>28</sup> Mwerin en Jesus pwahla mehpiwai, Ih wudla mwohrai inlahng Jerusalem. <sup>29</sup> Nehn Ah ne koaroanlahng Bethphage apel Bethany ipen Dolin Olip, Ih kadarla Nah sohnpadahk roahmen mwohrai, <sup>30</sup> "Kamwa alwe nehn koujappwen mwohmwa. Nehn amwa pirin dilda, kamwa pirin kapangda ejel pwulopwul men ma pirapir, ma pe kahjik armaj men dakoa. Kamwa lapwadda, ukdo. <sup>31</sup> A ma emen idoak ipamwa, mihndahng kamwa ejellen, kamwa japoangki, 'Koahunno anahne.' "

<sup>32</sup> Ira inla diarda joang ohroj doahroar en Jesus pwehng ira. <sup>33</sup> Nehn ara lapwlapwad ejel pwulopwullo, armajjok ma nainki idoak ipara, "Amwda kamwa ke lapwadda?"

<sup>34</sup> Ira japoang, "Koahunno ma anahne." <sup>35</sup> Ira ken ukdohng ipen Jesus. Irai piroakihoang likkoau puwoa apel jeuweje Jesus en doaudahng puwoa. <sup>36</sup> Nehn Ah allaluhwe armajjok piroakihi arai likkoauwok pohn allo.

<sup>37</sup> Nehn Ah koaroonoang Jerusalem, wija ma allo kijoudihlahng Dolin Olip, pokon koalikko ma pwilpwilihwe Ih siakda koaul in kapingkalahngan oang Koahs in ngil koalik ki kapkapnga Ih ki joang ohroj ma irai ne kapang, <sup>38</sup> "Koahs en kapaiahda nahmwarki ma allalu indoa in oadoan KOAUNNO! Popohl in nehnloange apel lingin aluhwoang Koahs!"

<sup>39</sup> Pharisee pwi ma pwili pokonno pwehnglahng Jesus, "Jounpadahk, pwehng nihmw sohnpadahk kan en nennenla!"

<sup>40</sup> Jesus japoang, "Kamwai en kidal pwa ma irai nennenla, a sakai pwiai pirin sapda rahrahu."

### *Jesus Jangidla Jerusalem*

<sup>41</sup> Nehn Ah ne koaroanlahng kahnihmmwo, Ih ne kapangda, Ih jangidla. <sup>42</sup> Ih pwa, "Ma koawoa pwen kidal oar rehnnoauwe da ma uhdahn pirin kioang oamw popohl! A apkas koawoa johkak kapang! <sup>43</sup> Pwa anjoau kij pirin leldo, ma oamw imwinsihi kan pirin kelihpene koawoa, pidekihpene koawoa, sohpenehng koawoa jang loop ohroj. <sup>44</sup> Irai pirin koauwehla koawoa pwilihi nihmw armaj kan dauluhi. Johpwa sakai oau pirin luhwoahdi nehn dohiah, pwa koawoa johpwa woahwoahki anjoau ma Koahs indoahng koamoaurla koawoa."

### *Jesus Dilda nehn Umw Joarwiho*

<sup>45</sup> Jesus dilda nehn Umw Joarwiho sapda kajroahjang jounnoasnoassok, <sup>46</sup> pwehng irai, "Ne insingdi nehn Puk Joarwi ma Koahs pwa, 'Umwoaie pirin adanki umwen kapkap.' A kamwai ne wiahkihla dohn jounpirap pwi!"

<sup>47</sup> Ih kin padpadahk nehn Umw Joarwiho rehn ohroj. Jamwrou laplappok, jounpadahk in Kojonneddok apel koaunin armaj kan nimen kojukdi Jesus. <sup>48</sup> Irai



johkak en diarda imdoahr irai en wia me, pwa armaj ohroj kin nimen rongrongoar Jesus, joah nimen luhj jang oau Ah padahk kan.

## 20

### *Peidekki doahr Manman in Jesus*

<sup>1</sup> Oau rehn ehn en Jesus Ah wihwia Ah padahk oang armaj kan nehn Umw Joarwiho apel kapkapahrakki Rongmwehu, jamwrou laplappok apel jounpadahk in Kojonneddok, pwilihkihla koaun pwi indoa ipoa, <sup>2</sup> pwehng Ih, "Pwehng kamai, en inje manman ma koawoa wiahki mehpwiai? Ke inje ma kioang koawoa manman en wia joang pwiai?"

<sup>3</sup> Jesus japoang, "Ngoahi nimen idoak ipamwai mehkij. Kamwai pwehng Ngoahi. <sup>4</sup> Ma en John jounpoapdaj ah manman in poapdaj injang ipen Koahs ke ipen armaj?"

<sup>5</sup> Irai sapda akpwungpene nehn pwungarai, "Da kisai en pwa? Ma kisai pwa, 'Sapjang ipen Koahs,' a Ih nen pwehng kisai, 'A da kamwai joah kamehlelehki John?'"

<sup>6</sup> A ma kisai pwa, 'Sapjang armaj,' pokon oauwe pirin kasoahki kisai sakai pwa irai kin wiahki John joukohp men." <sup>7</sup> Irai japoangki Jesus, "Kamai jehjoa pwa ia wija ah manman in poapdaj injang."

<sup>8</sup> Jesus pwehng irai, "A, ngoahi pel jehpirin pwehng kamwai, en inje manman ma Ngoahi wihwiahki mehpwiai."

### *Karajraj in Jounmwoaswel pwi nehn Mwoaswel in Wain*

<sup>9</sup> Jesus pwehng pokonno karajraj pase: "Woal men koadoahkoahda mwoaswel in wain oau, ih kioang jounmwoaswel pwi irai en kouwahki. A ih jeiloakla likin anjoau roairoai. <sup>10</sup> Ne lel anjoau in doddol wehn wainnok, ih kadarla lidu men ipen jounmwoaswellok pwa en oaloo ah pwaij jang nehn ah mwoaswello. Jounmwoaswellok pokihla liduhwo apel kadarla ih johpwa kioang mehkij. <sup>11</sup> Ih pel pwuroahng kadarla emen nah liduhwok; a jounmwoaswellok pel pokihla, kamehkihda ih kadarla johpwa kioang mehkij. <sup>12</sup> Woallo pel kadarla kajilmen in nah lidu. Jounmwoaswellok pel koauwehla ih, kerpwihla likin. <sup>13</sup> Doari, woallo ma anki mwoaswel in wainno ken lemleme, 'Da ngoahi en wia? Ngoahi pirin kadarla noai jermwein kajampwallo pwa irai nen uhdahn wounki!' <sup>14</sup> A nehn en jounmwoaswellok kapangda jermweinno, irai pwahpene nehn pwungarai, 'Ioar nihn woallo jermwein wa me. Kisai kojukdi pwa kisai en ankihla mwoaswel in wainne,' <sup>15</sup> Irai ken kerpwihla ih jang nehn mwoaswello, kojukdi ih."

Jesus pwa, "Dahkij koaunin mwoaswel in wainno nen wiahng jounmwoaswellok? <sup>16</sup> Ih pirin pein inla pwa en kojukdi jounmwoaswellok, ih kioang epwi jounmwoaswel sohrohr mwoaswel in wainno."

Nehn armajjok ahr rongda mehpwiai, ihr pwa, "Me johkak wiawi!"

<sup>17</sup> Jesus jipwoallahng irai, idoak, "A ia woahwoahn lal in Puk Joarwi oauwe? 'Sakai ma jounkou umw kan ne kerpwihla pwa johkaspoa, a wud wiahla sakai wa ma keiou kajampwal?'"

<sup>18</sup> "A, emen ma kipdihoang pohn sakaiho pirin ohla, a emen ma sakaiho kipdihoang pohn ih, nen mwisdi."

Nehn armajjok ahr rongda mehpwiai, ihr pwa, "Me johkak wiawi!"

<sup>17</sup> Jesus jipwoallahng irai, idoak, "A ia woahwoahn lal in Puk Joarwi oauwe?"

'Sakai ma jounkou umw kan ne kerpwihla pwa johkaspoa, a wud wiahla sakai wa ma keiou kajampwal?'"

<sup>18</sup> "A, emen ma kipdihoang pohn sakaiho pirin ohla, a emen ma sakaiho kipdihoang pohn ih, nen mwisdi."

### *Peidek in Dupuk Daksis*

<sup>19</sup> Jounpadahk in Kojonneddok apel jamwrou laplappok raprapahki mehkij irai en joalihkihdi Jesus anjoau pispis, pwa irai kidal pwa ih karajraj ki irai; a irai mijik armajjok. <sup>20</sup> Ioar mehwa irai kapkapangki anjoau mwehu, pwa irai en dupukla armaj pwi kadarla en lidipihki Jesus peidek pwi, pwa irai en kihlahng Ih pehn manman in koapinahn Rome.

<sup>21</sup> Irai pwiai idoak ipen Jesus, "Maing Jounpadahk, kamai kidal pwa oamw lal kan apel padahk kan pwen inenin pwung, pwa koawoa johkin injinohki mwomwen armaj, pwa kupwur en Koahs oang armaj ioar ma koawoa kin injinohki padahki. <sup>22</sup> Pwehng kamai, ma uhwoang kojoned pwa kamai en dupuk daksis oang Caesar in Rome ke joah?"

<sup>23</sup> Jesus kidal ahr widing, Ih pwehng irai, <sup>24</sup> "Kajalehioang Ngoahi oau mwani silperren! Mijen inje apel oadoan inje ma mine puwoa?"

A irai japoang, "Caesar."

<sup>25</sup> Jesus pwehng irai, "Doari, dupukkoang Caesar dahkij ma en Caesar, a dupukkoang Koahs dahkij ma en Koahs."

<sup>26</sup> Irai johkak kajapwunge Ih in mehkij mwohn pokonno, irai ken nennenla, pwuriamweikihla Ah pajpoanngok.

### *Peidek doahr Iejda*

<sup>27</sup> Sadducee pwi indoa ipen Jesus. Irai kin pwa armaj mehdi kan jehpirin mourda jang mehdi. Irai idoak ipen Jesus, <sup>28</sup> "Maing Jounpadahk, Moses koajoandi oang kamai kojoned oauwe; ma woal men mehdi jang pahioahu joh nihra jeri, a rien woallo en painkihla liohdiho pwa ira en kapwaihahioang riahua ma mehdi nah jeri. <sup>29</sup> A, doari, riarihoau mine, woal ijimen; riarai woal koalikko painkihda lihmen, a ih mehdihjang, joh nah jeri.

<sup>30</sup> "Woal karoahmenno pel painkihda liohdiho pel joh jeri; <sup>31</sup> kajilmen in riariho pel wiahda pel doahroar joanngohr wiawihoang ohroj irai ijimenno, irai mehdi jang pahioaraiho ohroj joh nihrai jeri. <sup>32</sup> Mwerin liho pel mehdi. <sup>33</sup> A doari, nehn rehnno ma armaj iejda, inje ma pirin pahien liho? Pwa irai ijimenno ohroj painkihda liho."

<sup>34</sup> Jesus japoang, "Woal apel lihkan nehn jampah kin pwoapwoaud, <sup>35</sup> a woal apel lihkan ma warroang iejda jang mehdi mourki mourin mweiho ma pirin indoa, irai johkin pwoapwoaud. <sup>36</sup> Pwa irai ne doahroarla sohnloang kan ma ne johla kak mehdi. Irai ioar nihn Koahs, pwa irai ne iejda jang mehdi. <sup>37</sup> Moses pel kadehdehda in mehlel doahroar en ihr mehdi kan ahr pirin iejda. Pwa nehn sikesik in suhkoa umpwumpwullo, Moses kahdanki Koaunno 'Koahs in Abraham, Koahs in Isaac, Koahs in Jacob.' <sup>38</sup> Ih ioar Koahs in ihr ma mour jaudi Koahs in ihr ma mehdi, pwa armaj ohroj kin mour oang Ih."

<sup>39</sup> Epwi jounpadahk in Kojoneddok pwehng Jesus, "Maing Jounpadahk oamw pajpoang pwung!" <sup>40</sup> Pwa irai johla nimen peidek oang Ih.

### *Peidek doahroar Messiah*

<sup>41</sup> Jesus pwehng irai, "Imdoahr amwai kak pwa Messiah nihn David? <sup>42</sup> Pwa pein David pwahla nehn Pukin Psalm kan:

'Koaunno pwehng oai koaun;

Koawoa en mwindi oang in loap moaun in Ngoahi,

<sup>43</sup> Oaroh Ngoahi en wiahkihla oamw imwinsihsi kan loangin pehn pwoalkoamwen kan.'

<sup>44</sup> "A, ma David panginki ah 'Koaun,' a imdoahr Messiah Ah kak wia nihn David?"

### *Jesus Kainoapwihdi armajjok jang Jounpadahk in Kojoneddok*

<sup>45</sup> Nehn en armaj ohroj rongrong, Jesus pwehng nah sohnpadahkkok:

<sup>46</sup> "Kamwai kalke kamwai jang jounpadahk in Kojoned kan ma kin mwehuki mine nehn likkoau roairoai, aluhjili mwohn armaj kan, kin nimen armaj kan en rahnmwahuwi irai nehn pokon kan, kin pilda dohiarai in mijoa nehn jinakoke kan, kin mwehuki moangehda sehpil kan nehn kamdipw kan, <sup>47</sup> ma kin kihjang liohdi kan ahr meohroj, a kin nimen kapkap roairoai! Arai koaloklok uhdahn pirin koalik mehlel!"

## 21

### *En Liohdi men ah Meiroang*

<sup>1</sup> Jesus jipwipwoaljili nehn Umw Joarwiho, Ih kapangda doahroar epwi armaj koapwoahpwoa ahr peiddi ahr meiroang kan nehn dohn meiroanngo. <sup>2</sup> Ih pel kapangda liohdi joamwoahmwoa men ma peiddi sen soal riau. <sup>3</sup> Ih pwehnglahng sohnpadahkkok, “In mehlel kamwai en kidal pwa dahkij liohdi mene kihdi koalik jang en ohroj. <sup>4</sup> Pwa irai ohroj meiroangkihoang Koahs mehkij jang nehn ahr pai kan. A lihmene jang nehn ah joamwoahmwoa ih meiroang kihla meohroj ma ih nainki apel kin mourki.”

### *Jesus Kohpda Ohlahn Umw Joarwiho*

<sup>5</sup> Epwi Nah sohnpadahkkok siksikoa doahroar Umw Joarwiho, doahroar mwewuwin koajkoajin sakaihok ma wiahda ummwo apel doahroar ling in kapwas ma armaj kan kin meiroang kioang Koahs. Jesus pwa, <sup>6</sup> “Kamwai kapang pwa rehnoau pirin indoa ma mehpwiai ohroj ma kamwai widwidahli pirin johla mine, johpwa sakai oau pirin luhwoahdi pohn oau; ohroj pirin mwoardi.”

### *Apwal apel Koaloklok kan*

<sup>7</sup> Irai kalelpoak ipoa, pwa, “Maing Jounpadahk, ngehd joang pwiai pirin pwoaida? Kilel da ma pirin kajalehda pwa anjoau in joang pwiai ne koaroando?”

<sup>8</sup> A Jesus pwa, “Kamwai mwajahn pwa armaj doar kapweipweidi kamwai. Pwa armaj dir pirin pwokdo in oadoaioa, pwa, ‘Ngoahi ioar Ih! Anjoauwa me!’ A kamwai johpwa rong irai. <sup>9</sup> Kamwai johpwa majpwehkda nehn amwai pirin rong rongin mahwin apel mwei apwal kan; pwa joang pwiai uhdahn pirin wiawi mwowoa, a imwin anjoau kahjik pirin lel.”

<sup>10</sup> Ih pel pwa, “Pei pirin wiawi nehn pwungen japw kan, mahwin pirin pwoaida nehn pwungen wei kan. <sup>11</sup> Roarroarin japw kamajpwehk, lehk, johmwehu nauna pirin wiawi wija ohroj; joang kamajpwehk apel kilel kapwuriamei pwi pirin pwokda pehnloange. <sup>12</sup> A mwohn mehpwiai ohroj pirin wiawi; kamwai pirin joaldi apel koaloklok, kamwai pirin pangekla nehn jinakoke kan apel wijiklahng nehn kalpwuhj kan, kamwai pirin wijikoang mwohn nahmwarki apel mwohn koaun in wei kan ki oadoaioa. <sup>13</sup> A ioar anjoauwa ma kamwai pirin kadehdehda Ngoahi. <sup>14</sup> Koajoanehdi nehn amwai lamlam kan mwohn anjoau, kamwai en joah pwunodki imdoahr amwai en japoang irai; <sup>15</sup> pwa Ngoahi pirin kioang kamwai joangoan japoangek pwi apel marain pwi ma joh emen ipen amwai imwinsihi kan kak pallanda apel kajohwe. <sup>16</sup> Jamamwai apel inamwai kan, riamwai kan, kijehmwai kan apel amwai pirien kan, ioar irai ma pirin pangla kamwai, pel pirin kojukdi epwi kamwai. <sup>17</sup> Armaj ohroj pirin lioassoangda kamwai ki Ngoahi. <sup>18</sup> A, johpwa pisen moangoamwai pas pirin mwoarjang. <sup>19</sup> Kasihkei kamwai pwa kamwai en pein doaroahla kamwai.

### *Jesus Pwa doahroar Ohlahn Jerusalem*

<sup>20</sup> “Nehn amwai pirin kapang karej in jounpeihok ma ne pidekihpene Jerusalem, kamwai pirin kidal ki pwa anjoau in ah ohla ne koaroando. <sup>21</sup> A nehn anjoauwo irai kan ma minmine nehn Judea, irai en uhdahn kaulahng pohn dol kan; irai kan ma minmine nehn kahnihmmwo; irai en uhdahn injang loaloa; irai ma minmine nehn japw, irai en johpwa pwurdo nehn kahnihmmwo. <sup>22</sup> Pwa rehn pwiok ioar ‘Rehnin koaloklok,’ anjoau in meohroj ma insingdi nehn Puk Joarwi pirin pwoaida. <sup>23</sup> Ia wen nauna oang li lijaian kan apel nohno kan ma kadihdi nehn rehnnok! Pwa apwal koalik pirin lel japw oauwe, apel en Koahs lioas koalik pirin lel sowoahkan. <sup>24</sup> Irai

pirin mehkihdi kodlaj apel epwi pirin joallahng nehn wein likin ohroj, apel Jerusalem pirin siakepijoang pehn ehn ihr ma rosros kan, oaroh ahr anjoau en doarihla.

### *Indoahn Nihn-Armaj*

<sup>25</sup> “Kilel kapwuriamei pwi pirin pwokda in joauwo, in johnpwonngo, apel in ujuhkan. Nehn jampah wija ohroj nehn wei kan, armaj kan pirin mijikda ngirngir koalik in nehn madauwo apel ngilen no koalik kan. <sup>26</sup> Irai pirin mwehlehlkihla arai mijik nehn ahr pirin joujowi mehkan ma pirin wiawi oang jampah pokon; pwa koajoandihn nehn woahwoa pirin isikekda. <sup>27</sup> Ioar anjoauwo ma Nihn-Armaj pirin pwokda allaluhdo nehn koasoau ki rojon apel ling koalik. <sup>28</sup> Nehn en mehpwiai sapda wiawi, kamwai uhda apel jarda, pwa koamoaurpamwai ne koaroando.”

### *Padahk jang in Suhkoa Pik*

<sup>29</sup> Doari Jesus pel pwehng irai karajraj pase, “Kamwai soahk mwehu doahroar suhkoa fig apel suhkoa sohrohr kan ohroj. <sup>30</sup> Nehn amwai kapang soahn suhkoa pwiai ahr kin sapin pwokda, kamwai en kidal pwa roak ne koaroan. <sup>31</sup> Pel doahroar, nehn amwai pirin kapang mehpwiai pirin wiawi, kamwai en kidal pwa Wein Koahs ne pirin ken lel.

<sup>32</sup> “Ngoahi pwehng kamwai in mehlel, pwa mehpwiai ohroj pirin wiawi mwohn armaj in dihoauwe ohroj ahr pirin mehdi. <sup>33</sup> Nehnloange apel jampah pirin joaloangla, a Oai mahjan kan pirin johkak joaloangla.

### *Anahnin Onnonop*

<sup>34</sup> “Kamwai kanaihoahng kamwai. Kamwai joah kadroapwoahki kamwai kamkamdipw apel jakjakau, apel pwunod kan in mour oauwe; pwa Rehnno kak oar lidipihdi kamwai. <sup>35</sup> Ih pirin indoa doahroar lidip oau oang armaj ohroj pohn jampah. <sup>36</sup> Kamwai en kapang mwehu apel kapkap anjoau ohroj pwa kamwai en sihkei apel isar oang pisjang mehpwiai ohroj ma pirin wiawi, apel warroang uhda mwohn mijen Nihn-Armaj.”

<sup>37</sup> Jesus kin padahk inrehn kan nehn Umw Joarwiho, a injoausik kan Ih kin injang nehn kahnihmmwo Ih inlahng in Dolin Olip, mine o inpwong. <sup>38</sup> Inminjoang kan armaj ohroj kin inlahng Umw Joarwiho pwa ihr en rong Ih.

## 22

### *Koajoandihn kojkojdihn Jesus*

<sup>1</sup> Anjoau in Joarwihn Pilahwa Joah Doal Ihs, ma adanki Passover, ne koaroan. <sup>2</sup> A jamwrou laplappok apel jounpadahk in Kojonned o raprapahki da irai en kak kojukkihdi Jesus; pwa irai inenin mijik armaj kan.

### *Judas Pwungkihda en Pangla Jesus*

<sup>3</sup> Jehsen ken dilloang nehn Judas, ma adanki Iscariot, emen in irai eijek roahmenno. <sup>4</sup> Judas inlahng ipen jamwrou laplap apel koaun in Umw Joarwihok pwehng irai doahroar ah pirin panglahng Jesus irai. <sup>5</sup> Irai inenin malaukihda apel pwungkihene irai en dupukki ih mwani. <sup>6</sup> Judas pwungkihla apel sapda joujowi anjoau mwehu ma en kak panngoang Jesus irai nehn en armaj kan ahr pirin jehjoa.

### *Jesus Onopda Pwili Kang Kamdipw in Passover*

<sup>7</sup> Joarwihn Pilahwa Joah Doal Ihs ne leldo, anjoau ma jihpw pwulopwul oang kamdipw in Passover kin kojkojdi. <sup>8</sup> Jesus kadarla Peter apel John, pwehng ira, “Kamwa alwe koaunopda asai sehpi in Passover.”

<sup>9</sup> A ira pwehng Ih, “Ia wija koawoa mwehuki kama en koaunopda?”

<sup>10</sup> A Ih japoang, “Kamwa kapang nehn amwa pirin dilda nehn kahnihmmwo, kamwa pirin suhwoang woal men ma wa poakis in pil oau. Kamwa kauj ih oaroh in dilda nehn umw oau. <sup>11</sup> Kamwa pwehng koaun in ummwo, ‘Jounpadahkko kadardo kama ipoamw, pwa: Ia pere ma Ngoahi apel Noai sohnpadahk kan pirin kang kamdipw in Passover loaloo?’ <sup>12</sup> Ih pirin kajalehioang kamwa pere koalik oau puwoa ma ne koajoanjoandi, ioar wijahwa ma kamwa pirin koaunopda joang ohroj.”

<sup>13</sup> Ira inla kapangda joang ohroj doahr en Jesus pwehng ira. Ira ken koaunopda kamdipw in Passover.

### *Kamdipw Joarwi*

<sup>14</sup> Nehn anjoauwo ne lel, Jesus apel Nah woaroakkok mwindihoang nehn dohiarai in sehpyllo. <sup>15</sup> Ih pwehng irai, “Ngoahi ngoangkihla mehlel pwili kamwai wia kamdipw in Passover oauwe mwohn Oai pirin loklok! <sup>16</sup> Kamwai en kidal pwa Ngoahi ne johla pirin pwuroahng pwili kang Passover oauwe oaroh janjalda woahwoa in unjek nehn Wein Koahs.”

<sup>17</sup> Jesus pwoakda mwoak oau, kaping kalahngan oang Koahs, pwa, “Kamwai oaloo mwoak oauwe kamwai ohroj nim. <sup>18</sup> Kamwai en kidal pwa Ngoahi ne johla pirin pwuroahng nim wain oauwe jang me inla oaroh lel anjoauwo ma Wein Koahs pirin lel.”

<sup>19</sup> Ih pel pwoakda pilahwahu, kaping kalahngan oang Koahs, Ih sipwangdi kioang irai, pwa, “Ioar palwoaroaioahwa me ma liklikkoang kamwai. Wia me oang mihn kasmada Ngoahi.” <sup>20</sup> Pel doahroar, mwerin mwinge Ih kioang irai mwoak oau, pwa, “Mwoak oauwe ioar en Koahs inoau kapw ma wiawihkihda insahihwa ma ne widekla ki kamwai.

<sup>21</sup> “A, kapang! Ih ma pirin pangla Ngoahi pwili mine in sehpyl oauwe. <sup>22</sup> Nihn-Armaj pirin mehdi doahroar en Koahs ne koajoanehdi; ia woahr nen naunahng armajjo ma pirin pangla Ih!”

<sup>23</sup> Irai sapda peidek pene nehn pwungarai, inje in irai ma pirin kak wia joang oauwe.

### *Akmai in inje ma Laplap*

<sup>24</sup> Sohnpadahkko akmaikihda inje ma pirin keiou laplap nehn pwungarai. <sup>25</sup> Jesus pwehng irai, “Nahmwarki in armaj rosros kan in jampah anki manman in koanda nihrai armaj kan. Koaun in armaj kan pwa ihr ioar ‘En Armaj Pirien.’ <sup>26</sup> A ih jehpirin doahroar me ipamwai; pwa ih ma keiou laplap ipamwai pirin doahroar ih ma keiou siksik; a ih ma koaun pirin doahroarla lidu. <sup>27</sup> Pwa inje ma laplap ipen ihr ma kin mwindi oang mwinge ke ih ma kin sahpis? Jaudi ih ma kin mwindi oang in sehpyl? A Ngoahi mine nehn pwungamwai kan wia sohn sahpis men.

<sup>28</sup> “Kamwai kin minminehr Ipoai anjoau ohroj nehn Oai apwal kan. <sup>29</sup> Apel nehn en joamoaiho kioang Ngoahi manman in koaun, Ngoahi pel pirin kioang kamwai joangoan manmannohr. <sup>30</sup> Kamwai pirin pwili ngoahi mwinge in oai sehpyl nehn oai Wei, kamwai pirin pwili mwindi pohn mwoal pwa en wia koaun kadaudok eijek riau in Israel.”

### *Jesus Kohpda en Peter ah pirin kahmahmki*

<sup>31</sup> Jesus pwa, “Simon, Simon! Kapang pwa Jehsen ne oaloo mweimwei pwa en jong kamwai ohroj doahroar jounmwoaswel men ah kin pohkjang kilin wehn pilahwa. <sup>32</sup> A Ngoahi kapkapki koawoa, Simon, pwa oamw pwojon en joah ohla. Apel nehn oamw pirin japhaldo Ipoai, koawoa pirin kasihkeida pwojon in rioamw kan.”

<sup>33</sup> Peter japoang, “Maing oai Koaun, ngoahi ne onopda en pwilihla koawoa nehn kalpwuhj apel pwili koawoa mehdi.”



<sup>34</sup> A Jesus japoang, “Peter, koawoa en kidal pwa rehn oauwe, mwohn joang jummwa koawoa pirin kahmahmkihla Ngoahi pehn jiluh pwa koawoa kidal Ngoahi.”

*Pwuko, Pehk, apel Kodlaj*

<sup>35</sup> Jesus idoakkoang Nah sohnpadahkkok, “Anjoauwo ma Ngoahi kadarwe kamwai, joah wa pwuko, pehk ke ju, a mine mehki kamwai apwalkihda?”

Irai japoang, “Joh mehki.”

<sup>36</sup> Jesus pwehng irai, “A apkas, ma mine emen nah pwuko apel pehk, a ih en wahda, a emen ma joh nah kodlaj a ih en noaskihla ah joakiddo dupukkihda apas kodlajjo.”

<sup>37</sup> Pwa kamwai kidal pwa Puk Joarwi pwa, ‘Ih pwili wadwad oang armaj nauna kan,’ uhdahn en pwoaida. Pwa me ma ne insingdi oang Ngoahi, kin pwoaida.”

<sup>38</sup> Sohnpadahkkok pwa, “Kapang, Maing amai koaun, kodlaj rahpas me!”

A Jesus japoang, “Ne isar!”

*Jesus Kapkap pohn Dolin Olip*

<sup>39</sup> Jesus injang nehn kahnihmmwo, inlahng in Dolin Olip, doahroar ma Ih kin kalap wia; Nah sohnpadahkkok pel pwilihla. <sup>40</sup> Anjoauwo Ih lel wijahu, Ih pwehng irai, “Kapkap pwa kamwai en joah lel nehn jongjong.”

<sup>41</sup> Ih ken sohrohrla jang irai, dohinoar armaj kin kasoahla sakai oau; Ih ken poadpwomwla kapkap, <sup>42</sup> Ih pwa, “Joamoai, ma koawoa mwewuki, a Koawoa kihwe jang Ngoahi dal en loklok oauwe. A joah, jaudi injenoai, pwa injenoamw ioar en pwoaida.” <sup>43</sup> Sohnloang men jang nehnloange pwokdohng Ih, kasihkeida Ih. <sup>44</sup> Nehn Ah ne inenin pwunod koalikda, Ih kasihkeila Ah kapkap; pwudohn Ih koardihoang pohn pwirej doahroar insa.

<sup>45</sup> Ih uhda jang Ah kapkap japahllahng ipen Nah sohnpadahkkok kapang irai pwen moair pwa johla engirai ki arai injinjuwed. <sup>46</sup> Ih pwehng irai, “Da kamwai moahmoahmoairki? Kamwai pwohrda kapkap pwa kamwai en joah lelloang nehn jongjong.”

*Jesus ne Joaldi*

<sup>47</sup> Nehn anjoauwo ma Ih pe lallal, pokon oau leldo wijahu; Judas, emen ma sohnpadahk eijek roahmenno, ma uk irai. Ih sohlahng oar ipen Jesus kiski Ih. <sup>48</sup> A Jesus pwa, “Judas, kis oau ma koawoa pangkihla Nihn-Armaj?”

<sup>49</sup> Nehn en sohnpadahkkok ma pwili Jesus kapangda dahki ma pirin wiawi, irai pwehnglahng Jesus, “Maing amai Koaun, kamai en doadoahkki nihmai kodlaj kai?”

<sup>50</sup> Emen irai ken poaloa nihn Jamwrou Laplap nah lidu men, poaloahjang sioa loap moaun.

<sup>51</sup> Jesus pwa, “Ne isar, doari!” Ih ken pukkoang oar sien woallo ken mohdi.

<sup>52</sup> Jesus pwehnglahng jamwrou laplappok apel koaun in Umw Joarwiho apel joun kaweid kan ma pwili indoahng oaloa Ih, “Kamwai indoa wa kodlaj apel mihn pok, doahroar ma Ngoahi pwen lollap men? <sup>53</sup> Ngoahi kin minminehr ipamwai rehn ohroj nehn Umw Joarwiho, a kamwai johpwa jong in koldi Ngoahi. A apkas ioar amwai anjoau, apel anjoauwa ma in manman in rosros pirin koaunda.”

*Peter Kahmahmki Jesus*

<sup>54</sup> Irai joalihdi Jesus uklahng in umwen Jamwrou Laplappo; a Peter pwilpwilihla irai a ekij dohjang irai. <sup>55</sup> Nehn pwungen kello, oai kij jaunekda. Peter pwili mwindi ipen ihrrok ma mwindi pidekihpene oaiho. <sup>56</sup> Emen liduhwok kapangda ih pwili mwindi ipen oaiho, ih kakilihdi, ih pwa, “Woal mene pel pwili Jesus.”

<sup>57</sup> Peter kahmahmki, pwehnglahng, “Li, ngoahi pwanah jehjoa ih!”

<sup>58</sup> Mwerin anjoau kij, woal men kapangda Peter, ih pel pwehnglahng, “Koawoa pel emen irai!”

A Peter japoang, "Woal, jaudi ngoahi!"

<sup>59</sup> Oaroh mwerin awa oau pel emen woal engdehunki sihkei pwa, "Mehlel pwa woal mene uhdahn pwili Jesus pwa ih pel mihn Galilee men!"

<sup>60</sup> Peter japoang, "Woal, ngoahi jehjoa pwa da koawoa siksikoahn!" Nehn anjoauwohr ih lallallal, a ne joang jummwa. <sup>61</sup> Koaunno jipwoallahng Peter kakildi ih; doar Peter samanda pwa Koaunno ne pwen pwehng ih, "Mwohn joang jummwa pwongoauwe koawoa pirin pwa pehn jiluh pwa koawoa jehjoa Ngoahi." <sup>62</sup> Peter inlahjang, dilla likin injinjuwedkihla ken joang.

*Jesus Wiahla mihn Kapis apel Pokpok*

<sup>63</sup> Armajjok ma jiljiloa Jesus kapiski apel poki Ih. <sup>64</sup> Irai kin poaroahla mijoa apel idoak, "Inje ma poki koawoa? Kajawihda!" <sup>65</sup> Irai kin pwehng Ih joang nauna dir.

*Jesus Mwohn Mwoalen Koapwunngo*

<sup>66</sup> Nehn ah rehnpijoang, koaunin mihn Jew-ok, jamwrou laplap, apel jounpadahk in Kojonneddok pokonpene, a Jesus ukkukdohng mwohn Sohn Mwoalen Koapwunngo.

<sup>67</sup> Irai idoak ipoa, "Pwehng kamai, koawoa ioar Messiah?"

Ih japoang, "Ma Ngoahi pwehng kamwai, kamwai nen johpwa kamehlele Ngoahi. <sup>68</sup> A ma Ngoahi idoak oang kamwai mehki, kamwai nen johpwa japoang. <sup>69</sup> A kamwai en kidal pwa jang apkas inla Nihn-Armaj pirin mwindi in loap moaunin Koahs Wija Laplap."

<sup>70</sup> Irai ohroj idoak, "Doari, Koawoa ioar nihn Koahs?"

Ih japoang irai, "Kamwai ma pwa Ngoahi ioar Ih."

<sup>71</sup> Irai pwahla, "Doari, kisai johpwa anahne jounkadehde, pwa pein kisai ne rong da Ih pwa!"

## 23

*Jesus Uhda mwohn Pilate*

<sup>1</sup> Sohnpokonno pwon uhda uklahng Jesus mwohn Pilate. <sup>2</sup> Irai sapiahda kadipoa: "Kamai koldi woal mene, kaweid japwung nihmai armaj kan pwehpwehpwehng irai en joah dupuk daksis oang Caesar; apel pwahpwahpwa pwa Ih ioar Messiah, nahmwarki men."

<sup>3</sup> Pilate idoakkoang Ih, "Koawoa ioar nahmwarkihn mihn Jew?"

Jesus japoang, "Koawoa ne pwa."

<sup>4</sup> Doari Pilate pwehnglahng jamwrou laplappok apel pokonno, "Joh kahrpoa oau ngoahi kapangda ngoahi en koalkoahki woal mene."

<sup>5</sup> A irai pel engdehunki sihkei pwa, "Ki Ah padahk kan Ih ne sapda kapingda armajjok nehn Judea. Ih ne sapda nehn Galilee, apkas ne leldo me."

*Jesus Uhda Mwohn Herod*

<sup>6</sup> Nehn en Pilate ah rongda me, ih ken idoak, "Woal mene mihn Galilee?" <sup>7</sup> Nehn ah kidalda pwa Jesus kijehn wei oau ma Herod kin koaunda, ih ken kadarlahng Ih ipen Herod, ma pel pwili minmine Jerusalem nehn anjoauwo. <sup>8</sup> Herod inenin malaukihda ah kapangda Jesus, pwa ih ne rong doahroar Jesus anjoau roairoai. Ih kajik en kapang Jesus wia epwi manmanno. <sup>9</sup> Ih idoakkoang Jesus joangoan peidek dirpwi, a Jesus johpwa japoang. <sup>10</sup> Jamwrou laplappok, jounpadahk in Kojonneddok uhda wijahu sihsihkeiki arai kadipoa Jesus. <sup>11</sup> Herod apel nah jounpeihok kapiski Jesus apel wiamwahlkihla Ih; irai kalikkoauwihkihda robe mwakelkel oau irai kapwurihla Ih ipen Pilate. <sup>12</sup> Rehnohr Pilate apel Herod ira pirienla; pwa jang mijkoalkoal allaluhdo ira kin imwinsihspene.

*Jesus Koajoandi en Mehdi*

<sup>13</sup> Pilate panginpene jamwrou laplappok, koaunnok, apel armaj ohroj, <sup>14</sup> pwehng irai, “Kamwai wahdohng ngoahi woal mene, pwa Ih kapingda armaj kan. A ngoahi ne kajawi Ih mwohn mijamwai kan, ah pwen johpwa mehkij japwung ngoahi kapangda doahroar mehkan ma kamwai kadkadipoahki Ih. <sup>15</sup> Herod pel johpwa diarda Ah japwung, ioar mehwa ih kapwurihkihdo Ih ipasai. Johpwa mehkij woal mene wiahda japwung pwa en koanoahng kojkojdi. <sup>16</sup> Doari, ngoahi pirin kioang en pokpokkoar kadarekla.”

<sup>17</sup> [Pilate kin pwen lapwadda emen jang mihn kalpwuhj anjoaun Passover.]  
<sup>18</sup> Sohn pokonno ohroj rahukihla, “Kojukdi Ih! Lapwaddohng kamai Barabbas!”  
<sup>19</sup> A Barabbas ne peidekkoang nehn kalpwuhj ki ah uhwoangda kojoned nehn kahnihmmwo apel kojarmaj.

<sup>20</sup> Pilate nimen kajaldekla Jesus, ioar mehwa ih pwuroahng suhwoang pokonno ki iroahu. <sup>21</sup> A arai pwen rahrahukihoar, “Kalohpwuhla Ih! Kalohpwuhla Ih!”

<sup>22</sup> Kajiluh in en Pilate pel pwehng irai, “Pwa nauna dahioau Ih wiahda? Johpwa mehkij Ih wiahda japwung pwa en koanoahng kojkojdi. Ngoahi pirin kioang en pokpok pel kajaldekla.”

<sup>23</sup> A irai kapwa kakoalikhla ahr rahrahuki pwa Jesus en kalohpwuhla, a doari, da irai rahrahuki pwoaida. <sup>24</sup> Doari Pilate ken kaminahla da irai poaki. <sup>25</sup> Ih ken lapwadda woallo ma irai poaki en lapwdahng irai, ma joalkihdi nehn kalpwuhj ah uhwoangda kojoned apel kojarmaj, a ih kioang irai Jesus pwa irai en wiahng injenarai.

### *Jesus ne Lohpwuhla*

<sup>26</sup> Jounpeihok kahlwahjang Jesus nehn kahnihmmwo, irai doaroahdi woal men pohn allo, oadoa Simon, mihn Cyrene, ma allaluhdo jang likin kahnihmmwo, irai kioang ih en wahda lohpwuhwo alu mwerin Jesus.

<sup>27</sup> Pokon koalik oau pwilpwilihla Jesus; pwilihki lihpiwi ma injinjuwed apel joangjoangjoangki Jesus. <sup>28</sup> Jesus pwurla pwehng irai, “**Lihn Jerusalem kan! Kamwai joah joangki Ngoahi, kamwai joangki pein kamwai apel nihmwai jerihkan.** <sup>29</sup> Pwa rehn pwi pirin indoa, ma armaj kan pirin pwa, ‘Meid pai li ma joah noainoai, johpwa noaisikihdi jeri apel johpwa kadihdi!’ <sup>30</sup> Doari, irai pirin pwehng dol koalik kan, ‘Kipdi pohn kamai!’

Apel oang dol siksik kan,  
 ‘Pwaindi kamai!’

<sup>31</sup> “Pwa ma armaj wia mehpiwai oang suhkoa mour, a dahioau pirin wiawihang suhkoa meng?”

<sup>32</sup> Woal roahmen, ira koaraj lollap pel ukkukla, pwa ira en pwili Ih kojkojdi. <sup>33</sup> Nehn irai lel wijahu ma adanki “Sihn Moang,” irai kalohpwuhla Ih wijahu pwilihki lollap nauna roahmenno, emen mine loap moaun a emen loap meing in Jesus. <sup>34</sup> Jesus pwa, “**Joamoai, mahkoahng irai, pwa irai jehjoa dahioau irai wihwia.**”

Irai ken nehkpjoang Ah likkoauwok pileiki. <sup>35</sup> A pokonno kapkapang koaun in mihn Jew-ok kaukauruhrki Ih, pwahpwahpwa, “Ih doaroahla epwi, mweidoahng en doaroahla pein Ih, ma ioar Ih Messiah wa ma Koahs pilda!”

<sup>36</sup> Jounpeihok pel pwili kapwroa Jesus. Irai sohlahng Ih kioang Ih wain kasik,  
<sup>37</sup> pwehng Ih, “Kapisla koawoa, ma ioar koawoa nahmwarkihn mihn Jew!”

<sup>38</sup> Pohnangin koadkoan moange insingdi,

“Ioar Ih me Nahmwarkihn mihn Jew.”

<sup>39</sup> Emen lollappok ma pwili kalohpwuhla koauwe Jesus, pwa, “Ma koawoa ma Messiah wa, kapisla Koawoa apel kama!”

<sup>40</sup> A emen in ira woarwoarihda, pwa, “Koawoa johpwa mijik Koahs? Koawoa mine nehn joangoan kadeikin doahroar Ahu. <sup>41</sup> A asa kadeik pwen pwung, pwa kisa koanoahng oaloo koaloklok oauwe, pwa asa wihwia kan ma kahrehda; a woal mene joh nauna oau Ih wiahda.” <sup>42</sup> Ih ken pwehnglahng Jesus, “Saman ngoahi, Jesus, nehn oamw wiahla nahmwarki men!”

<sup>43</sup> A Jesus pwehnglahng, “**Ngoahi pwehng koawoa in mehlel pwa rehnnoauwehr koawoa pirin pwili Ngoahi mine nehn Paradise.**”

### *Mehdihn Jesus*

<sup>44</sup> Aluhwoang kiloak eijek riau injauwaj, joauwo johla maram apel ros pwainla jappwo oaroh lel kiloak jiluh. <sup>45</sup> Kahdenngo nehn Umw Joarwiho soahroakdi nehn pwunge. <sup>46</sup> Jesus ngil koalikda, pwa, “**Joamoai, Ngoahi ne kioang Ngenihwa nehn poahmmwen,**” Ih pwahla me Ih ken mehdi.

<sup>47</sup> Koanin jounpei men kapang da ma ne wiawi ih kapnga Koahs, pwahla, “Mehlel oar pwa woal mene woal pwung men!”

<sup>48</sup> Nehn en armajjok ma pokonpene wijahu pwa irai en kapang da wiawi, irai ken pokpoki nehn pwalahrai kan injinjuwed pwurla in umwaraihok. <sup>49</sup> Ohroj ma kin kidal Jesus, pwilihki lihok ma pwilihdo Ih jang Galilee, uhda ekij dohjang, kapkapang.

### *Joajjoardihn Jesus*

<sup>50-51</sup> Woal men mine ma adanki Joseph, mihn Arimathea, kahnihmw oau nehn Judea. Woal mwehu apel kajampwal men, ih kin pwili joujowi indoahn Wein Koahs. Mihndahr ma ih pwili sowoa Mwoalin Koapwunngo ih johpwa pwungki arai koajoandi apel arai mwoakiddo. <sup>52</sup> Ih inla ipen Pilate poakihda palwoaroan Jesus. <sup>53</sup> Ih kihdi jang in lohpuwuhwo, kidimkihpene likkoau linen oau kioang nehn joaujoau oau joajjoarda nehn paip oau — kahjikkoar armaj men joajjoardi nehn joaujoauwo. <sup>54</sup> Rehnno nialim, Sabbath ne enken sap.

<sup>55</sup> Lihok ma pwilpwilihdo Jesus jang Galilee pwilihla Joseph, kapang joaujoauwo apel doahroar en palwoaroan Jesus liklikdi loaloo. <sup>56</sup> Irai pwurla in umwaraihok wiahda mihn karahdin pwi apel mihn soal pwi oang palwarro.

Sabbath, irai ken koammoal, doahroar da ma ne kileldi nehn Kojonneddo.

## 24

### *Jesus Iejda*

<sup>1</sup> Injohrehn in keiouin rehn nehn wihk, lihok ken inlahng in joaujoauwo wahda mihn karahdinnok ma irai ne koanopda. <sup>2</sup> Irai kapang pwa sakaiho ne kasahpwroahkjang in oawoan joaujoauwo. <sup>3</sup> Irai dilda loaloo, a johpwa kapangda palwoaroan Koan Jesus. <sup>4</sup> Irai uhda wijahu pwuriamweikihla, a anjoauwohr woal roahmen uhda mwohrai, mine nehn likkoau korohro dak. <sup>5</sup> Nehn irai ne dirkihla majpwehk, irai rukdihoang pohn pwirej, woallok pwehng irai, “Amwda kamwai ke raprapahki armaj mour men nehn pwungen armaj mehdi kan? <sup>6</sup> Ih ne joh me; Ih ne iejda. Samanda da ma Ih ne pwehng kamwai nehn Ah minmine nehn Galilee: **<sup>7</sup> ‘Nihn-Armaj uhdahn pirin pangekla ipen ihr ma dipan kan, kalohpwuhla, a Ih pirin iejda in kajiluh in rehn.’”**

<sup>8</sup> Lihok ken samanla en Jesus lallok, <sup>9</sup> irai pwurla jang in joaujoauwo, apel pwehng mehpuwai ohroj oang eijek emenno apel ohroj luhwoahk. <sup>10</sup> Lihpuwai ioar: Mary mihn Magdala, Joanna, apel Mary inen James, irai apel epwi li ma pwili irai pakairki doahroar mehpuwai oang woaroakkok. <sup>11</sup> A woaroakkok wiahki rong puwai joh kaspoa, ioar mehwa irai johpwa kamehlelehki. <sup>12</sup> A Peter uhdahr ken kijouwoang in joaujoauwo; ih rukdi kapangda likkoauwohr ma kidimla Ih. Ih ken pwurla in ummwo pwurpwuriamweiki da ma ne wiawihlahu.

### *Nehn Alin Inlahng Emmaus*

<sup>13</sup> Nehn rehnnohr nihn Jesus dohjang Jerusalem dapwa mwait ijuh. <sup>14</sup> Ira siksikoahpene doahroar meohroj ma ne wiawihla. <sup>15</sup> Nehn ara siksikoa, pein Jesus sohla koaroannoang ipara pwili ara allaluhla. <sup>16</sup> Ira kapang Ih, a ira johpwa kidal pwa inje Ih. <sup>17</sup> Jesus idoak ipara, **“Da ma kamwa siksikoa allaluhdo?”**

Ira ken uhdi mijen injinjuwedla. <sup>18</sup> Emen ira oadoa Cleopas, idoakkoang Jesus, “Koawoahr doari mihn keiru men nehn Jerusalem ma johpwa kidal da ma ne wihwiawi allaluhdo rehn pwiai nehn kahnihmmwo?”

<sup>19</sup> A Ih idoak, **“Me dahkij?”**

Ira japoang, “Doahroar mehkan ma wiawihang Jesus mihn Nazareth, Joukohp men, ma Koahs apel armaj ohroj kin wiahki ma Ih anki manman in joang ohroj ma Ih pwa apel wia. <sup>20</sup> Amai Jamwrou laplappok apel koaunnok ken pangla Ih pwa en koaloklok in mehdi doar Ih ken kalohpwuhekla. <sup>21</sup> A kamai koapwoarpwoarkihla pwa Ih ma pirin kamaioauda Israel! A likin mehpwai ohroj, lel rehnnouwe ne rehn jiluh mwerin mehpwai ahr wiawi. <sup>22</sup> Lihpwi ma kijehmai ne kapwuriamweihla kamai; pwa irai inlahng in joaujoauwo injohrehn, <sup>23</sup> a johkak rapahkihda palwarro. Irai pwurdo pwa irai kapang kajanjaln sohnloang pwi ma pwehng irai pwa Ih pwen mour. <sup>24</sup> Pel epwi kijehmai hok inlahng in joaujoauwo ne kadehde doahroar da ma lihok ne pakairkihdo, irai pel johpwa kapangda palwoaroan Jesus.”

<sup>25</sup> Jesus ken pwehnglahng ira, **“Kamwa pwanah pweipwei apel ia woahr kosin amwa en kamehlele joang ohroj ma joukohppok ne pwa! <sup>26</sup> Pwa jaudi koanoahng Messiah en loklokki joang pwiai ohroj mwohn Ah pirin dildahng nehn lingin Ah wei?”**

<sup>27</sup> Doari, Jesus ken kawoahwoahng ira doahroar sikesikin Ih nehn Puk Joarwi, sapjang pukin Moses apel pukin joukohp ohroj.

<sup>28</sup> Nehn irai ne lellahng koujappwo ma irai allaluhlahng. Jesus alu mwomwen pwa Ih pirin daudauluhla. <sup>29</sup> A ira ken kauhdi Ih, pwa, “Mine ipama, pwa joauwo ne pirin ken duhla apel pirin ken rosdi.” Doari Ih ken dilda mine ipara. <sup>30</sup> Ih mwindi oang pwili ira mwinge; Ih pwoakda pilahwahu kapkap apel kaping kalahngankihoang Koahs. Ih sipwangdi pilahwahu kioang ira. <sup>31</sup> Mijara kan ken poahdpijoang ira kidalda pwa pwen ioar Ih Jesus, a nehn anjoauwohr Jesus joaloang jang ira. <sup>32</sup> Ira ken sikoahpene, “Nehn kapehdisa kai joah kin mwoakmwoakidki peren, doahroar oai, nehn Ah siksikesik apel kahkawoahwoahng kisa Puk Joarwi, allaluhdo nehn allo?”

<sup>33</sup> Ira uhdahr pwurlahng Jerusalem ipen sohnpadahk eijek emenno apel iraihok ma pokpokon iparai, <sup>34</sup> pwehng irai, “Mehlel oau pwa Koainno ne iejda! Ih ne pwokkoang Simon!”

<sup>35</sup> Ira wud sikoahda dahkij ma wiawihang ira nehn allo, doahroar ara kidalda Koainno nehn Ah sipwangdi pilahwahu.

### *Jesus Pwokkoang Nah Sohnpadahkok*

<sup>36</sup> Nehn ira siksikoa mehpwai, Jesus pwurroar uhda nehn pwungarai pwehng irai, **“Popohl oang kamwai!”**

<sup>37</sup> Nehn irai majpwehkda, irai lemechioang pwa irai kapkapangda eni men. <sup>38</sup> A Ih pwehng irai, **“Amwda kamwai ke majpwehkda? Amwda jakoapwoarpwoar ke inda nehn amwai lamlam? <sup>39</sup> Kapang poaihoa kai apel ehihoa kai, apel kapang mwehu pwa pwen ioar Ngoahi me. Pukkoang Ngoahi, doari kamwai nen kidal, pwa eni joh kin mine udukoa ke sihn, doahroar amwai kapkapang ipoai.”**

<sup>40</sup> Mwerin Ah pwa me, Ih ken kajalehng irai poahk apel ehnnok. <sup>41</sup> Irai pel kahjik oar kamehlele, irai dirki peren apel pwuriamwei; doari Ih idoak iparai, **“Mine mwinge ipamwai apkas?”** <sup>42</sup> Irai kioang mwumw siksik inihn men, <sup>43</sup> Ih ken mwinge mwohn mijarai.



<sup>44</sup> Doari Jesus pwehng irai, “Ioar mehpwiai ma Ngoahi ne padahk kioang kamwai nehn anjoauwo ma Ngoahi minmine ipamwai, doahroar meohroj ma ne insingdi ki Ngoahi nehn Kojonned in Moses, nehn Pukin joukohppok apel nehn Pukin Psalm Kan, uhdahn pirin pwoaida.”

<sup>45</sup> Doari Ih ken kamaramihla arai lamlam pwa irai en woahwoahkihla Puk Joarwi, <sup>46</sup> Doari Ih ken pwehng irai, “Me ioar ne insingdi: Messiah uhdahn pirin loklokla apel uhdahn pirin iejda jang mehdi in kajiluh in rehn, <sup>47</sup> Rongmwehu in koaluhla apel lapwdahn dihp kan pirin kalohkjili nehn wei kan ohroj, in oadoa, sapda jang Jerusalem. <sup>48</sup> Kamwai ma pirin kadehde mehpwiai. <sup>49</sup> A pein Ngoahi pirin kadardohng kamwai mehu ma jamamwaiho ne inoaukihda. A kamwai uhdahn pirin joujowihoar nehn kahnihmmwo oaroh manman in puwoa audohda kamwai.”

### *Jesus Indahla Nehnloanng*

<sup>50</sup> Mwerin, Jesus kahlwa irai jang nehn kahnihmmwo, koaroanlahng Bethany; ioar wijahu Ih pwoakda poah kapaida irai. <sup>51</sup> Nehn Ah kapaiahda irai, Ih ken injang irai pwoakpwoakdahla nehnloanng. <sup>52</sup> Irai ken pwongi Ih, irai pwurlahng Jerusalem dirkihla peren koalik, <sup>53</sup> apel anjoau ohroj irai indoa in Umw Joarwiho, kapkapnga Koahs.

## **Rongmwehu ma Insingdi jang ipen John Oarlap en Puk oauwe**

*Rongmwehu in John* kajalehda doahroar Jesus ma ioar Mahjan in Koahs joahsuk, ma “ken wiahla armaj apel minmine ipasai.” Ma doahroar puk oauwe ah pwa, pukin Rongmwehu oauwe insingdi pwa irai kan ma pirin wadek, irai en pwojon pwa Jesus, ioar ih Jounkoamoaurwa ma inoapoa ne wiawi, ioar ih Nihn Koahs, ma irai pwojon ih, irai en ankihla mour (20.31).

Mwerin iroa siksik kan ma kajalehda in sabin puk oauwe doahroar Lal en Koahs joahsuk ioar Jesus, loap keiouin Rongmwehu oauwe sikoahda doahroar kilel (ke manman pwi) ma kadehdehda pwa Jesus, ioar ih Nihn Koahs, Jounkoamoaurwa ma inoapoa ne wiawi mehjwa. A doar mwuhr, kapahrak pwi ma ne wiawi ma kawoahwoahda mourin kilellok. Loapin puk oauwe pel kajalehda doahroar armaj pwi ahr pwojonla Jesus apel wiahla nah sohnpadahk, a epwi uhwoang Jesus apel joah kamehlele. Iroa koalik 13-17 sikoah doahroar en Jesus apel nah sohnpadahkkok arai minminpene mehlel inpwonngo ma mihn Jew-ok pirin joalihdi ih, apel doahroar Ah lal en koaunop apel kangoange irai mwohn Ah pirin mehdi in lohpuhwo. A, iroa koalik kan ma kadoarieklahn puk oauwe, ioar sikesik in Jesus ah joaldi apel koapwung mwohn Mwoalen koapwunngo, apel kalohpuhla apel iejda, apel ah pwokkoang nah sohnpadahkkok mwerin ah iejda.

*Rongmwehu in John* kin kawoahwoahda in mehlel kijakij ke kalahngan en mour joahsuk ma Christ kin kahrehioang kisai, kalahngan ma kin sapda anjoau oauwe apel kin aluhwoang irai kan ma kin wiahki Jesus arai al, ahr mehlel, apel ahr mour. Ma kin dehde mehlel doahroar *Rongmwehu in John*, ioar doahroar ah kin wiahki joang moangoai dir ma armaj ahnla anjoau ohroj kilelin padahk doahroar mehkan in pali ngen, doahroar pil, pilahwa, marain, jilepen jihpw apel nah pwihnin jihpw, apel suhkoahn wain apel wah kan.

### **Audoapoa in Oarlap**

Sabin puk oauwe 1.1-18

John jounpoapdaj apel sabin sohnpadahk en Jesus 1.19-51 4

En Jesus doadoahk in pokon janjal 2.1—12.50

Koarjoahklahn rehn kan en mourin Jesus nehn Jerusalem apel wija kan ma koaroani 13.1—19.42

En Koaun Jesus ah iejda apel pwokkoang nahk 20.1-31

Koarjoahklahn puk oauwe: Jesus pel pwokkoang nah ok nehn Galilee 21.1-25

### *Mahjanno in Mour*

<sup>1</sup> Mahjanno minmine ipen Koahs mwohn sabin kawa; pwa Mahjanno, ioar ma Koahs. <sup>2</sup> Ioar Ih ma minmine ipen Koahs mwohn sabin kawa. <sup>3</sup> Koahs wiahda meohroj ki Mahjanno: a joh mehkij mine ma Mahjanno joah kapikda. <sup>4</sup> Mahjanno ioar ma poahjoan in mour; a mour oauwe, ioar ma kin kamaramihda armaj kan. <sup>5</sup> Maram oauwe ioar kin dakarda nehn ros, a rosso kin koauwehla.

<sup>6</sup> Mine armaj men ma koadoaddoardo jang ipen Koahs, adanki John, <sup>7</sup> ma indoa pwa en kadehde Marammo, pwa ohroj en rong pakairro apel pwojonla. <sup>8</sup> Jaudi ih ma Maramma, a ih indoa pwa en kadehdehda doahroar Marammo. <sup>9</sup> Ih ioar Maram mehlelwa ma indoahng jampah pwa en kamaramihda armaj ohroj.

<sup>10</sup> Mahjanno ne mine nehn jampah, mihndahr ma Koahs wiahda jampah ki Ih, jampah jehjoha Ih. <sup>11</sup> Ih indihdohng Ah wija, a sohn Ah wijahu johpwa kajamwo Ih. <sup>12</sup> A pwen joah, epwi ne kajamwo apel pwojonla. Doari, Ih ken kioang arai pwung in wiahla nihn Koahs. <sup>13</sup> Irai pwiai joah wiahla nihn Koahs jang in alin kanoaisikdihn armaj, pwa pein Koahs, ioar ma nainkihla irai.

<sup>14</sup> Mahjanno ken wiahla armaj dirki kalahngan apel mehlel minmine ipasai. Kisai kapang Ah ling, linngo ma Ih oaloo, nehn Ah wia Nihn Jamahu Iehroj men, Nihn Jamahu.

<sup>15</sup> John kadehdehda doahroar Ih in ngil koalik, "Ioar Woalwa me ma ngoahi siksikoa, 'Ih indoo mwerin ngoahi, a Ih laplap jang ngoahi, pwa Ih ne mine oh mwohn oai noaisikdi.' "

<sup>16</sup> Jang in dirin Ah kalahngan, Ih kapaiahki kisai joangoan kapai ohroj, oau mwerin oau, johkin uhdi. <sup>17</sup> Koahs kihdihdohng Moses audoapoan Kojoneddo, a kalahngan apel mehlel jang ipen Jesus Christ. <sup>18</sup> Joh armaj ne kapang Koahs. Nah Iehrojjo, ma doahroar Koahs, ma kin minmine ipen Jahmmo, Ih ioar kajalehioang armaj doahroar Koahs.

### *Padahk in John jounpoapdaj*

<sup>19</sup> Laplap in Jew-ok nehn Jerusalem kdarla jamwrou pwi apel mihn Levi pwi pwa irai en idoak oang John, "Inje koawoa?"

<sup>20</sup> John joah kia japoang, Ih sikoahda in janjal, "Jaudi ngoahi Messiah."

<sup>21</sup> Irai pel kalelpoak, "A da? Koawoa ma Elijah?"

John japoang irai, "Joah. Jaudi ngoahi ih."

Irai pel kalelpoak, "Doar da? Koawoa Joukohppo?"\*

A Ih japoang, "Joah."

<sup>22</sup> Irai pwa, "Padahkihoang kamai inje koawoa, pwa kamai en kak japoangki iraihok ma kadardo kamai. Da koawoa pwahki pein koawoa?"

<sup>23</sup> John japoang,

"Ngoahi 'ngilloau ma poangpoangjili nehn japwsoahn: Kamwai kainenehla alin Koaunno pwa ih en alu loaloo!' "

Doahr en joukohp Isaiah ne pwahla.

<sup>24</sup> Sohnpakair pwiai ma koadoaddoardo jang ipen Pharisee-ok, <sup>25</sup> idoak oang John, "A da kahrehda koawoa wihwiahki poapdaj, ma jaudi koawoa Messiah-wa, ke Elijah, ke Joukohppo?"

<sup>26</sup> John pel japoangki irai, "Ngoahi kin poapdajiki pil, a mine Emen ma minmine nehn pwungamwai kan, ma kamwai jehjoha, <sup>27</sup> Ih ma pirin indoo mwerin ngoahi a ngoahi joah warroang lapwadda joalin Ah juhwo."

<sup>28</sup> Mehpwiai ohroj ne wiawi nehn Bethany, palimese in Pillap Jordan, wijahu ma John kin wihwia ah poapdaj.

### *Simpwul in Koahs*

<sup>29</sup> Pwohrdahng rehno, John kapangda Jesus ah allaluhdohng ipoa, Ih ken pwahla, "Kapang! Simpwl in Koahswa ma kin kihjang dipen jampah ohroj. <sup>30</sup> Ioar Ih woallo ma ngoahi siksikoa doahr nehn oai pwahla, 'Woal men pirin indoo mwerin, ma laplapjang ngoahi, pwa Ih ne mine oh mwohn oai noaisikdi.' <sup>31</sup> Pein ngoahi johpwa kidal Ih. A pwen ioar kahrpoan oai indoo apel poapdajiki pil, pwa en kajalehda Ih oang mihn Israel."

<sup>32</sup> Me ioar kadehde ma John pel kajalehda: "Ngoahi ne kapang Ngen Joarwiho Ah indihdo jang nehnloange, in mwomwen mwurei men; ken minehla Ipoa. <sup>33</sup> Pein

\* **1:21** Joukohppo: Ma emen ma armaj kan kin kajkajik ma pirin indoo pwa en kalohkihdo indoahn Messiah-o.

ngoahi jehjoa Ih, a Koahs, ma kadardo ngoahi pwa ngoahi en kin poapdaijki pil, Ih pel pwehng ngoahi, 'Ma Emen ma koawoa pirin kapang Ngenno jokdi puwoa, ioar Ih ma pirin poapdaijki Ngen Joarwi.' <sup>34</sup> Ngoahi ne kapang apel ngoahi ne pel kadehde pwa Ih ioar Nihn Koahs."

### *Sapin Sohnpadahk in Jesus kan*

<sup>35</sup> Rehnno mwerin, John pwili mine wijahu, pwilihki nah sohnpadahk roahmen. <sup>36</sup> Nehn ah kapangda Jesus allaluhla ih pwa, "Ioar Simpwl in Koahs wa men."

<sup>37</sup> Sohnpadahk roahmenno rongda ah pwa me, ira ken kaujla Jesus <sup>38</sup> Jesus kapangda ira kahkahkaujla Ih, Ih idoaklahng ira, "**dahki kamwa raprapahki?**" ira japoang, "Rabbi" (lalloauwe woahwoahki Jounpadahk), "ia wija Koawoa kin minmine?"

<sup>39</sup> Ih japoang ira, "**Kamwa indoa kapang.**" Ira ken pwilihda ih kapangda wijahu ih kin minmine, ira ken minmine ipoa rehnno. (Pwa ne enken kiloak pahu mwerin-jauwaj).

<sup>40</sup> Andrew, rien Simon Peter ioar emen woal roahmenno ma rongda da John pwa ih ken pwilihla Jesus. <sup>41</sup> Andrew ken pispisinoar rapahkihda riah Simon, pel pwehng ih "Kamai ne kapangda Messiah-wa!" (woahwoahn Messiah ioar Christ) <sup>42</sup> Ih ken ukla ih ipen Jesus.

Nehn en Jesus kapangda ih, Ih pwehnglahng, "**Koawoa ioar Simon nihn John. Koawoa wud adankihla Cephas.**" (Ad oauwe woahwoahki Peter, ma pel ioar woahwoahki paiplap.)

### *Jesus pangin Philip apel Nathanael*

<sup>43</sup> Pwohrdahn rehnno, Jesus lemehta en inlahng Galilee, Ih kapangda Philip, pwehng ih, "**Kaujdo ngoahi!**" <sup>44</sup> Philip mihn Bethsaida, ioar nehn koaujoan oauwe ma Andrew apel Peter kin mine loaloa. <sup>45</sup> Philip ken suhwoang Nathanael pwehng, "Kamai ne kapangda Armajjo, ma Moses insingehdi nehn Pukin Kojonneddo, apel da joukohppok insingehdi. Ioar ih Jesus nihn Joseph, jang Nazareth."

<sup>46</sup> Nathanael idoak ipoa, "Kak mehkij mwehu pwokda jang Nazareth?"

Philip japoangki, "Indoa kapang."

<sup>47</sup> Nehn en Jesus Ah kapangda Nathanael allaluhdo, Ih pwa, "**Me ioar uhdahn woal mehlel in mihn Israel men, ma joh kin widening!**"

<sup>48</sup> Nathanael idoakkoang, "Koawoa kidal ngoahi jang ia?"

Jesus japoang, "**Ngoahi kapangda koawoa mwohn Philip ah pangindo koawoa, nehn oamw mine pehn suhkoa fig-o.**"

<sup>49</sup> Nathanael japoang, "Maing Jounpadahk, Koawoa ioar uhdahn Nihn Koahs. Koawoa ioar Nahmwarkihn Israel!"

<sup>50</sup> Jesus japoang, "**Koawoa kamehlele pwa oai pwehng koawoa pwa Ngoahi kapangda koawoa nehn anjoauwo ma koawoa mine pehn suhkoa fig-o? Koawoa pirin kapang joang pwi ma koalikjang mehpwiai!**" <sup>51</sup> Ih pel pwehng ih "Ngoahi pwehng kamwai in mehlel, kamwai pirin kapang nehnloange risda, a sohnloang in Koahs kan daoudoauda apel daoudoaudi pohnangin Nihn-Armaj."

## 2

### *Koapwoapwoaud Oau Nehn Cana*

<sup>1</sup> Mwerin rehn riau, koapwoapwoaud oau wiawi nehn koaujoan Cana, nehn Galilee; inen Jesus pel pwili mine wijahu. <sup>2</sup> Jesus apel nah sohnpadahkkok pel lukkoang in koapwoapwoauddo. <sup>3</sup> Nehn anjoauwo ma nimarai wainnok roj, inen Jesus-o pwehng Ih, "Roj nimarai wain."

<sup>4</sup> Jesus japoang, "**Joah pwehng Ngoahi da Ngoahi en wia. Oai anjoau kahjik leldo.**"

<sup>5</sup> Doari, inahu pwehng liduhwok, “Kamwai wiahda meohroj ma Ih pirin pwehng kamwai.”

<sup>6</sup> Doari, ja sakai koalik wonou mine wijahu, mihn kamwkel, siahk in loapin lamlam in mihn Jew-ok, ma kak audohdkihda nehn pwungen kalen rieijek ke jilihjek. <sup>7</sup> Jesus pwehng liduhwok, “**Kamwai audohkihda pil dohn pillok.**” Liduhwok ken audohda oaroh dir. <sup>8</sup> Ih pwehng irai, “**Kamwai idipda wahla ipen koaunin kamdippwe.**” Irai ken wahla. <sup>9</sup> Koaunin kamdippwo jong pillo ma wiahla wain, a Ih pwen jehjoa ia wija ma wainno injang. A liduhwok ma idipda pillo, irai ioar ma kidal. Koaunin kamdippwo ken pangindo woal kamwohddo, <sup>10</sup> pwehng, “Armaj ohroj kin kihda oh mijoa wain mwehu; a mwuhr, nehn sohn kamdippwo irai kin jakaula, irai kapwa kihda wain joah nohn mwehu. A koawoa neknekiddoar wain mwehuwo oaroh lel anjoau kije!”

<sup>11</sup> Ioar me sapisin kilel kan \* ma Jesus wiahda nehn Cana nehn Galilee, a ioar doahroar Ah kajalehda Ah ling; doari, Nah sohnpadahkkok ken pwojonla.

<sup>12</sup> Mwerin me, Jesus inlahng Capernaum, pwilihkihla inahu, riah woalok, apel Nah sohnpadahkkok, irai minmine wijahu oaroain rehn pwi.

### *Jesus Inlahng Umw Joarwiho*

<sup>13</sup> Nehn anjoau in Joarwihn Passover ne koaroando, Jesus ken inlahng Jerusalem.

<sup>14</sup> Ih kapangda in Umw Joarwiho woal pwi ma kin noaski kahu, jihpw apel mwurei, apel epwi sohnkawiliali mwani, minmine in arai sehpiilok. <sup>15</sup> Ih ken wiahkihda mihn pokpok joal pwi, Ih ken kaujjang irai in Umw Joarwiho, pwilihki jihpw apel kahu ohroj. Ih ken ukuddi en sohnkawiliali mwanihok arai sehpiilok apel wudekihdi nihrai mwanihok. <sup>16</sup> Ih pwehng irai ma kin noaskihla mwureiok, “**Kamwai wahlahjang mehpwiai me, a joah wiahki umwen Joamoaihe umwen noas oau!**” <sup>17</sup> Nah sohnpadahkkok ken lemehda da ma insingdi nehn Puk Joarwiho, “Maing Koahs, oai kajampwalki Umwoammwe kin okkockok nehn mohngiongihoa doahroar oai.”

<sup>18</sup> Koaunin mihn Jew-ok idoak ipoa, “Kilel da ma Koawoa kak en wiahda ma pirin kajalehioang kamai ma Koawoa anki manman in wia mehpwiai?”

<sup>19</sup> Jesus japoang, “**Kamwai koauwehla Umwen Koahs oauwe, a mwerin rehn jiluh Ngoahi pel pirin pwuroahng kouda.**”

<sup>20</sup> Mihn Jew-ok pel kalelpoak, “Koawoa pirin pwuroahng kouda rehn jiluhoar? Johnpar pahijek wonou ma Umw Joarwi oauwe kokoukihda!”

<sup>21</sup> A ummwo ma Ih pwahpwahpwa, ioar pein palwoaroa. <sup>22</sup> Nehn Ah iejda jang mehdi, Nah sohnpadahkkok ken samanda da Ih pwahkihla mehpwiai; apel irai ken pwojonla lal in Puk Joarwi apel en Jesus padahk kan.

### *Jesus Kidal Armaj Ohroj*

<sup>23</sup> Doari, nehn ah minmine Jerusalem nehn anjoau in Joarwihn Passover, dir armaj pwojonla Ih nehn irai kapangda kilel kan ma Ih kin wiahda. <sup>24</sup> A Jesus johpwa likihoang irai pein Ih, pwa Ih kidal armaj ohroj. <sup>25</sup> Johpwa anahne emen en kadehdehng Jesus doahroar armaj kan, pwa pein Ih kidal joang dahpwi ma kin mine nehn mohngiongirai.

## 3

### *Jesus apel Nicodemus*

<sup>1</sup> Woal men mine, oadoa Nicodemus; ih jounkaweid men ipen mihn Jew-ok, ma kijehn pwihnin Pharisee. <sup>2</sup> Pwong oau, woal mene ken inla ipen Jesus pwehng

\* **2:11** Kilel kan: Jounising mene kin doadoahkki loapin sikesik pase “Kilel” ma woahwoahki manman kapwuriamwei ma Jesus wiahda pwa mwokid pwiai kin wia kilelin pwa Ih nihn Koahs.



Ih, “Rabbi, kamai kidal ma Koawoa Jounpadahk men ma koadoaddoardo jang ipen Koahs, pwa joh emen ma kak wia kilel pwiai ma Koawoa kin wihwia ioarroar ma Koahs kin pwili Ih.”

<sup>3</sup> Jesus japoang, “Ngoahi pwehng koawoa in mehlel: joh emen kak kapang Wein Koahs ma ih johpwa ipwjapahl.”

<sup>4</sup> Nicodemus pel pwuroahng idoak, “A imdoahr armaj mahla men, kak en noaisikdi japahl? Mehlel ma Ih nen kak pwuroahng dilloang nehn kapehd in inahu pwa en pwuroahng noaisikdi?”

<sup>5</sup> Jesus japoang, “Ngoahi pwehng koawoa in mehlel: joh emen kak dilda nehn Wein Koahs, ma Ih joah noaisikihdi pil apel Ngen Joarwi. <sup>6</sup> Pali uduk kin noaisikdijang armaj, a pali ngehn jang Ngenno. <sup>7</sup> Koawoa en joah pwuriamweikihla ngoahi pwehng koawoa ma kamwai ohroj uhdahn pirin ipwjapahl. <sup>8</sup> Eng kin koalla wija ma ih nimen, apel koawoa kin rong ngiloa, a koawoa jehjoe wija ma ih koaldo jang, ke wija ma ih kin koallahng. Doari, ioar doahr emenemen ma noaisikihdi Ngenno.”

<sup>9</sup> Nicodemus pel pwuroahng idoak, “Imdoahr mehpwai en kak wiawi?”

<sup>10</sup> Jesus ken japoang, “Jounpadahk laplap in Israel men koawoa, a koawoa ken joah woahwoahki doahr mehpwai? <sup>11</sup> Ngoahi pwehng koawoa in mehlel: kamai kin siksikoa mehkan ma kamai woahwoahki, a kamai kin kadehde doahroar mehkan ma kamai ne kapang; a joh emen ipamwai ma nimen kamehlele amai kadehde. <sup>12</sup> Kamwai joh kin kamehlele ngoahi nehn anjoauwo ma Ngoahi kin pwehng kamwai doahroar mehkan ma pid jampah oauwe; a doar, imdoahr amwai en kak kamehlele Ngoahi ma Ngoahi en pwehng kamwai doahroar mehkan ma pid nehnloanng? <sup>13</sup> Joh emen ma indahla nehnloanng, ioarroar Ih ma indihdo jang nehnloanng; ioar Ih ma Nihn-Armaj.”

<sup>14</sup> “Doahroar en Moses ah soanoakihda sinek prons men nehn japwsoahnno, ioar doahroar Nihn-Armaj ah uhdahn pirin soanoakda, <sup>15</sup> pwa ma emen ma pwojonla ih nen anki mour joahsuk.”

<sup>16</sup> Pwa ioar uhwen Koahs ah ipwilki jampah, ma Ih kadarkihdo Nah Iehroj, pwa ma emen ma kin pwojonla Ih en joah joaloangla, a en anki mour joahsuk. <sup>17</sup> Pwa Koahs joh kadardohng in jampah Nah Iehroj pwa en kadeikda jampah, a pwa en koamoaurla jampah.

<sup>18</sup> Ma emen ma pwojon ih jehpirin kadeikda, a ma emen ma joah pwojon, ioar ih ma ne kadeikda, pwa ih joah pwojon Nihn Koahs Iehroj. <sup>19</sup> Ioar kadeikwa me: marammo ne pwardohng nehn jampah, a armaj kan ipwilki ros koalikjang marammo, pwa arai wihwiahk nauna. <sup>20</sup> Iraihoek ma kin wia me nauna kin kiahki marammo, apel ihr johkin nimen indoahng maram oauwe, pwa ihr joah mwehuki ahr wihwia nauna kan en janjalda. <sup>21</sup> A ma emen ma kin wia me mehlel kin indoahng maram, pwa marammo en kajalehda pwa ah wihwia kan poahjoanki ah peikkoang Koahs.

### *Jesus apel John*

<sup>22</sup> Mwerin mehpwai, Jesus apel Nah sohnpadahkkok inlahng japwen Judea. Ih pwilpwili irai minmine wijahu oaroain anjoau kij, apel wihwia poapdaj. <sup>23</sup> John pel wihwia poapdaj nehn Aenon, ma joah dohjang Salim, pwa pil dir mine wijahu. Armaj kan kin inlahng ipoa; ih ken poapdajihla irai. <sup>24</sup> Anjoau kije John kahjik joaldihoang nehn kalpwuhj.

<sup>25</sup> Doari, epwi nihn John sohnpadahkkok pel sapda akmaikihoang mihn Jew men, doahroar arai siahk in kamwkel. <sup>26</sup> Irai ken indoahng ipen John pwehng, “Jounpadahk, koawoa lemleme Woallo ma pwilpwili koawoa oaloap Jordan, ma koawoa kin kadehde doahroar? Doari, Ih wihwia poapdaj anjoau kije, apel armaj ohroj kin inla ipoa!”

<sup>27</sup> John japoang, pwa, “Joh emen kak anki mehkij ioarroar ma Koahs kioang. <sup>28</sup> Pein kamwai ma oai jounkadehde, nehn oai pwahla, ‘Jaudi ngoahi Messiah, a ngoahi koadoaddoardo mwohn Ih.’ <sup>29</sup> Li kamwohddo ioar en woal kamwohddo. A en woal kamwohddo pirienco uhda ipoa rong Ih; perperen nehn ah rong ngilen woal kamwohddo. Ioar doahroar oai peren kin unjekla. <sup>30</sup> Woallo uhdahn pirin laplapla, a ngoahi pirin siksikla.”

### *Ih ma Indihdo jang Nehnloannge*

<sup>31</sup> Ih ma indihdo jang puwoa, ioar Ih ma laplapjang meohroj. Ih ma indoa jang nehn jampah, ioar ih kijehn jampah, apel ih kin siksikoa mehkan ma pid jampah. A Ih ma indihdo jang nehnloannge, ioar Ih ma pohnangin meohroj. <sup>32</sup> Ih kin kadehde mehkan ma Ih kin widahli apel rongda, a joh emen ma kamehlele Ah kadehde kan. <sup>33</sup> Ma emen kamehlele Ah kadehde kan pirin kajalehda pwa Koahs ioar mehlel. <sup>34</sup> Pwa Ih ma Koahs ne kadardo kin siksikoa en Koahs Ah lal, pwa Koahs ne kioang Ngenin unjek. <sup>35</sup> Jahmmo ma ipwilki Nah Iehrojjo, Ih kioang Ih manman ohroj. <sup>36</sup> Emen ma kin pwojonla Nah Iehrojjo, ioar ih ma kin anki mour joahsuk. A emen ma johkin peikkoang Nah Iehrojjo, Ih jehpirin kapang mour, a koaloklok in Koahs pirin mine ipoa allaluhla.

## 4

### *Jesus apel Lihn Samaria*

<sup>1</sup> Doari, Pharisee-ok ken rongda pwa Jesus ne poapdaijihla apel naihnikihla sohnpadahk dirjang John. <sup>2</sup> A in mehlel, pein Jesus johpwa poapdaijihla emen, a Nah sohnpadahkok ioar. <sup>3</sup> Nehn anjoauwo ma Jesus kidalda sikesik pase, Ih ken inla jang Judea pel pwurlahng Galilee. <sup>4</sup> Doari, nehn ah allaluhla, Ih uhdahn pirin wudla Samaria.

<sup>5</sup> Doari, nen a lellahng nehn koaujoan in Samaria oau, ma adanki Sychar, ma joah dohjang jappwo ma Jacob kioang nah jermwein Joseph. <sup>6</sup> Ioar wijahu ma pwarer in Jacob mine. Doari, Jesus ken koakoahkkihla Ah japjapal inla, Ih ken koammoaldi pohn pwarerro. Me ne koaroannoang in jauwaj.

<sup>7</sup> A lihn Samaria men aludohng idpil. Jesus ken pwehnglahng liho, **“Kihdoa — nimoai ekij pillen.”** <sup>8</sup> Nah sohnpadahkok inlahng nehn koaujoanno, pwa irai en dupukda kanarai mwinge.

<sup>9</sup> Lihn Samaria-o japoang, pwa, “Imdoahr, koawoa mihn Jew men, a ngoahi mihn Samaria men, a koawoa ken kak poaki pil ipoai?” Pwa mihn Jew kan johkin doadoahkki mwoak ke pwohl kan ma mihn Samaria kan kin doadoahkki.

<sup>10</sup> Jesus japoang, **“Ma koawoa kidal doahroar kalahngan en Koahs, apel inje Ih ma poaki pil ipoamw, a koawoa nen poaki pil ipoa, apel Ih nen kioang koawoa pil mour.”**

<sup>11</sup> Liho pel pwehnglahng, “Maing, joh Oamw poakis, a pwarer oauwe loal; a ia wija Koawoa pirin idipjang pillen? <sup>12</sup> Imdoahr, Koawoa en laplapjang jamasai Jacob ma kihdoahng kisai pwarer oauwe? Ma ih, apel nah jermweinok, pwilihkihla nah mahn kan, arai ohroj kin nimpil jang pwarer oauwe.”

<sup>13</sup> Jesus ken japoang, **“Armaj ohroj ma kin nimpil jang nehn pil oauwe pirin pwuroahng nimen nimpilda; <sup>14</sup> a ma emen ma nimpil jang nehn pil oauwe ma Ngoahi pirin kioang nen johla pirin pwuroahng nimen nimpilda allaluhla. Pillo ma Ngoahi pirin kioang, nen poad loaloa apel wiahla pil koarkoar oau ma pirin kioang ih mour joahsuk.”**

<sup>15</sup> Liho pwehnglahng Ih, “Maing, Koawoa kihdoahng ngoahi pillen, pwa Ngoahi en joah pwuroahng nimen nimpilda, apel Ngoahi en joah pwurdohng idpil wija kije.”

<sup>16</sup> Jesus ken pel pwehng liho, **“Alwe, ukdo pahioammwo apel pwurdo wija kije.”**

<sup>17</sup> Liho pwehng Ih, "Joh pahioai."

Jesus pwehng ih, "Men pwung oamw sikesik en, 'Joh pahioai'; <sup>18</sup> pwa koawoa painkihla woal limmen, a woallo ma koawoa painki anjoau kije, jaudi uhdahn pahioamw. Me mehlel oau men koawoa pwehng Ngoahi."

<sup>19</sup> Liho pel pwehng Ih, "Maing, Ngoahi ne kidal pwa Koawoa joukohp men. <sup>20</sup> Jamamaihok kin pwongi pohn dol oauwe, a kamwai mihn Jew kin pwa, Jerusalem-oar, ioar wija ma armaj en pwongi Koahs."

<sup>21</sup> Jesus pwa, "Li, kamehlele Ngoahi, anjoau nen leldo ma armaj johla pirin joarwihoang Jahmmo pohn dol oauwe, ke pel nehn Jerusalem. <sup>22</sup> Kamwai mihn Samaria kan johpwa kidal inje ma kamwai kin pwongi; a kamai mihn Jew kan, kamai kidal inje Ih ma kamai kin pwongi; pwa koamoaurro kin indoa jang mihn Jew kan. <sup>23</sup> A anjoau pirin leldo, apel ne lel, ma sohn joarwi mehlel kan pirin pwongi Jahmmo in ngen apel mehlel, pwa ioar joangoan sohn joarwi kan ma Jahmmo kin perenki en pwongi Ih. <sup>24</sup> Ngen oau Koahs, a emen ma kin joarwihoang Ih en joarwihki ngen apel mehlel."

<sup>25</sup> Liho ken pwehng Ih, "Ngoahi kidal pwa Messiah, ma adanki Christ, pirin indoa. A ma Ih leldo, Ih pirin pwehng kisai meohroj."

<sup>26</sup> Jesus japoang, "Ioar ngoahi Ih, ma siksikesik oang koawoa."

<sup>27</sup> Doari, nehn anjoauwohr Nah sohnpadahkkok pwurdo pwuriamweikihla Ah siksikesik oang lihmen. A joh emen jang nehn pwungarai ma pwehng liho, "Dahkij koawoa anahne?" ke pel idoak oang Jesus, "Dahkij kahrehda Koawoa sikesikkihoang lihen?"

<sup>28</sup> Liho ken kihdi ah rumehn pillo, ken japahllahng nehn koaujoanno apel pwehng armajjok, <sup>29</sup> "Kamwai indoa kapang Woal men ma siko a oang ngoahi meohroj ma ngoahi ne wiahda. Imdoahr, jaudi Ih Christ?" <sup>30</sup> Irai inla jang nehn koaujoanno, indoa ipen Jesus.

<sup>31</sup> Nehn anjoauwohr Nah sohnpadahkkok pwehng Ih, "Maing Jounpadahk, ken mwinge."

<sup>32</sup> Ih japoang irai, "Mine koanoai mwinge, ma kamwai jehjoa."

<sup>33</sup> Sohnpadahkkok ken sapda peipeidekpene nehn pwungarai, "Mine armaj ne wahdo kanah mwinge?"

<sup>34</sup> Jesus pwehng irai, "Oai peikkoang Ih ma ne kardo ngoahi, apel wiahda Ah doadoahk, ioar koanoai mwinge. <sup>35</sup> Mine oau sikesik ma kamwai kin pwa: 'Johnpwongar pahu luhwoa, doari, ioar anjoau in doli.' A Ngoahi pwehng kamwai: kamwai jarda apel jipwoalwehng mwoaswel kan, wahrai kan ne mah apel ne mwehuwin doddol. <sup>36</sup> Ih ma kin doli, ih kin oaloo dupukoan ah doadoahk, apel ih kin doli oang mour joahsuk; pwa ih ma kin poadokdi apel ih ma kin doli ara pirin perperenpene. <sup>37</sup> Pwa mehlel sikesik pase: 'Emen kin poadokdi, emen sohrohr kin dolihdi.' <sup>38</sup> Doari, Ngoahi kdarwe kamwai pwa kamwai en dolihdi roakko nehn mwoaswel kan ma jaudi kamwai koadoahkoahda. Epwi ma koadoahkoahda, a kamwai pirin paiki arai doadoahk."

<sup>39</sup> Mihn Samaria dihrdir ma pwojonla Jesus jang nehn koaujoanno, pwa jang nehn en liho ah pwa, "Ih sikoahng ngoahi meohroj ma ngoahi wiahda." <sup>40</sup> Doari, nehn anjoauwo ma mihn Samaria-k indoa Ipoa, irai engdehn poaki pwa en minminehr iparai. Jesus ken minmine iparai oaroain rehn riau.

<sup>41</sup> Armaj dir pwojonkihla Ah padahk. <sup>42</sup> Irai pwehng liho, "Apkas kamai pwojon, jaudi pwa jang in oamw sikesik, a pwa pwen amai pein rong; ioar ma kamai ne kidalki pwa Ih ma uhdahn Jounkoamoaurin jampah."

*Jesus Kemwehuwihla Nihn Koan men Jermwein*

<sup>43</sup> Mwerin ah ne koaujoanki wijahu oaroain rehn riau, Jesus injang wijahu inlahng Galilee. <sup>44</sup> Pwa pein Jesus pwahla pwa, “**Joukohp men joh kin woan nehn uhdahn ah wija.**” <sup>45</sup> Doari, nehn ah ne lel Galilee, armaj kan in wijahu kajamwo, pwa irai ne kapang joang ohroj ma Ih ne wiahda nehn anjoau in Joarwihn Passover nehn Jerusalem; pwa pein irai pwili sowoahda kamdippwo.

<sup>46</sup> Doari, Jesus pwurlahng Cana nehn Galilee, wijahu ma Ih kawikla pil oang wain. Doari, laplap in wei men mine Capernaum, ma nah jermwein men johmwehuda. <sup>47</sup> Nehn woallo ah rongda pwa Jesus ne indoahng Galilee jang nehn Judea, ih inla ipoa — poaki pwa en indihdohng Capernaum apel kemwehuwihla nah jermweinno ma enkennoar mehdi. <sup>48</sup> Jesus ken pwa, “**Joh emen nehn pwungamwai kan kak kamehlele ma kamwai joah kapang manman koalik apel kapwuriamwei kan.**”

<sup>49</sup> Min laplappo japoang, “Maing, koawoa en pwilihla ngoahi mwohn noai jermweinno ah pirin mehdi.”

<sup>50</sup> Jesus pwa, “**Alwe, nihmw jermweinno pirin mour.**”

Woallo ken pwojon da Jesus pwa, ih ken allaluhla. <sup>51</sup> Nehn anjoauwo woallo japahldohng umwahu, nah liduhwok suhkioang ih ronngo pwa nah jermweinno pirin mour.

<sup>52</sup> Woallo kalelpoak iparai nehn anjoau da ma Ih sapda mwehula. Irai pwa, “Aio, kiloak oau mwerin jauwaj, johla ah karkar.” <sup>53</sup> Jahmmo ken lemehda pwa ioar anjoauwa ma Jesus pwehng ih “**Nihmw jermweinno pirin mour.**” Doari ih apel ah peneinei ohroj ken pwojonla.

<sup>54</sup> Me ioar kariauin kilel manman ma Jesus ne wiahda mwerin ah indoahng Galilee jang Judea.

## 5

### *Jesus Kasihkeida Woal Men Ipen Pil Oau*

<sup>1</sup> Mwerin mehpwiai, joarwi laplap oau in mihn Jew ken wiawi, Jesus ken indahlahng Jerusalem. <sup>2</sup> Doari, nehn Jerusalem ipen Wanihmwin Jihpw, mine loopin pil oau ma palang limoau pidekihpene, ma adanki Bethzatha in lal in Hebrew. <sup>3</sup> Ma johmwehu dir kin minmine nehn palang pwiai, min majkun, min dangpel, apel min mwoasor. [Irai kin joujowi pwa pillo en mwoakidda. <sup>4</sup> Pwa epwi anjoau sohnloang in Koahunno kin indihdohng in loopin pillo pwa en kamwoakidihda. Doari, nehn anjoauwo ma loopin pillo kin mwoakidda, emen ma pispisla loaloa oh mijoa, ioar ih ma pirin mwehula jang joangoan johmwehuwo ma ih anki.] <sup>5</sup> Woal men mine wijahu, ma johjohmwehuki johmpar jilihjek waluh. <sup>6</sup> Nehn Jesus ah kapangda woallo apel kidalda pwa ih minminehki wijahu anjoau roairoai, Ih ken pwehnglahng, “**Koawoa joah nimen sihkeida?**”

<sup>7</sup> Woal johmwehuwo japoang, “Maing, joh noai armaj men ma pirin wahdihwehng ngoahi nehn loopin pillo nehn anjoauwo ma ih kin mwoakidda. Pwa nehn oai kin allaluhdihwe, emen kin mijoahla ngoahi.”

<sup>8</sup> Jesus pwehng ih, “Uhda, oaloa kioammwen, alu.” <sup>9</sup> Nehn anjoauwohr woallo sihkeida, ih ken pwoakda kiahua inla.

Me wiawi rehnin Sabbath oau. <sup>10</sup> Mihn Jew-ok pwehng woallo ma mwehula, “Rehnoauwe rehnin Sabbath, kin uhwoang asai Kojonned koawoa en wa kioammwen.”

<sup>11</sup> Ih japoangki irai, “Woal ma kasihkeida ngoahi ma pwehng ngoahi, ‘**Oaloa kioammwen, alu.**’ ”

<sup>12</sup> Irai kalelpoak, “Inje Ih ma pwehng koawoa en oaloa kioammwen alu?”

<sup>13</sup> A woal mwehulahu jehjoa inje Ih, pwa wijahu ne pokonla, apel Jesus ne inlahjang wijahu.

<sup>14</sup> A doahr mwerin anjoaukij, Jesus pel kapangda woallo nehn Umw Joarwiho, Ih pwehng ih, “Kapang, koawoa ne mwehuda, koawoa joah pwuroahng dihp, pwa me naunahjang me nen lelloang koawoa.”

<sup>15</sup> Woallo ken inla pwehng mihn Jew-ok pwa Jesus ma kemwehuwihla ih. <sup>16</sup> Ioar kahrpoa oauwe ma kahrehda mihn Jew-ok irai sapda nimen koalkoa Jesus, pwa Ah kemwehuwihla woallo in rehnin Sabbath. <sup>17</sup> Doari, Jesus ken japoangkihlahng irai, “Joamoaiho kin doadoahk anjoau ohroj, doari Ngoahi pel uhdahn doadoahk.”

<sup>18</sup> Ioar lal oauwe ma kahrehioang mihn Jew-ok irai engdehkihoang irai en kojukdi Jesus, jaudi pwa ah koauwehla kojoned in Sabbath, apel ki Ah pwa ma Jamahwa Koahs, apel kapahrakkihoang Ih Koahs.

### *Manman in Nihn Koahsso*

<sup>19</sup> Jesus ken pwehnglahng irai, “Ngoahi pwehng kamwai in mehlel: Nahu johkak wia mehkij in pein Ih, pwa me Ih kin kapang ma Jahmmo kin wia, ioarroar mehkia Ih kin wia. Pwa da ma Jahmmo kin wia, ioar ma Nahu pel kin wia. <sup>20</sup> Pwa Jahmmo ah kin ipwilki Nahu, Ih kin kajalehioang meohroj ma pein ih kin wihwia. Doari, Ih pirin kajalehioang Ih wihwia kan ma koalikjang me; a kamwai ohroj nen pwuriamweikihla. <sup>21</sup> Pwa doahroar en Jahmmo Ah kin kapwohrihda min mehdi kan, apel kioang irai mour, pel doahroar en Nahu pel kin kioang mour irai kan ma Ih kin pwungki. <sup>22</sup> Pel joh emen ma Jahmmo kin kadeikda, pwa Ih ne kioang Nahu manman unjek en kadeik; <sup>23</sup> pwa armaj ohroj en woauki Nahu doahroar arai pel woauki Jahmmo. Ma emen ma joah woauki Nahu, Ih pel joah woauki Jahmmo ma kadardo Nahu.

<sup>24</sup> “Ngoahi pwehng kamwai in mehlel: ma emen ma kin rong Oai padahk apel pwojon Ih ma kadardo Ngoahi, ioar ih ma anki mour joahsuk. Ih johpwa pirin lelloang kadeik, pwa ih ne injang mehdi lelloang mour. <sup>25</sup> Ngoahi pwehng kamwai in mehlel: anjoau oau pirin indoa — doari, ne lel — ma mehdi kan pirin rongda ngilen Nihn Koahsso, apel irai kan ma rongda pirin mourda. <sup>26</sup> Pwa doahroar Jahmmo ma sapin mour, pel doahroar Ah kioang Nahu en pel wia sapin mour. <sup>27</sup> Apel Ih ne kioang Nahu manman pwa en wia kadeik, pwa Ih Nihn-Armaj. <sup>28</sup> Kamwai joah pwuriamweiki mehpwai, pwa anjoau oau pirin indoa ma irai ohroj ma mine nehn joaujoau kan pirin rong ngiloa, <sup>29</sup> apel irai pirin diljang nehn arai joaujoau kan. A irai kan ma wihwia mwehu pirin iejdahng mour, a irai kan ma wihwia nauna pirin iejdahng koaloklok.”

### *Kadehde oang Jesus*

<sup>30</sup> “Ngoahi johkak en wia mehkij in pein oai koajoandi. Pwa Ngoahi kin wia kadeik in mwomwen en Koahs kin pwehng Ngoahi. Doari, Oai kadeik kin pwung pwa Ngoahi johkin rapahki pein injenoai, Ah kupwur en Ih ma kadardo Ngoahi.

<sup>31</sup> “Ma Ngoahi pirin kadehde mwomwen pein Ngoahi, mehkan ma Ngoahi pwa jehpirin uhdahn wia mihn kadehde mehlel. <sup>32</sup> A mine emen ma kin kadehde Ngoahi, apel Ngoahi kidal pwa dahkij Ih kin sikoahki Ngoahi pwen mehlel. <sup>33</sup> Kamwai ne kadarlahng John nihmwai sohnpakairrok, ih ne kadehdehda doahroar me mehlello. <sup>34</sup> Jaudi pwa Ngoahi en uhdahn anki kadehdehn armaj; Ngoahi pwa mehpwai pwa kamwai en mourkihla. <sup>35</sup> John doahroar lahm oau ma kin okkokkok apel marmaram, apel kamwai kin nimen perenki ah maram anjoau kij. <sup>36</sup> A mine Oai kadehde ma koalikjang kadehde kan ma John ne wiahda: Pwa mehkan ma Ngoahi kin wihwia, ioar doadoahkkok ma Joamoaiho kin mweidoahng Ngoahi en wia, mehpwai ioar oai kadehde ma kin kajalehda pwa Jahmmo ma kadardo Ngoahi. <sup>37</sup> Apel Joamoaiho ma kadardo Ngoahi, pein Ih pel kadehdehda mwomwen Ngoahi. Kamwai kahjik rong ngiloa, apel kapang mijoa, <sup>38</sup> apel Ah lal kan johpwa kin minmine nehn loaloamwai



kan, pwa kamwai joah pwojon Ih ma Ih kadardo. <sup>39</sup> Kamwai kin sukuhlki Puk Joarwi pwa kamwai lemleme pwa kamwai pirin diar mour joahsuk jang loaloo. A Puk Joarwi kin kadehde doahroar Ngoahi! <sup>40</sup> A kamwai kia indoahng ipoai pwa kamwai en anki mour.

<sup>41</sup> “Ngoahi joah rapahki kaping jang ipen armaj kan. <sup>42</sup> A Ngoahi kidal kamwai, Ngoahi kidal pwa joh amwai limpoak oang Koahs nehn mohngiongimwai kan. <sup>43</sup> Ngoahi indoahki in manman in Joamoaiho, a kamwai johpwa kajamwo Ngoahi. A nehn en emen ah kin indoahki in pein oadoa, kamwai kin kajamwo. <sup>44</sup> Kamwai kin anahne oaloo kaping jang emenemen kamwai. A kamwai joah jong in rapahki kaping jang Ih ma kalahpwuk ioar Koahs. Doari, ia mwomwen amwai en kak kamehlele Ngoahi? <sup>45</sup> Kamwai joah lemleme pwa Ngoahi pirin kadipoo kamwai ipen Jahmmo. Mine emen ma pirin kadipoo kamwai, ioar ih Moses, ma kamwai kin koapwoarpwoarki. <sup>46</sup> Ma kamwai uhdahn kamehlele Moses, kamwai pel pirin kamehlele Ngoahi, pwa Moses insingehdi mwomwen Ngoahi. <sup>47</sup> Apwa amwai joah kamehlele ah lal kan, imdoahr amwai en kak kamehlele Oai padahk kan?”

## 6

### *Jesus Kamwinge Woal Limekid*

<sup>1</sup> Mwerin mehpwai, Jesus wudla Oaloap Lehn Galilee (ke Lehn Tiberias). <sup>2</sup> Doari, pokon koalik oau kaujla, pwa irai ne kapang kilel manmannok ma Ih wiahng armaj johmwehuwok. <sup>3</sup> Jesus indahla pohn dol oau apel mwindihoang wijahu, pwilihkihla Nah sohnpadahkkok. <sup>4</sup> Joarwihn Passover in mihn Jew-ok ne koaroando. <sup>5</sup> Jesus ken jipwoalla kapangda pokon koalik oau ma allaluhdohng ipoo, Ih ken pwehng Philip, “**Ia wija kisai kak dupuk jang mwinge ma en isarroang kamwingehla armaj pwiai ohroj?**” <sup>6</sup> Ih pwahla mehpwai pwa en jong Philip, pwa pein Ih kidal dahkij Ih pirin wia.

<sup>7</sup> Philip japoang Ih, “Oang joangoan dir oauwe, ma emenemen pirin kangla ekijjoar, kisai nen anahne mwani silper\* 200 (riepwiki).”

<sup>8</sup> Emen Nah sohnpadahk, Andrew, rien Simon Peter, pwehng Jesus, <sup>9</sup> “Jermwein siksik men mine me, ma wa lopwonin pilahwa limoau ma wiawihda jang wehn parli apel mwumw roahmen. A nen pwen uhdahn johpwa isar oang armaj pwiai!”

<sup>10</sup> Jesus pwehng irai, “**Kamwai kamwindihdi irai.**” Wijahu dirkihla mo. Armaj ohroj mwindi, woalloar doari dapwa 5,000 (limekid). <sup>11</sup> Jesus ken oaloo lopwonin pilahwahk, kapingkihoang Koahs, apel nehkkoang irai ma ne mwindihok, pel doahroar mwummwok, irai mwinge oaroh ken moad. <sup>12</sup> Nehn irai ne moad, Ih pwehng Nah sohnpadahkkok, “**Kamwai rikda luhwoahkan, pwa joh ekij en luhjla mwahl.**” <sup>13</sup> Irai ken rikpene luhwoahk ohroj, irai audohkihda pwuko eijek riau luhwen pilahwa jang in lopwon in pilahwa limoauwo ma ihr ne kangla.

<sup>14</sup> Nehn armajjok ma mine wijahu irai ne kapang kilel oauwe ma Jesus ne wiahda, irai ken pwa, “Mehlel, Woal mene ioar Ih Joukohpwa † ma pirin indoahng jampah!”

<sup>15</sup> Nehn Jesus Ah kidalda pwa irai pirin indoahng oaloo ih, pwa irai en ipong oang Ih en wiahla nahmwarki, Ih ken dillahjang irai indahlahng pohn dollo kalahpwukla.

### *Jesus Alu pohn Lehu*

<sup>16</sup> Nehn ah joausikpene, Nah sohnpadahkkok indihlahng nehn lehu. <sup>17</sup> Irai ken doauda pohn pohs oau, apel kosehla lehu pwurlahng Capernaum. Doari, ne pwongihdi, a Jesus kahjikkoar lellahng iparai. <sup>18</sup> Anjoauwo inenin koalik eng, apel mwoakidkid nehn lehu. <sup>19</sup> Nehn sohnpadahkkok irai jeijeijeiki dapwa mwail jiluh ke pahu, irai kapangda Jesus Ah allaluhdo — pohn pillo, nehn Ah koaroandohng

\* **6:7** Mwani silper: Me ioar uhwen dupukoan sohndoadahk men rehn oau nehn anjoauwo. † **6:14** Joukohpwa: Soahk 1.21.

wararai pohsso, irai ken majpwehkda. <sup>20</sup> Ih pwehng irai, “Ngoahi me, kamwai joah majpwehk.” <sup>21</sup> Irai ken perenda kajamwo Ih oang pohn pohsso, apel nehn anjoauwohr pohsso lel in oaroahrro, wija ma irai jeiheilang.

### *Armajjok Rapahki Jesus*

<sup>22</sup> Rehnwa mwerin, pokonno ma mine oaloap lehu kapang pwa pohs passoar mine wijahu. Irai kidal pwa Jesus johpwa pwili Nah sohnpadahkkok doaudahng pohn pohsso, irai kijoujang Ih. <sup>23</sup> Pohs pwi jang Tiberias pel kijkioulahng in oaroahr oau ma koaroandohng wijahu ma pokonno kangla pilahwahk ma Kounno kapingkalahnganki. <sup>24</sup> Doari, nehn anjoau ma pokonno kapang pwa Jesus apel Nah sohnpadahkkok joah mine wijahu, irai ken dakoahda pohs pwi apel inlahng Capernaum, pwa irai en rapahki Jesus wijahu.

### *Jesus ioar Pilahwahn Mour*

<sup>25</sup> Nehn anjoauwo irai kapangda Jesus oaloap pillo, irai idoakkoang, “Maing Jounpadahk, ngehd koawoa lel me?”

<sup>26</sup> Jesus japoang irai, “Ngoahi pwehng kamwai in mehlel: kamwai raprapahki ngoahi pwa kamwai ne kang pilahwahk apel moadkihla, jaudi jang in amwai woahwoahki kilel manman kan. <sup>27</sup> Joah doadoahk oang mwinge ma kin mwelingla, a doadoahk oang mwinge ma kin kioang kamwai mour joahsuk. Ioar mwingehioauwe ma Nihn-Armaj pirin kioang kamwai, pwa Koahs Jahm ne kioang Ngoahi kilel in kadehdehda doahroar Ah pwungki Ngoahi.”

<sup>28</sup> Irai ken kalelpoak ipoa, “A dahkij kamai en wia pwa kamai en kapwaihahda doadoahkko ma Koahs koajoanehdi?”

<sup>29</sup> Jesus japoang irai, pwa, “Me ioar doadoahk wa ma Koahs nimen kamwai en wia: pwojon Ih ma Ih kadardo.”

<sup>30</sup> Irai pel japoang, “Kilel da ma koawoa pirin wia, pwa kamai en kak kapang apel pwojonla koawoa? Dahkij koawoa pirin wia? <sup>31</sup> Jamamwai koalikkok ne kangla manna nehn japwsoahnno, ma doahroar Puk Joarwi pwa, ‘Ngoahi kihdihdohng irai pilahwa jang nehnloange pwa irai en kang.’ ”

<sup>32</sup> Jesus pwehng irai, “Ngoahi pwehng kamwai in mehlel: jaudi Moses ma kioang kamwai pilahwa jang nehnloange, a Joamoaiho, ioar Ih ma kihdihdohng kamwai pilahwa mehlello jang nehnloange. <sup>33</sup> Pilahwahu ma Koahs kihda, ioar ma indihdo jang nehnloange apel kioang mour oang jampah.”

<sup>34</sup> Irai pel poaki Ipoa, “Maing, kihdoahng kamai pilahwa oauwe anjoau ohroj.”

<sup>35</sup> Jesus pwehng irai, “Ngoahi ma pilahwahn mour. Ma emen ma kin indoahng Ngoahi johla pirin nimen mwingehda, a ma emen ma kin pwojon Ngoahi johla pirin nimen nimpilda. <sup>36</sup> Ngoahi ne pwehng kamwai pwa kamwai ne pwen kapang Ngoahi a kamai pwen johpwahr kamehlele. <sup>37</sup> Iraiok ohroj ma Joamoaiho kioang Ngoahi pirin indoa Ipoi. Emen ma indoa Ipoi Ngoahi jehpirin kajpahlihla. <sup>38</sup> Pwa Ngoahi indihdo jang nehnloange pwa Ngoahi en kapwaihahda kupwuren Ih ma kadardo Ngoahi, a jaudi pwa Ngoahi en wia injenoai. <sup>39</sup> A ioar kupwuren Ih ma kadardo Ngoahi: Ngoahi en joah kajoaloangehla emen jang nehn ohroj ma Ih ne kihdoahng ngoahi, a Ngoahi en kamourihda ohroj imwin rehnno. <sup>40</sup> Pwa me ioar kupwuren Joamoaiho: irai ohroj ma jipwoallahng Nahu apel pwojon, irai nen anki mour joahsuk, a Ngoahi pirin kamourihda irai imwin rehnno.”

<sup>41</sup> Mihn Jew-ok sapda lipahnde Ih pwa Ih pwa, “Ngoahi ioar pilahwahu ma indihdo jang nehnloange.” <sup>42</sup> Irai ken pwa, “A jaudi Jesus me, ma nihn Joseph? Kamai kidal jamahu apel inahu. A imdoahr Ih kak pwa, ‘Ngoahi indihdo jang nehnloange?’ ”

<sup>43</sup> Jesus japoang irai, “Kamwai joah lipahned nehn pwungamwaikan. <sup>44</sup> Joh emen kak indoa ipoai, ma Joamoaiho ma kadardo Ngoahi joah kadardohng Ngoahi;

a Ngoahi pirin kamourihda imwin rehnno. <sup>45</sup> Joukohppok ne insingehdi, 'Irai ohroj pirin oaloo padahk jang ipen Koahs.' Emenemen ma rong Jahmmo apel padahk jang, ih kin indoa Ipoai. <sup>46</sup> Me johpwa woahwoahki pwa emen ne kapang Jahmmo; ioarroar Ih ma indoa jang ipen Jahmmo, ne kapang Ih. <sup>47</sup> Ngoahi pwehng kamwai in mehlel: emen ma kamehlele, anki mour joahsuk. <sup>48</sup> Ngoahi ioar pilahwahn mour. <sup>49</sup> Jamamwaihok kangla manna nehn japwsoahnno, a irai mehdi. <sup>50</sup> A pilahwahu ma indihdo jang nehnloanngge, ma emen ma pirin kang, ih jehpirin mehdi. <sup>51</sup> Ngoahi ma pilahwahn mour ma indihdo jang nehnloanngge. Ma emen pirin kang pilahwahioauwe, Ih pirin mour allaluhla. Doari, pilahwahu ma Ngoahi pirin kihda, ioar udukoaihoa, ma Ngoahi kihda pwa jampah en mourkihla."

<sup>52</sup> Me kahrehda en mihn Jew-ok irai lioas sapda akmaipene nehn pwungarai. Irai ken idoak, "Imdoahr Woal mene, Ah kak kioang kisai udukoa pwa kisai en kang?"

<sup>53</sup> Jesus pwehng irai, "Ngoahi pwehng kamwai in mehlel: ma kamwai jehpirin kang uduk en Nihn-Armaj, a nim insahn, a doar, joah mour nehn kamwai. <sup>54</sup> Ma emen ma kin kang udukoaihoa a nim insahi, ioar ih ma anki mour joahsuk, a Ngoahi pirin kamourihda ih in imwin rehnno. <sup>55</sup> Pwa udukoaihoa ioar uhdahn mwinge apel insahi ioar pilin nimpil mehlel. <sup>56</sup> Ma emen ma kin kang udukoaihoa a nim insahi, Ih kin oauwoang Ngoahi, a Ngoahi kin oauwoang ih. <sup>57</sup> Doahroar Jahmmo ma mour kadardo Ngoahi, a Ngoahi kin mour ki Ih, ioar doahr ma emen ma kin kang udukoaihoa pirin mour ki ngoahi. <sup>58</sup> Ioar me pilahwawa ma indihdo jang nehnloanngge; jaudi joanngo ma jamamwai koalikkok ne kangla, a mwuhr irai mehdi. Ma emen ma kin kang pilahwa oauwe pirin mour allaluhla."

<sup>59</sup> Jesus pwa mehpwai nehn jinakohehu, nehn ah kin padpadahkjili nehn Capernaum.

### *Lal in Mour Joahsuk*

<sup>60</sup> Doari, dirin Nah sohnpadahk ok rongda mehpwai, irai pwa, "Padahk pase inenin apwal! Inje kak rong?"

<sup>61</sup> Joh emen pwehng Ih, a Jesus, a pein ih kidal pwa Nah sohnpadahkkok lipahnedkihla doahroar mehpwai. Ih pwehng irai, "Imdoahr, padahk oauwe kahrehioang amwai pwojon siksikla? <sup>62</sup> A imdoahr ma kamwai kapang Nihn-Armaj ah pirin japhaldahlahng wijahu ma Ih kin koaujoan mwohn Ah indihdo? <sup>63</sup> Ngenin Koahs ma kin kioang mour, a manman in armaj, ioar mehkij mwahl. Sikesik kan ma Ngoahi kin padahkihoang kamwai, dirkihla Ngen apel mour. <sup>64</sup> A epwi kamwai johpwa pwojon." Pwa Jesus kidal jang in sapdahu inje nehn pwungarai ma johpwa pwojon, apel inje woallo ma pirin pangla Ih. <sup>65</sup> A Ih pel pwa, "Ioar kahrpoa oauwe ma Ngoahi ne pwehngkihoang kamwai pwa joh emen kak indoa ipoai, ioarroar ma Jahmmo mweidoahng."

<sup>66</sup> Pwa padahk oauwe, dirin sohnpadahkkok ne mweikijang apel johla nimen pwilpwil Ih. <sup>67</sup> Jesus ken idoakkoang irai eijek roahmenno, "A kamwai, kamwai pel pirin injang Ngoahi?"

<sup>68</sup> Simon Peter japoang, "Maing, inje kamai en inla ipoa? Oamw lal kan, ioar lalin mour joahsuk. <sup>69</sup> Doari, apkas kamai ne kamehlele apel kidal pwa Koawoahr ioar ma Joarwi jang ipen Koahs."

<sup>70</sup> Jesus japoang, "Ngoahi ne pilda kamwai min eijek roahmen. A emen kamwai ioar ma lidu in Jehsen!" <sup>71</sup> Ih pwahkihla me pwa Judas, nihn Simon Iscariot; mihndahr ma ih emen in eijek roahmenno, a ih pirin pangla Jesus.

<sup>1</sup> Mwerin mehpwai, Jesus jeijeiloakjili nehn Galilee; Ih johpwa mwehuki jeiloak nehn Judea, pwa koaunin mihn Jew-ok ma mine wijahu irai kin nimen kojukdi ih. <sup>2</sup> Doari, joarwi laplap oau in mihn Jew-ok, ma adanki Joarwihn Umpwal, ne koaroando. <sup>3</sup> Riahan ken pwehng Ih, “Alwehjang me, inla Judea, pwa nihmw sohnpadahk kan en kapang doadoahk kan ma Koawoa kin wihwia. <sup>4</sup> Pwa joh emen kin oakihla dahkij Ih kin wihwia, ma Ih anahne indand. Doari, pwa oamw wihwia mehpwai, mweidoahng jampah pwon en kidal da koawoa wihwia!” <sup>5</sup> Pwa pel riah kan johpwa kamehlele Jesus.

<sup>6</sup> Jesus pwehng irai, “Uhdahn oai anjoauwa pe kahjikkoar lel. Oang kamwai pwen anjoau ohroj. <sup>7</sup> Jampah johkak lioassoang kamwai, a ih kin lioassoang Ngoahi, pwa Oai kin pwehpwehpwehng ih pwa ah wihwia kan nauna. <sup>8</sup> Kamwai indahla pwili joarwiho, pwa Ngoahi jehpirin indahla pwili joarwi oauwe, pwa oai anjoau kahjikkoar leldo.” <sup>9</sup> Ih ken pwehng irai mehpwai, doari Ih ken minminehr nehn Galilee.

### *Jesus Pwili Joarwihn Umpwal*

<sup>10</sup> Mwerin riahkan irai ne indahlahng joarwiho, Jesus pel indahla. Ih joah indahla in janjal, a Ih indahla in rir. <sup>11</sup> Koaunin mihn Jew-ok raprapahki Jesus nehn joarwiho. Irai idoak, “Ia Ih?” <sup>12</sup> Armajjok ngudngudngudki nehn pokonno mwomwen ih. Epwi armaj kin pwa, “Woal mwehu men Ih.” A epwi kin pwa, “Joah! Ih kin kapweipwei armaj.” <sup>13</sup> A joh min siksikoa in janjal mwomwen Jesus, pwa arai mijik koaunin mihn Jew-ok.

<sup>14</sup> Nehn Ah lel nehn lopkoan wihk in joarwiho, ioar anjoauwa ma Jesus indahlahng in Umw Joarwiho ken sapda padahk. <sup>15</sup> Koaunin mihn Jew-ok inenin pwuriamweikihla ken pwa, “Ia mwomwen Woal mene Ah inenin kidal mehkan nehn Ah johkin pwili sukuhl?”

<sup>16</sup> Jesus ken japoang irai, “Jaudi pein oai padahk ma Ngoahi kin kihda, a en Ih ma kadardo Ngoahi. <sup>17</sup> Ma emen ma anahne kapwaihahda kupwuren Koahs, ioar ih ma pirin woahwoahki mwomwen Oai padahk kan, ma jang ipen Koahs ke jang pein Oai manman. <sup>18</sup> Armaj men ma siksikoa doahroar pein ih kin jongjongjong in oaloo ah wahu. A ma emen ma anahne kalingihla Inje ma kadardo Ih, ioar Ih ma mehleh apel joh likamw kij mine ipoa. <sup>19</sup> Jaudi Moses ma kioang kamwai Kojoneddo? A joh emen nehn pwungamwaikan ma kin kapwaihahda Kojoneddo. Amwda kamwai ke enngengdehunki en kojukdi Ngoahi?”

<sup>20</sup> Sohn pokonno japoang Ih, “Ngen jaus mine Ipoamw! Inje ma enngengdehunki en kojukdi Koawoa?”

<sup>21</sup> Jesus japoang, “Doadoahk manman oauwoar ma Ngoahi wiahda, a kamwai ohroj pwuriamweikihla. <sup>22</sup> Pwa Moses ah koajoanehdihoang kamwai en jorkomjaijihla nihmwai jermwein kan — a jaudi jang Moses, a jamamwai koalikkok ma sapkihda siahk oauwe — kamwai pel kin jorkomjaijihla emen jermwein rehnin Sabbath. <sup>23</sup> Doari, ma jermwein emen jorkomjaijila nehn rehnin Sabbath, pwa Kojoned in Moses en joah ohla; a da kahrehda kamwai lioassoangki ngoahi pwa Oai kemwehuwihla woallo nehn rehnin Sabbath? <sup>24</sup> Joah kajawi wihwiahn armaj, a en kajawihki uhdahn me mehlello.”

### *Ioar Ih ma Messiah wa?*

<sup>25</sup> Epwi armaj in Jerusalem pwa, “Jaudi ioar Woal mene ma irai laplappok raprapahki pwa irai en kojukdi? <sup>26</sup> A kapang! Ih kin padpadahk in janjal, joh pwa emen ma pwa mehkij pwa en pallan! Imdoahr, koaun kan joah ne pwen kidal pwa ioar Ih Messiah wa? <sup>27</sup> Imdoahr en kak wiawi? Nehn anjoauwo ma Messiah pirin

indoa, joh emen pirin dehdehki ia wija ma Ih indoahjang. A kisai ohroj kidal ia wija ma Woal mene indoahjang.”

<sup>28</sup> Doari, nehn en Jesus Ah padpadahk nehn Umw Joarwiho, Ih ken ngil koalikda, pwa, “Kamwai uhdahn kidal Ngoahi, apel kidal ia wija ma Ngoahi injang? Ngoahi joah indoahki pein Oai manman. A Ih ma kadardo Ngoahi, ioar Ih ma mehleh. Kamwai jehjoa Ih. <sup>29</sup> Ngoahi kidal, pwa Ngoahi indoahjang ipoa, apel Ih ma kadardo Ngoahi.”

<sup>30</sup> Irai jong en koldi Ih, a joh emen pukkoangdi Ih, pwa Ah anjoau kahjikkoar leldo. <sup>31</sup> A irai dir nehn pwungen pokonno ma pwojonla, apel pwa, “Imdoahr, in anjoauwo ma Messiah-o indoa, Ih pirin wiahda kilel manman dirjang en woal mene ne wiahda?”

### *Sohnjilajil pwi Koadoaddoarla pwa irai en Joalihdi Jesus*

<sup>32</sup> Doari, Pharisee-ok rongda doahroar joang pwiai ma pokonno ngudngudngudki, irai apel jamwrou laplappok ken kadarla sohnjilajil pwi pwa irai en joalihdi Jesus.

<sup>33</sup> Jesus pwa, “Ngoahi pirin mine ipamwai ekij woaroai; doari, mwuhr, Ngoahi pirin pwurlahng ipen Ih ma kadardo Ngoahi. <sup>34</sup> Kamwai pirin rapahki Ngoahi, a kamwai nen johpwa kapangda ngoahi; pwa wijahu ma Ngoahi pirin mine, kamwai johkak inla.”

<sup>35</sup> Koaunin mihn Jew-ok ken pwahpene nehn pwungarai, “Ia wija ma Ih pirin inla, ma kisai johkak kapangda? Ih pirin inlahng nehn kahnihmw in mihn Greece kan, wijahu ma mihn Jew kan koaukoaujoan, apel padahk oang mihn Greece kan? <sup>36</sup> Ih pwa, ‘Kamwai pirin rapahki Ngoahi, a kamwai nen johpwa kapangda Ngoahi’; apel, ‘Kamwai joh kak inlahng wijahu ma Ngoahi pirin mine.’ Ia woahwoahn me?”

### *Pilin Mour*

<sup>37</sup> Nehn rehnno ma joarwiho pirin doarihla ioar rehnwa keiou kajampwal, Jesus uhda pwahla in ngil koalik, “Emen ma ne maroauda en indoa ipoai ih nimpil. <sup>38</sup> Ioar doahr Puk Joarwi pwa, emen ma pwojon Ngoahi, pilin mour nen koardahjang nehn ih.” <sup>39</sup> Jesus siko me doahr Ngenno, pwa ma iraihok ma kamehlelehla Ih pirin anki mwuhr. Pwa anjoauwo Ngenno kahjik indoa, pwa Jesus kahjikkoar lingla. <sup>40</sup> Epwi armaj nehn pokonno ma rongda Jesus pwa me Ihr pwahla, “Woal mene ioar uhdahn Joukohp wa!”

<sup>41</sup> Epwi pel pwa, “Ih ioar Messiah!”

A pel epwi idoak, “Imdoahr Messiah-o en kak indoahjang Galilee? <sup>42</sup> Pwa puk Joarwi pwa Messiah-o pirin injang kadaudokin Nahmwarki David, apel Ih pirin noaisikdi nehn Bethlehem, nehn kahnihmwo ma David kin koaujoan.” <sup>43</sup> Pokonno ken liaksohrohr nehn pwungarai ki Jesus. <sup>44</sup> A epwi nimen jipoardi Ih, a joh emen pukkoang Ih.

### *Joahpwojon in Koaunin mihn Jew-ok*

<sup>45</sup> Doari, sohnjilajillok pwurlahng ipen jamwrou laplappok apel Pharisee-ok. Irai idoak iparai, “Amwda kamwai ke joah wahdo Ih?”

<sup>46</sup> Sohnjilajillok japoang, “Joh emen ma kin padahk doahroar Woallo!”

<sup>47</sup> Pharisee-ok ken idoak iparai, “Imdoahr, Woallo pel kapweipweidi kamwai? <sup>48</sup> Kamwai kidal ma mine emen jang nehn pwungen min laplap kan ke Pharisee kan ma pwojonla Ih? <sup>49</sup> Pokon oauwe joah woahwoahki Kojonnedin Moses, ioar kahrehda irai riahkila!”

<sup>50</sup> Nicodemus, emen Pharisee-ok, ma inlahng ipen Jesus anjoaukij mwohn me, ih ken pwehng irai, <sup>51</sup> “Oang asai Kojonnedo, kisai johkak kadeik armaj men mwohn asai kahjikkoar rongda apel kapangda dahkij ih wiahda.”



<sup>52</sup> Irai japoang, “Imdoahr, koawoa pel emen mihn Galilee? Sukuhlki Puk Joarwi, koawoa nen kidalda johpwa joukohp men indoahjang Galilee.” <sup>53</sup> [Armaj ohroj ken inla in umwaraihok.]

## 8

### *Liho ma Diarekda nehn ah Kamwahl*

<sup>1</sup> [Doari, Jesus ken indahlahng pohn Dolin Olip. <sup>2</sup> Oh inminjoang in rehnwa mwerin, Ih ken japahllahng Umw Joarwiho. Sohn pokonno ohroj ken pokondohng ipoa; ih ken mwindi apel sapda padahk oang irai. <sup>3</sup> Jounpadahk in Kojonneddo pwi apel Pharisee pwi ukdohng ipen Jesus li men ma jipdi nehn ah kamwahl. Irai ken kioang liho en uhda mwohn ohroj, <sup>4</sup> irai ken idoakkoang Jesus, “Maing Jounpadahk, li mene jipdi nehn ah kamwahl. <sup>5</sup> Nehn asai Kojonneddo, Moses ruwoje pwa joangoan lihmene en kaskas oaroh mehdi. A koawoa, da koawoa pwahki me?” <sup>6</sup> Irai pwa me pwa en lidipihkihdi Jesus, pwa irai en kak kadipoahki Ih. A Jesus ken rukdi, insinge nehn pwirejjo ki jandinpoah. <sup>7</sup> A nehn irai uhda wijahu peipeidek, Jesus uhda pwehng irai, **“Inje in nehn kamwai ma johkin wiahda dihp, ioar ih ma en sabin kasoahki lihmene sakai.”** <sup>8</sup> Ih pel pwuroahng rukdi insinge nehn pwirejjo. <sup>9</sup> Nehn irai rongda me, irai ken allaluhpijoang wad emen, sapjang min mah kan. Jesus ken kalahpwukla, ipen liho ma uhda wijahu. <sup>10</sup> Jesus ken uhda, Ih ken idoak ipen liho, **“Ia irai? Joh emen luhwoahdi pwa en kadipoa koawoa?”**

<sup>11</sup> Liho pwehng Ih, “Joh emen, Maing.”

Jesus ken pwehng ih, **“Doari, Ngoahi pel jehpirin kadeikihda koawoa. Alwe a jang apkas inla koawoa joah pwuroahng wiahda dihp.”**

### *Jesus ma Maram in Jampah*

<sup>12</sup> Jesus pwuroahng pwehng Pharisee-ok, **“Ngoahi ma maram in jampah. Ma emen ma pirin pwilihdo Ngoahi nen anki maram in mour, apel johkak en allalu nehn ros.”**

<sup>13</sup> Pharisee-ok ken pwehng Ih, “Koawoa kin kadehde doahroar pein Koawoa, doari, mehkan ma Koawoa siksikoa johkin kadehdehda mehkij.”

<sup>14</sup> Jesus japoang, pwa, **“Joah, mihnda ma Ngoahi kadehdehda pein Ngoahi, a Oai kadehde mehlel, pwa Ngoahi kidal wijahu ma Ngoahi indoahjang, apel wijahu ma Ngoahi pirin inlahng. A kamwai jehjoa wijahu ma Ngoahi indoahjang, ke wijahu ma Ngoahi pirin inlahng. <sup>15</sup> Kamwai kin wia kadeik in doahroar armaj, a Ngoahi johkin kadeik emen. <sup>16</sup> A ma Ngoahi pirin wia, Oai kadeikko nen mehlel; pwa Ngoahi joah kalahpwuk nehn doadoahk oauwe, pwa Jahmmo, ma kadardo ngoahi, ioar Ih ma pwilpwili Ngoahi. <sup>17</sup> Ne pel insingdi nehn amwai Kojonneddo, nehn en jounkadehde roahmen ara sikesik en pwungpene, ioar mehlel. <sup>18</sup> Doari, Ngoahi kin kadehdehda doahroar pein ngoahi, a Joamoaiho ma kadardo Ngoahi Ih pel kadehdehda doahroar Ngoahi.”**

<sup>19</sup> Irai ken kalelpoak ipoa, “Ia Joamoamw wa?”

Jesus japoang, pwa, **“Kamwai jehjoa Ngoahi, apel jehjoa Joamoaiho. Ma kamwai kidal Ngoahi, kamwai nen pel kidal Joamoaiho.”**

<sup>20</sup> Jesus pwa mehpwiai ohroj nehn Ah padpadahk in Umw Joarwiho, nehn perehu ma dalen meiroang kan kin mine. A joh emen joalihdi Ih, pwa Ah anjoau kahjikkoar lel.

### *Kamwai Johkak Inla Wijahu ma Ngoahi pirin Inla*

<sup>21</sup> Jesus pel pwuroahng pwehng irai, **“Ngoahi pirin inla, a kamwai nen rapahki Ngoahi, a kamwai nen mehdi nehn dipamwai kan. Kamwai johkak inla wijahu ma Ngoahi pirin inla.”**

<sup>22</sup> Doari, koaunin mihn Jew-ok ken pwa, "Ih siko a pwa, 'Kamwai joh kak inla wijahu ma Ngoahi pirin inla.' Imdoahr, me woahwoahki pwa Ih pirin pein kojukdi Ih?"

<sup>23</sup> Jesus ken japoang, "Kamwai injang jampah, a Ngoahi indoa jang puwoa. Kamwai mihn jampah oauwe, a Ngoahi jaudi mihn jampah oauwe. <sup>24</sup> Ioar kahrpoan Oai pwehng kamwai, ma kamwai nen mehdi nehn dipamwai kan. A kamwai uhdahn nen mehdi nehn dipamwai kan ma kamwai johpwa kamehlele pwa 'Ngoahi ioar ma ngoahi.' "

<sup>25</sup> Irai kalelpoak ipoa, "Inje Koawoa?"

Jesus japoang, "Ma Ngoahi ne pwehng kamwai jang in sapdahu. <sup>26</sup> Dir me Ngoahi kak pwahki kamwai, dir me Ngoahi kak kadeikihki kamwai. A Ih ma kadardo Ngoahi, ioar mehlel; a Ngoahi pwehng jampah: mehkan ma Ngoahi ne rongjang Ih."

<sup>27</sup> A irai joah woahwoahki pwa Ih pwen pwehpwehpwehng irai mwomwen Jahmmo. <sup>28</sup> Jesus pel pwehng irai, "Nehn amwai pirin soanoakihda Nihn-Armaj, ioar anjoau ma kamwai nen kidal pwa 'Ngoahi ioar ma Ngoahi.' Doari, kamwai nen kidal pwa Ngoahi joah wiahki mehkij jang pein Ngoahi. A Ngoahi kin pwa mehkannoar ma Jahmmo kin padahkihoang Ngoahi. <sup>29</sup> Apel Ih ma kadardo Ngoahi kin pwilpwili Ngoahi; Ih johkin kerpwihla ngoahi, pwa Oai kin wihwia mehkan ma Ih mwehuki."

<sup>30</sup> Doari, min dir ma rong Jesus nehn Ah pwa mehpwiai, irai kamehlelehla Ih.

### *Mehlello pirin Kapisla Kamwai*

<sup>31</sup> Jesus pwehng mihn Jew-ok ma ne pwojonla, "Ma kamwai pirin peikkoang Oai padahk kan, kamwai pirin wiahla Noai sohnpadahk mehlel. <sup>32</sup> Apel kamwai pirin kidalla dahkij mehlel, a mehlello pirin kapisla kamwai."

<sup>33</sup> Irai ken japoang, "Kamai kadaudok en Abraham, a kamai kahjik wia lidu in emen jang ohmehj indoa. Ia woahwoahn Oamw lal en, 'Kamwai pirin jaldekla?' "

<sup>34</sup> Jesus pwehng irai, "Ngoahi pwehng kamwai in mehlel: ma emen ma kin wiahda dihp, ioar ih ma lidu in dihp. <sup>35</sup> A lidu men jaudi sowoa mehlel in peneinei oau oaroain. A jerihn peneinei men, ioar ih ma uhdahn sohn peneinei oaroain. <sup>36</sup> Doari, ma Nahu pirin kapisla kamwai, kamwai uhdahn pirin jaldekla mehlel. <sup>37</sup> Ngoahi kidal pwa kamwai kadaudok in Abraham pwi, a kamwai kin jong in kojukdi Ngoahi pwa amwai joah nimen oaloahda Oai lal kan. <sup>38</sup> Ngoahi kin siksikoa mehkan ma Jahmmo kin kajalehioang Ngoahi, a kamwai kin wia mehkan ma jamamwaihok padahkihoang kamwai."

<sup>39</sup> Irai japoang, "Jamamai, ioar Abraham."

Jesus ken japoang, "Ma kamwai uhdahn nihn Abraham, kamwai pirin wihwia joangoan doadoahk kan ma ih wiahda. <sup>40</sup> Ioarroar Ngoahi ne wiahda, padahkihoang kamwai mehlello ma Ngoahi ne rongjang Koahs, a kamwai kin jongin kojukdi Ngoahi. Abraham johpwa wia joang oauwe! <sup>41</sup> Kamwai kin wihwia mehkan ma jamamwaiho ne wiahda."

Irai japoang, "Koahs ioarroar Jamamai wa; a kamai ioar uhdahn Nah jeri."

<sup>42</sup> Jesus pwehng irai, "Ma Koahs pwen uhdahn jamamwai wa, kamwai nen ipwilki Ngoahi, pwa Ngoahi indoa jang ipen Koahs, a Ngoahi ne minmine me apkas. Ngoahi joah indoahki pein Oai manman, a Ih ma kadardo Ngoahi. <sup>43</sup> Dahkij kahrehda kamwai johkin woahwoahki mehkan ma Ngoahi siko a? Pwa kamwai johkakkoang rong Oai padahk. <sup>44</sup> Kamwai kadaudok in Jehsen, pwa ih ioar jamamwai wa, apel kamwai kin engdehnoang kapwaihahda mehkan ma jamamwaiho kin mwehuki. Janngoar in sapinno, ih joun kojarmaj men. Ih johkin minmin oang me mehlello, pwa mehlello johpwa mine ipoa. Nehn anjoauwo ma ih kin sikesik likamw, ih kin wihwiah da ih ahnla, pwa Jehsen pwen likamw men, apel jemen joangoan likamw ohroj. <sup>45</sup> A ioar kahrpoan amwai joh kin pwojon Ngoahi, pwa Oai kin padahkihoang kamwai doahroar mehkan ma mehlel. <sup>46</sup> Inje nehn pwungamwai

kan ma kak kadehdehda doahroar dihp oau ma Ngoahi wiahda? Doari, ma Ngoahi kin padahkihoang kamwai mehkan ma mehlel, a dahkij kahrehda kamwai johkin pwojonki Ngoahi? <sup>47</sup> Ma emen ma sapjang ipen Koahs kin rong en Koahs lal kan. A kamwai kan ma joah sapjang ipen Koahs, ioar kahrehda kamwai johkin nimen rong Ngoahi.”

### *Jesus apel Abraham*

<sup>48</sup> Mihn Jew-ok japoang Jesus, “Jaudi kamai pwung nehn amai sikoia pwa koawoa mihn Samaria men a ngen jaus mine ipoamw?”

<sup>49</sup> Jesus japoang, “Joh ngen jaus ipoai. Ngoahi kin woaunki Joamoaiho, a kamwai johkin woaunki Ngoahi. <sup>50</sup> Ngoahi johkin rapahki pein Oai wahu. A mine emen ma kin raprapahki Oai wahu, ioar Ih ma kin pwungki Ngoahi. <sup>51</sup> Ngoahi pwehng kamwai in mehlel: ma emen ma kin kapwaihahda Oai padahk kan jehpirin mehdi.”

<sup>52</sup> Mihn Jew-ok pwehng Ih, “Doari, me kamai ne kidal in mehlel pwa ngen jaus mine Ipoamw. Abraham mehdi, joukohppok pel mehdi; a Koawoa pwa, ‘Ma emen ma kin kapwaihahda Oai padahk kan jehpirin mehdi.’ <sup>53</sup> Jamasai Abraham ne mehdi. Koawoa joah lemleme pwa koawoa laplapjang Abraham? Joukohppok ne pel mehdi. Inje ioar Koawoa lemehkihoang pein Koawoa?”

<sup>54</sup> Jesus japoang irai, “Ma Ngoahi pirin kawahuwi pein Ngoahi, Oai wahu nen mwahlla. Joamoaiho, ioar ma kin woaunki Ngoahi, ioar Ih ma kamwai kin pwa amwai Koahs. <sup>55</sup> Kamwai kahjikkoar kidalda Ih, a Ngoahi ma kidal Ih. Ma Ngoahi pirin sikoia pwa Ngoahi jehjoa Ih, doari, Ngoahi ma likamw doahroar kamwai. A Ngoahi kidal Ih apel Ngoahi kin peikkoang Ah lal kan. <sup>56</sup> Jamamwai Abraham perenkihda ah pirin kapang Oai Rehnno. Doari, Ih ne kapang pel perenkihda.”

<sup>57</sup> Mihn Jew-ok ken pwehng Ih, “Koawoa kahjikkoar johnpair limeijek, a imdoahr Koawoa en kapang Abraham?”

<sup>58</sup> Jesus japoang irai, “Ngoahi pwehng kamwai in mehlel: mwohn Abraham ah noaisikdi ‘Ngoahi Ioar.’ ” \*

<sup>59</sup> Irai ken rik sakai pwa irai en kasoahki Ih; a Jesus ken karirihla pein Ih jang irai, ken injang Umw Joarwiho.

## 9

### *Jesus Kemwehuwihla Woal men ma Noaisikidihoar Majkun*

<sup>1</sup> Nehn Jesus Ah allaluhla, Ih kapangda woal men ma noaisikidihoar majkun. <sup>2</sup> Nah sohnpadahkkok kalelpoak, “Maing Jounpadahk, dipen inje ma kahrehioang woal mene ah noaisikdi majkun? Pein dipoa, ke dipen ah pahpa apel nohno?”

<sup>3</sup> Jesus japoang irai, “Jaudi dipoa, ke dipen ah pahpa apel nohno, ma kahrehioang ah majkun. A ih majkun pwa en kajalehda manman in Koahs. <sup>4</sup> Kisai uhdahn pirin engdehnnoang wia doadoahk in Ih ma kadardo Ngoahi ijanki pwa pe rehnnoar; pwa pwong ne koaroando, anjoau ma joh emen kak doadoahk. <sup>5</sup> Oaroain Oai pirin mine nehn jampah, Ngoahi ma kamaram in jampah.”

<sup>6</sup> Nehn Ah pwa mehpwiai, Ih ken andipoang nehn pwirej, ken wiahkihda pwelmasak. Doari, Ih ken irijki pwelmasakko pwoaroan mijen woallo, <sup>7</sup> pwehng, “Inla amwunla mijoammwen nehn Pilen Siloam.” (Ad oauwe woahwoahki “Koadoadoarla.”) Woallo ken inla amwunla mijoa nehn pillo, pwurdo ken kapangda wija.

\* **8:58** Ngoahi Ioar: Lal riakije doahroar lal ma Koahs wia in anjoau ma Ih pwokdahng Moses a kajalehioang Moses pein ih. Sisin loapin lal oauwe ekij doahroar sisin loapin lal in Hebrew, “Yahweh” ma woahwoahki “Koahunno” ih ma ne mihne.

<sup>8</sup> Doari, minnok ipoa — apel irai ma ne kapang woallo nehn ah kin poakpoak mehjwa, irai idoak, “Jaudi ioar woalwa me ma kin onohnnoar poakpoakpoak?”

<sup>9</sup> Epwi pwa, “Ioar, ih men.”

A pel epwi pwa, “Joah! Jaudi, a dinin doahroar woallo.”

Pein woallo ken pwa, “Ioar, ngoahi ih.”

<sup>10</sup> Irai idoak ipoa, “Imdoahr pwoaroan mijoammwen kan poahdpijoang?”

<sup>11</sup> Ih japoang, “Woallo ma adanki Jesus wiahda pwelmasak irijki pwoaroan mijoaihoa kai, a Ih pel pwehng ngoahi, ‘Alwe Siloam duhpla mijoammwen.’ Ngoahi ken inla, a nehn anjoauwohr ma ngoahi duhpla, ngoahi kapangda wija.”

<sup>12</sup> Irai idoak, “Ia Ih?”

A ih japoang, “Ngoahi jehjoa.”

### *Pharisee-ok Kapeidekki ih ma ne Mwehula*

<sup>13</sup> Doari, irai uklahng woal majkunno ipen Pharisee-ok. <sup>14</sup> Rehnno, rehnin Sabbath-oau, ma Jesus wiahda pwelmasak kapoahdkihpijoang pwoaroan mijen woallo. <sup>15</sup> Pharisee-ok pel pwuroahng idoak ipen woallo mwohmmwen ah kapangda wija. Ih pwehng irai, “Woallo kioang pwelmasak in pwoaroan mijoaihoa kai, ngoahi duhpla doari ken kapangda wija.”

<sup>16</sup> Epwi Pharisee-ok pwa, “Woallo ma wiahda me joah indoa jang ipen Koahs, pwa ih joah peikkoang kojond in rehnin Sabbath.”

A pel epwi pwa, “Imdoahr armaj dipan men, en kak wia joangoan manman doahroar me?” Irai ken liaksohrohrda nehn pwungarai.

<sup>17</sup> Pharisee-ok pel pwuroahng kalelpoak ipen woallo, “Koawoa pwa Ih kapoahdpijoang pwoaroan mijoammwen kan. Doari, dahkij koawoa pwahki doahroar woallo?”

Ih japoangki irai, “Joukohp men Ih.”

<sup>18</sup> Laplap in mihn Jew-ok joah nimen kamehlele pwa ih majkun, a kak kapangda wija mwuhr. Irai ken pangindo ah jamahu apel inahu, <sup>19</sup> kalelpoak ipara, “Nihmwa jermwein mene? Kamwa pwa Ih noaisikdi majkun? A doari, imdoahr ah kak kapangda wija apkas?”

<sup>20</sup> Ah jamahu apel inahu japoangki irai, “Kama kidal pwa ih ioar nihma jermweinwa, apel kama kidal pwa ih noaisikdi majkun. <sup>21</sup> Kama jehjoa imdoahr ah kak kapangda wija apkas, ke inje ma kapoahdpijoang pwoaroan mijoa kan. Kamwai idoak ipoa, pwa mine ah lamlam apel ih kak pein japoang kamwai!” <sup>22</sup> Jamahu apel inahu pwa mehpwiai pwa ira mijik laplap in mihn Jew-ok, pwa irai pwungkihpen ma emen pirin kadehde pwa Jesus ioar Messiah wa, irai pirin kainoapwihjang ih nehn jinakokehu. <sup>23</sup> Ioar kahrehda jamahu apel inahu pwahki, “Mine ah lamlam, kamwai idoak ipoa!”

<sup>24</sup> Irai pel pwuroahng pangindo woallo, ma noaisikdi majkun, irai pwehng ih, “Inoaukihda mwohn Koahs pwa koawoa pirin lallal mehlel oang kamai! Kamai kidal pwa woal dipan men ma kemwehuwihla koawoa.”

<sup>25</sup> Woallo japoang, “Ngoahi jehjoa ma ih dipan men ke joah. A mehkijjoar ma ngoahi kidal, pwa mehjwa ngoahi uhdahn majkun, a apkas ngoahi kapangda wija.”

<sup>26</sup> Irai pel kalelpoak, “Dahkij Ih wiahng koawoa? Imdoahr Ah kapoahdpijoang pwoaroan mijoammwen kan?”

<sup>27</sup> Ih japoangki irai, “Ngoahi ne pwehng kamwai, a kamwai joah nimen rong. Dahkij kamwai pel nimen pwuroahng rongki? Dapwa kamwai pel nimen wiahla Nah sohnpadahk!”

<sup>28</sup> Irai koauwe ih apel pwa, “Koawoa Nah sohnpadahk, a kamai nihn Moses sohnpadahk! <sup>29</sup> Kamai kidal pwa Koahs lalloang Moses; a Ih, kamai jehjoa ia wijahu Ih indoa jang!”

<sup>30</sup> Woallo japoangki irai, “Joangoan kapwuriamei! Kamwai jehjoa wijahu ma Woallo indoa jang, a Ih kapoahdpijoang pwoaroan mijoaihoa kai! <sup>31</sup> Kisai kidal pwa Koahs johkin rong armaj dipan kan; a Ih kin rong iraihok ma kin woauki apel wia joang kan ma Ih kin perenki. <sup>32</sup> Jang oh in sapin jampah, joh emen ma ne rong ma mine emen kapoahdpijoang pwoaroan mijen armaj men ma noaisikdi majkun. <sup>33</sup> Ma woal mene jaudi jang ipen Koahs, Ih johkak wiahda mehkij.”

<sup>34</sup> Irai japoangki, “Koawoa noaisikdi apel koakoairda nehn dihp, koawoa jongjongjong en padahki kamai?” Irai ken kainoapwihjang ih nehn jinakokehu.

### *Majkun in Loapin Ngen*

<sup>35</sup> Nehn Jesus Ah kidalda pwa irai ne kainoapwihdi woallo jang nehn jinakokehu, Ih suhwoang apel pwehng, “Imdoahr, koawoa pwojon Nihn-Armaj?”

<sup>36</sup> Woallo japoang, “Maing, Koawoa pwehng ngoahi inje woal mene pwa ngoahi en kak pwojonla!”

<sup>37</sup> Jesus pwehng, “Koawoa ne kapang, apel ioar Ih ma siksikesikkoang koawoa apkas.”

<sup>38</sup> Woallo pwehng, “Maing oai Koaun, ngoahi ne pwojonla!” Ih ken poadpwomwla mwohn Jesus.

<sup>39</sup> Jesus pwa, “Ngoahi indoahng jampah pwa Ngoahi en wia koapwung; pwa min majkun kan en kapangda wija, a irai ma kin kapang wija en majkunla.”

<sup>40</sup> Epwi Pharisee-ok, ma mine wijahu, rong Ah pwa mehpwai, irai kalelpoak, “Imdoahr kamai, kamai pel majkun?”

<sup>41</sup> Jesus japoang irai, “Ma kamwai uhdahn majkun, kamwai johpwa dipda; a me, nehn amwai kin pwa, ‘Kamai kak kapang wija,’ woahwoahki pwa kamwai ne dipda.”

## 10

### *Karajraj in Jilepen Jihpw*

<sup>1</sup> “Ngoahi pwehng kamwai in mehlel: ma emen ma joah dilda nehn wanihmwin kelin jihpw, a doau oang nehn oau joangoan al sohrohr, ioar ih jounpirap men, apel mwoarjuwed men. <sup>2</sup> A ih ma kin dilda nehn wanihmmwo, ioar ih ma jilepen jihpw. <sup>3</sup> Jilepen wanihmmwo kin risingdahng jilepen jihppwo; nah jihpw kan kin rong ngiloa, nehn ah kin panginki irai oadoarai, a ih kin kahlwahla irai likin. <sup>4</sup> Nehn ah kadilihla irai, Ih kin wudla mwohn irai, apel jihpw kan kin kauj ih, pwa irai ahnla ngiloa. <sup>5</sup> Irai jehpirin kauj emen sohrohr; irai nen kau jang joangoan armaj meno, pwa irai jahn ngiloa.”

<sup>6</sup> Jesus pwehng irai karajraj pase, a irai johpwa kidal ia woahwoahn.

### *Jesus Ioar ma Jilepen Jihpw Mwehu*

<sup>7</sup> Jesus pel pwuroahng pwehng irai, “Ngoahi pwehng kamwai in mehlel: Ngoahi ma wanihmwin kelin jihpw. <sup>8</sup> Irai ohroj ma ne indoa mwohioa, jounpirap apel mwoarjuwed pwi, a jihppwok joah rong irai. <sup>9</sup> Ngoahi ma wanihmmwo. Ma emen dilda nehn wanihmw oauwe pirin mourla. Ih pirin dilda apel dilla, apel kapangda kanah mwinge. <sup>10</sup> Jounpirap kin indoa pwa en pirapoa, kojukdi, apel koauwehla. A Ngoahi, indoa pwa irai en anki mour — mour unjek.

<sup>11</sup> “Ngoahi ma jilepen jihpw mwehu. Jilepen jihpw mwehu men mihndahkihla Ah mour ki Nah jihpw kan. <sup>12</sup> Sohndoadoahk men, ma jaudi jilepen jihpw, apel jaudi uhdahn nah jihpw kan, nehn ah kin kapangda wolf ah allaluhdo Ih kin kerpwihla irai ih kaula. Wolf kin koldi jihpw kan apel kaujpijoang irai. <sup>13</sup> Sohndoadoahk men kin kaula pwa ih doadoahkkoar pwa en oaloo dupkoa, a joh kin injinohki jihpw kan. <sup>14</sup> Ngoahi ma jilepen jihpw mwehuwa. Ngoahi kidal Noai jihpw kan, irai pel kidal



Ngoahi. <sup>15</sup> Doahroar Jahm ah kidal Ngoahi, apel Ngoahi kidal Jahmmo. A Ngoahi pirin mihndahkihla Oai mour pwa irai. <sup>16</sup> Pel mine epwi Noai jihpw ma joah mine nehn kel oauwe. Ngoahi uhdahn pirin wahdo irai, apel irai pirin rong ngiloaihoa. Doari, irai pirin wiahla pwihnin jihpw oauwoar, apel jiloapoarai pirin emennoar.

<sup>17</sup> “Joamoai kin ipwilki ngoahi, pwa Oai kin mihndahkihla Oai mour, pwa Ngoahi en kak pwuroahng oaloo. <sup>18</sup> Joh emen pirin kihjang Oai mour, a pein Ngoahi ma mihndahkihla. Mine Oai manman en mihndahkihla, apel pel mine Oai manman in pwuroahng oaloo. Ioar doahroar ma Joamoaiho inoaukihoang Ngoahi pwa Ngoahi en wia.”

<sup>19</sup> Doari, mihn Jew-ok pel pwuroahng liaksohrohr ki lal pwiai. <sup>20</sup> Armaj dir nehn pwungarai pwa, “Ngen jaus mine ipoa, apel pweipwei men Ih! Dahkij kahrehda kamwai rong Ih?”

<sup>21</sup> A pel epwi pwa, “Armaj ma ngen jaus mine ipoa joh kak sikoah mehpwai. Mindoahr ngen jaus ah kak kapoahdpijoang pwoaroan mijen armaj majkun men?”

### *Mihn Jew kan Japwungki Jesus*

<sup>22</sup> Doari, anjoau in pokon in kajarawihn Umw Joarwiho\* nehn Jerusalem nehn johnpwong in kopou. <sup>23</sup> Jesus allaluhjili nehn Umw Joarwiho nehn Palang in Solomon. <sup>24</sup> Mihn Jew-ok ken pidekihpenne, idoakkoang Ih, “Ia woaroaihn amai pirin joujowihki koawoa? Ma ioar koawoa Messiah, kadehdehng kamai in janjal!”

<sup>25</sup> Jesus japoang, “Ngoahi ne pwehng kamwai, a kamwai joah nimen kamehlele Ngoahi. Doadoahkkok ma Ngoahi ne wiahda in manman in Joamoaiho, ioar ma ne kadehdehda. <sup>26</sup> A kamwai jehpirin kamehlele, pwa jaudi kijehn Noai jihpw kamwai. <sup>27</sup> Noai jihpw kan kin rong ngiloaihoa; a Ngoahi kidal irai, a irai kin pwilpwili ngoahi. <sup>28</sup> Ngoahi kioang irai mour joahsuk, a irai jehpirin mehdi. Joh emen kak doapwoahjang irai Ipoai. <sup>29</sup> Da Joamoaiho kioang Ngoahi koalikjang mehkan ohroj. † A joh emen ma kak doapwoahjang nehn poahn Joamoaiho. <sup>30</sup> Joamoaiho apel Ngoahi emennoar.”

<sup>31</sup> Mihn Jew-ok ken pwuroahng rik sakai pwa irai en kasoahki Ih. <sup>32</sup> Jesus pwehng irai, “Ngoahi ne wiahda doadoahk mwehu dihrdir mwohn kamwai ma Jahmmo kioang Ngoahi pwa Ngoahi en wia. A doari, doadoahk dahioau nehn pwungen doadoahk pwiai kamwai nimen kasoahki Ngoahi?”

<sup>33</sup> Mihn Jew-ok japoang, “Jaudi doadoahk mwehu ma kamai nimen kasoahkihdi Koawoa, a pwa Oamw kin lahlahwe Koahs! Pwa Koawoa, armaj men, Koawoa kin wiahki pwa Koawoa Koahs!”

<sup>34</sup> Jesus japoang, “Ne insingdi nehn amwai kojoneddo ma Koahs pwa, ‘Kamwai kohs pwi.’ <sup>35</sup> Doari, kisai kidal pwa dahkij Puk Joarwi sikoah pwen mehlel anjoau ohroj; a Koahs panginki irai koahs pwi, irai armaj kan ma Ah mahjan ne aluhwoang. <sup>36</sup> A Ngoahi, Jahm ne pilda kadardo nehn jampah. A doari, da kamwai kak sikoahki pwa Ngoahi lahlahwe Koahs pwa Oai pwa Ngoahi Nihn Koahs? <sup>37</sup> Ma Ngoahi johkin kapwaihahda doadoahk kan en Joamoaiho, doari, kamwai ken joah kamehlele Ngoahi. <sup>38</sup> A ma Ngoahi kin wiahda, mihnda ma kamwai johpwa kamehlele Ngoahi, a kamwai en kamehlele Oai doadoahk kan, pwa kamwai en kidalkihda apel woahwoahkihda pwa Jahm kin minmine nehn Ngoahi, apel Ngoahi, kin minmine nehn Jahm.”

\* **10:22** Kajarawihn Umw Joarwiho: Joarwi oauwe kin wiawi nehn johnpwong in Dihjempe pwa en wia kasmanin kajarwi japahl en pei joarwiho apel Umw Joarwiho in pahr 164 mwohn Christ, mwerin mihn likin kan irai kajaminihla pei joarwiho apel Umw Joarwiho. † **10:29** Da Joamoaiho kioang Ngoahi koalikjang mehkan ohroj. Oau kawoahwoa: Joamoaiho ma kioang Ngoahi irai, ma koalikjang mehkan ohroj.

<sup>39</sup> Irai pel pwuroahng rapahki pwa irai en jipoardi Ih, a Ih joaloang jang nehn pwungarai.

<sup>40</sup> Jesus japahlla oaloap Pillap Jordan wijahu ma John kin wia poapdaj mehjwa; Ih ken minmine wijahu. <sup>41</sup> Armaj dihrdir pokondohng ipoa. Irai ken pwa, "Joh manman John wiahda, a joang ohroj ma ih pwahki doahroar Woal mene inenin mehlel." <sup>42</sup> Doari, armaj dir wijahu ken pwojonla Jesus.

## 11

### *Mehdihn Lazarus*

<sup>1</sup> Mine woal men ma johmwehuda ma adanki Lazarus, kin koaukoaujoan Bethany, nehn kahnihmw ma Mary apel riah Martha kin koaukoaujoan. <sup>2</sup> (Ioar Mary mene ma salipki ehn Koaunno le karahdin a limwihki pisen moange, ioar ih ma pel rianki Lazarus ma johmwehudahu.) <sup>3</sup> Riariho koarongehki Jesus, "Maing ama Koaun, Oamw pirienco ne johmwehuda."

<sup>4</sup> Nehn Jesus ah rongda, Ih ken pwa, "**Johmwehu oauwe jehpirin kahrehda Lazarus en mehdi; me en wiawi pwa en kalingihda Koahs, a johmwehu oauwe pirin wia oau al ma Koahs pirin kalingihkihda Nahu.**"

<sup>5</sup> Jesus kin ipwilki Martha, riah liho, apel Lazarus. <sup>6</sup> Jesus ne kidal pwa Lazarus johmwehuda, a Ih minminehr wijahu ma Ih mine oaroain rehn riau. <sup>7</sup> Doari, Ih pwehng Nah sohnpadahkkok, "**Kisai pirin japahlla Judea.**"

<sup>8</sup> Sohnpadahkkok japoang, "Maing Jounpadahk, rehn pwiok mihn Jew-ok nimen kaso koawoa wijahu. A indoahr, koawoa pel lemleme pwurlahng wijahu?"

<sup>9</sup> Jesus japoang, "**Jaudi awa eijek riau mine nehn rehn oau? Doari, ma emen ma kin allalu in rehn, Ih jehpirin dipkelkel, pwa ih kapkapang maram in jampahioauwe.**"

<sup>10</sup> **A ma ih kin allalu inpwong, ih pirin dipkelkel, pwa marammo joah mine ipoa.**

<sup>11</sup> Jesus pwahla mehpwiai, apel pwuroahng pwa, "**Asai pirien Lazarus moairla. A Ngoahi pirin inlahng panginda ih.**"

<sup>12</sup> Sohnpadahkkok japoang, "Maing, ma ih moairla, a ih nen mwehula."

<sup>13</sup> Sikesik in Jesus pase uhdahn woahwoahki pwa Lazarus ne mehdi, a irai pwen kihkihoang pwa Jesus lemleme pwa ih pwen moair. <sup>14</sup> Jesus pwehng irai in janjal, "**Lazarus ne mehdi. 15 A pwa kamwai, Ngoahi perenkihda Oai joah mine ipoa, pwa kamwai en pwojon. Doari, kisai inla ipoa.**"

<sup>16</sup> Thomas (ma pel adanki Umpwoar) pwehng kijeh sohnpadahkkok, "Kisai pwili asai Jounpadahkke inla wijahu, pwa kisai en pwili Ih mehdi."

### *Jesus ioar ma Iejda apel Mour*

<sup>17</sup> Nehn Jesus ah mine wijahu, Ih kidalda pwa Lazarus ne joajjoardi a ne rehn pahu doaula puwoa. <sup>18</sup> Johpwa lel mwail riau ma Bethany dohki jang Jerusalem. <sup>19</sup> Mihn Jew dihrdir ma indoahng suhwoang Martha apel Mary pwa irai en kamwais ira ki mehdihn riara woallo.

<sup>20</sup> Nehn Martha ah rongda pwa Jesus allalu indoa, Ih aluhla pwa ih en suhwoang; a Mary minminehr nehn ummwo. <sup>21</sup> Martha pwehng Jesus, "Maing Oai Koaun, ma koawoa pwen minminehr me, rioai woallo jehpirin mehdi. <sup>22</sup> Doahr joah, Ngoahi kidal pwa Koahs pirin kioang Koawoa dahkij Koawoa pirin poaki Ipoa." <sup>23</sup> Jesus pwehng ih, "**Rioamw woallo pirin pwuroahng mourda.**"

<sup>24</sup> Martha japoang Ih, "Ngoahi kidal pwa Ih pirin pwuroahng mourda in rehnin kadeikko."

<sup>25</sup> Jesus pwehng ih, "**Ngoahi ma mour japahl apel Jounkoamoaur. Ma emen ma pwojon Ngoahi, mihndahr ma Ih mehdi, a Ih pirin mour. 26 A ma emen ma mour a pwojon Ngoahi, jehpirin mehdi allaluhla. A doari, koawoa kamehlele me?"**

<sup>27</sup> Liho japoang, “Eh, Maing oai Koahun, ngoahi kamehlele pwa Koawoa Messiah-wa, Nihn Koahsso, ma pirin indihdohng jampah.”

### *Jesus Joang*

<sup>28</sup> Mwerin Martha ah pwahla mehpiwai, ih japahlla ngudkihoang riah Mary, “Jounpadahkko ne indoa, a Ih idoak koawoa.” <sup>29</sup> Nehn Mary ah rongda, ih pispis uhda inla pwa ih en suhwoang Jesus. <sup>30</sup> (Jesus kahjikkoar lellahng nehn koaujoanno, pwa Ih minminehr wijahu ma Martha suhwoang Ih.) <sup>31</sup> Mihn Jew-ok ma pwili Mary mine nehn ummwo, ma kamwkamwais ih, irai pwilpwili ih anjoauwo ma irai kapang ih uhda a pispis dilla. Irai lelemehkihoang pwa ih pirin inla in joaujoauwo pwa ih en joang.

<sup>32</sup> A nehn Mary ah lellahng wijahu ma Jesus minmine, ih ken rukdi in pwoalkoa pwehng Ih, “Maing oai Koahun, ma koawoa minminehr me, rioai woallo nen johpwa mehdi!”

<sup>33</sup> Jesus kapangda ah joangjoangjoang, apel mihn Jew-ok ma pwili ih pel joang, Ih ken injinjuwedla apel pahsoaula. <sup>34</sup> Ih idoak iparai, **“Ia wija kamwai jaripdi ih?”** Irai japoang, “Maing amai Koahun, indoa kapang.”

<sup>35</sup> Jesus joang. <sup>36</sup> Mihn Jew-ok ken pwa, “Ia woahr Ah ipwilki woallo!”

<sup>37</sup> A epwi nehn pwungarai pwa, “Jaudi Ih ma kapoahdpijoang mijen woal majkunno? Imdoahr, Ih johkak en wia mehki pwa en doaroajang Lazarus mehdi?”

### *Lazarus Pwuroahng Mourda*

<sup>38</sup> Jesus pel pwuroahng injinjuwedla, inlahng in joaujoauwo, nehn pwoaroan paip oau ma sakai oau kin poaroahla.

<sup>39</sup> Jesus pwa, **“Kamwai pwoakjang sakaien!”**

Martha, rien woal mehdiho, pwehng ih, “Maing, Ih ne pwohn naunahla, pwa ne rehn pahu daulihla — ah joajjoardi!”

<sup>40</sup> Jesus pwehng liho, **“Ngoahi joah ne pwehng koawoa pwa koawoa pirin kapang lingin Koahs ma koawoa pirin pwojon?”** <sup>41</sup> Irai ken pwoakjang sakaiho, Jesus jarda pwa, **“Joamoai, kalahngan en koawoa pwa oamw kin rong Ngoahi. <sup>42</sup> Ngoahi kidal pwa Koawoa kin rong Ngoahi anjoau ohroj, a Ngoahi pwa mehpiwai pwa armaj pwiai ma mine wija kije, irai en kamehlele pwa Koawoa ma kadardo Ngoahi.”** <sup>43</sup> Mwerin ah pwahla mehpiwai, Ih kakoalikhla ngiloa, pwa, **“Lazarus, dildihdo!”** <sup>44</sup> Woal mehdiho dildihdo, poah apel ehn kan kidkidkihpenne likkoahun nehn joaujoau, apel likkoau oau pidpene mijoa. Jesus pwehnglahng irai, **“Kamwai lapwadda woallen kadarla ih.”**

### *Pwihnno ma Pallanda Jesus*

<sup>45</sup> Mihn Jew dir nehn pwungarai ma indoa ipen Mary, irai kapang da ma Jesus ne wiahda irai ken pwojonla. <sup>46</sup> A epwi irai pwurlahng ipen Pharisee-ok padahkihoang irai doahroar mehkan ma Jesus ne wiahda. <sup>47</sup> Doari, jamwrou laplappok apel Pharisee-ok ken kapokonihpene Sohn Mwoalen Koapwunngo pwehng irai, “Dahki kisai pirin wia? Pwa joangoan kilel kan ma woal mene kin wihwia! <sup>48</sup> Ma kisai mweidoahng ih en wihwia joang pwiai, armaj ohroj pirin pwojonla, a laplap kan in Rome nen indoa koauwehla asai Umw Joarwiho apel asai weihe pwon.”

<sup>49</sup> Emen irai ma adanki Caiaphas ma wia Jamwrou Laplap nehn pahrro pwehng irai, “Kamwai johpwa kidal mehki! <sup>50</sup> Kamwai johpwa dehdehki pwa en mwehu oang kamwai ma emen pirin mehkihi armaj kan pwa sohn weihe pwon en joah mwomwla?” <sup>51</sup> Caiaphas in mehlel, joah wia sikesik pase pwa Ih ioar ma wia Jamwrou Laplap in pahrro, ih pwen kohpda pwa Jesus pirin mehkihi mihn Jew-ok. <sup>52</sup> Jaudi irai ioar doari a pwa en kapsahpene jerihn Koahs kan ohroj ma ne mwoarpjoang.

<sup>53</sup> Doari, jang in rehnno inla koaunin mihn Jew-ok wia lamlamki doahroar irai pirin kojukdi Jesus. <sup>54</sup> A ioar kahrehda Jesus johla allaluhjili janjal nehn Judea. Ih ken injang wijahu inlahng wija kij ma koaroannoang japwsoahn, in kahnihmmwo ma adanki Ephraim; ioar wijahwa ma Ih minmine pwilihkihla Nah sohnpadahkko.

<sup>55</sup> Doari, en mihn Jew kan Joarwihn Passover ne koaroando, armaj dihrdir injang nehn japw kan indahlahng Jerusalem pwa irai kapwaihahda arai siahk in kamwkel mwohn joarwiho pirin sapda. <sup>56</sup> Irai raprapahki Jesus, a nehn irai pokonpene nehn Umw Joarwiho, irai kin peidekpene nehn pwungarai, “Da kamwai lemleme? Woallo pirin pwili joarwihe ke joah?” <sup>57</sup> Jamwrou Laplappok apel Pharisee-ok ne koajoanehdihoang armaj kan, ma emen kidal ia Jesus minmine, a en pakairkihdo pwa irai en kak joalihdi.

## 12

### *Soal oau nehn Bethany*

<sup>1</sup> Rehn wonou mwohn Joarwihn Passover, Jesus inlahng Bethany, wijahu ma Lazarus kin koaukoaujoan, woallo ma Jesus kamourihda jang mehdi. <sup>2</sup> Irai ken koaunopda mwingehn joausik wijahu. Martha pwili jeuweje nehkpijoang mwingehu, Lazarus ioar ih emen ma pwili Jesus mwindihoang in sehpyllo. <sup>3</sup> Mary ken wahdo le oau ma inenin koalik dupkoa ma wiawihkihda suhkoahu ma adanki nard, a salipki ehn Jesus, pel limwihki pisen moangehu. Karahdin in lehu ken pisoahla nehn ummwo pwon. <sup>4</sup> Emen Nah sohnpadahkko, Judas Iscariot — ih ma pirin pangla Jesus — pwa, <sup>5</sup> “Dahkij kahrehda lehioauwe joah noasla in mwani silper\* 300 (jilipwiki), pwa mwanihe en inlahng armaj joamwoahmwoa kan?” <sup>6</sup> Ih pwa me, jaudi jang in ah kin injinohki armaj joamwoahmwoa kan, a pwen jounpirap men ih. Ih ma kin wahwahwa nihrai pehkin mwaniho a kin kihkihjang mwani loaloa.

<sup>7</sup> Jesus pwa, “Kamwai joah kadroapwki lihe! Kamwai mweidoahng en nekidla dahkij ih ankiho oang in rehnno ma Ngoahi pirin joajjoardi. <sup>8</sup> Armaj joamwoahmwoa kan pirin minminehr ipamwai anjoau ohroj, a Ngoahi jehpirin mine ipamwai anjoau ohroj.”

### *Pwihhno ma Pallan Lazarus*

<sup>9</sup> Nehn pokon koalik in mihn Jew oau irai rongda pwa Jesus minmine Bethany, irai ken inla, jaudi pwa irai nimen kapanngoar Jesus, apel Lazarus ma Jesus ne kamourihda jang mehdi. <sup>10</sup> Jamwrou laplappok ken wia lamlamki doahroar mwomwen irai pirin pel kojukdi Lazarus, <sup>11</sup> pwa ih ma kahrehda mihn Jew dihrdir irai kerpwihla irai a pwojonla Jesus.

### *Dilda Jerusalem ki Rojon in Kalwehdi*

<sup>12</sup> Rehnno mwerin, pokon koalikko, ma indoahng pwili Joarwihn Passover, rongda pwa Jesus allalu indoahng Jerusalem. <sup>13</sup> Irai ken oaloa soahn suhkoa palm a inlahng pwa irai en suhwoang, irai ken rahrahuki, “Kapnga Koahs! Koahs en kapaiahda Ih ma indoa in oadoan Koaunno! Koahs en kapaiahda Nahmwarkihn Israel!”

<sup>14</sup> Jesus kapangda ejel pwulopwul men Ih ken doaudahng puwoa, doahroar ma insingdi nehn Puk Joarwi:

<sup>15</sup> “Kahnihmw in Zion, koawoa joah mijik!  
Me oamw Nahmwarki allalu indoa ipoamw,  
Ih mine pohn ejel pwulopwul men.”

<sup>16</sup> Nah sohnpadahkko joah wahwoahki me in anjoauwo. A in anjoauwo ma Jesus iejda apel poukdahla, irai ken lemehda da Puk Joarwi pwahki Ih, a irai pel wiahng Ih mehpwiai.

\* 12:5 Mwani Silper: Soahk 6.7

<sup>17</sup> Armajjok ma pwili Jesus nehn Ah pangin Lazarus jang nehn joaujoauwo, kamourihda jang mehdi, ken kalohkihjili da ma ne wiawi. <sup>18</sup> Ioar kahrpoan en pokonno irai inlahng suhwoang, pwa irai rongda pwa Ih wiahda manman oauwe. <sup>19</sup> Pharisee-ok ken pwahpene nehn pwungarai, “Kamwai kapang! Kisai johpwa pwoaida! Pwa me sohn jampah ohroj ne pwilihla Ih!”

### *Epwi mihn Greece Rapahki Jesus*

<sup>20</sup> Doari, mihn Greece pwi ma mine nehn pwungen irai kan ma inlahng Jerusalem pwa irai en joarwi in kajarwiho. <sup>21</sup> Armaj pwiai ken inla ipen Philip (ih mihn Bethsaida nehn Galilee), pwehng ih, “Maing, kamai nimen suhwoang Jesus.”

<sup>22</sup> Philip ken inla pwehng Andrew, a ara ken inla pakairkihoang Jesus. <sup>23</sup> Jesus japoang ira, “Anjoauwo ne leldo ma Nihn-Armaj pirin lingla. <sup>24</sup> Ngoahi pwehng kamwai in mehlel: pwa liporro in pilahwahioau johkak dirla ma ih jehpirin kipdihoang nehn pwirej mehdi. Ma ih mehdi, ih pirin wiahda liporro dir. <sup>25</sup> Ma emen kin ipwilki ah mour uhdahn pirin luhj jang; a ma emen kin mihndahkihla ah mour in jampahioauwe, ioar ih ma pirin anki mour joahsuk. <sup>26</sup> Ma emen ma nimen papah Ngoahi, ih uhdahn pirin pwilpwili Ngoahi, pwa wija ma Ngoahi pirin mine, ih pel pirin mine. A Joamoaiho pirin kawahuwihla emen ma kin papah Ngoahi.”

### *Jesus Sikoa doahroar Ah pirin Mehdi*

<sup>27</sup> “Anjoau oauwe ngenihoa injinjuwedla; a dahkij Ngoahi pirin pwa? ‘Joamoai, koawoa joah mweidoahng awa oauwe en indoahng ngoahi?’ Joah, pwa ioar kahrpoan oai indoa, pwa Ngoahi en lelloang nehn awahn loklok oauwe. <sup>28</sup> Joamoai, kalingihla oadoammwen!”

Doari, ngil oau ken indihdo jang nehnloanng, ma pwa, “Ngoahi kalingihla oadoaioa, a Ngoahi pirin pwuroahng kalingihla.”

<sup>29</sup> Pokonno ma mine wijahu rongda ngillo, irai ken pwa, “Ngilen jouruhr!”

Epwi pel pwa, “Sohnloang men ma lalloang Ih!”

<sup>30</sup> Jesus pwehng irai, “Jaudi Ngoahi ma ngil oauwe indihdohki, a pwen kamwai. <sup>31</sup> Anjoau oauwe ioar ma jampah oauwe pirin kadeikda. Anjoau oauwe koaunin jampah oauwe pirin kerpwihekla. <sup>32</sup> Doari, nehn Oai pirin pwoakpwoakda jang pohn jampah, Ngoahi pirin kahlwahdohng Ngoahi armaj ohroj.” <sup>33</sup> (Ih ken pwahla mehpwai pwa en kajalehda joangoan mehdiho ma Ih pirin mehkihdi.)

<sup>34</sup> Pokonno ken japoang, “A pukin Kojonneddo kin padahkihoang kamai pwa Messiah pirin mour allaluhla. Doari, indoahr Oamw kak sikoa pwa Nihn-Armaj uhdahn pirin pwoakpwoakda? Inje Nihn-Armaj mene?”

<sup>35</sup> Jesus japoang irai, “Marammo pirin minminehr nehn pwungamwaikan nehn anjoau kij. A doari, kamwai allaluhki marammo nehn ah mine ipamwai, pwa rosso nen koanoahdi kamwai. Pwa ma emen ma kin allalu nehn ros johkin kidal wijahu ih kin allaluhwoang. <sup>36</sup> Kamwai ken pwojon marammo nehn ah minmine ipamwai, pwa kamwai en kak wiahla armaj in marammo.”

### *Joah Pwojon in Mihn Jew-ok*

Mwerin Jesus Ah pwa mehpwai, Ih inla kajoaloangehla pein Ih jang irai.

<sup>37</sup> Mihndahr ma Ih ne wiahda kilel dir pwiai mwohn mijarai, a irai johpwa pwojonla.

<sup>38</sup> Pwa dahkij joukohp Isaiah pwa en pwoaida:

“Maing amai Koaun, inje ma ne kamehlele dahkij kisai ne kadehde?

Oang inje ma Koaunno ne kajalehioang Ah manman?”

<sup>39</sup> Ioar kahrpoa oauwe ma irai johkak pwojon, pwa Isaiah pel pwahla,

<sup>40</sup> “Koahs ma karosihla mijarai,

Ih ma risingdi arai lamlam kan,

pwa pwoaroan mijarai kan en joah kapang,



arai lamlam en joah woahwoahki,  
a irai jehpirin pwurdohng Ngoahi,  
pwa Ngoahi en kemwehuwihla irai.  
Ioar me ma Koahs ne pwahla.”

<sup>41</sup> Isaiah ne pwahla mehpwai pwa ah ne kapang en Jesus ling apel sikoah doahroar Ih.

<sup>42</sup> Doari, dir jang nehn pwungen koaunin mihn Jew-ok pwojonla Jesus, a pwen Pharisee-ok ma kahrehda irai johkin sikoah in janjal, pwa irai en joah kajroahkjang nehn jinakoke kan. <sup>43</sup> Pwa irai kajampwalki oaloha kaping jang ipen armaj koalikjang oaloha kaping jang ipen Koahs.

### *Kadeik ki da Jesus pwa*

<sup>44</sup> Jesus ken ngil koalikda, pwahla, “Ma emen ma pwojon Ngoahi, jaudi Ngoahi kalahpwuk ma Ih pwojon, pwa Ih pel pwojon Ih ma kadardo Ngoahi. <sup>45</sup> Ma emen ma kapang Ngoahi, ih pel kapang Ih ma kadardo ngoahi. <sup>46</sup> Ngoahi ne indoahng jampah doahroar maram oau, pwa irai ohroj ma kin pwojon Ngoahi irai en joah minminehr nehn ros. <sup>47</sup> Ma emen ma pirin rong Oai padahk, a johkin kapwaihahda, Ngoahi jehpirin kadeik. Ngoahi ne indoa, jaudi pwa Ngoahi en kadeikda jampah, a Ngoahi en koamoaurla. <sup>48</sup> Ma emen ma joah oalohada Ngoahi, apel joah peikkoang Oai padahk, mine emen ma pirin kadeik. Sikesik kan ma Ngoahi ne sikoahda, ioar ma pirin kadeikda irai in imwin rehnno! <sup>49</sup> Me ioar mehleh, pwa Ngoahi johkin kihda padahk jang pein Ngoahi; a Joamoaiho ma kadardo Ngoahi, pein Ih ma kin pwa dahkij Ngoahi pirin sikoah apel kadehdehda. <sup>50</sup> A Ngoahi kidal ma Ah lal pirin kahrehda mour joahsuk. Doari, da Ngoahi kin sikoahda, ioar da ma Joamoaiho pwehng Ngoahi pwa Ngoahi en sikoahda.”

## 13

### *Jesus Amwun pwoalkoan Nah Sohnpadahkkok*

<sup>1</sup> Doari, rehn oau mwohn Joarwihn Passover. Jesus ne kidal pwa Ah anjoau ne lel en injang jampah oauwe, inlahng ipen Jamahu. Ih kin pwen ipwilki Nah kan ma minmine jampah, a Ih kin pel ipwilki irai lel in imwin.

<sup>2</sup> Jesus apel Nah sohnpadahkkok mwingmwinge en joausik. Jehsen ken kainoangihda Judas, nihn Simon Iscariot, pwa en pangla Jesus. <sup>3</sup> Jesus kidal pwa Jamahu kioang Ih manman unjek. Ih pel kidal pwa Ih indoa jang ipen Koahs apel pirin japahlla Ipoa. <sup>4</sup> Jesus ken uhda jang in sehpyllo, kihjang Ah likkoan likinno, Ih piroahkihdi lopkoa daulloau. <sup>5</sup> Ih ken widekihdihoang pil nehn pahn oau Ih sapda amwunki pwoalkoan Nah sohnpadahkkok, apel limwihki daullo ma mine in lopkoa. <sup>6</sup> Nehn Ah lel ipen Simon Peter, Peter pwehng Ih, “Maing oai Koaun, Koawoa pirin amwun pwoalkoai?”

<sup>7</sup> Jesus japoang, “Koawoa joah kidal da ma Ngoahi wihwia anjoau oauwe, a mwuhr, koawoa pirin woahwoahkihda.”

<sup>8</sup> Peter pwehng Ih, “Koawoa jehpirin amwun pwoalkoai?”

Jesus japoang, “Ma Ngoahi jehpirin amwun pwoalkoamwen, koawoa johla pirin wia Noai sohnpadahk.”

<sup>9</sup> Simon Peter japoang, “Maing oai Koaun, jaudi pwoalkoaihoahr doari ma Koawoa pirin amwun, pwa pel poaihoa apel moangoaihoa!”

<sup>10</sup> Jesus pwahla, “Irai ma ne duhduhlahroh mwakelkel, apel joh kaspoan en pwuroahng duhdu, pwa irai ne mwakelkel; ioarroar, en amwunla pwoalkoarai. Doari, kamwai ohroj ne mwakelkella, a emennoar johpwa.” <sup>11</sup> (Pwa Jesus kidal

inje ma pirin pangla Ih; ioar kahrehda Ih pwa, “Kamwai ohroj ne mwakelkella, a emennoar johpwa.”)

<sup>12</sup> Mwerin ah amwunla pwoalkoarai ohroj, ih pwuroahng dilloang nehn Ah likkooun likinno, ih pel japhallahng dohiahu in sehpyllo. Ih ken idoak, “Imdoahr; amwai woahwoahki dahkij Ngoahi kapwehsene wiahioang kamwai? <sup>13</sup> Kamwai kin panginki Ngoahi Jounpadahk apel Koaun; men pwung amwai pwa apkas, pwa ioar Ngoahi ma Ih. <sup>14</sup> Ngoahi, amwai Koaun apel Jounpadahk, ma kapwehsene amwunla pwoalkoamwai kan. Kamwai uhdahn pirin amwun pwoalkoan emenemen kamwai. <sup>15</sup> Ngoahi wiahioang kamwai karajpoa oau, pwa kamwai en pel wia doahroar ma Ngoahi kapwehsene kajalehioang kamwai. <sup>16</sup> Ngoahi pwehng kamwai in mehlel: joh lidu men mine ma kin laplap jang ah koaun; joh jounpakair men mine ma laplap jang armajjo ma kadarla ih. <sup>17</sup> Apkas kamwai kidal pwa padahk mehlel pas me; doari, ia woahr amwai peren ma kamwai pirin kapwaihahda!

<sup>18</sup> “Ngoahi joah siksikoa doahroar kamwai ohroj, pwa Ngoahi kidal iraihok Ngoahi ne pilda. A lal in Puk Joarwi uhdahn pirin pwoaida, ma pwa, ‘Emen ma pwili kang koanoai mwingehi pirin pallan Ngoahi.’ <sup>19</sup> Anjoau kije Ngoahi pwehng kamwai mehpiwai mwohn ahr pirin wiawi, pwa nehn ahr pirin pwoaida, kamwai en pwojon pwa ‘Ngoahi ioar Ngoahi.’ <sup>20</sup> Ngoahi pwehng kamwai in mehlel, emen ma kin kajamwo emen ma Ngoahi kadarwe, Ngoahi ma ih kin kajamwo; apel emen ma kin kajamwo Ngoahi, ioar ih ma kin kajamwo Ih ma kadardo Ngoahi.”

### *Jesus Kohpda doahroar Ah pirin Panngekla*

<sup>21</sup> Nehn en Jesus Ah pwahla mehpiwai, Ih pel injinjuwedla, pwa, “Ngoahi pwehng kamwai in mehlel: emen jang nehn pwungamwai kan pirin pangla Ngoahi.”

<sup>22</sup> Sohnpadahkkok jipwjiwpwoalpene nehn pwungarai, inenin jawoahwoahkihda inje Ih sikoahki lal pwiai. <sup>23</sup> Doari, emen nehn pwungen sohnpadahkkok, ma Jesus kin ipwilki, mwindi ipen Jesus. <sup>24</sup> Simon Peter ken pwurlahng ih, idoak, “Kalelpoak ipoa pwa inje ma Ih pwahki me.”

<sup>25</sup> Sohnpadahkko ken sohlahng ipen Jesus, idoakkoang Ih, “Maing amai Koaun, inje ioar ih?”

<sup>26</sup> Jesus japoang, “Ngoahi pirin kaduhdi pilahwa kije nehn dal oauwe, kioang ih; ioar ih woalwa.” Doari, Ih ken kihda pilahwa kij kaduhdi, Ih kioang Judas, nihn Simon Iscariot. <sup>27</sup> Nehn anjoauwohr ma Judas oaloo pilahwahu, Jehsen dilloang nehn ih. Jesus pwehnglahng Judas, “Pispis wiahda dahkij koawoa uhdahn pirin wia!”

<sup>28</sup> Joh emen iparai in sehpyllo woahwoahki amwda Jesus ke pwa me. <sup>29</sup> Pwa Judas kin kohwahki pehkin mwaniho, epwi sohnpadahkkok lemlemehkihoang pwa Jesus pwehng ih en inla dupukda dahkij irai anahne oang kamdippwo, ke ih pirin kijkihoa min joamwoahmwoa kan ki mehkij.

<sup>30</sup> Judas oaloo pilahwahu, pispisinnor dilla. Anjoauwo ne pwong.

### *Kojonned Kappwo*

<sup>31</sup> Mwerin Judas ah dilla, Jesus pwahla, “Ioar anjoauwa me ma ling in Nihn-Armaj pirin janjalda. Anjoauwa me ma ling in Koahs ne janjalda nehn Ih. <sup>32</sup> Ma Nihn-Armaj pirin kajalehda ling in Koahs, doari, pein Koahs pirin kajalehda ling in Nihn-Armaj. Ih pirin wiahda apkas. <sup>33</sup> Noai jerihkan, Ngoahi jehpirin pwilpwili kamwai anjoau woaroi. Kamwai pirin rapahki Ngoahi, a apkas Ngoahi pwehng kamwai dahkij Ngoahi pwehng mihn Jew-ok, ‘Kamwai johkak inla wijahu ma Ngoahi allaluhlahng.’ <sup>34</sup> Ngoahi kioang kamwai kojonned kapw oau: kamwai en ipwilpene nehn pwungamwaikan. Doahroar Oai ipwilki kamwai, ioar doahroar kamwai en ipwilpene. <sup>35</sup> Armaj ohroj pirin kidalki pwa kamwai Noai sohnpadahk, ma kamwai pirin limpoakpene.”

*Jesus Kohpda doahr en Peter pirin Kahmahmkihla Ih*

<sup>36</sup> Simon Peter kalelpoak, "Maing Koaun, ia wija koawoa pirin inla?"

Jesus japoang, "Koawoa johkak kaujla Ngoahi wijahu ma Ngoahi pirin inla anjoau kije; a mwuhr koawoa nen kak kauj Ngoahi."

<sup>37</sup> Peter pel pwuroahng kalelpoak, "Maing oai Koaun, dahkij kahrehda ngoahi johkak kaujki koawoa anjoau kije? Ngoahi ne onopda ngoahi en mehkihdi Koawoa!"

<sup>38</sup> Jesus japoang ih, "Koawoa uhdahn ne koaunopda koawoa en mehkihdi Ngoahi? A, Ngoahi pwehng koawoa in mehlel: mwohn jummwa ah pirin joang, koawoa pirin kahmahmkihla pehn jiluh pwa koawoa jehjoa Ngoahi."

## 14

*Jesus, ioar Alwa oang Jahm*

<sup>1</sup> Doari, Jesus pwehng irai, "Kamwai joah pwunod apel injinjuwed. Kamwai pwojon Koahs apel pwojon Ngoahi. <sup>2</sup> Pere dir mine nehn umwen Joamoaiho; ma joh, Ngoahi jehpirin pwehng kamwai pwa Ngoahi pirin inla koaunopdahng kamwai dohiamwai. <sup>3</sup> Ngoahi pirin inla koaunopda dohiamwai, Ngoahi pirin pwurdo uk kamwai dohng ipoai, pwa kamwai en mine wijahu ma Ngoahi kin mine. <sup>4</sup> Kamwai kidal allo ma inlahng wijahu ma Ngoahi allaluhlahng."

<sup>5</sup> Thomas pwehng Ih, "Maing Koaun, kamai jehjoa wijahu ma Koawoa pirin inlahng. A imdoahr amai en kak kidal allo ma inlahng wijahu?"

<sup>6</sup> Jesus pwehng ih, "Ngoahi ma alwa, Ngoahi ma mehlelwa, Ngoahi ma mourwa; joh emen kak inla ipen Joamoaiho ma joh Ngoahi." <sup>7</sup> Ih pel pwehng irai, "Apkas kamwai ne kidal Ngoahi, kamwai pirin pel kidal Joamoaiho; jang apkas inla kamwai ne kidal Ih apel kapang Ih."

<sup>8</sup> Philip pwehng Ih, "Maing Koaun, kajalehioang kamai Jahm, ioarroar ma kamai anahne."

<sup>9</sup> Jesus pwa, "Imdoahr, Philip, anjoau roairoai ma Ngoahi kin pwilpwilihki kamwai, a kamwai kahjikkoar kidal Ngoahi? Inje ma ne kapang Ngoahi, ne pel kapang Jahm. Doari, dahkij koawoa pwahki, 'Kajalehioang kamai Jahm?' <sup>10</sup> Philip, koawoa joah kamehlele ma Ngoahi kin minmine nehn Jahm, a Jahm kin minmine nehn Ngoahi?" Jesus pel pwehnglahng Nah sohnpadahkkok, "Lal kan ma Ngoahi ne padahkihoang kamwai jaudi pein Oai. A Jahmmo ma minmine Ipoai, ioar Ih ma wihwia Ah doadoahk kan. <sup>11</sup> Kamwai kamehlele nehn Oai pwa ma Ngoahi kin minmine ipen Jahm, a Jahm kin minmine Ipoai; a ma joah, kamwai kamehlele ki doadoahk pwiai ma Ngoahi wihwia. <sup>12</sup> Ngoahi pwehng kamwai in mehlel: ma emen ma pwojon Ngoahi pirin wia doadoahk kan ma Ngoahi kin wia. Eh, ih pirin wia doadoahk koalikjang, pwa Ngoahi allaluhlahng ipen Jahm. <sup>13</sup> A Ngoahi pirin kapwaihahda joang ohroj ma kamwai poaki in oadoaioa, pwa ling in Jahm en janjalda ipen Nah. <sup>14</sup> Ma kamwai pirin poaki Ipoai mehki in oadoaioa, Ngoahi uhdahn pirin kapwaihahda."

*Inoaupoan Ngen Joarwi*

<sup>15</sup> "Ma kamwai ipwilki Ngoahi, a kamwai pirin kapwaihahda Oai kojoned kan. <sup>16</sup> Ngoahi pirin poaki ipen Jahm, a Ih pirin kioang kamwai pel emen Jounjauwaj, pwa en pwilpwili kamwai anjoau ohroj. <sup>17</sup> Ih Ngenwa ma kin kajalehda mehlelin Koahs. Sohn jampah oauwe johkak oaloo, pwa ihr johkak kapang apel johkak kidal Ih. A kamwai kidal Ih, pwa Ih kin minmine ipamwai apel nehn kamwai.

<sup>18</sup> "Ngoahi johkak en kihdi kamwai kalahpwukla, a Ngoahi pirin japahldohng kamwai. <sup>19</sup> Mwerin anjoau kij jampah oauwe pirin johla kapang Ngoahi, a kamwai pirin kapang Ngoahi. Pwa Ngoahi mour, kamwai pirin pel mour. <sup>20</sup> Nehn rehno

pirin leldo, kamwai pirin kidal pwa Ngoahi kin mine nehn Joamoaiho, a kamwai kin minmine nehn Ngoahi, doahroar Ngoahi kin minmine nehn kamwai.

<sup>21</sup> “Emen ma kin rong apel kapwaihahda Oai kojoned kan, ioar ih ma kin ipwilki Ngoahi. Joamoaiho pirin ipwilki emen ma kin ipwilki Ngoahi; Ngoahi pirin pel ipwilki ih, apel kajalehioang ih pein Ngoahi.”

<sup>22</sup> Judas (jaudi Judas Iscariot) pwehng Ih, “Maing Koaun, mindoahr Oamw pirin kajalehioang kamai pein Koawoa, a jaudi oang jampah?”

<sup>23</sup> Jesus japoang, “Emen ma ipwilki Ngoahi pirin kapwaihahda Oai padahk kan. Joamoaiho pirin ipwilki ih; Joamoaiho apel Ngoahi pirin indoa ipoa apel minmine ipoa. <sup>24</sup> Emen ma johkin ipwilki Ngoahi johkin kapwaihahda Oai padahk kan. Padahk kan ma kamwai ne rong, jaudi pein Oai, a pwen indoahjang ipen Joamoaiho, ma kadardo Ngoahi.

<sup>25</sup> “Ngoahi ne padahkihoang kamwai mehpiwai nehn Oai minmine ipamwai. <sup>26</sup> A Jounjauwajjo, Ngen Joarwi, ma Joamoaiho pirin kadardo in oadoaioa, ioar Ih ma pirin padahkihoang kamwai, apel kasmankihoang kamwai mehkan ohroj ma Ngoahi ne pwehng kamwai.

<sup>27</sup> “Ngoahi kioang kamwai popohl, pein Oai popohl ma Ngoahi kioang kamwai. Ngoahi johpwa kioang kamwai doahroar en jampah kin kioang kamwai. Kamwai joah injinjuwed, pwunod, apel majpwehk. <sup>28</sup> Kamwai ne rong Oai pwehng kamwai, ‘Ngoahi pirin inlahjang kamwai, a Ngoahi pirin japhaldohng kamwai.’ Ma kamwai ipwilki Ngoahi, kamwai nen perenki Oai inlahng ipen Jahm, pwa Ih ma laplapjang Ngoahi. <sup>29</sup> Ngoahi pwehng kamwai apkas mehpiwai mwohn ahr pirin wiawi, pwa nehn ahr pirin pwoaida, kamwai en kamehlele. <sup>30</sup> Ngoahi ne johkak sikesikkoang kamwai anjoau roairoai, pwa koaunin jampah oauwe ne allaluhdo, joh ah manman pohn Ngoahi; <sup>31</sup> a sohn jampah en uhdahn kidal pwa Ngoahi ipwilki Jahm. Ioar kahrehda Ngoahi kin wiahda joang ohroj ma Ih pwehng Ngoahi.

“Kisai ken inlahjang wijahkije!”

## 15

### *Jesus ioar Suhkoahn Wain Mehlelwa*

<sup>1</sup> “Ngoahi ma suhkoahn wain mehlelwa, a Joamoaiho jounmwoaswelwa. <sup>2</sup> Rahk ohroj ma johkin mine wah, Joamoaiho kin pakkahjang. Ih kin kamwosmwosihdi rahk ohroj ma kin kajalehda wah, pwa irai en pel dirla wah. <sup>3</sup> Kamwai ne mwakelkelkihda padahk kan ma Ngoahi ne padahkihoang kamwai. <sup>4</sup> Kamwai oauwoang Ngoahi, a Ngoahi pel pirin oauwoang kamwai. Ma kamwai joah poaddoang Ngoahi, kamwai johkak uhwa, doahroar rahn suhkoa pas pel johkak uhwa, ma ih joah poaddoang in palwoaroan suhkoahu.

<sup>5</sup> “Ngoahi ma suhkoahn wainwa, a rah kan kamwai. Ma emen ma poaddoang Ngoahi, a Ngoahi oang ih, pirin uhdahn dir wah; pwa kamwai johkak wia mehkij ma joah Ngoahi. <sup>6</sup> Emen ma joah poaddoang Ngoahi pirin doahroar rahn suhkoa pas ma kerpwihekla mengla. Joangoan rah pwiai pirin kihekpene apel kerpwiheklahng nehn oai, wija ma irai pirin jirepla. <sup>7</sup> Ma kamwai oauwoang Ngoahi, a Oai mahjan kan kin oauwoang kamwai, doari, kamwai pirin poaki mehkij ma kamwai anahne, uhdahn pirin pwoaihoang kamwai. <sup>8</sup> Ling in Joamoaiho pirin janjalda, ma kamwai pirin uhwahda dir, a ioar doahroar me amwai pirin wiahla Noai sohnpadahk. <sup>9</sup> Ngoahi ipwilki kamwai, doahroar Jahm ipwilki Ngoahi; kamwai minmine nehn Oai limpoak. <sup>10</sup> Ma kamwai pirin kapwaihahda Oai kojoned kan, kamwai pirin minmine nehn Oai limpoak, doahroar Oai kin kapwaihahda en Joamoaiho koajoandi, apel minmine nehn Ah limpoak.

11 “Ngoahi ne padahkihoang kamwai mehpwai pwa Oai peren en mine ipamwai, a amwai peren en unjekla. 12 Oai kojoned oang kamwai: kamwai en ipwilpene nehn pwungamwai kan, doahroar Oai kin ipwilki kamwai. 13 Limpoak wa keiou koalik ma emen anki oang ah pirien kan, ioar ih en mihndahkihla ah mour ki irai. 14 Kamwai ioar oai pirien, ma kamwai kin wia dahkij Ngoahi padahkihoang kamwai. 15 Ngoahi johla pirin panginki kamwai lidu, pwa lidu johkin kidal dahkij ah koaun kin wia. A Ngoahi pirin panginki kamwai pirien, pwa Ngoahi ne padahkihoang kamwai joang ohroj ma Ngoahi ne rongjang ipen Joamoaiho. 16 Jaudi kamwai ma pilda Ngoahi, a Ngoahi ma pilda kamwai. Ngoahi ma pilda kamwai pwa kamwai en alwe kaparahda wah dir, joangoan wah kan ma mwehu johkak ohla. Doari, Jahmmo pirin kioang kamwai meohroj ma kamwai pirin poaki Ipoa in Oadoaioa. 17 Doari, me Oai kojoned: kamwai en ipwilpene nehn pwungamwai kan.”

### *Kalioas in Jampah*

18 “Ma jampah kin lioassoang kamwai, kamwai en lemleme pwa ih lioassoang ngoahi mwohn ah lioassoang kamwai. 19 Ma kamwai kijehn jampah oauwe (a kamwai pwen jaudi), doari, jampah oauwe pirin ipwilki kamwai doahroar ah kin ipwilki nah kan. A Ngoahi pilda kamwai jang nehn jampah; doari, jaudi kamwai kijehn jampah. Ioar kahrpoan en jampah ah kin lioassoang kamwai. 20 Kamwai lemleme dahkij Ngoahi ne pwehng kamwai: ‘Joh lidu men kin laplap jang ah koaun.’ Ma irai ne koalkoa Ngoahi, irai pel pirin koalkoa kamwai. Ma irai kapwaihahda oai padahk kan, irai pel pirin kapwaihahda amwai padahk kan. 21 Irai pirin wiahioang kamwai mehpwai ohroj pwa Noai kamwai, pwa irai jehjoa Ih ma kadardo Ngoahi. 22 Nen pwen joh diparai, ma Ngoahi joah indoa padahkkoang irai; a apkas irai ne johla kak akpwungki diparai kan. 23 Emen ma lioassoang Ngoahi, ih pel lioassoang Joamoaiho. 24 Ma Ngoahi joah wiahda joangoan doadoahk kan ma joh emen wia mwohn mijarai, nen joh diparai; a apkas irai ne kapang oai wihwia kan, doari irai ken lioassoang Ngoahi apel Joamoaiho. 25 Ioar kahrpoan mehpwai ahr wiawi, pwa dahkij ma ne insingdi nehn arai Kojoned en pwoaida: ‘Irai lioassoang Ngoahi, in joh kahrpoa.’

26 “A Jounjauwaj pirin indoa, ioar Ngen mehlello, ma indoa jang ipen Jahm. Ngoahi pirin kadardo Ih jang ipen Jahmmo, ioar Ih pirin kadehde doahroar Ngoahi. 27 A kamwai pel pirin kadehdehda doahroar Ngoahi, pwa kamwai ne pwilpwili Ngoahi jang in sapinno.

## 16

1 “Ngoahi padahkihoang kamwai mehpwai pwa kamwai en joah kerpwihla amwai pwojon. 2 Irai pirin kainoapwihjang kamwai nehn arai jinakoke kan. A anjoau allaluhdo, ma emen ma pirin kojuk kamwai pirin lemlemehioang pwa ih kin papah Koahs. 3 Armaj pirin wiahng kamwai mehpwai pwa irai jehjoa Jahmmo ke Ngoahi. 4 A Ngoahi ne pwehng kamwai mehpwai pwa nehn anjoauwo pirin leldo ma irai en wia mehpwai, kamwai nen lemehda Oai sikesik pwiai.”

### *Doadoahk en Ngen Joarwi*

“Ngoahi joah padahkihoang kamwai mehpwai in sapinno, pwa Ngoahi minmine ipamwai. 5 A apkas Ngoahi pirin inlahng ipen Ih ma kadardo Ngoahi; a joh emen kamwai ma idoak Ipoai, ‘Ia wija Koawoa pirin inla?’ 6 A apkas, pwa Oai ne pwehng kamwai, amwai mohngiong ne dirkihla injinjuwed. 7 Ngoahi pwehng kamwai in mehlel: ma mwehuwoang kamwai ma Ngoahi pirin inla jang kamwai, pwa ma Ngoahi joah inla, Jounjauwajjo jehpirin indoa ng kamwai. A ma Ngoahi inla, Ngoahi pirin kadardohng Ih kamwai. 8 A nehn Ah pirin indoa, Ih pirin kadehdehioang sohn



jampah pwa irai pwen japwung nehn doahroar dihp, nehn doahroar pwung, nehn doahroar kadeik en Koahs. <sup>9</sup> Irai kin japwung in doahroar dihp, pwa irai joah pwojon Ngoahi; <sup>10</sup> irai kin japwung in doahroar dahkij pwung, pwa Ngoahi ne pirin ken inla ipen Jahm a kamwai ne johla pirin kapang Ngoahi. <sup>11</sup> Irai kin japwung in doahroar kadeik, pwa koaunin jampah oauwe ne pwen kadeikda doari.

<sup>12</sup> “Pel mine joang dir ma Ngoahi nimen pwehng kamwai, a apkas ne inenin apwal oang kamwai en oaloahda. <sup>13</sup> A nehn Ngenin Mehlello ah pirin indoa, Ih pirin kajalehda mehlel in Koahs, Ih pirin kahlwahng kamwai oang nehn mehlel ohroj. Ih jehpirin padahk ki jang in pein Ah manman, a Ih pirin padahkihoang kamwai da ma Ih kin rongda, apel padahk ki doahroar mehkan ma pirin indoa. <sup>14</sup> Ih pirin kalingihla Ngoahi, pwa Ih pirin padahkihoang kamwai dahkij ma Ih rongjang Ngoahi. <sup>15</sup> Meohroj ma Joamoaiho anki, ioar Oai; kahrehda Ngoahi pwehng kamwai pwa Ngenno pirin oaloo dahkij Ngoahi kioang Ih, a Ih padahkihoang kamwai.”

### *Injinjuwed apel Peren*

<sup>16</sup> “Mwerin anjoau kij, kamwai johla pirin kapang Ngoahi, apel mwerin anjoau kij, kamwai pirin pel pwuroahng kapang Ngoahi.”

<sup>17</sup> Epwi Nah sohnpadahkkok idoak pene nehn pwungarai, “Ia woahwoahn me, ma Ih pwehngkihoang kisai, ‘Mwerin anjoau kij kamwai johla pirin kapang Ngoahi; apel mwerin anjoau kij kamwai pirin pwuroahng kapang Ngoahi?’ A Ih pel pwa, ‘Ngoahi allaluhlahng ipen Joamoaiho.’ <sup>18</sup> Ia woahwoahn lal oauwe, ‘Mwerin anjoau kij?’ Kisai johpwa woahwoahki dahkij Ih siksikoa!”

<sup>19</sup> Jesus kidal pwa irai nimen kalelpoak Ipoa, Ih pwehnglahng irai, “Ngoahi pwa, ‘Mwerin anjoau kij kamwai johla pirin kapang Ngoahi, apel mwerin anjoau kij kamwai pirin pwuroahng kapang Ngoahi.’ Ioar mehwa kamwai iddidoak nehn pwungamwaikan? <sup>20</sup> Ngoahi pwehng kamwai in mehlel: kamwai pirin joang apel injinjuwed, a jampah oauwe pirin peren. Kamwai pirin injinjuwed, a amwai injinjuwed pirin wikkoang in peren. <sup>21</sup> Nehn en li men ah pirin koaroannoang en noaisik, ih pirin injinjuwed, pwa ah anjoau in moadoak ne lel. A in anjoau ma jeriho noaisikdi, ih pirin moalkoahla ah moadoak; ih pirin perenda, pwa jeri men ne noaisikdi nehn jampah. <sup>22</sup> Ioar pel doahroar kamwai, anjoau oauwe kamwai injinjuwed, a Ngoahi pirin pwuroahng suhwoang kamwai, a mohngiongimwai kan pirin dirkihla peren, joangoan peren ma joh emen kak kihjang kamwai.

<sup>23</sup> “Nehn rehnno pirin leldo, kamwai jehpirin poaki Ipoai mehkij. Ngoahi pwehng kamwai in mehlel: Jahmmo pirin kioang kamwai meohroj ma kamwai pirin poaki Ipoa in Oadoaioa. <sup>24</sup> Leldo anjoau oauwe kamwai kahjikkoar poaki mehkij in Oadoaioa. Poaki a kamwai pirin oaloo, pwa amwai peren en unjekla.”

### *Kalwehdi Jampah*

<sup>25</sup> “Ngoahi ne padahkihoang kamwai mehpwiai in karajraj. A anjoau pirin indoa ma Ngoahi johla pirin doadoahkki karajraj, pwa Ngoahi pirin padahkkoang kamwai in janjal doahr Joamoaiho. <sup>26</sup> Nehn rehnno pirin leldo, kamwai pirin pein poaki mehkan ipen Koahs in Oadoaioa; a Ngoahi johpwa pwa Ngoahi pirin poaki ipoa mehkij ki kamwai, <sup>27</sup> pwa pein Jahmmo ipwilki kamwai. Ih ipwilki kamwai pwa kamwai ipwilki Ngoahi apel kamehlele pwa Ngoahi indoa jang ipen Koahs. <sup>28</sup> Ngoahi indoa jang ipen Jahmmo, apel indoahng jampah. Apkas Ngoahi pirin injang jampah inlahng ipen Jahmmo.”

<sup>29</sup> Doari, Nah sohnpadahkkok ken pwehng Ih, “Maing, apkas Koawoa sikesik janjal, a johla doadoahkki karajraj. <sup>30</sup> Apkas kamai kidal pwa Koawoa kidal joang ohroj, a Koawoa johpwa anahne emen en kalelpoak mehkij Ipoamw. Me kahrehioang kamai en kamehlele pwa Koawoa indoa jang ipen Koahs.”

<sup>31</sup> Jesus japoang irai, “Apkas kamwai ne kamehlele? <sup>32</sup> Anjoauwo pirin indoa, a ne leldo, ma kamwai ohroj pirin mwoarpijoang, emenemen inlahng nehn pein ah wija; Ngoahi pirin kalahpwukla. A Ngoahi johpwa pirin kalahpwukla, pwa Joamoaiho kin pwilpwili Ngoahi. <sup>33</sup> Ngoahi ne padahkihoang kamwai mehpwai pwa kamwai en anki popohl ki Ngoahi. Jampah pirin koalkoa kamwai, a kamwai en sihkei, pwa Ngoahi ne kalwehdi jampah!”

## 17

### *Jesus Kapkapki Nah Sohnpadahkkok*

<sup>1</sup> Nehn Jesus Ah pwahla mehpwai, Ih ken jipwoaldahlahng nehnloange, pwa, “Joamoai, Oai anjoau ne lel. Kalingihla Nihmw mene, pwa Nihmw mene en pel kalingihla Koawoa. <sup>2</sup> Pwa Koawoa kioang Nihmw mene manman in koaun armaj ohroj, pwa en kak kioang mour joahsuk irai ohroj ma Koawoa kioang Ngoahi. <sup>3</sup> A mour joahsuk woahwoahki en kidalla Koawoa, pwa Koawoahr Koahs mehlelwa, apel kidalla Jesus Christ ma Koawoa ne kadardo. <sup>4</sup> Ngoahi ne kajalehda Oamw ling nehn jampah; apel Ngoahi ne kadoarihla doadoahk kan ma Koawoa ne kioang Ngoahi en wia. <sup>5</sup> Maing Joamoai! Kalingihda Ngoahi mwohn Mijoammwen anjoau oauwe, kalingihkihda Ngoahi linngohr ma Ngoahi ne anki nehn Oai minmine Ipoamw mwohn jampah oauwe ah kahjikkoar wiawihda.

<sup>6</sup> “Ngoahi ne kajalehda Koawoa ipen armajjok ma Koawoa kioang Ngoahi nehn jampah. Irai nihmw, a Koawoa kioang Ngoahi irai, irai ne kapwaihahda Oamw lal. <sup>7</sup> A apkas irai ne kidal pwa mehkan ohroj ma Koawoa ne kihdoahng Ngoahi pel indoahjang ipoamw. <sup>8</sup> Pwa Ngoahi ne kioang irai padahk kan ma Koawoa kioang Ngoahi, a irai ne oaloahda. Irai ne kidal pwa ioar me mehlelwa: ma Ngoahi indoa jang ipoamw, a irai kamehlele pwa Koawoa ma kadardo Ngoahi.

<sup>9</sup> “Ngoahi kin kapkapki irai. Ngoahi joah kapkapki jampah, a irai kan ma Koawoa kioang Ngoahi, pwa irai ioar nihmw. <sup>10</sup> Meohroj ma Oai ioar Oamw; a meohroj ma Oamw ioar Oai; a Oai ling janjalda nehn irai. <sup>11</sup> Apkas Ngoahi pirin allaluhwoang Ipoamw. Ngoahi johla pirin minmine jampah; a irai pirin minminehr nehn jampah. Maing Joamoai ma Joarwi! Nekidki irai oadoammwen ma manman, addo ma Koawoa ne kihdoahng Ngoahi, pwa irai en wiahla oau doahroar asa kin wia oau. <sup>12</sup> Nehn Oai minmine iparai, Ngoahi ne jiloahkihdi irai oadoammwen ma manman, addo ma Koawoa kihdoahng Ngoahi. Ngoahi ne apwali irai, a joh emen nehn pwungarai ma kak joaloangla; ioarroar ih ma ne kileldi en joaloangla, pwa lal in Puk Joarwi en pwoaida. <sup>13</sup> A apkas Ngoahi pirin allaluhwoang Ipoamw, a Ngoahi ne pwahla mehpwai nehn jampah, pwa irai en kak anki Oai peren nehn mohngiongirai kan, in unjek mehlel. <sup>14</sup> Ngoahi ne kioang irai Oamw lal, a jampah ne liassoangkihda irai pwa irai jaudi kijehn jampah, doahroar Ngoahi ma jaudi kijehn jampah. <sup>15</sup> Ngoahi joah poaki Ipoamw pwa Koawoa en kihjang irai nehn jampah, a pwa Koawoa en poaroahjang irai me Naunahu. <sup>16</sup> Doahroar Ngoahi ma jaudi kijehn jampah, pel ioar doahroar irai jaudi kijehn jampah. <sup>17</sup> Kajarwihkihla irai me mehlello; Oamw lal ioar ma mehlel. <sup>18</sup> Ngoahi ne kdarla irai nehn jampah, doahroar Oamw kadardo Ngoahi nehn jampah. <sup>19</sup> A ki irai, Ngoahi kajarwihkihoang Koawoa pein Ngoahi, pwa irai en pel kajarwihoang Koawoa.

<sup>20</sup> “Ngoahi joah kapkapki irai kalahpwuk, pwa pel irai kan ma pirin pwojon Ngoahi ki arai padahk. <sup>21</sup> Ngoahi kapkap pwa irai ohroj en wiahla oau. Maing Joamoai! Irai en wiahla oau Ipasa, doahroar Oamw mine Ipoi, a Ngoahi Ipoamw. Irai en wiahla oau, pwa jampah en kamehlele pwa Koawoa ma kadardo Ngoahi. <sup>22</sup> Ngoahi ne kioang irai linngohr ma Koawoa ne kihdoahng Ngoahi, pwa irai en wiahla oau, doahroar Asa wia oau: <sup>23</sup> Ngoahi iparai a Koawoa Ipoi, pwa irai en uhdahn wiahla

oau, pwa jampah oauwe en kidal pwa Koawoa ma kadardo Ngoahi, a Koawoa ipwilki irai doahroar Oamw ipwilki Ngoahi.

<sup>24</sup> “Maing Joamoai! Koawoa ne kihdoahng Ngoahi irai, a Ngoahi anahne irai en pwili Ngoahi mine wijahu ma Ngoahi pirin mine, pwa irai en kak kapang Oai ling, linngo ma Koawoa ne kihdoahng Ngoahi ki Oamw ipwilki Ngoahi mwohn jampah oauwe ah kahjikkoar wiawihda. <sup>25</sup> Joamoai, Koawoa ma Pwung! Jampah oauwe jehjoa Koawoa, a Ngoahi ma kidal Koawoa, a irai pwiai ne kidal pwa Koawoa ma kadardo Ngoahi. <sup>26</sup> Ngoahi ma kahrehioang irai en kidalla Koawoa, a Ngoahi pel pirin doautoaulahr pwa limpoakko ma Koawoa ne wiahng Ngoahi en pel mine iparai, a Ngoahi en pel kak mine iparai.”

## 18

### *Irai Joalihdi Jesus*

<sup>1</sup> Mwerin Jesus Ah wia kapkap oauwe, Ih pwilihki Nah sohnpadahkkok ken inla jang wijahu, irai kosehla pilsik in Kidron. Mwoaswel oau mine wijahu. Ih apel Nah sohnpadahkkok inla loaloa. <sup>2</sup> Judas, ma pirin pangla Jesus, kidal doahroar wijahu, pwa pak dir Jesus apel Nah sohnpadahkkok kin suhpene o. <sup>3</sup> Judas ken inla nehn mwoaswello, uk jounpei in Rome pwi apel jilepen Umw Joarwiho pwi ma koadoaddoardo jang ipen jamwrou laplappok apel Pharisee-ok. Irai ohroj wijik mihn pei, lahm apel dil. <sup>4</sup> Jesus kidal meohroj ma pirin wiawihang Ih; Ih ken uhda mwohrai pwahla, “**Inje ma kamwai raprapahki?**”

<sup>5</sup> Irai japoang, “Jesus, mihn Nazareth.”

Jesus pwehng irai, “**Ngoahi Ioar Ih.**”

Judas, ma pangla Jesus, pwili irai uhda wijahu. <sup>6</sup> Nehn Jesus Ah pwehnglahng irai, “**Ngoahi Ioar Ih,**” irai ken pehkla kipdihoang pohn pwirej. <sup>7</sup> Jesus pel pwuroahng idoak iparai, “**Inje ma kamwai raprapahki?**”

Irai pwa, “Jesus, mihn Nazareth.”

<sup>8</sup> Jesus pel pwa, “**Ngoahi ne pwehng kamwai pwa Ngoahi ioar Ih. A doari ma kamwai raprapahki Ngoahi, kamwai mweidoahng irai pwiai en inla.**” <sup>9</sup> (Ih pwahla mehpiwai pwa mehk ma Ih ne pwahla en pwoaida: “**Joamoai, joh emen iraihok ma koawoa kihdoahng Ngoahi ne joaloangla.**”)

<sup>10</sup> Simon Peter, ma wahwahwa kodlaj pas, wijda poaloahjang loop moaun in sien nihn Jamwrou Laplap lidu. Oadoan lidu mene, Malchus. <sup>11</sup> Jesus pwehnglahng Peter, “**Kajpahlihoang nihmw kodlajjen nehn dohiahn! Koawoa lemleme pwa Ngoahi jehpirin nim mwoakin lokloko ma Joamoaiho kihdoahng Ngoahi?**”

### *Jesus Mwohn Annas*

<sup>12</sup> Jounpei in Rome-ok pwilihki arai koaun, apel mihn Jew ma kin wia doadoahkin jilajil, irai sipisdi apel joalihdi Jesus. <sup>13</sup> Keiou, irai ukla Jesus ipen Annas, pwa ih ma jemen pahien Caiaphas-o. Caiaphas ioar ih ma Jamwrou Laplap nehn pahrro. <sup>14</sup> Caiaphas ioar ma pwehng mihn Jew-ok pwa mwehu ma armaj men en mehkihdi armaj ohroj.

### *Peter Kahmahmkihla Jesus*

<sup>15</sup> Simon Peter apel emen sohnpadahk, ira pwilihla Jesus. Jamwrou Laplappo kidal sohnpadahk meno, doar ih ken pwili Jesus inla nehn kelin umw en Jamwrou Laplappo. <sup>16</sup> A Peter mine likin kello, ipen wanihmmwo. Sohnpadahk meno, dilla siksikesikkoang lidu ma jiljiloa wanihmmwo, ken ukdo Peter nehn kello. <sup>17</sup> Lidu ma jiljiloa wanihmmwo pwehng Peter, “**Jaudi koawoa emen nihn Woallo sohnpadahkkok?**”

Peter japoang, “Joah. Jaudi.”

<sup>18</sup> Doari, liduhwok apel jounjilajillok jaunda oai siksik kij, pwa anjoaun kopou. Irai ken pidekihpene koarkoaroangroang; a Peter pel pwili irai koaroangroang.

### *Jamwrou Laplap Kapeideki Jesus*

<sup>19</sup> Jamwrou Laplap ken idoak ipen Jesus doahroar Nah sohnpadahkkok apel doahroar Ah padahk. <sup>20</sup> Jesus japoang, “Ngoahi kin kalap sikesik janjal oang armaj ohroj. Oai padahk ohroj ne wiawihla nehn jinakoke kan apel nehn Umw Joarwiho, wija ma mihn Jew kan ohroj kin pokonpene. Ngoahi johkin pwa mehkij in wija rir. <sup>21</sup> Dahkij kahrehda koawoa kapeideki Ngoahi? Koawoa idoak iparai ma rongjang Ngoahi doahroar mehkan ma Ngoahi padahkihoang irai; irai ma kidal dahkij Ngoahi ne pwahla.”

<sup>22</sup> Nehn Jesus Ah pwahla mehpwai, emen jounjilajillok, ma uhda ipoa, ken poki Jesus pwahla, “Ioar doahroar Oamw pajpoang oang Jamwrou Laplap men?”

<sup>23</sup> Jesus japoang woallo, “Ma Oai sikesik kin japwung, a kadehdehda doahroar Oai japwung; a ma Oai sikesik kin pwung, a mihnda koawoa poki Ngoahi?”

<sup>24</sup> Doari, Annas ken kadarla Jesus ipen Jamwrou Laplap Caiaphas, Ih pirapirdihoar.

### *Peter Pwuroahng Kahmahmkihla Jesus*

<sup>25</sup> Simon Peter uhdahr wijahu koarkoaroangroang. Irai ken pwehnglahng ih, “Jaudi koawoa emen Nah sohnpadahkkok?”

Peter japoang, “Joah, jaudi ngoahi.”

<sup>26</sup> Lidu in Jamwrou Laplap men, kijehn woallo ma Peter poaloahjang sioa, idoak, “Jaudi koawoa ma ngoahi kapang pwili Woallo nehn mwoaswello?”

<sup>27</sup> Peter pel pwuroahng kahmahmkihla; a nehn anjoauwohr jummwa men ken joangla.

### *Jesus Mwohn Pilate*

<sup>28</sup> Oh inminjoang irai ukjang Jesus nehn umwen Caiaphas-o uklahng nehn umwen koapinahu. A irai joah dilloang nehn umwen koapinahu, pwa irai doar jaminla, pwa irai en kak kang kamdipw in Passover. <sup>29</sup> Pilate ken dilla likin iparai idoak, “Dahkij kamwai kadipoahki Woal mene?”

<sup>30</sup> Irai pwehnglahng ih, “Kamai johpwa pirin ukdo Woal mene ipoamw ma Ih johpwa wiahda mehkij nauna.”

<sup>31</sup> Pilate ken pwehnglahng irai, “Pein kamwai oaloo Woal mene kadeikda Ih in doahroar amwai kojoned.”

Mihn Jew-ok pwehnglahng ih, “Kamai johpwa mweimweioang en kojukdi armaj.”

<sup>32</sup> (Me en wiawi pwa en pwoaida mehkan ma Jesus pwahkihla doahroar Ah pirin mehdi.)

<sup>33</sup> Pilate pwurlahng nehn ummwo, pangin Jesus, peidek Ipoa, “Koawoa ioar ma nahmwarkihn mihn Jew kan?”

<sup>34</sup> Jesus japoang, “Peidek oauwe pein oamw, ke epwi armaj ma pwehng koawoa doahroar Ngoahi?”

<sup>35</sup> Pilate japoang Ih, “Da, ngoahi mihn Jew men? Sohn Oamw wei apel jamwrou laplap kan, ioar irai ma wahdo Koawoa ipoi. Dahkij Koawoa wiahda?”

<sup>36</sup> Jesus japoang, “Oai wei jaudi kijehn jampah oauwe. A ma Oai wei kijehn jampah oauwe, Oai papah kan pirin peiki ngoahi, pwa joh emen en pangla Ngoahi ipen mihn Jew kan. Pwen joah! Oai wei jaudi kijehn jampah oauwe!”

<sup>37</sup> Pilate pel pwehng Ih, “Doahr da, nahmwarki men Koawoa?”

Jesus japoang, “Koawoa ma pwahla pwa Ngoahi nahmwarki men. A ioar, kahrpoa oauwoar ma Ngoahi noaisikdi apel indoahng jampah, pwa Ngoahi en kadehdehda doahroar me mehlello. Armaj ohroj ma kijehn mehlello kin rong ngiloaihoa.”

<sup>38</sup> Pilate pel idoak Ipoa, “A dahkij me mehlello?”

### *Jesus ne Mweimweilahng en Kojkojdi*

Pilate pwuroahng pel dilla likin ipen mihn Jew-ok, pwehnglahng irai, “Ngoahi johpwa kapangda kahrpoa oau pwa Ngoahi en koalkoahki Woal mene. <sup>39</sup> A mine siahk oau ipamwai, doahroar oai en kin lapwaddahng kamwai emen sohn kalpwuhj nehn anjoau in Passover. A imdoahr, kamwai joah nimen ngoahi en lapwaddahng kamwai nahmwarkihn mihn Jew kan?”

<sup>40</sup> Irai ken rahrahuda, pwahpwahpwa, “Jaudi Woal menen, a Barabbas!” (Barabbas, ioar armaj nauna men.)\*

## 19

<sup>1</sup> Pilate ken oaloo mweidoahng Jesus en pokpokla. <sup>2</sup> Jounpeihok ken pidda mwarmwar dokdok pas kihdihoang pohn moange apel kapwasahkihda Ih robe mwoahroan pwijehnmwoal. <sup>3</sup> Irai ken sohla Ipoa pwahpwahpwa, “Maing! Nahmwarkihn mihn Jew kan!” Irai kin pel poki Ih.

<sup>4</sup> Pilate pel pwuroahng dilla likin pwehnglahng pokonno, “Ngoahi pirin ukdohng kamwai Woallo, pwa kamwai en kidal pwa Ngoahi johpwa diarda dihp Ipoa.”

<sup>5</sup> Jesus ken dildo, mwaroahdi mwarmwar dokdok pas apel kol robe mwoahroan pwijehnmwoal. Pilate pwehnglahng arai, “Kamwai kapang! Me ioar Woalwa!”

<sup>6</sup> Nehn jamwrou laplappok apel jilepen Umw Joarwiho ahr kapang Ih, irai ken rahrahuki, “Kalohpwuhla Ih! Kalohpwuhla Ih!”

Pilate pwehnglahng irai, “Pein kamwai oaloo Woal mene kalohpwuhla, pwa ngoahi johpwa diarda dihp Ipoa.”

<sup>7</sup> Mihn Jew-ok japoang ih, “Amai kojoned mine, ma pwa Woallen uhdahn pirin kojkojdi, pwa Ih wiahki Ih nihn Koahs.”

<sup>8</sup> Nehn Pilate ah rongda sikesik pwiai, ih inenin majpwehkda. <sup>9</sup> Ih pel pwuroahng dilda nehn ummwo idoak ipen Jesus, “Mihnia men Koawoa?”

A Jesus johpwa japoang.

<sup>10</sup> Pilate pwehnglahng Ih, “Koawoa joah nimen lalloang ngoahi? Imdoahr, Koawoa johpwa kidal pwa mine oai manman in kapisla Koawoa, apel manman in kalohpwuhla Koawoa?”

<sup>11</sup> Jesus japoang, “**Joh ekij oamw manman pohioa, ma joah mweioang koawoa jang puwoa. Ioar ma kahrehda dipen ih ma kihdoahng Ngoahi ipoamw koalikjang dipoamwen.**”

<sup>12</sup> Mwerin mehpwiai, Pilate ken jong in kapisla Ih; a mihn Jew-ok rahrahuki, “Ma koawoa pirin kapisla Woallen, a jaudi koawoa koampoakpen Caesar! Emen ma kin wiahki pein ih nahmwarki kin pallan Caesar!”

<sup>13</sup> Nehn Pilate ah rongda sikesik pwiai, ih ken kadilihla Jesus jang nehn ummwo, kihdi pohn mwoalen kadeik in wija ma adanki “Pilowar Sakai.” (A in lal in Hebrew, “Gabbatha.”)

<sup>14</sup> Rehnno ioar rehnin koaunop oang Joarwihn Passover; a mehpwiai ne wiawi koaroanlahng injauwaj. Pilate ken pwehnglahng mihn Jew-ok, “Ioar amwai Nahmwarkiwa me!”

<sup>15</sup> Arai ken rahrahuki, “Kojukdi Ih! Kojukdi Ih! Kalohpwuhla Ih!”

Pilate pel pwa, “Kamwai nimen Ngoahi en kalohpwuhla amwai Nahmwarkihe?”  
Jamwrou laplappok japoangki, “Joh amai nahmwarki, Caesar oar doari!”

<sup>16</sup> Pilate ken kihla Jesus iparai, pwa irai en kalohpwuhla.

### *Jesus ken Kalohpwuhekla*

\* **18:40** Barabbas: Ih woal men ma mihn Rome kan joalihdi pwa ah wia moromor nehn Jerusalem a kin uhwoang kojoned in Rome.



Irai ken oaloo Jesus. <sup>17</sup> Ih aluhla, pein Ih wahda Ah lohpuwuhwo, inlahng wijahu ma adanki "Wijahn Sihn Moang." (A in lal in Hebrew, "Golgotha.") <sup>18</sup> Ioar wijahwa ma irai kalohpuwuhla Ih, pwilihki woal roahmen, emen loap moaun, apel emen loap meing; a Jesus mine nehn pwungara. <sup>19</sup> Pilate insingehdi lal pwi kapsaioang in lohpuwuhwo: "Jesus mihn Nazareth, Nahmwarkihn mihn Jew." <sup>20</sup> Dir in mihn Jew wadek insing pwiai, pwa wijahu ma irai kalohpuwuhla Jesus koaroannoang kahnihmmwo; a insing pwiai insingdi in lal in Hebrew, lal in Latin, apel lal in Greek. <sup>21</sup> Jamwrou laplappok pwehng Pilate, "Joah insingehdi, 'Nahmwarkihn mihn Jew,' a insingehdi, 'Woal mene pein pwahla, Ngoahi Nahmwarkihn mihn Jew.' "

<sup>22</sup> Pilate japoang, "Da ngoahi ne insingehdi, ne pwen ioar!"

<sup>23</sup> Mwerin jounpeihok ahr kalohpuwuhla Jesus, irai ken oaloo Ah likkoauwok wiahkihda kij pahu, oau oau kij oang emen emen jounpeihok. Irai pel oaloo Ah robe (ma joah doadoapene). <sup>24</sup> Irai ken sikoahpene nehn pwungarai, "Kisai joah soahrpijoang robe oauwe a kisai wijwijki inje ma pirin anki." Me wiawi pwa da ma insingehdi nehn Puk Joarwi en pwoaida:

"Irai nehkpijoang Oai likkoauwok nehn pwungarai,  
irai pel wijwijki Oai robe."

A ioar ma jounpeihok ne wiahda.

<sup>25</sup> Inen Jesus-o, apel rien inahu, Mary pahien Clopas, apel Mary mihn Magdala, irai uhda ipen en Jesus lohpuwuhwo. <sup>26</sup> Nehn Jesus kapang inahu apel sohnpadahkko ma Ih kin ipwilki uhda wijahu, Ih pwehnglahng, "**Li, kapang nihmw jermweinnen!**"

<sup>27</sup> A Ih pel pwehnglahng sohnpadahkko, "**Kapang inoammwen!**" Jang in anjoauwohr inla sohnpadahkko ken ukla liho in umwahu pwa en koaujoanla ipoa.

### *Jesus ne Mehdi*

<sup>28</sup> Mwerin mehpwiai, Jesus ne kidal pwa mehkan ohroj ne pwoaida, Ih ken pwahla, "**Ngoahi nimen nimpil!**" Pwa lal in Puk Joarwi en pwoaida.

<sup>29</sup> Pwohl oau ma dirin wain siksik dupkoa mine wijahu. Irai ken oaloo limw oau kadu nehn wainno, piroahng in alek pas, a kihdahlahng in oawoa. <sup>30</sup> Nehn Jesus Ah oaloahda wainno, Ih ken pwahla, "**Ne doari!**"

Ih ken rukdi kadarla ngenin.

### *Pangpangen Jesus Dokdi*

<sup>31</sup> A doari, rehno Nialim oau; ioar kahrehda koaunin mihn Jew-ok poaki ipen Pilate pwa ehn araihok ma kalohpuwuhlahu en sipwangekdi a irai en wijikjang in lohpuwuhwok, pwa palwoaroarai en joah soansoanoak nehn rehnin Sabbath, pwa rehnin Sabbath, ioar rehn joarwi koalik oau. <sup>32</sup> Jounpeihok ken inla sipwangdi ehn emen, a mwerin pel ehn emen ma pwili kalohpuwuhle. <sup>33</sup> Nehn ahr sohla ipen Jesus, kapangda pwa ih ne pwen mehdi, irai ken johpwa sipwang ehn. <sup>34</sup> Jounpei men ken doakoahki kopwoi pas pangpange; doari, insa apel pil ken koarjang in Ih. <sup>35</sup> Armajjo ma kapang mehpwiai, ne kadehdehda, pwa kamwai en pel kamehlele. Ah kadehde pwen mehlel; ih kidal pwa ah sikesik pwen mehlel. <sup>36</sup> Doari, me en wiawi pwa Puk Joarwi en pwoaida: "Joh si pas ipoa pirin sipw." <sup>37</sup> A pel oau iroa siksik in Puk Joarwi ma pwa, "Irai pirin kapang Ih ma irai doakoahdi."

### *Joajjoardihn Jesus*

<sup>38</sup> Joseph, mihn Arimathea, emen sohnpadahk in Jesus, in rir, pwa ih mijik koaunin mihn Jew-ok. Doari, mwerin mehpwiai, ih poakihda ipen Pilate pwa en wahlahjang palwoaroan Jesus. Nehn Pilate ah mweidoahng, ih ken inla wahjang palwarro. <sup>39</sup> Nicodemus, woallo ma inla ipen Jesus oau pwonngo, ih pel pwili Joseph inla, ih wa le karahdin ma doalkihpene myrrh apel aloe, dapwa poaun epwiki. <sup>40</sup> Ira ken oaloo

palwoaroan Jesus kidimkihpenne likkoau linen pwi, pwilihki le karahdinnok, doahr siahk in mihn Jew-ok, nehn irai kin jaripdi armaj mehdi. <sup>41</sup> Mwoaswel oau mine wijahu ma irai kalohpwuhla Jesus, apel joaujoau kapw oau mine nehn mwoaswello ma kahjikkoar emen joajjoardi loaloa. <sup>42</sup> Ioar wijahwa ma irai nekiddi Jesus pwa koaroan, apel rehnno ioar rehnwa mwohn rehnin Sabbath.

## 20

### *Joaujoau Joh Koanoange*

<sup>1</sup> Injohrehn in Rehn Joarwi, nehn ah pe rossoar, Mary mihn Magdala ken inla in joaujoauwo, kapangda sakaiho ne kasahpwroahk jang mijen joaujoauwo. <sup>2</sup> Ih ken pwur kijoula ipen Simon Peter apel sohnpadahkko ma Jesus kin ipwilki, ih pwehng ira, "Irai ne wahjang Koanunno nehn joaujoauwo, a kamai jehjoa wijahu ma irai wahla Ih!"

<sup>3</sup> Peter apel sohnpadahkko ken inlahng in joaujoauwo. <sup>4</sup> Ira kijou, a sohnpadahkko kijou dahrjang Peter, ih lella in joaujoauwo mwohn Peter. <sup>5</sup> Ih ken rukdi kapangda likkoau linen-ok oar ma mine wijahu; a ih johpwa dilda loaloa. <sup>6</sup> Simon Peter kijoudo mwerin ih dilda nehn joaujoauwo. Ih pel kapang likkoau linen-ok ma mine wijahu, <sup>7</sup> apel likkoauwo ma pidla moangoan Jesus, johpwa mine ipen linen-ok apwen limlimpene sohrohrla. <sup>8</sup> Doari, sohnpadahkko ma leldo mwohn Peter, dilda nehn joaujoauwo, kapang apel kamehlele. <sup>9</sup> (Ara kahjikkoar woahwoahkihla Puk Joarwi, ma pwa Ih pirin iejda jang mehdi.) <sup>10</sup> Sohnpadahkko ken pwurla nehn umwara.

### *Jesus Pwokkoang Mary mihn Magdala*

<sup>11</sup> Mary uhda joangjoangjoang likin joaujoauwo. Nehn ah joangjoangjoang ih ken rukdi jipwoallahng nehn joaujoauwo. <sup>12</sup> Ih kapangda sohnloang roahmen ma kapwaskihda likkoau korohro. Ara mwindi wijahu ma palwoaroan Jesus mine. Emen mine pohn moange a emen mine in ikin. <sup>13</sup> Ara pwehnglahng, "Li, dahkij koawoa joangjoangjoangki?"

Liho pwehng ara, "Apwa irai ne wahjang oai Koanun, a ngoahi jehjoa ia wija irai kioang Ih!"

<sup>14</sup> Nehn ah pwahla me, ih jipwoalla kapangda Jesus ma uhda wijahu, a ih pwen jehjoa pwa ioar Jesus o. <sup>15</sup> Jesus pwehng ih, "Li, dahkij koawoa joangjoangjoangki? Inje ma koawoa raprapahki?"

Mary pwen lemlemehkihoang pwa ioar Ih jounmwoaswelwa, ih pwehnglahng, "Maing, ma Koawoa ma wahjang Ih, pwehng ngoahi wijahu ma Koawoa kioang Ih, pwa Ngoahi en inla oaloa Ih."

<sup>16</sup> Jesus pwehnglahng ih, "Mary."

Mary jipwoallahng pwehnglahng Ih, "Rabboni!" ma woahwoahki in lal in Hebrew "Jounpadahk."

<sup>17</sup> Jesus pwehng ih, "Joah pukkoang Ngoahi, pwa Ngoahi kahjikkoar pwurdahlahng ipen Joamoiho. A alwe ipen rioaihok pwehng irai, 'Ngoahi pirin pwurdahlahng ipen Joamoiho apel Jamaraiho, ipen Oai Koahsso apel arai Koahsso.' "

<sup>18</sup> Doari Mary mihn Magdala inla pwehng sohnpadahkko pwa ih ne kapang Koanunno, ih pel sikoahng irai doahroar Ah pwehng ih mehpwiai.

### *Jesus Pwokkoang Nah Sohnpadahkko*

<sup>19</sup> Injoausikin rehnin Joarwihohr, nehn wanihmmwok ahr risdi wijahu ma sohnpadahkko pokonpene, pwa irai mijik mihn Jew-ok, Jesus indoa uhda nehn pwungarai pwehng irai, "Kamwai popohl!" <sup>20</sup> Nehn Ah pwahla me, Ih ken kajalehioang irai poah kan apel pangpangehu. Sohnpadahkko ken perenda nehn ahr kapangda Koanunno. <sup>21</sup> Jesus pel pwuroahng pwehng irai, "Kamwai popohl! Doahroar

Jahmmo Ah ne kadardo Ngoahi, ioar doahroar Oai pirin pel kadarwe kamwai.”  
<sup>22</sup> Nehn Ah pwahla me, Ih ken ukkoang irai engin, “Kamwai oaloo Ngen Joarwi. <sup>23</sup> A ma kamwai mahkoahng dipen armaj kan, irai nen mahkla; a ma kamwai jehpirin mahkoahng, irai jehpirin mahkla.”

### *Thomas apel Jesus*

<sup>24</sup> A Thomas, emen kijehn eijek roahmenno (ma pel adanki Umpwoar), johpwa mine iparai nehn anjoauwo ma Jesus indoa iparai. <sup>25</sup> Sohnpadahkkok ken pwehng ih, “Kamai ne kapang Koaunno!”

Ih pwehng irai, “Ma ngoahi johpwa kapang lipwen nihllok in poah kan, pel kioang jandin poaihoa nehn lipwen nihllok, apel kioang poaihoa in pangpangehu, ngoahi jehpirin kamehlele.”

<sup>26</sup> Mwerin wihk oau, Nah sohnpadahkkok pel pokonpene nehn ummwo, Thomas pel pwili irai. Wanihmmwok pwen risdi, a Jesus indoa uhda nehn pwungarai, Ih pwa, “Kamwai popohl!” <sup>27</sup> Ih pel pwehnglahng Thomas, “Kioang jandin poahmmwen me, a kapang poaihoa kai; apel kihdoa poahmmwen in pangpangoaioa. Doari oamw joah joahpwojon, a kamehlele!”

<sup>28</sup> Thomas japoang, “Maing, oai Koaun apel oai Koahs!”

<sup>29</sup> Jesus pwehng ih, “Koawoa kamehlele pwa oamw kapang Ngoahi? Meid pai irai kan ma johkin kapang a kamehlele!”

### *Kahrpoan Puk oauwe*

<sup>30</sup> Jesus ne wiahda kilel sohrohr dir mwohn Nah sohnpadahkkok, ma joah insingdi nehn puk oauwe; <sup>31</sup> a mehpwiai ne insingdi pwa kamwai en pwojon pwa Jesus ioar Ih ma Messiah, Nihn Koahs; apel, nehn amwai pwojon Ih, kamwai en anki mour.

## 21

### *Jesus Pwokkoang Sohnpadahk Ijimen*

<sup>1</sup> Mwerin mehpwiai, Jesus pel pwuroahng pwokkoang sohnpadahkkok ipen Lehn Tiberias. Me ioar doahroar da wiawi. <sup>2</sup> Simon Peter, apel Thomas (ma pel adanki Umpwoar), apel Nathanael, mihn Cana nehn Galilee, apel nihn Zebedee woallok, apel woal roahmen jang nehn pwungen Nah sohnpadahkkok, irai pokpokon. <sup>3</sup> Simon Peter pwehng irai, “Ngoahi pirin inla loakjid.”

Irai pwehng ih, “Kamai pirin pwili koawoa.” Irai ken inla doauda pohn pohs oau. A inpwonngo irai johpwa koldi mehkij. <sup>4</sup> A nehn ah rehnpioang Jesus minmine in oaroahrro a sohnpadahkkok pwen jehjoa pwa Ih ioar Jesus. <sup>5</sup> Jesus pwehnglahng irai, “Woal kan! Mine koanoahmwai?”

Irai japoang, “Johpwa mehkij.”

<sup>6</sup> Ih pwehng irai, “Kamwai kadardi ukken loop moaun in pohssen; a kamwai pirin koldi epwi.” Irai ken kadardi ukko, irai ken johla kak oapihda pwa ne dirkihla mwumw.

<sup>7</sup> Sohnpadahkko ma Jesus kin ipwilki ken pwehnglahng Peter, “Ioar Koaunwa o!” Nehn Simon Peter ah rong pwa ioar Koaunwa o, ih ken kasoangehdi ah likkoaun likinno (pwa ih ne kakihjang ah likkoaun likinno) lujdihoang nehn pillo. <sup>8</sup> A sohnpadahkkok jeikihdo pohsso warwarahkihdo ukko ma dirkihla mwumw pwa irai pwen johpwa dohjang japw, dapwa iahs epwiki. <sup>9</sup> Anjoauwo ma irai kerdihjang pohn pohsso, irai kapangda oai oau ma ne mwolujdi, a mwumw pwi mine puwoa apel pilahwa pwi. <sup>10</sup> Jesus pwehnglahng irai, “Kamwai wahdo epwi mwumw kan ma kamwai koldi.”

<sup>11</sup> Simon Peter ken doauda pohn pohsso, oapihdahdohng japw ukko ma dirkihla mwumw koalik epwiki limeijek jilmen (153). Joangoan dirin mwumw, a ukko pwen

johpwa ohla. <sup>12</sup> Jesus pwehng irai, **“Kamwai indoa mwinge.”** Joh emen irai sohnpadahkkok idoak, **“Inje Koawoa?”** Pwa irai ne pwen kidal pwa Ih ioar Koawoa. <sup>13</sup> Jesus inla oaloo pilahwahu, ken nehkkoang irai, apel nehkkoang irai mwummwok. <sup>14</sup> Ioar me kajilpakin en Jesus ah ne kajalehioang sohnpadahkkok pein Ih mwerin Ah ne iejda jang mehdi.

### *Jesus apel Peter*

<sup>15</sup> Mwerin irai mwingehpene, Jesus ken idoak oang Simon Peter, **“Simon, nihn John, koawoa ipwilki Ngoahi koalikjang mehpwiai?”**

Peter japoang, **“Eh, Maing oai Koaun, Koawoa kidal pwa Ngoahi ipwilki Koawoa.”** Jesus pwehng ih, **“Kamwinge Noai jimpwul kan.”**

<sup>16</sup> Ih pel pwuroahng idoak, **“Simon, nihn John, koawoa ipwilki Ngoahi?”**

Peter japoang, **“Eh, Maing oai Koaun, Koawoa kidal pwa Ngoahi ipwilki Koawoa.”** Jesus pwehnglahng, **“Apwali Noai jihpw kan.”**

<sup>17</sup> Ih pel idoak kajilpak, **“Simon, nihn John, koawoa ipwilki Ngoahi?”**

Peter inenin injinjuwedkihla en Jesus Ah kalelpoak kajilpak, **“Koawoa ipwilki Ngoahi?”** Ih ken japoang Ih, **“Maing oai Koaun, Koawoa kidal meohroj, Koawoa kidal pwa ngoahi ipwilki Koawoa.”**

Jesus pwehnglahng ih, **“Kamwinge Noai jihpw kan.”** <sup>18</sup> Ngoahi pwehng koawoa in mehlel: nehn oamw mwahnkapw, koawoa kin pein kasoangehpene oamw kangir, inla wija ma koawoa mwehuki. A nehn oamw pirin mahla, koawoa pirin kailwe poahmmwen kan, a emen pirin piroahpene, a ukkoawoalahng wija ma koawoa joah nimen inla.” <sup>19</sup> (Ih pwa mehpwiai pwa en kajalehda joangoan mehdiho ma Peter pirin kalingihkihla Koahs.) Mwerin me, Jesus pwehnglahng ih, **“Papah Ngoahi!”**

### *Jesus apel Sohnpadahk Meno*

<sup>20</sup> Peter ken jipwoalla kapang sohnpadahkko ma pwilpwilihdo irai, ma Jesus kin ipwilki — ih ma englahng ipen Jesus nehn irai mwingmwinge, ih idoak, **“Maing, inje ih ma pirin pangla Koawoa?”** <sup>21</sup> Nehn Peter ah kapang woallo, ih ken idoak ipen Jesus, **“Maing, imdoahr woal mene?”**

<sup>22</sup> Jesus japoang, pwehng ih, **“Ma Ngoahi nimen woal mene en minminehroh Ngoahi pwurdo, mihndahng koawoa? A koawoa papah Ngoahi!”**

<sup>23</sup> Sikesik pase ken lohkjili nehn pwungen joauloanngok, ma pwa sohnpadahkko jehpirin mehdi. A Jesus johpwa pwa woallo jehpirin mehdi, Ih pwen pwa, **“Ma Ngoahi nimen woal mene en minminehroh Ngoahi pwurdo, mihndahng koawoa?”**

<sup>24</sup> Ioar sohnpadahkwa me ma ne kadehdehda doahroar mehpwiai, ma ne insingehdi sikesik pwiai; a kamai kidal pwa ah kadehde pwen mehlel.

### *Koarjoahklahn Puk oauwe*

<sup>25</sup> A pel mine joang dir ma Jesus pel wiahda. A ma kamai pirin insingehdi doahroar mehkan ohroj, Ngoahi lemleme pwa jampah oauwe nen johkak audohdkihda puk kan ma pirin insingda.

## Nihn Paul Kijinlikoau Oang Mihn Rome Oarlap in Kijinlikoau oauwe

*Nihn Paul Kijinlikoau oang mihn Rome* ne insingdi pwa en koaunopda sohn mwomwohdjo kan in Rome oang en Paul ah koajkoajoane en paj iparai. Ih koajoanehdi en wia doadoahk nehn pwungen joauloang kan nehn Rome ekij anjoau, a mwuhr ih pel pirin dauluhllahng Spain ki arai jauwaj. Ih insingehdi kijinlikoau oauwe pwa en kawoahwoahda doahr ah lamlam oang pwojon in joauloang apel oang wihwia kan ma pirin injang in pwojon oauwe oang in mourin joauloang. Kijinlikoau oauwe ioar keiou kajalehda unjekin en Paul padahk kan jang nehn nah kijinlikoau kan ohroj.

Paul rahnmwahu oang sohn mwomwohdjohn Rome apel kajalehng irai doahr ah kin kapkapki irai; doari, ih ken oarlapihda audoapoan kijinlikoau kije: “Rongmwehuwo kin kajalehda doahr Koahs Ah kin wiahda pwa armaj en pwungla Ipoa; jang in ahr pwojon jang in sabin lel in imwin. Doahr en Puk Joarwi pwa, ‘Emen ma pwungla ipen Koahs ki pwojon pirin mourla.’ ” (1.17).

Paul ken kawoahwoahda oarlap oauwe. Armaj ohroj, mihn Jew apel mihn likin kan, uhdahn anahne pwungla ipen Koahs, pwa ohroj minmine pehn manman in dihp. Armaj kin pwungla ipen Koahs jang in ahr pwojon Jesus Christ. Mwerin, Paul pel kawoahwoahda mour kapw nehn Christ. Emen ma kin pwojon Christ ne anki popohl ipen Koahs, apel Ngenin Koahs ne kapisla ih jang pehn manman in dihp apel mehdi. Paul pel sikoahda nehn iroa koalik 5-8 kahrpoan Kojonned in Koahs, apel doahr manman en Ngenin Koahs nehn mour in joauloang. Mwuhr, Paul pel kajalehda ah lamlam doahr mihn Jew apel mihn likin kan ahr kak oaupene nehn koajoandihn Koahs oang sohn jampah kan. Ih ken kadoarihkihla ah sikoahda doahr apkas nehn ah sikoahda ma en mihn Jew kan joikla Jesus, ioar kijehn koajoandihn Koahs pwa en kadokihpene armaj ohroj nehn en Koahs kalahngan ipen Jesus Christ; apel ih lemleme ma mihn Jew johpwa pirin joikla Jesus allaluhla. Doari, in imwin, Paul sikoahda doahr mour in joauloang, a in mehleh doahr arai limpoakpene, ih pel sikoahda doahr papah Koahs, pwukoahn joauloang oang wei, pwukoah nehn pwungarai, apel doahr iroahpwi ma pidada kadeik in loaloa. Ih ken kaimwjekkihla kijinlikoau kije ah rahnmwahu oang koampoakpah kan wijahu apel lal in kapnga Koahs.

### **Audoapoa in oarlap**

Kapehje apel oarlap in kijinlikoau oauwe *1.1-17*

En armaj anahn in koamoaurla *1.18—3.20*

En Koahs koajoandi oang koamoaurahn armaj *3.21—4.25*

Mour kapw ipen Christ *5.1—8.39*

Israel nehn en Koahs koajoandi *9.1—11.36*

Mwomwen mour in joauloang *12.1—15.13*

Kaimwjeklahn sikesik apel en Paul rahnmwahu kan *15.14—16.27*

<sup>1</sup> Jang Paul, lidu in Christ Jesus apel woaroak ma Koahs ne pilda apel pangin pwa en kalohkihjili Ah Rongmwehu.

<sup>2</sup> Rongmwehu ma Koahs ne inoaukihoang armaj ohmehj ma Ih kioang Nah joukohppok apel ma ne insingdi nehn Puk Joarwi. <sup>3</sup> Rongmwehu oauwe ioar doahr Nah Iehrojjo, asai Koan Jesus Christ, doahr in Ah wia armajla Ih noaisikdi jang kadaudok in David, <sup>4</sup> apel doahr in Ah joarwi unjek, Ih ne iejda jang mehdi kajalehda uhwen Ah manman en adanki nihn Koahs Iehroj laplap. <sup>5</sup> Doari, Koahs kioang ngoahi



kalahngan oauwe jang ipen Christ apel ki Christ, ngoahi wiahla woaroak men, pwa ngoahi en kahlwa armaj in wei kan ohroj en kamehlele apel peikkoang.

<sup>6</sup> Me pel pwilikhla kamwai kan minmine Rome, ma Koahs ne pel pangin kamwai en wiahla nihn Jesus Christ.

<sup>7</sup> Doari, ioar ngoahi insingkihwehng kamwai ohroj ma mine Rome, ma Koahs ipwilki apel pangin pwa en wiahla Nah armaj.

Jamasai Koahs apel asai Koaun Jesus Christ en kioang kamwai kalahngan apel popohl.

### *Kapkap in Kapingkalahngan*

<sup>8</sup> Keiou ngoahi kapingkalahngankihoang oai Koahs in oadoan Jesus Christ ki kamwai ohroj, pwa jampah ohroj kin rongrongrong amwai pwojon. <sup>9</sup> Koahs oai jounkadehde mehlel in oai sikesikke, ma ngoahi kin papah nehn oai mohngiong jang in rongmwehu in Nah Iehroj, ngoahi kin kapkap ki kamwai anjoau ohroj johpwa uhd. Koahs kidal pwa ngoahi kin samsaman kamwai, <sup>10</sup> anjoau ohroj nehn oai kapkap kan. Ngoahi kin poaki ipen Koahs en kalahngan, kamoangoaioang pwa ngoahi en kak paj ipamwai anjoau oauwe. <sup>11</sup> Pwa ngoahi inenin nimen kapang kamwai pwa ngoahi en kak kioang kamwai kapai in Ngenno pwa en kioang kamwai sihkei. <sup>12</sup> Me woahwoahki pwa kisai nen oaloe jauwajpasai anjoau oauwoar, amwai pwojon en jeuweje ngoahi, a oai pwojon en jeuweje kamwai.

<sup>13</sup> Rioai kan, ngoahi nimen kamwai en kidal pwa anjoau dir ngoahi kin koaukoanop ngoahi en paj ipamwai, a mine mehkij ma kin kalap poaroa oai en alwe ipamwai. Ngoahi nimen oai doadoahk in Rongmwehu en pel uhwa mwehu ipamwai doahroar epwi mihn likin kan. <sup>14</sup> Ki pwa mine oai pwukoa oang pwiwnin armaj kan ohroj, oang irai ma marain apel irai ma rosros, oang irai ma woahwoa apel irai ma jawoahwoa. <sup>15</sup> Ioar kahrehda ngoahi pel nimen kalohki Rongmwehu oang kamwai ma kin koaukoaujoan Rome.

### *Manman in Rongmwehu*

<sup>16</sup> Ngoahi uhdahn koapwoarpwoarki mehlel Rongmwehuwo; pwa ioar manman in Koahs ma kin koamoaurla ohroj ma kin pwojon, sapkihda mihn Jew-ok apel oar mihn likin kan. <sup>17</sup> Rongmwehuwo kin kajalehda doahr Koahs Ah kin wiahda pwa armaj en pwungla Ipoa; jang in ahr pwojon jang in sapin lel in imwin. Doahr en Puk Joarwi pwa, "Emen ma pwungla ipen Koahs ki pwojon pirin mourla."

### *Dipen Armaj kan*

<sup>18</sup> En Koahs lioas kin janjalda jang nehnloange ki dihp apel joangoan nauna ohroj in armaj kan, ma arai mour juwed kan kin poaroahla armaj kan en kidalla me mehlello. <sup>19</sup> Koahs kin koalkoa irai, pwa joang kan ma irai kak kidalki doahr Koahs ne pwen janjal oang irai, pwa pein Koahs ne pwen kajalehioang irai. <sup>20</sup> Armaj johkak kapang Koahs; apwen jang in sapin en Koahs kapikda jampah, Ah manman unjek apel Ah Koahs Laplap, ne pwen inenin janjal; jang in mehk ma Ih wiahda ne kawoahwoahda. Doari, johpwa mehkij armaj kak akpwungki. <sup>21</sup> Doari, irai kidal doahr Koahs, a irai johkin kioang Ih woan ma koanoahng Ih, irai pel johkin kaping kalahngan oang Ih. Arai lamlam audohdkihda me johkaspoa, apel arai mohngiong rosia. <sup>22</sup> Irai kin kihkihoang pwa irai loalkoang, a pwen pweipweipwi irai. <sup>23</sup> Irai johla kioang klori oang Koahs mehlello a wud pwongi janjal in armaj, apel mahnsang, apel mahn alu, apel limwahdek.

<sup>24</sup> Doari, Koahs mweidoahng joangoan armaj pwiai en kin wia joangoan wihwia jamin kan ma mohngiongirai kan kin inoangki; doar irai ken wihwia joang kamehk kan nehn pwungarai. <sup>25</sup> Irai wiliankihda mehlel in Koahs me likamw. Irai kin pwongi

apel papah mehkan ma Koahs pein kapikda apwen johpwa pwongi Jounkapikpikko, ma kaping en aluhwoang anjoau ohroj.

<sup>26</sup> Nehn irai kin wia joang pwiai, Koahs mweidla irai oang nehn inoang kamehk pwi. Pel lihkan mweidla palwoaroarai oang siahk japwung kan nehn pwungarai.

<sup>27</sup> Pel doahroar woal kan, irai kin kihdi arai inoang oang li, irai ken wiahpene pein arai inoang nehn pwungarai; doari, in imwla irai pirin oaloo koaloklok ma koanoahng arai wihwia nauna kan.

<sup>28</sup> Nehn en armaj kan johla nimen lemleme mehlel in Koahs, Koahs ken mweidla arai lamlam oang lamlam japwung, doari irai ken wiahda joang kan ma johpwa koanoahng. <sup>29</sup> Irai ken dirkihla joangoan nauna kan ohroj; mwoarjuwed, noaroak, luwak, kojarmaj, pei, widing apel pihrin. Irai kin lipahned <sup>30</sup> apel koauwe emen emen, irai kin lioassoang Koahs, joah woaunki armaj, lehmwsik, lioajoahj; irai kin lemehda joang nauna dihrdir irai en wia; irai japeik oang arai nohno-pahpa. <sup>31</sup> Johla arai lamlam oang dahkij pwung apel japwung; arai inoau joah mehlel, irai johkin ipwilki ke kadek oang armaj. <sup>32</sup> Irai kidal en Koahs kojoned ma pwa armaj kan ma kin mohmohmour nehn joangoan mour oauwe uhdahn koanoahng mehdi. A joah, pwa irai wihwiah joang pwiai, apel kin pwungki irai kan ma kin pwili wia joang pwiai.

## 2

### *En Koahs Kadeik*

<sup>1</sup> Imdoahr koawoa, koampoakpoi, kin kadeikda epwi armaj? Doari, joah lipilpil inje koawoa, joh oamw pwung oau koawoa en doaroa pein koawoa; pwa nehn oamw kin kadeikda emen sohrohr apel wia joanngok ma irai kin wia, koawoa kin pein kadeikda koawoa. <sup>2</sup> Kisai kidal pwa Koahs ma pwung anjoau in Ah kin kadeikda armaj kan ma kin wia joang pwiai. <sup>3</sup> Koampoakpoi, pein koawoa kin wia joang pwiai ma koawoa kin kadeikkihda emen sohrohr! Imdoahr, koawoa lemleme pwa koawoa pirin pisjang kadeik in Koahs? <sup>4</sup> Ke dapwa koawoa kin pwen kajohwe Ah kalahngan laplap, kadek, apel kanangma. Imdoahr? Koawoa johpwa woahwoahki kahrpoan Ah mohngiong kadek, pwa lh kanangma joujowi koawoa en koaluhla apel wiliakapwla? <sup>5</sup> A mohngiongimmwen ne koapsakaila apel masakla, ioar kahrehda koawoa pein kakkakoalikhla oamw koaloklok nehn Rehno en Koahs Ah lioas apel kadeik pwung pirin janjalda. <sup>6</sup> Pwa Koahs pirin kijkihoa emen emen, in doahr dahkij koanoahng ah wihwia kan. <sup>7</sup> Epwi armaj kin kalap wia me mwehu, apel kin rapahki klori, apel woan, apel mour joh imwin; doari, Koahs pirin kioang irai mour joahsuk. <sup>8</sup> Epwi armaj kin noaroak ken kerpwihla me mehlello pwa irai en kauj me nauna: doari, Koahs pirin kihdihoang pohrai Ah lioas koalik. <sup>9</sup> Loklok apel weiroak pirin mine oang armaj ohroj ma kin wihwia me nauna; sapkihda mihn Jew-ok apel oang mihn likin kan. <sup>10</sup> A Koahs pirin kioang armaj ohroj ma kin wihwia me mwehu klori, woan, apel moaloiloai; sapkihda mihn Jew-ok apel oang mihn likin kan. <sup>11</sup> Pwa Koahs johkin lipilpilki armaj.

<sup>12</sup> Doari, mihn likin kan jehpwili anki Kojoned in Moses; a irai kin wiahda dihp pel kadeikda mihndahr ma irai jehpwili anki Kojoneddo. Mihn Jew-ok anki Kojoneddo; doari, irai kin wiahda dihp apel kadeikkihda Kojoneddo. <sup>13</sup> Pwa jaudi jang in rongrongoar Kojoneddo ma armaj kin pwungla ipen Koahs, a pwen jang in ahr kin kapwaihahda audoapoan Kojoneddo. <sup>14</sup> Mihn likin kan jehpwili anki Kojoneddo; a nehn anjoau kan ma irai kin kapwaihahda audoapoan Kojoneddo, jang in pein arai poapoahm, en woahwoahki pwa irai ne kajalehda pwa irai kidal Kojoneddo mihnda ma irai jehpwili anki Kojoned in Moses-o. <sup>15</sup> Arai wihwia kan kin kajalehda pwa audoapoan Kojoneddo ne insingdi nehn mohngiongirai. Pein arai lamlam pwung

kin kajalehda doahr mehlel in me, pwa epwi anjoau arai lamlam kin kadipoahda irai apel epwi anjoau kin doaroahla irai. <sup>16</sup> Doari, doahr Rongmwehu ma ngoahi kin kalohkkihjili, ioar doahr Rehnno ma Koahs pirin kadeikda lamlam rir in armaj kan ki Christ Jesus.

### *Mihn Jew kan apel Kojonneddo*

<sup>17</sup> Imdoahr koawoa? Koawoa pwa koawoa mihn Jew; koawoa koapwoarpwoarki Kojonneddo, apel kin juweiki doahroar Koahs; <sup>18</sup> koawoa kidal dahkij Koahs mwewhuki koawoa en wia, a koawoa ne kidalda jang nehn Kojonneddo pwa koawoa en pilda dahkij ma pwung; <sup>19</sup> koawoa kin wiahki koawoa joun kahlwa armaj majkun men apel kamaram in armaj ma minmine nehn ros, <sup>20</sup> apel jounkaweid in armaj pweipwei kan, jounpadahk in armaj jawoahwoa kan. Koawoa pein lemleme pwa koawoa anki joangoan loalkoang apel mehlel ohroj jang nehn Kojonneddo. <sup>21</sup> Koawoa kin padahki armaj, a dahkij koawoa joah padahkihki pein koawoa? Koawoa kin padahkki, “Joah pirap,” a imdoahr, koawoa johkin pirap? <sup>22</sup> Koawoa kin pel pwa, “Joah kamwahl,” a imdoahr, koawoa johkin kamwahl? Koawoa kin saski kohs likamw kan, a imdoahr koawoa johkin pirapoa umwen joarwi kan? <sup>23</sup> Koawoa kin juweiki oamw anki Kojonned in Koahs, a imdoahr, koawoa johkin kihjang woan in Koahs nehn oamw kin koauwehla Ah kojoned? <sup>24</sup> Puk Joarwi pwa, “Kamwai mihn Jew ioar ma kahrehda mihn likin kan lahlahwe Koahs.”

<sup>25</sup> Ma koawoa kin kapwaihahda Kojonneddo, mine kaspoan oamw jorkomjaij; a ma koawoa johkin kapwaihahda Kojonneddo, mwewu in oar ma koawoa pwen johpwa jorkomjaij. <sup>26</sup> Ma mihn likin men ma johpwa jorkomjaij, a ih kapwaihahda audoapoan Kojonneddo, imdoahr, Koahs joah nen wiahki ih armaj jorkomjaij men? <sup>27</sup> Kamwai mihn Jew kan pirin kadeikda ipen mihn likin kan pwa kamwai kin koauwehla Kojonneddo, mihndahr ma ih insingdi oang kamwai ma jorkomjaij; a irai kin kapwaihahda Kojonneddo, mihndahr ma irai johpwa jorkomjaijla in palwoaroarai. <sup>28</sup> Doari, inje ma uhdahn mihn Jew, inje ma uhdahn jorkomjaij? Jaudi ih ma mihn Jew likin oar doari, ma ah jorkomjaij minehr in palwoaroa. <sup>29</sup> A ih ma uhdahn mihn Jew, ioar ih ma wia mihn Jew loaloa. Me woahwoahki pwa ah mohngiong ne jorkomjaijla — ioar doadoahk in Ngenin Koahs, jaudi doadoahk in Kojonned insingdiho. Doari, joangoan armaj mene kin oalooa kaping jang Koahs, a jaudi jang armaj.

## 3

<sup>1</sup> Mine kemwehu pohn mihn Jew kan koalik jang mihn likin kan? Ke mine kaspoan jorkomjaijla? <sup>2</sup> Mehlel douluhl, in joang ohroj! Keiou, Koahs likihoang mihn Jew kan Ah mahjan. <sup>3</sup> A imdoahr ma epwi irai pwen johpwa loalpwoas? Me pirin woahwoahki pwa Koahs pel johpwa loalpwoas? <sup>4</sup> Joah douluhl! Koahs uhdahn mehlel, mihndahr ma armaj ohroj likamw. Doahroar en Puk Joarwi pwahki Koahs:

“Oamw pwung uhdahn pirin janjalda in Oamw sikesik,  
Koawoa uhdahn pirin pwoaida in anjoau in Oamw pirin koapwung.”

<sup>5</sup> Doari, a ma asai wihwia japwung kan kajalehda doahroar mwewu in en Koahs pwung, kisai kak pwa Koahs wihwia japwung nehn Ah koalooa kisai? (Me ioar peidek oau ma armaj kin wia.) <sup>6</sup> Joah douluhl! Ma Koahs joah mehlel, imdoahr Ih en kak kadeikda jampah?

<sup>7</sup> A imdoahr, ma oai joah mehlello pirin kajalehda en Koahs klori apel Ah mehlello uhdahn janjalda mehlel? Dahkij kahrehda ngoahi pirin kadeikda doahr armaj dipan men? <sup>8</sup> Doari, amwda kisai joah pwa, “Kisai wiahda nauna pwa mwewu en janjalda?” Epwi armaj ne koauwehkihla ngoahi jang in ahr kin pwa ngoahi kin sikooa mehpwiai! Irai pirin kadeikda, in doahr ma koanoahng irai.

### *Joh Armaj Men Pwung*

<sup>9</sup> Doari da, kisai mihn Jew paimwehu jang mihn liki kan? Joah! Ngoahi ne kajalehda doari pwa mihn Jew apel mihn likin pwen ohroj doahroauwoar pehn manman en dihp. <sup>10</sup> Doahr en Puk Joarwi pwa!

“Joh armaj emen pwung,

<sup>11</sup> Johpwa armaj men loalkoang

Ke kin joarwihoang Koahs,

<sup>12</sup> Ohroj ma ne jipwoaljang Koahs;

irai ohroj ne japwungla,

johpwa armaj men ma kin wiahda mwehu; johpwa emen.

<sup>13</sup> Arai sikesik kin dirin widing; likamwoar doari kin injang in loawoarai, Lal keper ma doahr pwoaisin in sinek kin injang in oawoarai kan.

<sup>14</sup> Arai sikesik kan dirin kariahk nauna,

<sup>15</sup> Irai kin pispisin kamoadoakihla apel kojukdi armaj;

<sup>16</sup> irai kin koauwehla wija ohroj ma irai kin inlahng.

<sup>17</sup> Irai johpwa kidal ekij alin popohl;

<sup>18</sup> Irai pel johpwa kidal dahkij mijik Koahs.”

<sup>19</sup> Doari, kisai ne kidal pwa audoapoan Kojonneddo ohroj kin doakdoakoahr irai kan ma mohmohmour pehn Kojonneddo, pwa en kauhdihjang armaj ohroj in doaroa pein irai apel kioang jampah pwon pehn en Koahs kadeik. <sup>20</sup> Johpwa armaj emen ma kak pwungla mwohn Koahs ah kin kapwaihahda audoapoan Kojonneddo; a ioar ma Kojonneddo kin wia, ih kin kajalehng kisai armaj pwa kisai ne dipda.

### *Doahr en Koahs Ah kin Koapwungla Kisai*

<sup>21</sup> Doari, me Koahs kajalehng armaj kan doahr Ah kin koapwungla armaj Ipoa, Ih johpwa ekij pidida kojoned. A Kojonneddo apel joukohppok ne kadehdehda doahr:

<sup>22</sup> Koahs kin koapwungla armaj mwohn Ih, jang in arai kin pwojon Jesus Christ. Koahs kin wia me oang irai ohroj ma kin pwojon Christ, pwa armaj ohroj doahroauwoar:

<sup>23</sup> armaj ohroj ne wiahda dihp, doari, irai ohroj ne dohlahjang en Koahs klori. <sup>24</sup> Doari, jang in kalahngan apel japan in Koahs, armaj ohroj kin pwungla Ipoa ki Christ Jesus ma kin kajaldekihla irai. <sup>25</sup> Koahs koajoanehdi pwa Christ en meiroangkihla pein

Ih pwa Ah insahu en wiahla meiroang oau mihn lapwadda dipen armaj kan, jang in arai kin pwojon. Koahs wiahda meiroang oauwe pwa en kajalehda doahr Ah

kin koapwungla armaj mwohn Ih. Mehj, Koahs kin kanangma apel kin pohnjehjoa dipen armaj kan; <sup>26</sup> a anjoaukije, Ih kin soahk apel kajalehda dipen armaj kan pwa en

kajalehda pwa pein Ih ma kin koapwungla armaj kan mwohn Ih. Jang in iroahioauwe Koahs kajalehda doahr Ah pwung apel doahr Ah kin koapwungla armaj ohroj ma kin

pwojon Jesus.

<sup>27</sup> Doari, mine mehki kisai kak juweiki? Pwa joh! Dahkij kahrehda? Ki asai kin kapwaihahda Kojonneddo ma kahrehda? Joah, a jang in asai pwojon. <sup>28</sup> Kisai

ne kidal pwa armaj kan kin pwungla ipen Koahs jang in pwojon, jaudi jang in ahr kapwaihahda Kojonneddo. <sup>29</sup> Ke imdoahr Koahs? Ih Koahs in mihn Jew kan oardoari?

Jaudi Ih pel Koahs in mihn likin kan? Eh, Ih pel Koahs mihn likin kan. <sup>30</sup> Koahs men oar doari, Ih kin koapwungla mihn Jew kan mwohn Ih ki arai pwojon, apel mihn likin kan jang ki arai pwojon. <sup>31</sup> Me woahwoahki pwa kisai pirin kajohla Kojonneddo

ki pwa pwojon oauwe? Joah, jehpirin, pwa kisai pirin kapwaihahda Kojonneddo.

## 4

### *Karajpoan Abraham*

<sup>1</sup> Dahkij kisai en pwahki doahroar Abraham, jemen asai kaineke? Dahkij ih oaloahdi jang in pein ah wihwia kan? <sup>2</sup> Ma ih pwungla mwohn Koahs ki joang kan ma ih wiahda, ih pirin kak juweiki mehkij. A jaudi mwohn Koahs. <sup>3</sup> Puk Joarwi pwa, "Abraham pwojon Koahs, Koahs ken mweidoahng ih en pwungla ipoa ki ah pwojon." <sup>4</sup> Sohndoadoahk men kin oaloo dupukoan ah doadoahk, a dupkoa jaudi kijakij oau apwen mehkij ma pein ih koadoahkoahda. <sup>5</sup> A doahr armaj men ma johkin koapwoarpwoarki ah wihwia, a ih kin pwojon pwa Koahs kin koapwungla armaj japwung kan; Koahs mweidoahng ih en pwungla Ipoa ki ah pwojon. <sup>6</sup> Me ioar woahwoahn en David sikesik anjoauwo ih sikoahda doahr pai en armaj men ma Koahs kin koapwungla mwohn Ih likin en armaj meno wihwia kan:

<sup>7</sup> "Meid pai irai kan ma ne oaloo mahk in ahr japwung kan ipen Koahs, apel mahk in diparai kan.

<sup>8</sup> Meid pai irai kan ma Koaunno jehpirin kapwukoahki irai diparai kan."

<sup>9</sup> Imdoahr pai oauwe ma David sikoah, ih kin mine ipen irai kan oardoari ma jorkomjaijla? Joah! Pwa ih pel mine ipen irai kan ma joah jorkomjaijla. Pwa kisai ne wadek Puk Joarwi ma pwa, "Abraham pwojon Koahs, Koahs mweidoahng ih en pwungla Ipoa ki ah pwojon." <sup>10</sup> Ngehd me wiawi? Mwahn en Abraham jorkomjaijla ke mwerin? Me wiawi mwowoa, jaudi mwerin. <sup>11</sup> Abraham jorkomjaijla mwerin, apel ah jorkomjaij wiahla kilel oau pwa en kajalehda pwa Koahs koapwungla Abraham mwahn ah jorkomjaijla ki ah pwojon. Ioar kahrehda Abraham wiahla jemen irai kan ohroj ma pwojon Koahs apel pwungkihla pwojon mwahn Ih, mihnda ma irai johpwa jorkomjaij. <sup>12</sup> Abraham pel wiahla jemen irai kan ma jorkomjaijla. Me woahwoahki pwa jaudi arai jorkomjaij oar doari apwen pel arai mourin pwojon ma Abraham ne mohmohmourki mwahn ah jorkomjaijla.

### *Armaj kin Oaloahda en Koahs Inoau jang in Pwojon*

<sup>13</sup> Koahs inoaukihoang Abraham apel kadaudokoa kan pwa irai pirin johjohki jampah. Doari, inoau oauwe ne wiawihla, jaudi pwa Abraham ah kapwaihahda Kojonneddo, a pwen jang in ah pwojon Koahs doar Koahs ken mweidoahng ih en pwungla Ipoa. <sup>14</sup> Pwa ma en Koahs inoau kan aluhwoang irai oar ma kin kapwaihahda Kojonneddo, doari, me woahwoahki pwa pwojon johla kaspoa, apel en Koahs inoau pel johla kaspoa. <sup>15</sup> Kojonneddo kin kajalehioang armaj en Koahs lioas.\* Ma joh kojoned, joh japeik.

<sup>16</sup> Doari, inoauwo poahjoanda jang in pwojon, pwa en wiahla inoau mehlel oau pwa ioar en Koahs kijakij japan oang kadaudok en Abraham ohroj. Jaudi oanngoar irai ma kapwaihahda Kojonneddo, a pwen pel oang irai kan ma kin pwojon doahroar Abraham. Pwa Abraham ioar jemen kisai ohroj ma pwojon, <sup>17</sup> ma doahr Puk Joarwi ne pwa, "Ngoahi ne wiahkihla koawoa jemen wei dihrdir." Doari, inoauwo mwehu mwahn Koahs. Ih ioar Koahswa ma Abraham ne pwojonla, ioar Ih ma kin kamourda mehdi kan, apel Ah lal kin kapikda joang ohroj ma johkin mine. <sup>18</sup> Doari, mihnda ma joh mehkij ma Abraham koapwoarpwoarki, a ih ne pwojonla, doari koapwoarpwoar ne mine ipoa; ioar ih wiahla "jemen wei dihrdir." Doahroar Puk Joarwi ne pwa, "kadaudok in koawoa pirin dir doahroar ujukan." <sup>19</sup> Ih ne pirin ken johnpar epwiki, a ah pwojon johpwa jasihkeila nehn ah kin lemleme doahr palwoaroa ne moadohla, ke lemleme doahr Sarah ma ne johkakla noaisik. <sup>20</sup> Ah pwojon johpwa siksikla, a ih pel johpwa jakoapwoarpwoarki en Koahs inoau. Ah pwojon kioang ih sihkei, doari ih kioang klori oang Koahs. <sup>21</sup> Ih uhdahn kamehlele pwa Koahs uhdahn kak kapwaihahda Ah inoau. <sup>22</sup> Ioar kahrehda, "Koahs mweidoahng ih en pwungla Ipoa"

\* **4:15** Kojonneddo kin kajalehioang armaj en Koahs lioas. Koahs lioas pwa armaj johkin kapwaihahda Ah Kojoned ohroj.



ki ah pwojon. <sup>23</sup> Loapin lal pwiai, “Koahs mweidoahng ih en pwungla Ipoa,” johpwa insingdi oang ih ioar doari. <sup>24</sup> Me pel insingdi oang kisai ma pirin pel pwungkihla asai pwojon Koahs ma kaiejda asai Koaun Jesus jang mehdi. <sup>25</sup> Koahs mweidoahng Jesus en mehdi ki dipasai kan, Jesus pel iejdahng mour pwa en koapwungla kisai mwohn Koahs.

## 5

### *Pwungla Ipen Koahs*

<sup>1</sup> Apkas kisai ne pwungla ipen Koahs ki asai pwojon, kisai ne anki popohl ipen Koahs ki asai Koaun Jesus Christ. <sup>2</sup> Ioar Ih ma ukdohng kisai oang nehn en Koahs kalahngan ma kisai ne mourki apkas. Doari, kisai kamjehkki asai koapwoarpwoarki en Koahs klori! <sup>3</sup> A kisai pel kamjehkki asai apwal kan, pwa kisai kidal pwa apwal kin kahrehda kanangmah, <sup>4</sup> kanangmah kin kahrehda koahiok, a koahiok kahrehda koapwoarpwoar. <sup>5</sup> Doari, koapwoarpwoar oauwe johkin kapweipweidi kisai, pwa Koahs ne kihdoahng nehn mohngiongisai Ah limpoak jang Ngen Joarwi, me ioar en Koahs kijakij oang kisai.

<sup>6</sup> Pwa nehn anjoauwo ma kisai jasihkeihoar, Christ mehkihdi armaj nauna kan nehn anjoauwo ma Koahs koajoanehdi. <sup>7</sup> Apwal armaj men en mehkihdi armaj pwung men. Pel kak oar mine emen ma nen pel nimen mehkihdi armaj mwehu men. <sup>8</sup> A Koahs ne kajalehng kisai woahroar Ah limpoak oang kisai: pwa nehn anjoauwo ma kisai minmine nehn dihp, Christ ne mehkihdi kisai! <sup>9</sup> Jang in Ah insahu, kisai ne pwungla ipen Koahs apkas; ia woahroar koalikin asai pirin pisjang en Koahs lioas. <sup>10</sup> Kisai wia imwinsihsihn Koahs mehj, a apkas kisai ne wiahla en Koahs pirien ki mehdihn Nah Iehrojjo. Apkas kisai ne wiahla en Koahs pirien, doari, ia woahroar koalikin asai pirin koamoaurla ki mour in Christ! <sup>11</sup> A jaudi ioarroar me, kisai pel kamjehkki dahkij Koahs ne wiahda ipen asai Koaun Jesus Christ, ma wiahkihla kisai en Koahs pirien.

### *Adam apel Christ*

<sup>12</sup> Dihp indoa nehn jampah jang armaj mennoar. Apel ah dihp kahrehda mehdi. Doari mehdi ken lelloang armaj ohroj, pwa armaj ohroj dipan. <sup>13</sup> Mine dihp nehn jampah mwohn Kojonneddo. A anjoauwo ma kojonneddo pwen kahjikkoar mine, joh koapwungpen dihp. <sup>14</sup> Apwen jang nehn mwein Adam lel Moses mehdi ne koanda armaj ohroj; eh, pel oang irai kan ma johkin wia dihp doahroar Adam nehn ah johpwa peikkoang dahkij Koahs pwa. Adam ioar janjal in Ih ma pirin indoa mwuhr. <sup>15</sup> Apwen armaj roahmenne johpwa doahroauwoar, pwa en Koahs kijakij japan johpwa doahr en Adam dihp. Mehlel, armaj dir mehdihki dipen armajmeno. A en Koahs kalahngan inenin koalik jang dihp; pel doahroar Ah kijakij ma Ih wiahda kioang armaj dir ki kalahngan in armaj men oar doari, ioar Jesus Christ. <sup>16</sup> Mine wikipijoang in nehn pwungen en Koahs kijakij apel dipen armaj men. Mwerin dihp oauwo kadeikpen dihppo wiawi; a mwerin dihp dirla, mahk en Koahs, ma joh emen warroang anki, pwokda, ma pwa doahr asai pwungla ipen Koahs. <sup>17</sup> Mehlel pwa jang dipen armajmeno, mehdi sapda koaun. A ia uhwen koalikin mwoakiddo ma armaj sohrohro ne wiahda, ioar Jesus Christ! Armaj ohroj ma oaloe en Koahs kalahngan laplap oauwe apel ne pwungla ki kalahngan oauwe, irai pirin pwili koaun oaroin arai mour ki Christ.

<sup>18</sup> Doari, doahroar dihppo ah kariahla armaj ohroj, ioar pel doahroar wihwia pwunngo ah pel kajaldekihla armaj ohroj apel kioang irai mour. <sup>19</sup> Apel doahr japeik in armaj mennoar ah kahrehng armaj dihrdir dihp, ioar pel doahr peik in armaj mennoar pirin koapwungla armaj dihrdir mwohn Koahs.

<sup>20</sup> Kojonneddo wiawihda pwa en kajalehda koalik in wihwia japwungkan; a nehn dihp ah koalikla, en Koahs kalahngan a kapwa koalikla jang mehlel. <sup>21</sup> Doari, doahroar en dihp koaunda mehdi, ioar pel doahroar en Koahs kalahngan koaunda pwung unjek, kahkahlwahlahng kisai nehn mour joahsuk ipen Jesus Christ asai Koaun.

## 6

### *Mehdi oang Dihp, a Mour Ipen Christ*

<sup>1</sup> Doari, dahkij kisai en pwa? Dapwa kisai en minmine nehn dihp, pwa kalahngan en Koahs en koalikla? <sup>2</sup> Joah douluhl! Kisai ne mehdi oang nehn dihp; doari, ia mwomwen asai kak minmine nehn dihp? <sup>3</sup> Mehlel kamwai ne kidal, nehn asai poapdaijla apel minmin oang Christ Jesus, kisai pel poapdaijla apel minmin oang nehn Ah mehdi. <sup>4</sup> Jang in asai ne poapdaijla, kisai ne pwili mehdi apel pwili joajjoardi, pwa en doahroar en Christ Ah ne iejda jang mehdi in rojon ling in Jamahu. Ioar pel pirin doahroar kisai, asai pirin pel mourki mour kapw oau.

<sup>5</sup> Pwa ma kisai wiahla oau ipen Christ nehn asai pwili Ah mehdi, doari, kisai pirin pel pwili wiahla oau nehn asai pirin pwili Ah iejda. <sup>6</sup> A kisai ne kidal pwa asai mour mering ne pwili Christ mehdi in Ah lohpuwuhwo, pwa manman in dihp ipasai en pel johla mine, pwa kisai en johla liduhwoang dihp. <sup>7</sup> Pwa anjoau ma emen mehdi, ih kin jaldekla jang pehn manman in dihp. <sup>8</sup> Pwa ma kisai ne pwili Christ mehdi, kisai pwojon pwa kisai pirin pwili mour Ipoa. <sup>9</sup> Kisai kidal pwa Christ ne iejda jang mehdi, a Ih johla pirin pwuroahng mehdi. Mehdi johla ah manman pohn Ih. <sup>10</sup> Pwa Ih ne mehdi, Ih ne kalwehdi manman in dihp. Apkas Ih mohmohmourki Ah mour oang Koahs. <sup>11</sup> En pel doahroar kamwai. Kamwai en pel wiahki pwa kamwai ne pel mehdi oang nehn dihp, a ne mourda oang mour oang Koahs ki Christ Jesus.

<sup>12</sup> Doari, dihp en johla pirin koaunda palwoaroamwai kan, apel kahre oang kamwai en kapwaihahda anahn in pein injenamwai. <sup>13</sup> Kamwai en pel johpwa mweidoahng kijehn palwoaroamwaikan en wiahda dihp, ke kapwaihahda inoang juwed. A kamwai mweidoahng Koahs pein kamwai, doahroar armaj ma iejda jang mehdi oang mour, apel mweidoahng Koahs palwoaroamwai pwon pwa en wia mihn wihwia pwung. <sup>14</sup> Dihp en johla koaunda kamwai pwa kamwai ne johla mour pehn kojoned, apwen pehn en Koahs kalahngan.

### *Lidu in me Pwung*

<sup>15</sup> Doari, ken da? Kisai en wiahda dihp pwa kisai ne johla mine pehn kojoned, apwen pehn kalahngan en Koahs? Joah! <sup>16</sup> Pwa mehlel kamwai ne kidal. Nehn amwai mweidoahng pein kamwai en wiahla lidu apel peikkoang emen, doari, mehlel kamwai ne lidu oang ma kamwai kin peikkoang — ma oang dihp, imwkihla mehdi ke oang peik, imwkihla pwung ipen Koahs. <sup>17</sup> A pwen kalahngan en Koahs, pwa anjoau kij kamwai wia lidu in dihp, a apkas kamwai kin peikkoang mehlel in padahk ma kamwai ne oaloa nehn mohngiongimwai kan. <sup>18</sup> Kamwai ne jaldek jang dihp apel ne wiahla lidu in pwung. <sup>19</sup> Ngoahi doadoahkki lal moangoai pwa amwai mour pe jasihkei. Pwa anjoau kij kamwai mweidoahng pein kamwai en wiahla lidu in jamin, nauna, apel kapwaihahda inoang naunahkan. Doari, apkas kamwai uhdahn en mweidoahng pein kamwai pwa kamwai en wiahla lidu in pwung apel joarwihla.

<sup>20</sup> Anjoauwo ma kamwai wia lidu in dihp, anjoauwa ma kamwai jaldekJang pwung. <sup>21</sup> Joangoan mwehu da kamwai ne oaloahjang amwai wiahda mehkan ma kamwai kin mehkki anjoaukije? Imwlahn mehpwiai mehdi! <sup>22</sup> A anjoaukije kamwai ne jaldekla jang dihp apel ne wiahla lidu in Koahs; imwlahn mehpwiai kamwai ne kajarwihoang Koahs amwai mour unjek apel imwlahn meohroj kamwai pirin anki mour joahsuk.

<sup>23</sup> Pwa dupukoan dihp ioar mehdi; a en Koahs kijakij japan, ioar mour joahsuk ipen Christ Jesus asai Ko aun.

## 7

### *Karajraj jang in Pwoapwoaud*

<sup>1</sup> Doari, rioai kan, kamwai uhdahn woahwoahki dahkij ngoahi pirin pwa apkas, pwa kamwai kidal doahr kojoned: kojoned kin koaunda armaj nehn anjoauwo ma irai pe mohmohmour. <sup>2</sup> Me ioar oau karajpoa: nehn kojoned li pwoapwoaud men uhdahn pirin mine ipen pahioahu oaroain en woallo mour; a ma woallo mehdi liho pirin jaldek jang kojoneddo. <sup>3</sup> Doari, ma ih painkihla emen woal sohrohr nehn anjoauwo ma pahioahu pe mour, liho pirin adanki lihn kamwahl men; a ma pahioahu mehdi, liho pirin jaldekjang kojoneddo. Doari, ih johla pirin adanki lihn kamwahl ma ih painkihla emen woal sohrohr. <sup>4</sup> Rioai kan, ioar pel doahroar kamwai, kamwai ne mehdi jang Kojoneddo pwa kamwai ne wiahla kijehn palwoaroan Christ; apel anjoaukije kamwai ne pel wiahla nihn Christ ma iejda jang mehdi pwa kisai en mourki mour kaspoahoau oang Koahs. <sup>5</sup> Pwa anjoauwo ma kisai mour doahroar ahnpen armaj, inoang naunahkan ma Kojoneddo kin kamwoakidihda doadoahk in nehn palwoaroasai kan, joang ohroj ma kisai wiahda kin kahrehda mehdi. <sup>6</sup> A apkas, kisai jaldek jang Kojoneddo pwa nehn asai ne mehdi jang dahkij ma joalihdi kisai, kisai ne johla papah Koahs doahroar mour mering in kojoned ma ne insingdi, a doahroar in mour kapw in Ngenno.

### *Kojoned apel Dihp*

<sup>7</sup> Doari, dahkij kisai en pwa, kojoneddo dihp oau? Joah douluhl! Pwa ioar Kojoneddo ma kajalehioang ngoahi en kidal dahkij dihp. Ma Kojoneddo johpwa pwa, "Koawoa en johpwa noaroak," doar ngoahi nen jehjoa pwa dahkij noaroak. <sup>8</sup> Kojoned oauwe kahrehioang dihp kamwoakidihda joangoan noaroak nauna ohroj nehn ngoahi, pwa ma joh Kojoneddo, dihp mehdi. <sup>9</sup> Mehjwa pein ngoahi kin mourki likin kojoned, a nehn anjoauwo ma Kojoneddo indoa, dihp pel janjalda, <sup>10</sup> a ngoahi ken mehdi. Doari, Kojoneddo ma uhdahn pirin wahdohng ngoahi mour, a ken kahrehioang ngoahi mehdi. <sup>11</sup> Dihp kidalda ah anjoau mwehu, jang in Kojoneddo, dihp kapweipweidi ngoahi apel kojukdi ngoahi. <sup>12</sup> Doari, pein Kojoneddo ma joarwi apel lalin kojoneddok pel joarwi, pwung apel mwehu. <sup>13</sup> Imdoahr, me woahwoahki pwa mehkij mwehu kahrehioang ngoahi mehdi? Joah douluhl! Jang in doadoahkki mehkij mwehu, dihp wahdohng ngoahi mehdi, pwa en kajalehda mehlel doahroar nauna in dihp. Doari, jang in Kojoneddo, dihp ne janjalda mehlel uhwen koalik in ah nauna.

### *Uhpene nehn Loaloasai kai*

<sup>14</sup> Kisai kidal pwa Kojoneddo mine in loapin ngen; a ngoahi palwar oau, lidu oang dihp. <sup>15</sup> Ngoahi johpwa woahwoahki dahkij ngoahi kin wia pwa ngoahi johkin wia dahkij ma ngoahi nimen wia, a ngoahi kin wia dahkij ma ngoahi kin naunahki. <sup>16</sup> Nehn oai kin wia dahkij ngoahi johpwa nimen wia, me kin kajalehda oai kin pwungki pwungin Kojoneddo. <sup>17</sup> Doari, jaudi pein ngoahi ma kin wia me, a dihp ma kin mohmohmour nehn ngoahi. <sup>18</sup> Ngoahi kidal pwa me mwehu johpwa mour nehn ngoahi, me woahwoahki doahroar ahnpen ngoahi armaj men. Pwa mihndahr ma ngoahi nimen wiahda me mwehu, ngoahi pwen johkak oang. <sup>19</sup> Ngoahi johkin wiahda me mwehu ma ngoahi kin nimen wia, a ngoahi kin wiahda me nauna ma ngoahi johpwa nimen wia. <sup>20</sup> Ma ngoahi wia mehkij ma ngoahi johkin nimen wia, me woahwoahki pwa audi ngoahi ma wihwia mehkije, a pwen dihp ma kin mohmohmour nehn ngoahi.

<sup>21</sup> Doari, ngoahi kidalda pwa joangoan koajoandihoauwe kin doadoahk ipoai: nehn anjoauwo ma ngoahi kin nimen wia dahkij mwehu, mehkij nauna ioarroar doari ma ngoahi kak pilda. <sup>22</sup> Loaloaihoa kin perenkihda kojoned in Koahs. <sup>23</sup> A ngoahi kin kapang oau joangoan kojoned sohrohr ma kin doadoahk nehn palwoaroaioa — oau joangoan kojoned sohrohr ma kin uhwoang kojoneddo ma oai lamlam kin pwungki. Kojoned sohrohr oauwe kahrehng oai joaldi pehn kojoned in dihp ma kin doadoahk nehn palwoaroaioa. <sup>24</sup> Uhdahn armaj paijuwed men ngoahi! Inje ma pirin kapisla ngoahi jang nehn palwar oauwe ma kin kahlwahlahng ngoahi mehdi? <sup>25</sup> Kalahngan oang Koahs ma kin kapisla joanngoauwe ipen asai Koaun Jesus Christ! Doari, pein ngoahi, ngoahi kak papah kojoned in Koahs janngoar nehn oai lamlam; a nehn ahnpen ngoahi armaj kin papah kojoned in dihp.

## 8

### *Mohmohmourki Ngenno*

<sup>1</sup> Doari, joh karia in irai kan ma kin minmin oang Christ Jesus nehn ahr mour. <sup>2</sup> Pwa kojoned in Ngenno, ma kin kahrehng kisai mour nehn asai minmin oang Christ Jesus, Ih ne kapisla ngoahi jang in kojoned in dihp apel mehdi. <sup>3</sup> Da ma kojoneddo johkak wia, pwa jang in jasihkei in armaj, Koahs ne wiahda. Ih kin kariahla dihp ipen armaj jang in Ah kadardo Nah Iehrojjo ma indoa in mwomwen armaj dipan men pwa en kajohrla dihp. <sup>4</sup> Koahs wia me pwa iloak in pwungin in Kojoneddo en pwoaida ipen kisai ok ma kin mourki mourin Ngenno, a jaudi in ahnpen armaj. <sup>5</sup> Pwa irai kan ma kin mourki doahroar ahnpen armaj, irai kin injinohki kapwaihahda ahnpen armaj. A irai kan ma kin mourki Ngenno, irai kin injinohki kapwaihahda dahkij Ngenno mwehuki. <sup>6</sup> Doari, mourki ahnpen armaj, kin imwla mehdi; a mourki mourin Ngenno imwla mour apel popohl. <sup>7</sup> Doari, armaj kan ma kin mourki mourin ahnpen armaj, kin wiahla imwinsihsihn Koahs, pwa irai johkin kapwaihahda kojoned in Koahs, pwa in mehlel irai johkak. <sup>8</sup> Irai kan ma kin kapwaihahda ahnpen armaj johkak kaperenda Koahs.

<sup>9</sup> A kamwai johkin kapwaihahda ahnpen armaj nehn amwai mour; kamwai kin kapwaihahda dahkij Ngenno pwehng kamwai — ma ioar Ngenin Koahs kin mour loaloamwai kan. Armaj men ma Ngenin Koahs joah mine ipoa audi ih nihn Christ. <sup>10</sup> A ma Christ kin minmine nehn kamwai, mihnda ma palwoaroamwai kan pirin mehdi ki dihp, a Ngenno ioar amwai mour ki pwa amwai ne pwungla ipen Koahs. <sup>11</sup> Ma Ngenin Koahs ma ioar kaiejda Jesus jang mehdi kin minmine loaloamwai kan, doari, Ih ma kaiejda Christ jang mehdi pirin pel kamourihda palwoaroamwai kan ma kak mehdi, ki Ngenno ma mine nehn kamwai.

<sup>12</sup> Doari, rioai kan kisai anki pwukoa oau, a audi kisai en weweidki ahnpen armaj. <sup>13</sup> Pwa ma kamwai kin weweidki ahnpen armaj, kamwai pirin mehdi; a ma kamwai pirin kojukkihdi amwai wihwia nauna kan Ngenno, doari, kamwai pirin mourla. <sup>14</sup> Irai kan ma Ngenin Koahs kin kahlwa, ioar ma nihn Koahs jeri. <sup>15</sup> Pwa Ngenno ma Koahs kioang kamwai johkin wiahki kamwai lidu apel kahrehng kamwai majpwehk; a Ngenno kin wiahki kamwai nihn Koahs. Apel jang in manman in Ngenno emenemen kisai kin poangpoang oang Koahs, “Joamoai, Joamoai.” <sup>16</sup> Ngenin Koahs kin oau oang ngenisai apel kadehdehda pwa kisai nihn Koahs jeri. <sup>17</sup> Nehn asai ne wiahla Nah, kisai pirin pwili paiki pai kan ma Ih neknekid oang Nah jerihkan, a kisai pirin pel pwili Christ paiki da ma Koahs neknekid oang Christ; pwa ma kisai pwili Christ loklok, doari, kisai pirin pel pwili Ih nehn Ah klori.

### *Kloriho ma pirin Indoa*

<sup>18</sup> Ngoahi kin lemlème pwa loklok kan ma kisai kin loklokki anjoau oauwe johpwa pahrekkoang dauluhl klori ma pirin pwokdohng kisai. <sup>19</sup> Audoapoan loanngé apel jampah ohroj kin joujowi anjoauwo ma Koahs pirin kajalehda Nah kan. <sup>20</sup> Pwa wioapoan loanngé apel jampah ne kipjang koajoandihpoa, jaudi jang in pein injenarai, a ki pwa koajoandihn Koahs. A mine koapwoarpwoar oauwe pwa <sup>21</sup> oau rehn audoapoan loanngé apel jampah uhdahn pirin maioudahjang mour in liduhwoang mehdi, a pirin pwili nihn Koahs jerihkan nehn arai klori jaldek. <sup>22</sup> Pwa kisai ne kidal pwa lel anjoau oauwe audoapoan loanngé apel jampah ohroj kin weiweiroak, doahroar moadoak in noaisik. <sup>23</sup> A jaudi audoapoan loanngé apel jampah ohroj oardoari weiweiroak, pwa pel kisai oaloahdi Ngen Joarwiho ma wia sapin en Koahs kijakij kan, kisai pel weiweiroak loaloasai nehn asai joujowi anjoau ma Koahs pirin nainkihla kisai apel kamaioauwihda kisai. <sup>24</sup> Pwa asai koapwoarpwoar ma koamoaurla kisai; a ma kisai kin kapang dahkij kisai kin koapwoarpwoarki, doari, audi uhdahn koapwoarpwoar. Pwa inje kin koapwoarpwoarki mehkij ma ih kin kapang? <sup>25</sup> A ma kisai koapwoarpwoarki mehkij ma kisai kahjikkoar kapang, doari, kisai nen kanangma apel joujowi.

<sup>26</sup> Doahroar me, Ngen Joarwiho kin pel indoa jeuweje kisai nehn asai jasihkei. Pwa nehn asai kin jehjoa dahkij kisai pirin poaki, pein Ngenno kin kapkapki kisai ipen Koahs, in joangoan lal pwi ma kisai johkak kajalehda. <sup>27</sup> Doari, Koahs ma kidal doahr audoapoan mohngiongin armaj pel kidal doahr lemlemehn Ngenno; pwa Ngenno kin wiliandi Nah armaj ngidngid poaki irai oang Koahs doahroar dahkij kupwuren Koahs.

<sup>28</sup> Pwa kisai kidal pwa irai kan ma ipwilki Koahs apel poangpoangdohng Ah koajoandi, irai kin oalóa kemwehuparai jang ipoa in joang ohroj. <sup>29</sup> Irai kan ma Koahs ne pilda, Ih pel kilelehdi irai pwa irai en doahrla Nah Iehrojjo pwa Nah Iehrojjo en wiahla mehjenihn peneinei koalík oau. <sup>30</sup> Doari, Koahs pangin irai kan ma Ih ne kasohrohrihla, iraihok ma Ih pangin, Ih koapwungla irai Ih pel kalingihda irai ki Ah klori.

### *Limpoak in Koahs ipen Jesus Christ*

<sup>31</sup> Doari, dahkij kisai kak sikoá nehn asai ne lelloang mehpwiai ohroj? Ma Koahs uhpali kisai, inje pirin pallan kisai? <sup>32</sup> Koahs johpwa joamwoaski Nah Iehrojjo, a Ih mweidla ki kisai ohroj! Ih kihdoahng kisai Nah Iehrojjo — doari, Ih joah pirin pel japankihoang kisai me ohroj? <sup>33</sup> Doari, inje ma pirin kadipoa nihn Koahs armaj kan ma ne pilpilda? Pein Koahs ma kin koajoanehdi apel kajalehda doahr arai pwungla Ipoa! <sup>34</sup> Inje ma pirin kariahla irai? Joh emen! Pwa Christ Jesus, Ih ma mehdi, apel Ih ma iejdahng mour apel kin minmine in loap moaun in Koahs, wijahu Ih kin ngidngid poaki kisai ipen Koahs! <sup>35</sup> Doari, inje ma kak kasohrohrihjang kisai limpoak in Christ? Loklok ke apwal, ke koaloklok ke duhpek, ke joamwoahmwoa, ke keper, ke mehdi? <sup>36</sup> Doahroar ma Puk Joarwi pwa:

“In Oadoammwen, kamai kin minmine nehn apwal in mehdi anjoau ohroj, kamai doahr jihpw ma kin wijiklahng kojkojdi.”

<sup>37</sup> Joah, pwa in joang pwiai ohroj, kisai ne kalwehdi ohroj jang in manman in Ih ma ipwilki kisai! <sup>38</sup> Pwa ngoahi kidal in mehlel pwa johpwa mehkij kak kasohrohrihjang kisai Ah limpoak; joh mehdi ke mour, ke sohnloang kan, ke koaun apel manman sohrohr in nehnloanngé kan, pel johpwa mehkij ma wihwia apkas ke pel pirin wiawi mwuhr, <sup>39</sup> pel johpwa mehkij pohnangin ke pehnangin jampah — mehlel johpwa mehkij nehn audoapoan loanngé apel jampah ohroj kak kasohrohrihjang kisai limpoak in Koahs ma kisai anki ipen Christ Jesus asai Koaun.



## 9

### *Koahs apel Nah Armaj kan*

<sup>1</sup> Ngoahi kin sikestik mehlel: ngoahi nihn Christ apel ngoahi johkin likamw. Ngen Joarwi kin koaun oai poapoahm, a kin pel kadehdehng ngoahi pwa ngoahi johpwa likamw <sup>2</sup> nehn oai sikoa uhwen koalik in oai injinjuwed! Ia uhwen moadoak poaspoas ma mine nehn mohngiongihoa! <sup>3</sup> Ngoahi kakkoar pwa Koahs en kariahla ngoahi apel kasohrohrihla ngoahi jang Christ ki kijehn udukoaihoa apel insahihoa, <sup>4</sup> mihn Israel kan. Koahs wiahkihla irai Nah jeri apel koajoanehdi pwa irai en pwili anki Ah klori. Ih wiahdahng irai Ah inoau koalik kan apel kioang irai Kojonneddo. Irai anki joarwi mehlel apel irai ne oaloo en Koahs inoau kan. <sup>5</sup> Irai ma kadaudok en jamasai koalik in mehjjok; a Christ, in palwar, pel wia kadaudokoarai. Christ, ma pel ioar Koahs ma koaunda me ohroj, kaping en aluhwoang Ih, Amen.

<sup>6</sup> Ngoahi johpwa siksikoa pwa en Koahs inoauwo johpwa pwoaida; pwa jaudi ohroj mihn Israel wia uhdahn nihn Koahs armaj. <sup>7</sup> Pel jaudi ohroj kadaudokin Abraham pirin wia jerihn Koahs. Koahs pwehng Abraham, "Jang Isaac ioar pirin wiahla kadaudokoamw ma Ngoahi inoaukihoang koawoa." <sup>8</sup> Me woahwoahki pwa irai kan ma noaisikdi oang peneinei in Abraham jaudi irai jerihn Koahs; a irai ok ma noaisikdi oang nehn inoau in Koahs ioar wia Nah kadaudok mehlel kan. <sup>9</sup> Pwa en Koahs inoauwo wiawihda in loapin lal pwiai: "Nehn anjoauwo ma Ngoahi pirin pwurdo; a Sarah ne nainkihda jermwein men."

<sup>10</sup> Apel jaudi ioarroar mehpwiai. Pwa nihn Rebecca jermwein roahmenno pel pahpahki woal mennoar, ioar jamasai Isaac. <sup>11-12</sup> Pwa koajoandihn Koaunno en pwoaida mehlel nehn pilpil in emen jerihok, Koahs pwehng Rebecca, "Min koalikko pirin papah min siksikko." Ih pwa me mwohn ira noaisikdi, mwohn ira kahjikkoar wiahda mehki mwehu ke mehki nauna. Doari, en Koahs pilpilloauwe ne wiawihla jang in pein Ah koajoandi, jang in Ah pangin ira, jaudi pwa jang in mehki ira wiahda. <sup>13</sup> Doahroar dahki Puk Joarwi pwa, "Ngoahi ipwilki Jacob, a Ngoahi lioassoang Esau."

<sup>14</sup> Doari, dahki kisai pirin pwa? Mwomwen pwa Koahs ma japahrak? Joah, johkak! <sup>15</sup> Pwa Ih pwehng Moses, "Ngoahi kin kalahngan oang inje ma Ngoahi nimen kalahngan oang, a Ngoahi pel kin poakehla inje ma Ngoahi kin nimen poakehla." <sup>16</sup> Me ohroj wiawi jaudi anahn in armaj ke da ihr wia apwen jang in en Koahs kalahngan. <sup>17</sup> Pwa nehn Puk Joarwi, ih pwehng Pharaoh, "Ioar me kahrpoan Oai kajapwilda koawoa en nahmwarki pwa koawoa en kajalehda Oai manman, apel pwa Oadoaioa en lohki wija ohroj nehn jampah." <sup>18</sup> Doari, Koahs kin kalahngan oang irai ma Ih kin nimen kalahngan oang, a Ih kin pel kakoapsakaihla irai kan ma Ih kin nimen irai en koapsakaila.

### *En Koahs Lioas apel Kalahngan*

<sup>19</sup> Doari, emen kamwai kakkoar pwehng ngoahi, "Ma ioar doahr me, doari, amwda Koahs kak en kapwukoahki armaj mehki? Pwa inje ma kak pallan koajoandihn Koahs?" <sup>20</sup> Pwa inje koawoa, oai pirien, pwa koawoa en kak uhwoang Koahs? Ainpwoahs oau ma wiawihkihda pwirej, johkin pwehng armajjo ma wiahda, "Amwda koawoa ke wiahda ngoahi in joangoan mwomw oauwe?" <sup>21</sup> Doari, jounwia ainpwoahsso anki pwungin pilda joangoan pwirej da ma ih nimen doadoahki; apel wiahda ainpwoahs riau jang in pwirej oau, oau en mwehu oang doadoahk kajampwalkan oar doari, a oau oang mihn doadoahk in rehn ohroj.

<sup>22</sup> Me pel doahroar mehlel in dahki Koahs ne wiahda. Ih nimen kajalehda Ah lioas apel kalohkihjili Ah manman. Ioar mehwa Ih kanangmahkihoang irai kan ma ne minehla pehn Ah lioas, ma pirin kerpwihekla. <sup>23</sup> A Ih pel nimen kajalehda dirin Ah klori, ma Ih ne kamwroahdi oang kisai ma ne minehla pehn Ah kalahngan, kisai kan

ma Ih ne koaunopda en kioang Ah klori. <sup>24</sup> Pwa ioar kisai ma Ih pangin, jaudi jang oar ipen mihn Jew kan, a pwen pel jang ipen mihn likinkan. <sup>25</sup> Me ioar ma Ih pwa nehn Puk en Hosea:

“Armaj kan ma jaudi noai,  
Ngoahi pirin kahdanki irai, ‘Noai Armaj,’  
Weiho ma Ngoahi johpwa ipwilki,  
Ngoahi pirin kahdanki, ‘Oai Mwohn limpoak.’

<sup>26</sup> Apel wijahu oar ma Ngoahi pwehng irai,  
‘Jaudi noai armaj kamwai,’ irai pirin adanki nihn Koahs mourro jeri.”

<sup>27</sup> A Isaiiah pel sikoa doahr Israel, “Mihnda ma armaj in Israel pel dir doahroar pikin oaroahr kan, a armaj jipid iparai pirin mourla; <sup>28</sup> pwa Koaunno pirin ken pispisinnoar kadeikda jampah.” <sup>29</sup> Doahroar Isaiiah ne sikoa mehj, “Ma Koaunno inenin Laplappo, johpwa luhwoahkihdi epwi kadaudokoasai, kisai pirin doahrla Sodom, kisai pel doahrla Gomorrah.”

### *Israel apel Rongmwehu*

<sup>30</sup> Doari, dahkij kisai pirin pwa? Apkas: mihn likinkan ma johkin jongjong in pwungla ipen Koahs, irai ne pwungla ipen Koahs jang in arai pwojon. <sup>31</sup> A mihn Israel kan kin raprapahki kojoned oau ma pirin kak koapwungla irai ipen Koahs, a irai johpwa kapangda. <sup>32</sup> A da joah ki? Pwa irai lemleme pwa irai kak pwungkihla arai wihwia a jaudi pwojon, irai pirin dipkelkel in “sakain kadipkelkello,” <sup>33</sup> ma doahroar da Puk Joarwiho pwa:

“Kapang! Ngoahi ne kihdihoang nehn Zion sakaihoau  
ma pirin kahrehioang armaj dipkelkel,  
sakaiho ma pirin kahrehioang irai kipla.  
A emen ma pwojon ih, johpwa pirin injinjuwedla.”

## 10

<sup>1</sup> Rioai kan, ia woahr oai mohngiong inoangki oai armaj kan en koamoaur! Ia woahr oai kin kapkapki irai oang Koahs! <sup>2</sup> Ngoahi kak kadehde doahr arai poadidi oang Koahs, a arai johpwa poadidihki pwung mehlello. <sup>3</sup> Pwa irai johpwa kidal allo ma Koahs kihdi pwa armaj en pwungla Ipoa. A irai kin jongjong en wiahda pein arai al; doari, irai johkin wud nehn al in en Koahs koajoandi en koapwungla irai mwohn Ih. <sup>4</sup> Pwa Christ indoa kadoarihla Kojoneddo pwa armaj ohroj ma pwojon en pwungla ipen Koahs.

### *Koamoaur oang Ohroj*

<sup>5</sup> Moses insingehdi doahroar pwungla in armaj ipen Koahs jang in peikkoang Kojoneddo: “Armaj men ma kin kapwaihahda audoapoan Kojoneddo pirin mourkihla Kojoneddo.” <sup>6</sup> Ioar me doahroar en Puk Joarwi pwahki mwomwen pwungla ipen Koahs jang in pwojon: “Koawoa en joah pein lemleme, ‘Inje pirin indahla nehnloange?’ (me woahwoahki pwa en wahdihdo Christ). <sup>7</sup> Koawoa en joah pel pwa, ‘Inje pirin indihla pehn jampah?’ (pwa en wahdahdo Christ jang mehdi).”

<sup>8</sup> Doari, me ioar ih pwa:

“En Koahs padahk kin mine koaroannoang koawoa,  
in oawoammwen apel nehn oamw mohngiong.”

Doari, apkas woahwoahki sikesik in pwojon ioar kisai kin padahkihwe. <sup>9</sup> Pwa ma koawoa kadehdehki in oawoammwen pwa Jesus ioar Koaun, apel pwojon nehn kapehdimwen pwa Koahs kaiejda Ih jang mehdi, doari, koawoa pirin mourla. <sup>10</sup> Pwa asai pwojon kin sapjang nehn kapehdisai kai, apel ioar me kisai kin pwungkihla ipen

Koahs; asai kadehde kin sapjang in oawoasai kai, apel ioar kisai kin mourkihla. <sup>11</sup> Puk Joarwi pwa, “Emen ma kin pwojon Ih johpwa pirin injinjuwedla.” <sup>12</sup> Me kihpene armaj ohroj, pwa joh wikpijoang oau mine nehn pwungen mihn Jew kan apel mihn likin kan. Koahs, ioar emennoar doari ma Koaunin armaj ohroj ma kin kapaiahda armaj ohroj ma kin pangin Ih. <sup>13</sup> Doahroar en Puk Joarwi pwa: “Ohroj ma kin pangin oadoan Koaunno pirin mourla.”

<sup>14</sup> Imdoahr irai en kak pangin Ih, ma irai joah pwojon? Apel ia mwomwen irai en pwojon ma irai joah rong padahkko? Apel imdoahr irai kak rong, ma joh emen pwehng irai? <sup>15</sup> A ia mwomwen padahkko kak wiawi oang irai, ma joh jounpakair koadoadoarlhng irai? Doahroar en Puk Joarwi pwa: “Inenin ling apel mwehu asai kapang ehn jounpakair kan nehn ahr kin indoa wa Rongmwehu!” <sup>16</sup> A jaudi irai ohroj oaloahda Rongmwehuwo. Pein Isaiah pwa, “Maing oai Koaun, inje kamehlele amai padahkko?” <sup>17</sup> Doari, pwojon kin injang in rong padahkko, apel rong padahkko kin injang in padahk in Christ.

<sup>18</sup> A ngoahi pirin idoak: Mehlel pwa irai kahjikkoar rong padahkko? Irai ne rong — pwa Puk Joarwi pwa,

“Ngilaraiok ne lelpijoang wija ohroj nehn jampah, arai padahk kan ne kipehdi jampah pwon.”

<sup>19</sup> Ngoahi pirin pel pwuroahng idoak: Imdoahr armaj in Israel, irai johpwa woahwoahki me? Doari, pein Moses ma sapin japoang:

“Ngoahi pirin kaluwakihki kamwai armaj kan ma joh uhdahn arai wei, ngoahi pirin kalioasihki kamwai sohn wei pweipwei oauwe.”

<sup>20</sup> A Isaiah inenin johla mijik nehn ah pwa,

“Irai kan ma johpwa rapahki ngoahi ioar kapangda ngoahi, ngoahi ne pwokkoang irai kan ma johpwa iddidoak ngoahi.”

<sup>21</sup> A pid Israel ih pwa “Rehnoau pwon Ngoahi joujowi pwa Ngoahi en kajamwo armaj japeik apel kahngohdi kan.”

## 11

### *En Koahs Mahk oang mihn Israel kan*

<sup>1</sup> Doari, ngoahi ken idoak: Imdoahr Koahs ne kerpwihla Nah armaj kan? Joah! Pein ngoahi pel mihn Israel men jang in kadaudok in Abraham kijehn kadaudok in Benjamin. <sup>2</sup> Koahs johpwa kerpwihla Nah armaj kan ma Ih pilda jang in sapinno. Kamwai ne kidal dahkij Puk Joarwi sikoa wija ma Elijah ngidngidkihoang Koahs en pallanda mihn Israel kan: <sup>3</sup> “Maing oai Koaun, irai ne kojukdi nihmw joukohp kan apel ne koauwehla oamw pei joarwi kan. Ngoahioar doari ma luhwoahdi, a irai pel jongjong en kojukdi ngoahi.” <sup>4</sup> Doari, dahkij Koahs japoangki ih? “Ngoahi neknkid oang Ngoahi woal ijikid ma johkin pwongi kohs likamw Baal.” <sup>5</sup> Ioar pel doahr anjoaukije: Mine pwihn siksik oau ma Koahs ne pilda, jang in Ah kalahngan. <sup>6</sup> Ah pilpil oauwe sapjang in Ah kalahngan, jaudi jang in ahr wihwia. Pwa ma en Koahs pilpil kin sapjang in wihwiahn armaj, doari, en Koahs kalahngan audi kalahngan mehlel oau.

<sup>7</sup> Doari, da? Armaj in Israel kan johpwa kapangda dahkij irai raprapahki. Pwihn siksikko ma Koahs pilda, ioar irai ma kapangda; iraihok likin koapsakaila, joah nimen rong poangpoang in Koahs. <sup>8</sup> Doahroar en Puk Joarwi pwa: “Koahs ma kakoapsakaihla mohngiongirai apel arai lamlam; oaroh lel rehnoauwe, irai johkak kapang wija ke rong wija.” <sup>9</sup> A David pel pwa,

“Arai kamdipw kan en wiahla lidipparai, irai en kipdi apel oaloe koalokpoarai!

<sup>10</sup> Mijaraikan en rosia pwa irai en joah kapang wija;

a palwoaroarai en kojla pehn arai apwal kan anjoau ohroj.”

<sup>11</sup> Doari, ngoahi pel nimen idoak: Nehn anjoauwo ma mihn Jew kan dipkelkella, irai uhdahn mwomwla nehn arai kipdiho? Joah dauluhl! Nehn irai ne dipdahu, koamoaur pel lelloang mihn likin kan, pwa mihn Jew kan en luwakkihda. <sup>12</sup> Dipen mihn Jew kan ne kahrehioang jampah kapai koalik mehlel, apel nehn irai joamwoahmwoahki Ngenno kahrehioang mihn likin kan kapai koalik mehlel. Doari, ia woahr pai ma pirin mine ma mihn Jew kan ohroj pirin pwili japahldo!

### *Koamoaurahn mihn Likin kan*

<sup>13</sup> Doari, apkas, ngoahi siksikesikkoang kamwai mihn likin kan: oaroain oai pirin pwaijanki pwukoahn woaroak in mihn likin kan ngoahi pirin kin juweiki doadoahk oauwe. <sup>14</sup> Dapwa ngoahi pel kak wiahng kijehi mihn Jew kan en luwakkihda, apel koamoaur la epwi irai. <sup>15</sup> Pwa nehn irai ne kerpwiheklahu, jampah ne wiahla koampoakpen Koahs. Doari, a ia pirin doahr ma irai japahldo? Nen pirin doahr iejdahn armaj mehdi kan!

<sup>16</sup> Ma kijehn lopwon in pilahwahioau kajarwi oang Koahs mijoa, doari, Koahs pirin anki lopwonno ohroj; apel ma koalohn suhkoa pas pirin kajarwihoang Koahs, doari, rahn suhkoahu pel en Koahs. <sup>17</sup> Epwi rahn suhkoa olip ma apwalihek mwehu ne sipwjang, a rahn suhkoa olip in nehn woallo sohrohr pas ma wud wiliandi. Kamwai mihn likin kan, kamwai doahroar rahn suhkoa olip in nehn woallohu, a apkas, kamwai pel pwili anki en mihn Jew arai mour sihkei in loapin ngen. <sup>18</sup> Ioar mehwa kahrehda kamwai joah mwamwahlki irai kan ma doahr rahkan ma ne sipwjang. Ia mwomwen amwai pirin kak juweiki kamwai? Kamwai doahr rahn suhkoa pas, kamwai joah kamouri koalohwoahu — a koalohwoahu ma kamouri kamwai.

<sup>19</sup> A koawoa pirin pwa, “Eh, a rah kan ne sipwjang pwa en minehda dohioai.” <sup>20</sup> Mehlel oau! Irai ne sipwjang pwa joh arai pwojon, a kamwai minminehr pwa kamwai pwojon. A kamwai joah juweiki, a kamwai en mijik. <sup>21</sup> Koahs johpwa koamoaurihla mihn Jew kan, ma doahr rahn suhkoa mehlel. Doari, imdoahr, kamwai lemleme pwa Ih pirin koamoaurihla kamwai? <sup>22</sup> Doari, nehn joang oauwe kisai ne kak woahwoahki uhwen en Koahs kadek apel uhwen Ah kadeik apwal. Ih kin wia Ah kadeik apwal oang irai kan ma ne japwungla, a kadek oang kamwai — ma kamwai pirin pwilpwilihoar Ah kadek. Pwa ma kamwai johpwa, kamwai pirin pel kasohrohrjang. <sup>23</sup> Apel ma mihn Jew kan kerpwihla arai joahpwojon, irai pirin pel pwuroahng nehn wijahuwoar ma irai mine mehj, pwa Koahs ma kak kajpahliho irai. <sup>24</sup> Kamwai mihn likin kan, kamwai doahr rahn suhkoa olip in nehn woallo pas ma ne sipwjang, a ne pel kapaspassoang in suhkoa olip pas ma apwalihek mwehu, in joangoan mwoakid ma pein suhkoa kan johkin wia. Mihn Jew kan doahr suhkoa olip pas ma apwalihek mwehu. Doari, ih pirin inenin moangoai pwa Koahs en kapwurihoang in suhkoahu rahn suhkoa pwiai ma ne sipwjang.

### *En Koahs Kalahngan oang Armaj Ohroj*

<sup>25</sup> Rioai kan, mine mehlel rir oau ma ngoahi nimen kamwai en pel kidal, ih iroahdihjang kamwai amwai lemleme doahr amwai loalkoang. Doari, ioar me: Koapsakailahn mihn Israel-ok jehpirin allaluhlahr, a Ih pirin kolkol oaroh lel uhwen dirin mihn likin kan ma ne kileldi pirin wiahla nihn Koahs. <sup>26</sup> Ioar doahr en mihn Israel kan ohroj ahr pirin mourla. En Puk Joarwi pwa:

“Jounkoamoaurro pirin indoahjang Zion,  
apel kihjang joang nauna ohroj ipen kadaudok in Jacob.

<sup>27</sup> Ngoahi pirin wiahng irai inoau koalikkoauwe,  
nehn Oai pirin lapwadda diparai kan.”

<sup>28</sup> Mihn Jew kan ne wiahla imwinsihsihn Koahs ki kamwai mihn likin kan, jang in arai joah oaloahda Rongmwewuwo. A ki en Koahs pilpil, Ih ipwilki irai ki jamarai

mehjjok. <sup>29</sup> Pwa Koahs johkin ukudla Ah lamlam oang inje Ih pilda apel kapaida. <sup>30</sup> A doahr kamwai mihn likin kan, kamwai johkin peikkoang Koahs mehjwa; a apkas kamwai ne oaloo en Koahs kalahngan pwa mihn Jew kan japeik. <sup>31</sup> Pel doahroar jang in kalahnganno ma kamwai ne oaloo, mihn Jew kan kin japeik oang Koahs anjoau oauwe, pwa irai en pel kak oaloo kalahngan en Koahs apkas. <sup>32</sup> Pwa Koahs ne joalihdi armaj ohroj jang in ahr japeik, pwa en kak kajalehng irai ohroj Ah kalahngan.

### *Kaping oang Koahs*

<sup>33</sup> Ia woahr koalikin en Koahs kapai kan! Ia uhwen loalin Ah erpis apel kupwurkoang! Inje ma kak kawoahwoahda Ah koajoandihkan? Inje kak woahwoahki Ah wihwia kan? <sup>34</sup> Doahroar en Puk Joarwi pwa:

“Inje ma kidal kupwuren Koaunno?

Inje ma kak kaweid Ih?

<sup>35</sup> Inje ma ne kioang Ih mehki,  
pwa Ih en kak dupukkoang?”

<sup>36</sup> Pwa Ih ma wiahda me ohroj apel joang ohroj kin minehki Ih apel ki Ih. Klori en aluhwoang Koahs allaluhla. Amen.

## 12

### *Mour nehn Doadoahk oang Koahs*

<sup>1</sup> Rioai kan, jang in en Koahs kalahngan dir oang kisai, ngoahi wia poakpoak ngidngid oau oang kamwai: kamwai mweidla palwoaroamwai kan en wiahla meiroang mour, ma joarwi apel kaperen oang Koahs, me ioar joangoan joarwi mehlelwa ma kamwai en wia. <sup>2</sup> Kamwai joah kahlmoangi wihwia kan en jampah oauwe, a kamwai mweidoahng Koahs en kawiliakapwihla loaloamwai nehn Ah en ukudla amwai lamlam unjek. Doari, kamwai pirin kidalda kupwuren Koahs, dahkij mwehu apel dahkij ma Ih perenki apel dahkij ma unjek.

<sup>3</sup> Jang in en Koahs kijakij kapai oang ngoahi, ngoahi pwehng kamwai ohroj: kamwai joah lemleme pwa kamwai laplap jang da ma koanoahng. A kamwai en kin aksiksik nehn amwai lemleme pein kamwai: apel emenemen en kajkawaji pein ih doahroar uhwen pwojon ma Koahs kioang. <sup>4</sup> Koakon dir mine nehn palwar oau, a koakon pwiai ohroj johpwa doahroauwoar nehn arai doadoahk. <sup>5</sup> Pel doahroar kisai, mihnda ma kisai pel dir, a kisai wia palwar oauwoar ipen Christ, a kisai ohroj kin paspene doahroar koakon sohrohr kan nehn palwar oau. <sup>6</sup> Doari, kisai en doadoahkki asai kijakij kan ma wikipjoang in joangoan doadoahk kan ma koanoahng kalahnganno ma Koahs kioang kisai. Ma kisai pwaijanki lohkihjili en Koahs lal, doari, kisai wia uhwen ma koanoahng pwojonno ma kisai anki. <sup>7</sup> Ma kisai pwaijanki doadoahk in papah, a kisai uhdahn papah. Ma jounpadahk, a kisai uhdahn padahk. <sup>8</sup> Ma kisai pwaijanki doadoahk in kangoange armaj kan, a kisai uhdahn wia. Emen ma kin kijkljoahki armaj mehki ma ah, ih uhdahn wia in japan. Ma emen mine ah manman in koaun, ih uhdahn doadoahk koalik. Ma emen ma kin kadek oang armaj kan, ih uhdahn perenki kapwaihahda.

<sup>9</sup> Doari, amwai limpoak en uhdahn mehlel. Kamwai lioassoang me nauna, a soangsoangdi oang me mwehu kan. <sup>10</sup> Kamwai limpoakpene doahroar limpoak in joauloang; a kamwai en ngoangki woauki emen emen. <sup>11</sup> Kamwai pwoarjek oang amwai doadoahk, a joah dangahnga. Kamwai poadidi oang papah Koaunno jang nehn kapehdimwaikan unjek. <sup>12</sup> Amwai koapwoarpwoar en kaperenihda kamwai; kamwai kanangmah oang nehn anjoau in amwai apwal kan; kamwai kapkap anjoau ohroj. <sup>13</sup> Kamwai kijkljoahki amwai dipwjoau kan riamwai joauloang joamwoahmwoa kan, apel kajamwo mihn keiruhkan.



<sup>14</sup> Poaki Koahs en kapaiahda irai kan ma kin koalkoa kamwai; doari, kamwai poaki Ih pwa en kapaiahda irai, a joah kariahla irai. <sup>15</sup> Kamwai pwili peren ipen irai ma kin perperen kan, apel pwili joang ipen irai kan ma kin joang. <sup>16</sup> Kamwai kajampwalki armaj ohroj. Kamwai joah aklaplap; a kamwai oauwoang armaj siksik kan. Kamwai joah pel akloalkoang.

<sup>17</sup> Ma emen wiahng kamwai nauna, joah dupukkihoang me nauna. Kamwai engdehn in kapwaihahda joang mwehu kan ma armaj ohroj kin pwungki. <sup>18</sup> Kamwai wia uhwen amwai kak pwa kamwai en anki moaloailoai ipen armaj ohroj. <sup>19</sup> Doari, rioai kan, kamwai joah ikih, a kamwai mweidoahng en Koahs lioas en doadoahk. Pwa Puk Joarwi pwa, “Koaunno pwa, Ngoahi ma pirin ikih, Ngoahi ma pirin kajpahli.” <sup>20</sup> A Puk Joarwi pel pwa, “Ma oamw imwinsihi kan nimen mwingehda, kamwinge; ma irai nimen nimpilda, kanimpili irai; pwa ma koawoa pirin wia me, koawoa pirin inenin kamehkihda irai mehlel, doahroar mwoluj pwideng pohn moangoarai.” <sup>21</sup> Doari, joah mweidoahng me nauna en kalwehdi koawoa, a oamw mwehu en kalwehdi me nauna.

## 13

### *Pwukoa kan oang Koaun in Wei kan*

<sup>1</sup> Armaj ohroj anahne peikkoang koaun in wei kan, pwa joh koaun mine ma Koahs joah mweidoahng, apel irai ma anki pwukoahn koaun pilpilloang ahr pwukoa jang Koahs. <sup>2</sup> Emen ma uhwoang koaun in wei kan, ne uhwoangda dahkij Koahs ne koajoanehdi; a emen ma uhwoang en Koahs koajoandi pirin oaloo koalokpoa. <sup>3</sup> Pwa koaun in wei kan johpwa kamjik oang ihr ma kin wia me pwung, apwen kamjik oang ihr ma kin wia japwung. Koawoa nimen johpwa mijik pwihn in koaunnok nehn oamw mour? Wia mehkan ma pwung, ah ihr nen wounki koawoa, <sup>4</sup> pwa koaunnok papah Koahs, koadoahkoa kemwehupasai jang Koahs. A ma koawoa wia japwung, uhdahn koawoa en mijik koaunnok, pwa ihr anki manman in kioang koalokpoamw. Irai nihn Koahs sohn papah kan anki pwukoahn koalkoa ihr ma wia me japwung. <sup>5</sup> Jangin kahrpoahioauwe, kisai anahne peikkoang koaunnok, audi ioarroar pwa kisai en joah oaloo koaloklok jang Koahs, ah pel wia iren poapoahm mwehu.

<sup>6</sup> Ioar kahrpoahwa kamwai dopdop daksis pwa koaun in wei kan doadoahk oang Koahs nehn irai kapwaihahda arai pwukoa kan.

<sup>7</sup> Doari, dupukla amwai pwaipwanid ok oang koaunnok; dupuk joangoangoan daksis kan, apel kajalehda woan apel wahu oang irai ma koanoahng.

### *Pwukoa oang Emen Emen*

<sup>8</sup> Johpwa pwaipwanid oang emen — ioarroar pwukoahwa kamwai anki, kamwai en ipwilki emen emen. Inje ma wia me ne kapwaihahda Kojonneddo.

<sup>9</sup> Kojonneddo pwa, “Joah kamwahl. Joah kojukdi armaj. Joah pirap. Joah noaroak juwed.” Me passoang epwi kojonneddok doahroar me ne kapaspene nehn Kojonned oauwe: “Ipwilki mihn ipoamw doahroar oamw ipwilki pein koawoa.” <sup>10</sup> Ma koawoa ipwilki epwi armaj, koawoa nen johkak wia nauna oang irai; koawoa en ipwil ioar doahr oamw en kapwaihahda Kojonneddo unjek.

<sup>11</sup> Kamwai uhdahn pirin wia me, pwa kamwai kidal anjoau wa ma kamwai en pwohrda jang amwai moair. Pwa anjoau in asai mourla ne koaroandohng kisai, koaroanjang anjoauwo ma kisai sapin pwojonla. <sup>12</sup> Pwa inpwong enkennoar roj, inrehn enkennoar lel. Doar kihjang oamw siahk rosroskan doahr oamw kin kihjang oamw likkoau pwirej, ah koawoa en likkoau in mahwinki mour pwung. <sup>13</sup> Kisai en kamwkamwoakid kisai in wioapoa ma koanoahng, doahroar armaj ma kin mourki maram — joh jakjakau ke kamwahl, joh siahk juwed ke jamin, joh pei ke pihrin.

<sup>14</sup> Mehwa kamwai en wia ioar likkoaukihda mour in Koaun Jesus Christ. Ah joah injinohki kapwaihahda amwai inoang nauna kan.

## 14

### *Joah Kadeik Emen*

<sup>1</sup> Kajamwo ohroj joauloang ma jasihkei nehn ahr pwojon, ah joah akmaikihoang irai da arai leme pwa pwung ke japwung. <sup>2</sup> Epwi armaj kin kamehlele pwa armaj kak kang me ohroj. A epwi joauloang ma anki kapehd jasihkei kin kakkoar kang wehnsuhkoahr doari. <sup>3</sup> Irai ma kak kang joang ohroj en joah koauwe ihr ma johkak. Apel oang ihr ma kin kanngoar wehnsuhkoa, en joah kajawi ihr ma kin kang joang ohroj, pwa Koahs ne kajamwo ihr. <sup>4</sup> Inje koawoa en kajawi nihn emen sohn doadoahk? Pein arai koaun pirin kadeik pwa ma arai doadoahk pwoaida ke joah. Pwa jang in en Koaunno jauwaj, arai pirin uhkihda en Koaunno jauwaj.

<sup>5</sup> Epwi armaj kin leme pwa minehr rehn oau kajampwal jang epwi rehn, ah epwi kin leme pwa ohroj rehn doahroauwoar. Emen emen kisai en koajoanehdi soang asai lamlam.

<sup>6</sup> Ihr ma kin kajampwalki rehn oau ma ihr kasohrohrihla, pwa ihr en wounki Koaunno. Ihr ma kin kang mwinge joah lipilpil kin wia me pwa en wounki Koaunno, in ahr kin kajpahl kalahngan oang Koahs mwohn ahr mwinge. A pel ihr ma johkin kang epwi joangoan mwinge pel pwili nimen kapnga Koaunno in ahr kin kapingkalahngan oang Koahs. <sup>7</sup> Pwa kisai johpwa mourki pein kisai ke mehkihdi pein kisai. <sup>8</sup> Ma kisai mour, kisai mourki Koaunno. A ma kisai mehdi, kisai mehdihi Koaunno. Doari mihnda ma kisai mour ke mehdi, kisai nihn Koaunno. <sup>9</sup> Christ mehdi apel iejda pwa Ih en wiahla Koaun en irai kan ma mour apel irai kan ma ne mehdi.

<sup>10</sup> Doar amwda koawoa ken koapwungi epwi armaj? Da kahrehda koawoa kin lioassoang epwi joauloang? Kisai ohroj pirin uhda mwohn mwoalen koapwung laplap en Koahs. <sup>11</sup> Pwa ne insingdi nehn Puk Joarwi, "Koaunno pwa, 'nehn Oai wia Koahs mourwa, ohroj pirin poadpwomwla Mwohioa, apel ohroj pirin kadehde pwa Ngoahi ioar Koahs.' "

<sup>12</sup> Emen emen kisai ohroj pirin kadehde oang Koahs asai wihwia kan.

### *Joah Kadipkelkeli Emen*

<sup>13</sup> Doar kisai en doari kadeiki emen emen. Pilda pwa koawoa en mourki mour oau ma jehpirin kahrehda joauloangmen en dipkelkel ke kippoang nehn dihp. <sup>14</sup> Oai minminoang Koaun Jesus kin kahrehng ngoahi en kidal pwa johpwa mehki mine ma jamin; a ma emen kin leleme pwa mehki jamin, doari, mehkiijo jamin oang pein ih. <sup>15</sup> Ma koawoa kainjinjuwedihla epwi rioamw kan jangin da koawoa kang, doari koawoa ne johla momourki limpoak. Joah mweidoahng da koawoa kang en koauwehla emen ma Christ mehkihdi. <sup>16</sup> Joah mweidoahng pwa mehkan ma kamwai wiahki pwa mwehu en wia mehki ma nauna <sup>17</sup> Pwa wein Koahs johpwa pid mwinge apel pil, a ih pid pwung, moaloailoai, apel peren ma Ngen Joarwi kihdoa. <sup>18</sup> Ma koawoa papah Christ in mwommwoauwe, koawoa nen kaperenihda Koahs, ah epwi nen pel pwungki koawoa. <sup>19</sup> Doari, kisai engdehki me ohroj ma nen wahdohng kisai moaloailoai apel en kasihkei emenemen kisai <sup>20</sup> Joah koauwehla da Koahs ne wiahda ki mwingehkan. Kisai kak kang mwinge ohroj, a japwung kang mehki ma pirin kahrehioang epwi joauloang en kipdihoang nehn dihp. <sup>21</sup> Doari, me mwehu wa me: joah kang uduk, ke nim wain, ke wiahda mehki ma pirin kahrehng riamwai joauloang en kipdi oang nehn dihp. <sup>22</sup> Doari, koawoa kolkol oar da koawoa kamehlele

pid iroa oauwe, nehn pwungen koawoa apel Koahs. Meid pai ih ma johkin poahm ma ih japwung nehn ah wia mehkij ma ih kajawi pwa pwung!

<sup>23</sup> A ma ih peikajalki da ih kang, Koahs pirin kadeikda ih, pwa ah wihwia kan johpwa poahjoankihda pwojon. Pwa joang ohroj ma johkin poahjoankihda pwojon, ioar dihp.

## 15

### *Kadeke Epwi Sohrohr Jaudi Kamwaihoar Doari*

<sup>1</sup> Kisai ma sihkei nehn pwojon Christ anahne jeuweje irai ma jasihkei in wa arai kasoausoau ok. Kisai en joah kadeke pein kisai. <sup>2</sup> Kisai ohroj anahne jeuweje epwi oang kemwehuparai, pwa en kasihkeila irai nehn pwojon. <sup>3</sup> Pwa Christ pel johpwa kadeke pein Ih. Puk Joarwi pwehng kisai, "Nehn irai koauwe Koawoa irai ne pel koauwe Ngoahi." <sup>4</sup> Joang ohroj insingdi nehn Puk Joarwi insingdi pwa en kaweid kisai pwa kisai en anki koapwoarpwoar jang in kanangma apel kasihkei ma Puk Joarwi kioang kisai. <sup>5</sup> Mweidoahng Koahs, ma kin kihda kanangma apel kasihkei en jeuweje kamwai en anki lamlam oauwoar nehn pwungamwai kan nehn amwai kahlmoangi Christ Jesus. <sup>6</sup> Pwa kamwai ohroj en oaukihpene ngil oauwoar, kapngahki Koahs, Jemen asai Koan Jesus Christ.

### *Rongmwehu oang mihn Likin kan*

<sup>7</sup> Doar kamwai kajamwo ohroj irai doahr en Christ ne kajamwo kamwai pwa en kioang Koahs klori. <sup>8</sup> Ngoahi pwehng kamwai pwa en Christ mour in papah wia mihn kasman oang mihn Jew kan, en kajalehoang irai pwa Koahs loalpwoas, en kapwaihahda Ah inoau oang ahr papah kan mehj. <sup>9</sup> Ih pel indoa pwa mihn likin kan en pel kapnga Koahs ki Ah kalahngan.

Ma doahr Puk Joarwi pwa:

"Doar ngoahi pirin kapnga Koawoa nehn pwungen mihn likin kan; Ngoahi pirin koaul kapnga Oadoammwen."

<sup>10</sup> Ih pel pwa,

"Kamwai mihn likin kan, pwili nih Koahs armaj koaul perperen."

<sup>11</sup> Pel pwuroahng,

"Kapnga Koanunno, ohroj kamwai mihn likin kan;

Kapnga Ih, kamwai ohroj sohn jampah."

<sup>12</sup> Isaiah pel pwa nehn Puk Joarwi,

"Kainekin Jesse pirin pwarda,

A Ih pirin koan mihn likin kan.

Irai pirin kioang arai koapwoarpwoar Ipoa."

<sup>13</sup> Mweidoahng Koahs, ma poahjoan en koapwoarpwoar, en audohkihla kamwai peren apel moaloailoai unjek pwa kamwai pwojon Ih; doar amwai koapwoarpwoar pirin koalkoalikla jang manman in Ngen Joarwi.

### *Kahrpoan en Paul ah Insing Sihkei nehn Kijinlikoau oauwe*

<sup>14</sup> Rioai woal apel li kan, ngoahi kamehlele in mehlel pwa kamwai audohdki me mwehu, pwa kamwai anki loalkoang ohroj, apel pwa kamwai kin kak kaweidki iroahpwiai nehn pwungamwaikan. <sup>15</sup> A nehn kijinlikoau kije ngoahi ngil sihkeik-ihang kamwai iroahpwi ma ngoahi nimen kasmankihoang kamwai, ngoahi ngil sihkei oang kamwai ki jang in kalahngan oau ma Koahs kioang ngoahi <sup>16</sup> en wia jounpapah men jang Christ Jesus oang kamwai mihn likin kan. Ngoahi wahdohng kamwai Rongmwehu pwa kamwai en wiahla meiroang oau ma warroang Koahs, ma kajarwihoang Ih jang Ngen Joarwi. <sup>17</sup> Doari, nehn oai minmin oang Christ Jesus, ngoahi kak lehmwsikki oai wia sohn doadoahk men oang Koahs. <sup>18</sup> Ngoahi pirin

ngil sihkeiki apel siko en Christ ne kahrehng mihn likin kan en peikkoang Koahs. Christ mweidoahng pwa joanngoauwe en wiawi jang in sikesik ke wihwia, <sup>19</sup> jang in manman kapwuriamei apel jang in manman in Ngenin Koahs. Doari, jang oai jeijeiloak jang Jerusalem lel Illyricum, ngoahi ne kalohki in unjek Rongmwehu in Christ. <sup>20</sup> Oai anahn anjoau ohroj ngoahi en kalohki Rongmwehu oang wija kan ma kahjikkoar rong oadoan Christ, a audi wija kij ma emen jounpadahk ne kouda mwomwohdjohioau. <sup>21</sup> A ma doahr Puk Joarwiho ne pwa,  
 “Thr ma kahjikkoar rong sikesikin Ih pirin kapang,  
 apel ihr ma kahjikkoar rong pirin woahwoahki.”

### *En Paul Koajoandi en Paj ipen mihn Rome*

<sup>22</sup> A ioar, anjoau dir, ngoahi ne kainoapwdihjang oai en paj ipamwai. <sup>23</sup> A apkas oai doadoahk nehn wijahpwiai ne doarihdi, doar mwerin johnpar dirin joujou, ngoahi peren, kajik oai pirin suhwoang kamwai, <sup>24</sup> ngoahi koapwoarpwoarki pwa nen pwoaida apkas. Ngoahi nimen suhwoang kamwai nehn oai pirin jeiloakla Spain, a kamwai en pel jeuweje ngoahi nehn oai jeiloakke, mwerin oai ne perenkihda oai paj ipamwai <sup>25</sup> Doar mwohn oai alwe, ngoahi anahne jeiloaklahng Jerusalem pwa ngoahi en jeuweje joauloangok. <sup>26</sup> Mwomwohdjohn Macedonia apel Achaia ne kihpene meiroang oau oang joauloang joamwoahmwoahk nehn Jerusalem. <sup>27</sup> Koajoandihn meiroang oauwo pein arai; a in mehlel, irai anki pwukoa in jeuweje irai joamwoahmwoa kan nehn pwungen nihn Koahs armaj in Jerusalem. Nehn en mihn Jew-ok oaukihoang irai mihn likin kan kapai en Ngen Joarwi, mihn likin kan anahne doadoahkki arai kapai kan en jeuweje mihn Jew-ok. <sup>28</sup> Nehn oai pirin kadoarihla pwukoahioauwe apel wahlahng irai mwani ohroj me rikrikpene oang irai, ngoahi pirin jeiloakla Spain apel paj ipamwai nehn oai jeijeiloakla. <sup>29</sup> Nehn oai pirin lelwe ipamwai, ngoahi kidal pwa ngoahi nen lelwe pwilihkihwe kapai unjek en Christ. <sup>30</sup> Rioai kan, ngoahi poaki ipamwai in ngoang in oadoan asai Koaun Jesus Christ, apel jang in limpoak ma Ngen Joarwiho kin kihdoa, pwa kamwai en pwili kapkapki ngoahi ipen Koahs anjoau ohroj. <sup>31</sup> Kapkapki pwa ngoahi en jilajil mwehu jang irai ma joah pwojon kan nehn Judea apel kapkapki pwa oai doadoahk in kalohki Rongmwehu en warroang nihn Koahs armaj kan nehn Jerusalem. <sup>32</sup> Doari, ma ioar kupwuren Koahs, a ngoahi pirin lelwe ipamwai nehn oai nen dirkihla peren apel perenki asai suhpene kainjenmwahu. <sup>33</sup> Koahs, ma kioang kisai moaloailoai oauwe, en pwilpwili kamwai ohroj. Amen.

## 16

### *En Paul Rahnmwahu*

<sup>1</sup> Ngoahi nimen kapehje oang kamwai riasai joauloang Phoebe, ma wia sohn doadoahk men nehn mwomwohdjohn Cencreae. <sup>2</sup> Kajamwo ih in oadoan Koaunno pwa ih warroang woau nehn pwungen nihn Koahs armaj. Jeuwejehki ih joang ohroj ih anahne, pwa ih ne jeuwejehla dir, pwilihki ngoahi. <sup>3</sup> Oai rahnmwahu oang Priscilla apel Aquila, pwilihki ioangoai sohn doadoahk kan nehn doadoahkin Christ Jesus. <sup>4</sup> Anjoau kij ira mweidla ara mour ki ngoahi. Ngoahi apel pwilihki mwomwohdjohn mihn likinnok ohroj kaping koalik oang ira. <sup>5</sup> Oai pel rahnmwahu oang sohn mwomwohdjohk ma kin suhpene nehn umwarahu.

Oai rahnmwahu oang oai pirien Epaenetus, ih ioar sapin armaj ma pwojonla Christ nehn wein Asia. <sup>6</sup> Oai rahnmwahu oang Mary, ma inenin doadoahk koalik oang kamwai. <sup>7</sup> Oai rahnmwahu oang Andronicus apel Junia, ioangoai mihn Jew, ma pwili ngoahi joaldi nehn kalpwuhj; ara pwanah inenin janjal mwehu nehn pwungen woaroakkok, a ara pel pwojonla Christ mwohn ngoahi.

<sup>8</sup> Oai rahnmwahu oang Ampliatus, oai pirien in oadoan Koounno. <sup>9</sup> Oai rahnmwahu oang Urbanus, ioangoai sohn doadoahk oang Christ, pwilihki Stachys, oai pirien kajampwal. <sup>10</sup> Oai rahnmwahu oang Apelles, woal men ma loalpwoas oang Christ ma ne pel janjal mwehu. A pel kioang oai rahnmwahu oang joauloangkok nehn en Aristobulus wijahu. <sup>11</sup> Oai rahnmwahu oang Herodion, ioangoai mihn Jew. Oai rahnmwahu oang joauloangkok nehn en Narcissus wijahu.

<sup>12</sup> Kioang oai rahnmwahu oang Tryphaena apel Tryphosa, nihn Koounno sohn doadoahk, pel oang oai pirien kajampwal Persis, ma inenin doadoahk koalik oang Koounno. <sup>13</sup> Oai rahnmwahu oang Rufus, ma Koounno ne pilda pwa en papah Ih, pel ah nohnohu, ma wiahki ngoahi doahr nah. <sup>14</sup> Kioang oai rahnmwahu oang Asyncritus, Phlegon, Hermes, Patrobas, Hermas, apel oang ohroj riasai joauloang kan iparai. <sup>15</sup> Kioang oai rahnmwahu oang Philologus, Julia, Nereus apel riah li, apel oang Olympas pwilihki ohroj nihn Koahs armaj ma mine iparai.

<sup>16</sup> Kamwai rahnmwahukihpene en Christ limpoak ohroj.\* Ohroj mwomwohdjo en Christ kadarwe arai rahnmwahu.

#### *Kadoariekdihn en Paul Kaweid*

<sup>17</sup> Ngoahi kangoangehki kamwai, rioai joauloang kan: kapang ihr ma kin kahrehda liaksohrohr apel koauwe en joauloang kan pwojon nehn ahr padahki iroahpwi ma uhwoang padahk ma kisai ne oaloahdi. Joah passoang irai! <sup>18</sup> Joangoan armaj pwiai johkin papah Christ, asai Koan; irai papah pein injenarai. Jang in mwomwen loalkoangin arai lal apel ling in arai sikesik irai kin widingehdi armaj pwung kan. <sup>19</sup> Armaj ohroj kidal doahr amwai kin poadidihoang Rongmwehu in Koahs. Me kahrehng ngoahi peren koalik. Ngoahi nimen kamwai en loalkoangki amwai siahk mwehu kan nehn amwai wia me pwung apel anki mwakelkel jang japwung ohroj. <sup>20</sup> In anjoau mwosmwos, Koahs in moaloailoai pirin kamwusihdi Jehsen pehn ehmwaiakan.

Kalahngan en asai Koan Jesus en pwilpwili kamwai.

<sup>21</sup> Timothy, ioangoai sohn doadoahk, kadar ah rahnmwahu, pel jang Lucius, Jason, apel Sosipater, ioangoai mihn Jew pwi.

<sup>22</sup> Ngoahi, Tertius, ma insinsinge nihn Paul kijinlikoau oauwe, pel kadar oai rahnmwahu, nehn oai pel wia nihn Koounno armaj.

<sup>23</sup> Gaius pel pwa kajilel oang kamwai. Ih umwanki ummwo ngoahi mine loaloa, ma mwomwohdjohu kin pel pokonpene loaloa. Erastus, jounkankid in kahnihmmwo, kadar oang kamwai ah rahnmwahu, pel jang riasai joauloang Quartus.

<sup>24</sup> [Kalahngan en asai Koan Jesus Christ en pwilpwili kamwai ohroj. Amen.]

#### *Kadoariekdihn Kapkap in Kaping*

<sup>25</sup> Kisai kapnga Koahs, kioang Ih klori! Ih ioar kak kasoangehdi kamwai nehn amwai pwojon, jang in Rongmwehu in Jesus Christ ma ngoahi kin padahki apel jang in janjalda in me mehlel ma johpwa janjal anjoau woaroai jang oh mehj. <sup>26</sup> Doari, mehlel oauwe ne janjal jang nehn pukin joukohppok; apel jang in mahjan in Koahs poaspoas; mehlel oauwe pel janjal oang sohn wei kan ohroj, pwa irai ohroj en pwojonla apel peik oang Koahs.

<sup>27</sup> Klori ma joh imwin en inlahng Koahs ma kalahpwuk anki loalkoang unjek in me ohroj, in oadoan Jesus Christ! Amen.

\* **16:16** Kamwai rahnmwahukihpene en Christ limpoak. Ke: kamwai rahnmwahukihpene misik joarwi.